


O LE EKALEZIA A IESU KERISO O LE AU PAIA O ASO E GATA AI • ME 2013

O Le Liahona

Saunoaga o le Konafesi Aoao

Ua Valaauina Fitugafulu
Fou ma le Au Peresitene
Aoao Fou o Tamaitai
Talavou

Ua Fofogaina mai
Malumalu Fou e Lua





© JOSEPH BRICKEY, E LE MAFALONA KOPINA

Sailia o Seloā, saunia e Joseph Brickey

O le Vai o Seloā (Siloā) i Ierusalema e tafe mai se vaipuna e tu i fafo atu o le pa o le aai. I le avea ai ma puna e tasi o le vai tafe i lea nofoaga, ua avea ai lava mo se taimi umi ia vai o Seloā ma se faatusa o le pui-puiga ma le mana lagolago o le Atua. E pei ona faamaumauina i le Isaia 8:6–8, sa valoia e Isaia o le a teena e le malo o Isaraelu le Alii ae lagolago ni tupu se toalua. Na faataunuu lava lea mea. Peitai, e le pei la o i latou i le taimi o Isaia, o le fafine lenei o loo sailia le vai tafe o Seloā—o lona uiga o le faatusa o le sailia o le alofa faifai pea ma le pui-puiga a le Atua.

SAUNIGA O LE TAEAO O LE ASO TOONAI

- 4 Susū Maia i le Konafesi
Peresitene Thomas S. Monson
- 6 O Nei Mea Ua Ou Iloa
Peresitene Boyd K. Packer
- 9 O Se Faavae Mautinoa
Epikopo Dean M. Davies
- 12 O i Matou o Afafine o lo
Tatou Tamā Faalelagi
Elaine S. Dalton
- 15 E Finagalo le Faaola e
Faamagalo Atu
Elder Craig A. Cardon
- 18 “O La’u Galuega ma
Lo’u Mamalu Lenei”
Elder M. Russell Ballard
- 22 “O Mai ia te Au”
Peresitene Henry B. Eyring

SAUNIGA O LE AFIIFI O LE ASO TOONAI

- 26 O Le Lagolagoina o
Taitai o le Ekalesia
Peresitene Dieter F. Uchtdorf
- 28 Lipoti a le Matagaluega Suetusi
a le Ekalesia, 2012
Robert W. Cantwell
- 28 Lipoti Faafuainumera, 2012
Brook P. Hales
- 29 Mo Le Filemu i le Aiga
Elder Richard G. Scott
- 32 O Le Filemu o le Tagata Lava Ia:
O Le Tau i lea o le Amiotonu
Elder Quentin L. Cook
- 36 O Le Ala a le Alii
Elder Stanley G. Ellis
- 39 O Le Talalelei i le Lalolagi Uma
Elder John B. Dickson
- 41 Matou te Talitonu i le Nofomama
Elder David A. Bednar
- 45 Pu’e le Galu
Elder Russell M. Nelson

SAUNIGA A LE AU PERISITUA

- 48 Tutu Malolosi i Nofoga Paia
Elder Robert D. Hales
- 52 O Le Mana o le Perisitua
i le Taulealea
Elder Tad R. Callister
- 55 O Lou Tiute Paia e Auauna Atu
David L. Beck

- 58 O Faalagiga e Fa
Peresitene Dieter F. Uchtdorf
- 62 E Tasi Lava i Tatou
President Henry B. Eyring
- 66 O Mai, Alo o le Atua
Peresitene Thomas S. Monson

SAUNIGA O LE TAEAO O LE ASO SA

- 70 O Le Faamoemoe o
le Malamalama o le Atua
Peresitene Dieter F. Uchtdorf
- 77 O Se Vavega Lava
Elder Neil L. Andersen
- 81 O Upu Tatou te Tautatala Ai
Rosemary M. Wixom
- 83 Faaipoipoga: Matau ma Aoao
Elder L. Whitney Clayton
- 86 O Le Usiusitai i Tulafono o
le Saalotoga Lea
Elder L. Tom Perry
- 89 O Le Usiusitai e Aumaia
ai Faamanuiaga
Peresitene Thomas S. Monson

SAUNIGA O LE AFIIFI O LE ASO SA

- 93 “Le Alii, Ua Ou Faatuatua”
Elder Jeffrey R. Holland
- 96 O Soo o Keriso
Elder Dallin H. Oaks
- 99 O Le Tama ma le Alo
Elder Christoffel Golden Jr.
- 102 O Le Aiga: O Le Faleaoga
o le Olaga
Elder Enrique R. Falabella
- 104 O Le Taliaina e le Alii
Elder Erich W. Kopischke
- 107 O Taeaog Matagofie
Elder Bruce D. Porter
- 109 Togiola
Elder D. Todd Christofferson
- 113 Seia Tatou Toe Feiloai
President Thomas S. Monson

SAUNIGA AOA O TAMAITAI TALAVOU

- 115 O o Outou Nofoga Paia
Ann M. Dibb
- 118 A E Laveaiina se Teine,
Ua E Laveaiina Augatupulaga
Mary N. Cook
- 121 Aua Le Masi’i Ese!
Elaine S. Dalton
- 125 O Lau Malaga Matagofie i le Aiga
Peresitene Dieter F. Uchtdorf
- 72 Au Pulega Aoao o Le Ekalesia a Iesu
Keriso o le Au Paia o Aso e Gata Ai
- 130 Sa Latou Saunoa mai ia i Matou:
O Le Avea o le Konafesi ma Vaega
o o Tatou Olaga
- 132 Faasino Upu o Tala o le Konafesi
- 133 O Aoaoaga Mo O Tatou Taimi
- 133 Au Peresitene Aoao o Ausilali
- 134 Tala Fou o le Ekalesia



Aotelega mo le Konafesi Aoao Lona 183 Faaletausaga

TAEAO O LE ASO TOONAI, 6 APERILA, 2013, SAUNIGA AOAO

Pulefaamalumu: Peresitene Thomas S. Monson. Taitai: Peresitene Dieter F. Uchtdorf. Tatalo Amata: Elder Randall K. Bennett. Tatalo Faaiu: Jean A. Stevens. Musika na saunia e le Aufaipese a le Tapeneko; Mack Wilberg ma Ryan Murphy, o faatonu; Richard Elliott ma Andrew Unsworth, o taokeni: “Faaola o Isaraelu,” *Viiga*, nu. 5; “In Hymns of Praise,” *Hymns*, no. 75; “Faalogo Nuu Uma!” *Viiga*, nu. 165, arr. Wilberg; “Faamalosi ia i le Galuega Nei,” *Viiga*, nu. 152; “Faith,” *Children’s Songbook*, 96, arr. Elliott, e lei faasalalauina; “O Loo Soifua Lo’u Faaola,” *Viiga*, nu. 72, arr. Wilberg, e lei lolomia.

AFIAFI O LE ASO TOONAI, 6 APERILA, 2013, SAUNIGA AOAO

Pulefaamalumu: Peresitene Thomas S. Monson. Taitai: Peresitene Henry B. Eyring. Tatalo Amata: Russell T. Osguthorpe. Tatalo Faaiu: Elder J. Devn Cornish. Musika na saunia e se aufaipese tuufaatasi mai le Iunivesite o Polika Iaga; Ronald Staheli ma Rosalind Hall, o faatonu; Bonnie Goodliffe, taokeni: “Iesu, A Mafaufau ia Oe,” *Viiga*, nu. 76, arr. Staheli, pub. Jackman; “Pe Na Faia Sau Tatalo?” *Viiga*, nu. 75, arr. Johnson, pub. Johnson; “Fiafia, o le Alii o le Tupu!” *Viiga*, nu. 38; “Faapaia Mai Au,” *Viiga*, nu. 70, arr. Staheli, pub. Jackman.

AFIAFI O LE ASO TOONAI, 6 APERILA, 2013, SAUNIGA A LE AU PERISITUA

Pulefaamalumu: Peresitene Thomas S. Monson. Taitai: Peresitene Dieter F. Uchtdorf. Tatalo Amata: Elder Ronald A. Rasband. Tatalo Faaiu: Larry M. Gibson. Musika na saunia e se aufaipese a le au perisitua mai siteki a talavou nofofua matutua i le Aai o Sate Leki, Iuta; Justin Bills, faatonu; Clay Christiansen, taokeni: “Arise, O God, and Shine,” *Hymns*, no. 265, arr. Wilberg, pub. Oxford; “Ta Felatai Nei le Atua ma Oe,” *Viiga*, nu. 59, arr. Bills, e lei faasalalauina; “Faamoemoe o Isaraelu,” *Viiga*, nu. 161; “Outou Faifeau o Isaraelu,” *Viiga*, nu. 198, arr. Bills, e lei faasalalauina.

TAEAO O LE ASO SA, 7 APERILA, 2013, SAUNIGA AOAO

Pulefaamalumu: Peresitene Thomas S. Monson. Taitai: Peresitene Henry B. Eyring. Tatalo Amata: Elder Steven E. Snow. Tatalo Faaiu: Elder O. Vincent Haleck. Musika na saunia e le Aufaipese a le Tapeneko; Mack Wilberg, faatonu; Andrew Unsworth ma Clay Christiansen, o taokeni: “Talai Atu o Iesu,” *Viiga*, nu. 168; “Siona e le Nuu Lelei,” *Viiga*, nu. 22, arr. Kasen, pub. Jackman; “Mulimuli Mai ia te Au,” *Viiga*, nu. 62, arr. Wilberg, e lei faasalalauina; “Ieova e, ia Tautai Pea i Matou,” *Viiga*, nu. 47; “Where Love Is,” *Children’s Songbook*, 138, arr. Cardon, e lei faasalalauina; “O Mai, Outou o le Au Paia,” *Viiga*, nu. 17, arr. Wilberg, e lei lolomia.

AFIAFI O LE ASO SA, 7 APERILA, 2013, SAUNIGA AOAO

Pulefaamalumu: Peresitene Thomas S. Monson. Taitai: Peresitene Dieter F. Uchtdorf. Tatalo Amata: Carole M. Stephens. Tatalo Faaiu: Elder Larry Y. Wilson. Musika na saunia e le Aufaipese a le Tapeneko; Mack Wilberg ma Ryan Murphy, o faatonu; Linda Margetts ma Bonnie Goodliffe, o taokeni: “O Mai Fanau a le Alii,” *Viiga*, nu. 24, arr. Murphy, e lei lolomia; “Tell Me the Stories of Jesus,” *Children’s Songbook*, 57, arr. Murphy, e lei lolomia; “Ia Fiafia Tatou,” *Viiga*, nu. 3; “Le Alii ua Tuua Matou,” *Viiga*, nu. 85, arr. Wilberg, e lei lolomia.

AFIAFI O LE ASO TOONAI, 30 MATI, 2013, SAUNIGA AOAO A TAMAITAI TALAVOU

Pulefaamalumu: Peresitene Thomas S. Monson. Taitai: Elaine S. Dalton. Tatalo Amata: Ella Edgley. Tatalo Faaiu: Emily Maxwell. Musika na saunia e se aufaipese a Tamaitai Talavou mai siteki i Highland, Iuta; Merrilee Webb, o faatonu; Linda Margetts, taokeni: “I Luga o Mauga,” *Viiga*, nu. 4, faatasi ai ma le “Arise” descant; “In That Holy Place,” DeFord, pub. DeFord; “Faapaia mai Au,” *Viiga*, nu. 70, arr. Goates, e lei lolomia; “O Thou Rock of Our Salvation,” *Hymns*, no. 258, arr. Kasen, pub. Jackman; “Siona e le Nuu Lelei,” *Viiga*, nu. 22, arr. Webb, e lei lolomia.

E MAUA SAUNOAGA O LE KONAFESI

Ina ia maua saunoaga o le konafesi aoao i le tele o gagana, asiasi ane i le conference. lds.org. Ona filifili lea o se gagana. E masani lava ona maua lipine faalogologo i faletusi autu, i totonu o le lua masina e sosoo ma le konafesi.

SAVALI A FAIAOGA O AIGA MA FAIAOGA ASIASI


Mo savali a faiaoga o aiga ma faiaoga asiasi, faamolemole ia filifili se lauga e aupito sili ona fetauti lelei ma tulaga o loo manaomia e i latou tou te asia.

I LE FAAVAA

Luma: Ata na pueina e Leslie Nilsson
Tua: Ata na pueina e Leslie Nilsson.

PUEGA O ATA O LE KONAFESI

O le vaaiga o le konafesi aoao i le Aai o Sate Leki sa pueina e Cody Bell, Randy Collier, Weston Colton, Scott Davis, Craig Dimond, Lloyd Eldredge, Sarah Jenson, Collin King, Ashlee Larsen, ma Leslie Nilsson; i Arizona, ISA, na pueina e Mindy Sue Evans; i Ausetalia na pueina e Colin Ligertwood; i Brasilia, Pasila na pueina e Tomé Siqueira; i Sobral, Pasila sa pueina e Francisco Flávio Dias Carneiro; i Kalefonia, ISA, na pueina e Rhonda Harris; i Chile na pueina e Oscar Schmittner; i Tenimaka na pueina e Ann-Mari Lindberg; i Ecuador na pueina e Jimmy Padilla Pin; i El Salvador na pueina e Josué Peña; i Niu Ioka, ISA, na pueina e Mark Weinberg; i Sikotilani na pueina e Sylvia Mary Brown; ma i Aferika i Saute na pueina e Jeremy Rakotomamonjy.



**ME 2013 VOL. 37 NU. 5
O LE LIAHONA 10785 890**

O Le Lomiga Faamaonia Faa-Samoa a le Ekalesia a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposetolo e Toasefululua:

Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Craig A. Cardon

Fautua: Shayne M. Bowen, Bradley D. Foster, Christoffel Golden Jr., Anthony D. Perkins

Pule Faatonusili: David T. Warner

Faatonusili o le Lagolago mo Aiga ma

Tagata o le Ekalesia: Vincent A. Vaughn

Faatonusili o Mekasini a le Ekalesia: Allan R. Loyborg

Pule o Mea Tau Pisinisi: Garff Cannon

Pule Faatonutonu: R. Val Johnson

Pule Faatonutonu Lagolago: Ryan Carr, LaRene Porter Gaunt

Lagolago o Lomiga: Melissa Zenteno

Au Tunitisi ma Faatonutonu: Susan Barrett, David Dickson, David A. Edwards, Matthew D. Flitton, Mindy Raye Friedman, Lori Fuller, Garrett H. Garff, Jennifer Grace Jones, Hikari Loftus, Michael R. Morris, Richard M. Romney, Paul VanDenBerghe

Pule Faatonusili Tusiata: J. Scott Knudsen

Faatonusili Tusiata: Tadd R. Peterson

Au Mamanu: Jeanette Andrews, Fay P. Andrus, C. Kimball Bott, Thomas Child, Nate Gines, Kerry Lynn C. Herrin, Colleen Hinckley, Eric P. Johnson, Susan Lofgren, Scott M. Mooy, Brad Teare

Faatonu o le Puletaofia ma Fatufatuga:

Collette Nebeker Aune

Pule i le Gaosiga: Jane Ann Peters

Au Gaosi: Kevin C. Banks, Connie Bowthorpe Bridge, Julie Burdett, Bryan W. Gygi, Denise Kirby, Ginny J. Nilson, Gayle Tate Rafferty

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Stephen R. Christiansen

Mo le okaina o mekasini, alu i le store.lds.org po o le Falelusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le

initoneti i le liahona.lds.org: pe meli mai i le Liahona, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po o se "faatonualala") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekisolovakia, Tenimaka, Take, Iqilisi, Estonia, Fiti, Finelani, Farani, Siamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Lativia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Saina (ua faafaigofieina), Silovenia, Sipaniolo, Suetena, Swahili Tagaloka, Tahiti, Tai, Toga, lukureini, Urutu, ma Viatename. (E eseese lava gagana.)

© 2013 Puletaofia e le Intellectual Reserve, Inc. Ua taofia aia tatau uma. Lomia i le Lunaite Setete o Amerika.

E mafai ona kopi tala ma ata o le Liahona mo le toe faaogaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta'ua ai le e ona lea faatufatuga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

May 2013 Vol. 37 No. 5. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address *must* be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send all UAA to CFS (see DMM 707.4.12.5).

NONPOSTAL AND MILITARY FACILITIES: Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.



**FAILAUGA I LE FAASOLOGA
FAAALAFAPETA**

Andersen, Neil L., 77
Ballard, M. Russell, 18
Beck, David L., 55
Bednar, David A., 41
Callister, Tad R., 52
Cardon, Craig A., 15
Christofferson, D. Todd, 109
Clayton, L. Whitney, 98
Cook, Mary N., 126
Cook, Quentin L., 32
Dalton, Elaine S., 12, 125
Davies, Dean M., 9
Dibb, Ann M., 123
Dickson, John B., 39
Ellis, Stanley G., 36
Eyring, Henry B., 22, 62
Falabella, Enrique R., 102
Golden, Christoffel, Jr., 101
Hales, Robert D., 48
Holland, Jeffrey R., 97
Kopischke, Erich W., 108
Monson, Thomas S., 4, 66, 89, 113
Nelson, Russell M., 45
Oaks, Dallin H., 104
Packer, Boyd K., 6
Perry, L. Tom, 91
Porter, Bruce D., 107
Scott, Richard G., 29
Uchtdorf, Dieter F., 26, 58, 70, 125
Wixom, Rosemary M., 81

FAASINO AUTU

Agaga Paia, 6, 123
Aiga, 6, 18, 29, 55, 98, 102, 126
Alofa, 66, 98, 125
Ata o le faaolataga, 41, 125
Auauna atu, 22, 55, 58, 109
Avea ma Soo, 58
Faaaloalo, 98
Faaipoipoga, 98, 102
Faalogologo, 81
Faamagaloga, 15
Faamalologa, 58, 70
Faamanatuga, 9
Faamoemoe, 70, 107
Faatoagaina, 55
Faatuatua, 98, 97
Faatuatuaina, 52
Faatupulaia o le Ekalesia, 39
Faigata, 12, 70, 107, 126
Faitalia, 91
Feagaiga, 108
Fesootaiga, 81
Filemu, 29, 32
Galuega faafaifeautalai, 4, 39, 45, 62, 66, 77
Iesu Keriso, 22, 29, 48, 70, 89, 104, 101, 107, 109
Le Atua le Tama, 36, 101
Loto faafetai, 113

Lotogatasi, 62
Lotomauualo, 98, 108
Lotonuu, 98
Maluu, 126
Malumalu, 4, 32, 125
Molimau, 18, 66, 97
Muai olaga, 125
Natura paia, 12, 18, 58
Olaga Faaletino, 125
Ola mama, 6, 41, 125
Paia, 123
Perisitua, 18, 52, 55, 62
Perofeta, 36
Poloaiga, 91, 89
Salamo, 15, 41, 98, 109
Sauniuniga, 66
Suesue i tusitusiga paia, 9
Taitaiga, 52
Talafoasolopito o aiga, 126
Tamaitai Talavou, 12
Tamaiti, 81, 102
Tatalo, 9, 113
Taulaga, 108
Toefuataiga, 45
Togiola, 12, 109, 125
Tulaga faatonuina, 48
Tusi a Mamona, 45
Tusitusiga Paia, 66, 102
Upumoni, 89
Usiusitai, 48, 91, 89



Saunia e Peresitene Thomas S. Monson

Susū Maia i le Konafesi

Ou te uunaia outou ina ia gauai lelei atu ma talia savali o le a tatou faalogo i ai. Talosia ia tatou faia o la'u tatalo lea.

Ou uso e ma tuafafine pele, so'u fiafia ina a tele e faa-feiloai atu ai ia te outou i le Konafesi Aoa Lona 183 Faaletausaga a le Ekalesia.

I le ono masina talu mai la tatou feiloaiga mulimuli, sa ou maua ai le avanoa e fai ai ni nai malaga, ma feiloai ai ma nisi o outou i a outou eria. Ina ua maea le konafesi aoao ia Oketopa, sa ou malaga ai i Siamani, lea na ou maua ai le avanoa e feiloai ai ma o tatou tagata i ni nofoaga eseese i lena atunuu, faapea foi ni vaega o Oseteria.

I le faaiuga o Oketopa sa ou faapaiaina ai le Malumalu o Calgary Alberta i Kanata, faatasi ai ma le fesoasoani a Elder ma Sister M. Russell Ballard, Elder ma Sister Craig C. Christensen, ma Elder ma Sister William R. Walker. Ia Novema, sa ou toefaapaiaina ai le Malumalu o Boise Idaho. Sa matou auai foi i le faapaiaga ma Elder ma Sister David A. Bednar, Elder ma Sister Craig C. Christensen, ma Elder ma Sister William R. Walker.

O faafiafiaga faaleaganuu na faia i nei faapaiaga sa tulagaese. Ou te lei auai i le faafiafiaga faaleaganuu

i Calgary, ona o le aso soifua lona 85 o Sister Monson, ma sa ou lagona e tatau ona ma mafuta ma ia. Peitai, sa ma maua le avanoa e matamata ai i le faafiafiaga i lo ma'ua potu malolo i se televise, ona ou lele ai lea i Calgary i le taeao na sosoo ai mo le faapaiaga. I Boise, e silia ma le 9,000 talavou mai le itulagi o le malumalu sa auai i le faatinoga o le faafiafiaga faaleaganuu. Sa matua toatele naua talavou sa aofia ai, ma sa leai se avanoa mo ni tagata o aiga e auai ai i le vaega na latou faafiafia ai.

O le masina na te'a nei na malaga faatasi ai Peresitene Dieter F. Uchtdorf, ma Sister Uchtdorf, Elder ma Sister Jeffrey R. Holland, ma Elder ma Sister Gregory A. Schwitzer i Tegucigalpa, Honduras, e faapaia lo tatou malumalu fou ua maea iina. Sa faia ai foi se faafiafiaga maoae a le autalavou i lena afiafi a o loma le faapaiaga.

E i ai isi malumalu ua uma ona fofogaina atu ma o loo i tulaga eseese o le amataga o le faagasologa pe o loo fausiaina nei.

O lo'u avanoa lenei i lenei taeao e faasilasila atu ai isi malumalu fou



e lua, lea o le a fausia i masina po o tausaga a sau i nofoaga nei: o le Aai o Cedar, Iuta, ma Rio de Janeiro, Pasila. Uso e ma tuafafine, e faaauau pea le fausiaina o malumalu e aunoa ma le faatuai.

E pei ona outou silafia, i le konafesi aoao ia Oketopa na ou faasilasila atu ai le matutua o alii talavou ma tamaitai talavou ua mafai ai ona avea ma faifeautalai faamisiona, o alii talavou



ua mafai nei ona faamisiona i le ta'i 18 a o tamaitai talavou i le ta'i 19.

E ofoofogia ma musuia le tali mai a o tatou tupulaga talavou. E oo mai i le aso 4 o Aperila—lua aso talu ai—ua 65,634 faifeautalai faamisiona o loo galulue nei, ma le silia ma le 20,000 ua maua o latou valaauga ae e lei ulufale i nofoaga autu mo le aoaoina o faifeautalai ma e silia ma le 6,000 isi o loo faagasolo faatalanoaga ma

o latou epikopo ma peresitene o siteki. Ua tatau ai ona tatou faatuina nisi misiona fou e 58 e taulima ai le numera faatupulaia o faifeautalai.

Ina ia fesoasoani e faatumauina lenei 'au o faifeautalai, ma ona o le toatele o o tatou faifeautalai e o mai i tulaga lē mautu lelei, o lea matou te valaaulia ai outou, pe a mafai ai, ia saofagā ma le limafoai i le Tupe Lau-tele mo Faifeautalai a le Ekalesia..

Ia, uso e ma tuafafine, o le a tatou faalogologo i savali musuia i le asō ma a taeao. O i latou o le a saunoa mai sa latou saili ma le agaga tatalo ia iloa po o a mea e finagalo le Alii tatou te faalogo i ai i lenei taimi.

Ou te uunaia outou ina ia gauai lelei atu ma talia savali o le a tatou faalogo i ai. Talosia ia tatou faia o la'u tatalo lea i le suafa o Iesu Keriso, le Alii, amene. ■



Saunia e Peresitene Boyd K. Packer
Peresitene o le Korama a Aposetolo e Toasefululua

O Nei Mea Ua Ou Iloa

O mea uma ua ou faitauina ma aoao atu ma aoao mai, o le upumoni aupito taua ma paia ou te ofoina atu o la'u molimau faapitoa lea ia Iesu Keriso.

I le 1992, ina ua ma'ea le tautua ai mo le iva tausaga o se Fesoasoani i le Toasefululua ma le 22 o tausaga o se tasi o le Toasefululua, na ou aulia ai le matua e 68. Na ou lagonaina le uunaiga e amata le mea na ou ta'ua o se "Galuega E Le'i Ma'ea." O le vaega muamua o lena galuega e faapenei:

*Sa oso a'e so'u manatu i se tasi po,
Se manatu loloto ma o'oo'o.
Na oo mai a'o ou vaivai lava,
O le le lavā tele na le mafai ai ona moe mata.*

*O mea fai o le aso sa anoanoai
Na ou mafaufau loloto ai i lo'u lumanai.
O le manatu lenei:
A o o'u talavou, e le'i atoa lo'u 68!*

*Na lelei lava e le'i etu la'u savali;
Le'i tiga se tauau.
Fo'i faalua la'u faitau
Ma toe faamatala atu.*

*Galue mo le tele o itula
Tau le malōlō mo se mānava.
O mea ua ou le toe mafai nei ona fai
Na pei o le selo le faigofie sa i ai.*

*Ana mafai na ou liliu nei le taimi,
Pe ana o sa'u filifiliga lena e fai,*

*O le a ou le suia le toaina i le taulealea,
Ona o le a tele nauā mea ou te misi ai.*

*Ua ou malie lava e agai i luma,
Ae tuua le talavou, e ui e manaia.
O le mea e misi pe a ou fo'i i tua
O lo'u malamalama lea.*

*O le sefulu tausaga mulimuli ane,
sa ou filifili ai e faaopoopo ni nai isi laina i lena solo:*

*Sefulu tausaga ua sola e leiloa po o i fea
Ma le tele o tiga ua nā avea.
Sulugatiti metala ua aveese ai le etu;
Ua tau sa'o ai la'u savali.*

*O se isi u'amea ua mau lelei ai
ivi o le ūa—*

*Oka se gaoioiga ina a ofoofogia!
Le ma'i pipili na ia tineia;
Le au ūa malolō ua ou i ai i le latou vaega.*

*O faailoga ia o le matua ua vaaia.
E le toe foi na mea i se lelei.
Pau le vaega ua faateteleina
O le le mafai lea ona ou manatuaina.*

*E te fesili mai, "Pe ou te manatua oe?"
Ae a, e le o tele lava sou suiga.
Ia se aua e te ita
Pe afai o lou igoa ua ou le manatuaina.*

*Io e i ai mea ua ou iloa
Ou te le'i manao i ai,
Ua aumaia na upumoni taua ona ua
loa le soifua
Ua faapea ona ola ai le agaga.*

*Mai faamanuiaga uma ua oo mai,
O le mea aupito matagofie i lo'u olaga
O le mafutaga ma le mafanafana
Ou te maua mai i si a'u ava
faapelepeleina.*

*Ua faaiipoipo lelei le ma fanau uma,
Ma i ai o latou lava auaiga,
O fanau ma a latou fanau,
E le'i umi ae matutua uma i latou.*

*E le'i i ai lava sina suiga o lo'u mafaufau
I le toe foi i aso o le talavou.
E tatau lava ona tatou toaiina ma olomatutua, aua foi
E oo mai faatasi ma se malamalama o le upumoni.*

*E te fesili, "O le a se mea o i ai i le lumanai?
O le a ea lo'u faasinomaga?"
O le a ou mulimuli atu pea ae lē faasēā.
Ae toe fesili mai pe a 88 o'u tausaga!*

Ma o le tausaga na te'a nei sa ou faaopoopoina i ai laina nei:

*O lenei la ua atoa lo'u 88.
O tausaga ua televave le alu.
Sa ou savali, etuetu, sa ou tautootoo,
A e o le tietie lea ua oo i ai la'u faasolo.*

*E fai sina a'u miti mai lea taimi i lea taimi,
Ae o le mana o le perisitua e tumau pea ona i ai.
E ui i mea faaletino uma ou te le o maua
Ae ua tele lo'u tuputupu ae faaleagaga.*

*Ua soo le lalolagi i la'u fealuai
I le mamao i ni maila e tele.
Ma satellite e fesoasoani mai,
O a'u malaga ua le o gata ai.*

*E mafai ona ou fai atu ma le
mautinoa i le taimi nei
Ua ou iloa ma ou te alofa i le Alii.
E mafai ona ou molimau atu faatasi
ma i latou anamua
A o o'u tala'i atu Lana afioga paia.*

*Ua ou iloa le mea sa Ia lagonaina
i Ketesemane
E faigata ona malamalama i ai.
Ua ou iloa na Ia faia uma mo i tatou;
E leai se isi a tatou Uo e sili atu.*

*Ua ou iloa o le a toe afio mai o Ia
I le mamalu ma le mana.
Ua ou iloa o le a ou toe vaai ia te Ia
Pe a ou tuua lenei olaga.*

*O le a ou tootuli i luma o Ona
aao na tu'itu'ia;
O le a ou lagona le mamalu o
Lona Agaga.
I se leo vaivai o le a ou musumusu
atu ai faapea,
"Lo'u Alii, lo'u Atua, ua ou iloa."¹*

Ma ua ou iloa!

O faamalama pito i tua o le matou fale e iloa ai se togalaau o fugalaau laiti ma ni lauu tetele e si'o ai se auvai laitiiti. O le tasi puipui o le fale e sosoo ma le togalaau ma ua lilofia i le mafia o le fue sosolo Peretania. O le tele o tausaga sa fai ai lenei fue ma faamoega o segasegamauu. O faamoega i totonu o fue sosolo e saogalemu mai luko ma rakuni ma pusi e feoi solo.

I se tasi aso sa tupu ai se vāvāo tele i totonu o le fue sosolo. O le fetagisi atuatuvaile i le mafatia na o mai ai le 8 po o le 10 o segasegamauu mai le togalaau tetele lata mai e auai i lenei fetagisiga tele. E le'i umi ae ou vaaia



loa le pogai o le vāvāo. O se gata na aliali mai se vaega o lona tino i fafo o le fue sosolo ma tautau i luma o le faamalama, na lava lava lona umi ou te tosoina mai ai i fafo. O le ogatonu o le tino o le gata na i ai ni patu se lua—o se faamaoniga mautinoa e faasala ai o ia ona o le aveeseina o tamai segasegamauu mai le faamoega. E le'i i ai se taimi o le 50 tausaga na matou nonofo ai i le matou fale na matou vaai ai i se mea faapena. Sa o se aafiaga e faatasi i le olaga—ia pe o le matou manatu lena.

O ni nai aso mulimuli ane, sa i ai foi se isi vāvāo, o le taimi la lenei i totonu o fue na sosolo i le pa e nofo ai le matou taifau. Na matou faalogoina foi ia lava feei e tasi o faailo, o le faapotopoto mai o segasegamauu tuaoi. Na matou iloina lava le faaoosala. Na pe'a atu se tama a le ma tama i luga o le pa ma toso ese mai se isi gata lea sa ū mauina pea le manulele fafine lea sana maua i totonu o le faamoega ma tapeina.

Sa ou faapea ifo ia te a'u lava, "O le a le mea ua tupu? Pe ua toe osofaia foi le Faatoaga i Etena?"

O iina na oo mai ai i lo'u mafaufau lapataiga na tulei saunoa ai perofeta. E le faapea o taimi uma o le a tatou saogalemu ai mai faatosinaga a le fili, e oo lava i totonu o le tatou lava

fale. E manaomia ona tatou puipuia a tatou fanau laiti.

Ua tatou ola i se lalolagi ua sili ona matautia ua faamata'uina ai na mea e sili ona faaleagaga. O le aiga, o le faalapotopotoga aupito taua i le olaga nei ma le faavavau, ua osofaia e fili vaaia ma fili e le vaaia. O loo fealuai solo le fili. O lona faamoemoega o le faamanu'alia. Afai e mafai ona ia faavaivaia ma faataumaioia le aiga, o le a manuia o ia.

Ua silafia e le Au Paia o Aso e Gata Ai le taua tele o le aiga ma taumafai ai e ola i se tulaga ia le mafai ai e le fili ona sao faagaai atu i totonu o le tatou fale. Tatou te maua le saogalemu ma le puipuiga mo i tatou lava ma a tatou fanau i le faamamaluina o feagaiga ua uma ona tatou faia ma ola e tusa ai ma faatinoga masani o le usiusitai lea e manaomia mai i soo o Keriso.

Fai mai Isaia, "O le mea e tupu i le amiotonu o le manuia lea; e tupu mai foi i le amiotonu le filemu ma le saogalemu e faavavau."²

O lena manuia o loo folafola mai foi i faaaliga lea o loo tautino mai ai le Alii, "Afai ua outou saunia o le a outou le matatau."³

O le mana atoatoa o le perisitua ua tuuina mai e puipuia ai le aiga ma ona tagata e mau ai. Ua i ai i le tama



le pule ma le tiutetauave e aoao lana fanau ma ia faamanuia ma tuuina atu mo i latou sauniga o le talalelei ma isi puipuiga uma faaleperisitua e tatau ai. E tatau ona ia faaalua le alofa ma le faamaoni ma ava i le tina ina ia mafai ona vāai le la fanau i lena alofa.

Ua ou iloa o le faatuatua o se mana moni ae e le na o se faaupuga po o se talitonuga. E itiiti lava ni mea e sili atu le mamana nai lo o tatou faamaoni a se tina amiotonu.

Ia aoao oe lava ma aoao lou aiga e uiga i le meaalofa o le Agaga Paia ma le Togiola a Iesu Keriso. E leai se galuega e sili atu ona faavavau o le a e faia nai lo o totonu lava o puipui o lou lava maota.

Ua tatou iloa o i tatou o fanau agaga o ni matua faalelagi, ua tatou i ai iinei i le lalolagi ia maua ni tino faaletino ma ina ia tofotofoina. O i tatou o e ua i ai tino faaletino ua i ai le mana i tagata o e e le o i ai [ni tino faaletino].⁴ Ua tatou saoloto e filifili po o a ituaiga tagata o le a tatou aveai ma ia ilo ma filifili a tatou amioga, ae tatou te le saoloto e filifili ia taunuuga. E le mafai ona suia taunuuga.

O le faitalia o loo faamatalaina i tusitusiga paia o se “faitalia e filifili ai,” o lona uiga e mafai ona tatou filifili i le va o le lelei ma le leaga. O loo saili le fili e faaosooso i tatou e faaoga sese o tatou faitalia.

Ua aoao mai tusitusiga paia ia i tatou “ina ia mafai e tagata taitoatasi ona faia e tusa ma mataupu faavae ma mataupu autu e faatatau i le lumanai, e tusa ma le faitalia ua ou tuu atu ia te ia, ina ia mafai e tagata taitoatasi ona tali mo ana lava agasala i le aso o le faamasinoga.”⁵

Na aoao mai Alema “e le mafai ona silasila o le Alii i le agasala ma se tikeri itiiti o le taliaina.”⁶ Ina ia malamalama lenei mea, e ao ona tatou tuueseeseina le agasala ma le tagata agasala.

Mo se faataitaiga, ina ua latou aumaia i luma o le Faola se fafine na molia i le mulilua, ua mautinoa lava le ta’usalaina, sa Ia faaleaogaina le faamasinoga i upu e valu: “Alu ia oe, aua e te toe agasala.”⁷ O le agaga lena o Lana auunaga.

O le faapalepale o se uiga mama, ae, e pei foi o uiga mama uma, ae talavale loa ona suia ai lea i se mea leaga. E tatau ona tatou faaeteete i le “mailei o le faapalepale” ina ia le pu’uina ai i tatou. O le faapalepele lea e maua mai ona o le faavaivaia o tulafono o le laulelee e faapale i faatinoga o amioga le mama ia ua faatagaina faaletulafono, e le tuuitia ai taunuuga ogaoga faaleagaga ona o le taunuuga lena o le solia o le tulafono a le Atua o le ola mama po o le legavia.

E fananau mai tagata uma ma le Malamalama o Keriso, o se faatosinaga

taiala lea e faataga ai tagata taitasi ia iloa le sa’o mai le sese. O le mea tatou te faia i lena malamalama ma le auala tatou te tali atu ai i na uunaiga ia ola amiotonu o le vaega lea o le suega o le olaga faaletino.

“Aua faauta, ua tuuina mai i tagata taitoatasi le Agaga o Keriso, ina ia mafai ona iloa e ia le lelei mai le leaga; o le mea lea, ou te faaali atu ai ia te outou le ala e faamasino ai; ona o mea uma e valaau mai ia fai le lelei, ma faatauana mai ia talitonu ia Keriso, ua auina mai i le mana ma le meaalofa a Keriso; o le mea lea e mafai ai ona outou iloa ma le malamalama atoatoa ua mai le Atua.”⁸

E tatau ia i tatou taitoatasi ona tutu i tulaga e tali atu ai i musumusuga ma uunaiga a le Agaga Paia. O loo i ai se ala a le Alii e liligi mai ai le pote mama i totonu o o tatou mafaufau e uunaia ai i tatou, e taitai ai i tatou, e aoao ai i tatou, ma e lapatai ai i tatou. E mafai ona iloa e atalii po o afafine taitasi o le Atua mea e ao ona latou iloa i le taimi lava lea. Aoao ia maua ma galue i musumusuga ma faaaliga.

O mea uma ua ou faitauina ma aoao atu ma aoao mai, o le upumoni aupito taua ma paia ou te ofoina atu o la’u molimau faapitoa lea ia Iesu Keriso. O loo soifua o Ia. Ua ou iloa o loo soifua o Ia. O a’u o Lana molimau. O Ia e mafai ma ou te molimau i ai. O Ia o lo tatou Faola, lo tatou Togiola. Ou te mautinoa lenei mea. Ou te molimau atu i lenei mea i le suafa o Iesu Keriso, amene. ■

FAAMATALAGA

1. Boyd K. Packer, “Unfinished Composition,” 2012.
2. Isaia 32:17.
3. Mataupu Faavae ma Feagaiga 38:30.
4. Tagai Aoaoga a Peresitene o le Ekalesia: Josefa Samita (2007), 211.
5. Mataupu Faavae ma Feagaiga 101:78.
6. Alema 45:16.
7. Ioane 8:11.
8. Moronae 7:16.



Saunia e Epikopo Dean M. Davies
Fesoasoani Lua i le Au Epikopo Pulefaamalumu

O Se Faavae Mautinoa

Sei o tatou taliaina le valaau a le Faaola ina ia o mai ia te Ia. Sei o tatou fausia o tatou olaga i luga o se faavae saogalemu ma le mautinoa.

I le aso 17 o Oketopa, 1989, ao agai atu lau taavale i le fale mai le galuega, sa ou agai atu i se moli o le auala i le magaala o Market ma Beale Streets i San Francisco, Kalefonia. I lena lava taimi sa ou lagona ai le lulu o le taavale ma manatu ai, “Atonu ua pa lau pau.” A o lulu ai pea le taavale, sa ou iloaina atu se pasi o tu latalata mai i lau taavale ma sa ou manatu ai loa, “O le pasi le la na pa i lau taavale!” Ona toe lulu ma toe lulu ai pea lea o le taavale, sa ou manatu faapea, “Masalo e fa au pau ua pa pa!” Peitai e lei pa pa ni pau po o le pasi—ae o se mafuie malosii! A o tu lau taavale i moli mumu, sa i ai ni galugalu i le auala e pei o ni galu o le sami o loo tafe mai i le Market Street. I ou luma atu sa i ai se fale maualuga lava ma sa lue mai i le isi itu i le isi itu, ma sa touulu mai i lalo ia piliki o se isi fale tuai i lou itu agavale ao faaauau pea ona lulu le fogaeleele.

O le mafuie o Loma Prieta na taia ai le Eria o San Francisco Bay i le itula e 5:04 i le afiafi o lena aso ma tuua ai le toatele o tagata e tusa ma le 12,000 ua leai ni fale.

Na tuga mafatiaga na faia e le mafuie i le Eria o San Francisco Bay, o nofoaga e lei mautu i San Francisco ma Oakland na tele se aafiaga. I San

Francisco, o le Itu o Marina o se laueleele lea na tanuina mai ni palu o oneone, palapala, lapisi, ma o isi mea na aofia ai le tele o le pasene o vai mai le laueleele. O nisi o palapala o ni lapisi na tatiai i le San Francisco Bay ina ua maea le mafuie i San Francisco i le 1906.”¹

Pe tusa o le 1915, na fausia ai ia fale mautotogi i le laueleele lea na tanuina. O le mafuie i le 1989, o palapala ua palu faatasi ma le vai, oneone, ma lapisi ua liua e pei o se faaputuga o



vaivai, na mafua ai le pauu o fale. E lei fausia fale i luga o se faavae mautinoa.

O le mafuie i Loma Prieta na aafia ai le tele o soifua, na ou aafia ai foi. O le mafaufau la i mea na tutupu i lena vaitaimi ua toe faamautu ai i lou mafaufau ma lou loto faapea, o le mafai ona tatalia ma le manuia o afa, mafuie, ma mala o le olaga, e tatau ona tatou fausia lea i luga o se faavae mautinoa.

Na tuuina atu e le perofeta sa Nifae o Helamana se faamalamalamaga uigaese i le taua o le fausiaina o o tatou olaga i luga o se faavae mautinoa, e pei o Iesu Keriso: “Ma o lenei, ou atalii e, ia manatua, ia manatua o luga lava o le papa o lo tatou Togiola, o le o Keriso lea, le Alo o le Atua, e ao ina oulua atinae ai lo oulua faavae; ina ia pe a auina mai e le tiapolo ana matagi malolosi, ioe, ana ufanafana i le asiosio, ioe, pe a pesi mai ia te oulua ana uatoua uma ma lana afa malosii, o le a leai sona mana i luga o oulua e toso ifo ai oulua i lalo i le to o le pagatia ma le malaia e le gata, ona o le papa lea ua oulua atinae ai i luga, o le faavae mautinoa lea, o se faavae lea afai e atiae ai tagata e le mafai lava ona pauu i latou” (Helamana 5:12).

I le atinaeina o malumalu faanei ona po, o se taulaiga mataalia ua tuuina atu lea i le mamauina, fausiaina, ma le faaaogaina o mea e fausia ai. E faia se suesuega atoatoa o le laueleele ma le nofoaga lea o le a fausia ai le malumalu. E fuafuaina foi ia suesuega o matagi, timu, ma suiga i le tau mo le eria ina ia mafai ona tatalia e malumalu ua uma ona fausia ia le gata i afa ma tau masani o le eria, ae ua mamauina foi ma faatulagaina le malumalu e tatalia ia mafuie, asiosio, lologa, ma isi mala faalenatura e ono oso faafuasei mai. I le tele o malumalu, ua eliina faamaualalalo ia pou



uamea i le eleele e taula ai le faavae o le malumalu.

Faapei o tagata e mamauina ma fausiaina o lo tatou vaitaimi, ua saunia ai e lo tatou Tama o i le Lagi alofa ma agalelei ma Lona Alo ni fuafuaga, meafaigaluega, ma isi punaoa tatou te faaaogaina ina ia mafai ai ona tatou fausiaina ma faamalolosia o tatou olaga ia mautinoa ma le maluelue. O fuafuaga o le ata o le faaolataga ma le fuafuaga tele o le fiafia. Ua faataaititia mai ia i tatou e le fuafuaga se ata manino ma se malamalamaaga o le amataga ma le taunuuga, ma laasaga taua, e aofia ai sauniga, lea e manaomia mo fanau uma a le Tama ina ia mafai ai ona toe foi atu i Lona afoaga ma nonofo faatasi ai ma Ia e faavavau.

O le faatuatua, salamo, papatisoga, le meaalofa o le Agaga Paia, ma le tumau seia oo i le iuga o ni vaega ia o le “ata” o le olaga. Latou te fesoasoani e foafoaina ia poloka faufale talafeagai lea o le a taulaina o tatou olaga i le Togiola a Keriso. O nei mea o le a mamauina ma faatulagaina le fausaga o le olaga o se tagata. Ma, faapei foi ona i ai i le malumalu ia “tulaga e manaomia” lea e tuuina atu ai ni faatonuga auiliili i le ala e fausia ai ma tuufaatasia ai ia vaega taua, o le tatalo

foi, faitauina o tusitusiga paia, ai ma inu i le faamanatuga, ma le mauaina o sauniga taua o le perisitua o le a avea lea ma “tulaga e manaomia” e fesoasoani e tuufaatasia ma noatia faatasi ai le fausaga o le olaga.

E taua le faapaleniina o le faaaogaina o nei tulaga manaomia. Mo se faataitaiga, i le faagasologa o le faiga o le sima, ia sao lelei le aofaiga o le oneone, palapala, sima, ma le vai e faaoga ina ia maua ai le malosi sili atu. O le le sao o le aofaiga pe o le misi foi o nisi o vaega o nei elemene o le a vaivai ai le sima ma ua le mafai ai ona faatino lona tiute taua.

E tutusa lava foi, pe afai tatou te le saunia e faapaleni ma le talafeagai o tatou olaga e pei o le tatalo faaletagata lava ia i aso uma ma le fiafia i tusitusiga paia, faamalolosia i vaiaso taitasi i le aai ma feinu i le faamanatuga, ma le auai soo i sauniga faaleperisitua e pei o sauniga o le malumalu, o le a lamatia ai i tatou i le vaivai i lo tatou fausaga malosi faaleagaga.

Na taua e Paulo, i se tusi i le au paia i Efeso, lea e mafai ona tatou faatatauina i le manaomia o se atinaega faapaleni ma le tuufaatasia o o tatou tagata ma agaga: “Ua faatatauina ia te ia le fale atoa, o loo alu ae, ina ia

fai ma malumalu paia i le Alii” (Efeso 2:21).

O le tatalo o se tasi lea o muai mataupu faavae ma e sili ona taua o lo tatou faatuatua ma fausaga. O le tatalo ua mafai ai ona tatou faaali atu lo tatou agaga faafetai, alofa, ma le naunautaiga i le Atua. O le tatalo ua mafai ai foi ona tuuina atu o tatou manaoga ia te Ia ma maua ai le malosi e faaogatasi ai o tatou olaga i Ana aoaga. O le tatalo o le ala lea e mafai ona tatou mulimuli i ai e sailia ai Lana uunaiga i o tatou olaga, e pei o faaaliga.

Na aoao mai e Alema: “Filifili faatasi ma le Alii i au mea uma e fai ma o le a ia taitai oe mo le lelei; ioe, pe a e taoto i lalo i le po, taoto i lalo i le Alii, ina ia mafai ona leoleo mai o ia i ou luga a’o e moe; ma a e ala mai i le taeao, ia tuu lou loto ia tumu i le faafetai i le Atua; ma afai e te faia nei mea, o le a sii ae oe i luga o le aso gataaga” (Alema 37:37).

O le faasoaina atu o o tatou manatu, lagona, ma manaoga i le Atua e ala i le tatalo faamaoni ma le naunautai e tatau ona avea lea ma se vaega taua ma masani ia i tatou e pei o le manava ma le aai.

O le suesue i tusitusiga paia i aso taitasi o le a faamalolosia ai lo tatou faatuatua ma fausaga. Faapei ona tatou manaomiaina ia meaai e fafaga ai o tatou tino faaletino, o le a faatumulia foi ma faamalolosia o tatou agaga e ala i le taumamafa i afoaga a Keriso e pei ona aofia ai i tusitusiga a perofeta. Na aoao mai Nifae, “Ia taumamafa fiafia i afoaga a Keriso; aua faauta, o afoaga a Keriso o le a ta’u mai ai ia te outou mea uma e tatau ona outou faia” (2 Nifae 32:3).

E ui o le faitauina o tusitusiga paia e lelei, ae e le lava le na o le faitauina e pue mai ai le tulaga atoatoa ma le loloto o aoaga a le Faaola. O le

suesue, mafaufau loloto, ma faaoga ia afioga a Keriso e pei ona aoao mai i tusitusiga paia, o le a aumai ai le potu ma le malamalama e sili atu nai lo le malamalama faaletagata o ia i tatou. O le a faamalosia ai e lenei mea lo tatou naunautaga ma saunia ai tulaga faaleagaga ina ia faia le mea sili tatou te mafaia i tulaga uma.

O se tasi o laasaga sili ona taua e mafai ona tatou faia e faamalosia ai o tatou olaga ma tumau ai ma le mausali i le faavae o le Faaola o le ai lea ma inu ma le agavaa i le faamanatuga i vaiaso taitasi. O le sauniga o le faamanatuga e maua ai e tagata uma o le Ekalesia le avanoa e muai mafaufau ai i lona olaga, e mafaufau ai i faatinoga po o ni mea e lei faatinoina e ono manaomia ai le salamo mai ai, ona ai lea ma inu i le falaoa ma le vai o ni faatusa paia o le tino ma le toto o Iesu Keriso, o se molimau o Lona Togiola. Afai tatou te fetagofi atu ma le faamaoni ma le faamaulalo, ua tatou faafouina ia feagaiga e faavavau, ua faamamaina ma faapaiaina, ma o le a tatou maua le folafolaga o le a faatasi Lona Agaga ma i tatou, i taimi uma. O le Agaga e faapei o se ituaiga o sima, o se sootaga mau e le gata i le faamamaina ae o le a tatou manatuaina ai foi mea uma ma molimau ai pea lava pea ia Iesu Keriso. O le ai ma inu ma le agavaa i le faamanatuga o le a faamalolosia ai o tatou fesootaiga patino ma le maa o le faavae, o Iesu Keriso lea.

I lana talaiga na aoao atu ai le Faaola ma le alofa ma le manino ia aoaoga faavae, mataupu faavae, ma galuega e manaomia o le a faasaoina ai o tatou ola ma faamalolosia ai o tatou tagata. I le faaiuga o le Lauga i luga o le Mauga, na Ia fetalai ai:

“O lea, o soo se tasi e faalogo i au upu nei ma faia e ia, ou te faatusaina o ia i se tagata potu, o le na atiae lona fale i luga o se papa—

“Ma sa to mai uaga, ma oo mai lologa, ma agi mai matagi, ma taia lona fale; ma sa lei pau lava, ona sa faavaeina i luga o se papa.

“Ma o i latou uma o e faalogo i au upu nei ma le faia e ia, e faatusaina o ia i se tagata valea, o le na atiae lona fale i luga o le oneone—

“Ma sa to mai uaga, ma oo mai lologa, ma agi mai matagi, ma taia lona fale; ma sa pau, ma sa pau tele lava” (3 Nifae 14:24–27; tagai foi Mataio 7:24–27).

Uso e ma tuafafine, e leai lava se tasi o i tatou o le a fausiaina ma le iloa o tatou fale, nofoaga o galuega, po o fale paia o tapuaiga i luga o se oneone, po o lapisi, po o le le leai o ni fuafuaga ma ni meafaufale talafeagai. Sei o tatou taliaina le valaau a le Faaola ina ia o mai ia te Ia. Sei o tatou fausia o tatou olaga i luga o se faavae saogalemu ma le mautinoa.

Ou te molimau atu ma le agaga mauualalo o le taulaina o o tatou olaga ia Iesu Keriso ma Lana Togiola ma o le mulimuli ma le faaeteete i Ana fuafuaga mo lo tatou fiafia, e aofia ai le tatalo i aso uma, suesue i tusitusiga paia i aso uma, ma le aai ma feinu i le faamanatuga i vaiaso uma, o le a faamalolosia ai i tatou, o le a tatou lagonaina ai le tuputupu ae moni patino ma se liua tumau, o le a tatou saunia lelei ai ina ia tatalia ma le manuia ia afa ma mala o lenei olaga, o le a tatou tofo i le fiafia ua folafola mai, ma o le a tatou mauaina se faamautinoaga ua fausia o tatou olaga i luga o se faavae mautinoa—o se faavae o le a le pa’ū lava. I le suafa o Iesu Keriso, amene. ■

FAAMATALAGA

1. Tagai “1989 Loma Prieta Earthquake,” wikipedia.org/wiki/1989_Loma_Prieta_earthquake.





Saunia e Elaine S. Dalton

Peresitene Aoao o Tamaitai Talavou na Faamalolo Talu ai Nei

O i Matou o Afafine o lo Tatou Tama Faalelagi

I le avea ai ma afafine o le Atua, o i tatou taitoatasi e faapitoa ma eseese i o tatou tulaga ma aafiaga. Ae peitai o a tatou vaega e tāua—aua e tāua i tatou.

O vaiaso uma lava, e tauloto ai e tamaitai talavou uma i le lalolagi atoa le autu a Tamaitai Talavou. Po o le a lava le gagana, o taimi uma lava ou te lagona ai nei upu, “O i matou o afafine o lo matou Tama Faalelagi, e alofa ia i matou, ma matou te alolofa foi ia te Ia,”¹ e faamautu mai e le Agaga i lo’u loto ua moni ia. E le gata o se faamautuina o lo tatou faasinomaga—po o ai i tatou—ae o se faailoaga foi o lē e ona [afafine] ua i ai i tatou. O i tatou o afafine o se tamalii faaeaina!

I atunuu uma ma konetineta uma, ua ou feiloai i tamaitai talavou e talitonu ia i latou lava, ma atamamai e tautatala, e tumu i le malamalama, ua faaeaina ona o le malosi o le galulue faapea ma tofotofoga, ua i ai ni faatuatua mama ma faatauva. Latou te ola mama. Latou te tausi feagaiga ma e “tutu o ni molimau a le Atua i taimi uma ma i mea uma, ma i nofoaga uma.”² Latou te iloa po o ai i latou ma ua i ai so latou matafaioi

taua e faatino i le fausiaina o le malo o le Atua.

A o o’u i ai i le kolisi, sa avea au ma se tasi o le Ausiva Masani Faavaomalo a le BYU. I se tasi taumafanafana, sa maua ai e le matou vaega se avanoa

tulaga ese e maimoa faataamilo ai i misiona i Europa. Sa avea o se taumafanafana faigata lea ia te a’u ona o ni nai masina na muamua atu, na maliu faafuasei ai lo’u tamā. A o matou i ai i Sikotilani, na ou lagona le tuua na o au ma oo ina o’u lotovaivai. Na matou sisiva i se falelotu i lena po, ma ina ua uma le matou faafiafiaga sa matou o atu loa i le maota o le misiona lea sa i autafa atu. A o faaauau atu la’u savali, sa ou vaaia se maa sa taatia ai i le togalaau na teuina lelei i talaane o le pa. O luga o le maa sa ou faitau ai i upu, “Po o le a lava lau matata, fai ia lelei lau vaega.” O le taimi lena na matuai gotouga i le taele o lo’u fatu na upu, ma sa ou lagonaina ia mana o le lagi o aapa mai ma aumai ia te a’u se savali. Na ou iloaina ai sa silafia a’u e se Tama Faalelagi agaalofa. Na ou lagonaina sa lei tuua na o au. Na ou tutu i lena togalaau ma ou tagi ai. “Po o le a lava lau matata, fai ia lelei lau vaega.” O lena faamatalaga faatauva na toefaafouina ai la’u vaaiga mamao e faapea, na silafia a’u e le Tama Faalelagi ma na i ai sana fuafuaga mo lo’u



Sini, Ausetalia

olaga, ma o le agaga na ou lagonaina na fesoasoani ou te malamalama ai e t̄aua la'u vaega.

Mulimuli ane, na ou iloa ai o lenei faaupuga na musuia ai foi le perofeta o Tavita O. MaKei a o auuana ai o se faifeautalai talavou i Sikotilani. Na ia vaaia i luga o se maa i se fale i se taimi o le lotovaivai a o i ai i lana misiona, ma sa siitiaina o ia e na upu. O tausaga mulimuli ane a o tuuina i lalo le fale, na ia faia ni fetuunaiga ina ia aumai le maa ma faataatia i totonu o le togalaau i le maota o le misiona.³

I le avea ai ma afafine o le Atua, o i tatou taitoatasi e faapitoa ma eseese i o tatou tulaga ma aafiaga. Ae peitai o a tatou vaega e t̄aua—aua e t̄aua i tatou. O a tatou saofaga i aso uma i le faafaileleina, aoaoina, ma le tausiga o isi e foliga foi o se mea masani, tau le iloa, faigata, ma ta'u faatauvaaina i nisi o taimi, ae ui i lea, pe a tatou manatua lena laina muamua o le autu a Tamaitai Talavou—“O i matou o afafine o lo matou Tama Faalelagi, e alofa ia i matou”—o le a faia ai le eseese a toa i a tatou mafutaga ma a tatou tali.

E le'i mamao atu, na maliu ai lo'u tina maoae, i le 92 o tausaga o lona soifua. Sa ia tuua lenei olaga i le tino e pei ona sa ia soifua ai—filemu. O lona olaga sa le o le mea lea sa ia fuafuaina. O lana tane, o lo'u tama, na maliu ina ua 45, na tuua ai o ia ma se fanau e toatolu—o a'u ma o'u tuagane e toalua. E 47 tausaga na nofo ai o ia o se tagata ua maliu lana tane. Sa ia tausia lo matou aiga e ala i le faiaoga i le aoga i le aso ae faiaoga i lesonea ta-piano i le po. Sa ia tausia lona tama ua toeaina, lo'u tamamatua, o le sa nofo i le fale tuaoi. Sa ia faamautinoa o matou aoaoga uma i le kolisi. O le mea moni, sa ia finafinai i ai ina ia mafai ona avea i matou na ni “tagata e saofagā.” Ma sa le'i faitio lava o ia. Sa ia tausia ana feagaiga, ma ona sa



ia faia, o lea sa ia talosagaina ai mana o le lagi e faamanuia lo matou aiga ma ia auina mai ni vavega. Sa faalagolago o ia i le mana o le tatalo, perisitua, ma folafolaga o feagaiga. Sa faamaoni o ia i lana auunaga i le Alii. O lona tuuto mausali sa taofiofia ai i matou, o lana fanau. Sa masani ona ia ta'uina mai ia i matou le mau: “O A'u, o le Alii, e noatia a'u pe a outou faia mea ou te fai atu ai; ae a outou le faia mea ou te fai atu ai, e leai se folafolaga mo outou.”⁴ O lana mautauave lena, ma sa ia iloina e moni. Sa malamalama o ia i le uiga o le avea ma se tagata tausi feagaiga. Sa le'i taualoa o ia e le lalolagi. Sa le'i manao o ia i lena mea. Sa malamalama o ia i lona tagata ma po o ai e anaina o ia—o se afafine o le Atua. Ioe, e mafai ona ta'ua e faapea i lo matou tina, sa ia faia lelei lana vaega.

I tamaitai ma tina, na saunoa atu ai Peresitene Gordon B. Hinckley i se taimi:

“E le tatau ona faasēloa i la tatou vaai le malosi o se tamaitai. O tina e sili ona patino o latou aafiaga i olaga o a latou fanau. . . . O tina e faafaileleina i latou ma tausi i latou i ala o le Alii. O a latou faatosinaga e le mafaatusalia. . . .

“ . . . O i latou o foafoa o le ola. O i latou e atiaaina le fanau. O i latou o faiaoga o tamaitai talavou. O i latou o a tatou soa taua. O i latou o a tatou soātau i le fausiaina o le malo o le

Atua. E maoae la latou matafaioi, e ofoofogia la latou saofaga.”⁵

E faapefea la ona totona e se tina ma se tama i so laua afafine faapelepele le upumoni faamamaluina ma le faavavau e faapea, o ia o se afafine o le Atua? E faapefea ona tatou fesoasoani ia te latou ia ia laa ese mai le lalolagi ma laa atu i totonu o le malo o le Atua?

I se lalolagi ua fai ifo ai tulaga faatonuina lelei, e manaomia e tamaitai talavou ni tamaitai ma ni alii e “tutu atu o ni molimau a le Atua i taimi uma ma i mea uma, ma i nofoaga uma.” E le'i ai se taimi muamua ua sili atu ai le taua o lenei mea nai lo o le taimi nei. E manaomia e tamaitai talavou ni tina ma ni taitai e faataitaia amioga mama faaletamaitai. Tina, o la oulua mafutaga ma lau tama e matuai taua tele, ma e faapena foi i au faataitaiga. O le ala e te alofa ai ma faamamaluina ai lona tamā, lona perisitua, ma lana matafaioi paia, o le a atagia ma atonu e faalauteleina i uiga faaalua ma amioga a lau tama.

O le a lena vaega lea e tatau ia i tatou uma ona “faia lelei”? O loo manino lava i le folafolaga i aiga:

“I le fuafuaga paia, e tatau ona pulefaamalumu tamā i o latou aiga i le alofa ma le amiotonu ma o i latou e tuuina atu mea e manaomia o le olaga ma le puipuiga mo o latou aiga. O le uluai matafaioi a tina o le faafaileleina



lea o a latou fanau. O nei matafai oi paia, e ao i tamā ma tina ona fesoasoani le tasi i le isi o se paaga tutusa. . . .

“Matou te lapatai atu o tagata taitoatasi o e ua solia feagaiga o le ola mama, o e faasaunoa i taitoalua po o fanau, o e ua faatalale i le faataunuina o tiutetauave faaleaiga, o le a i ai se aso tou te tutu atu ai e tali atu i luma o le Atua.”⁶

I le lalolagi le mama o le vaitaimi o Mamona, sa ia faaalua ai le faanoanoa ona sa aveesea mai i tamaitai le mea ua silisili ona pele ma taua i luga o mea uma lava, o le le gaoia lea ma le mama.⁷

Ou te toe faafouina le valaau mo se toe foi i le mamā. O le mamā o le malosia ma le mana o afafine o le Atua. O a ni foliga o le a i ai le lalolagi pe afai e toe faafoi mai mamanu o le mamā—o mafaufauga ma uiga faaalua e tusa ai ma le tulaga maualuga o le amiomama—tulaga faatonuina, e aofia ai le ola mama⁸—i lo tatou lalolagi e avea o se tulaga faatonuina e aupito sili ona faatauaaina? Afai e faaitiitia le ola le mama, ponokalafi, ma sauaga mataga, mata o le a itiiti ni faaiipoipoga malepelepe, olaga nutipalaina, ma loto nutimomoia? Mata e faamamalu ma lagolago e ala o faasalalaua nai lo le osofaia ma faatamaia o afafine faapelepele o le Atua? Afai e mala-malama tagata soifua uma i le taua

o le faamatalaga “O i tatou o afafine o lo tatou Tama Faalelagi,” o le a se manatulia ma se faiga o le a taulima ai tamaitai?

O ni nai tausaga ua mavae, a o fausiaina lenei Maota Autu mo Konafesi ma ua lata ona faamaeaina, sa ou ulu mai ai i totonu o lenei maota paia i le fogafale faatautau i se pulou malō ma ni matatioata mo le puipuiga, ua sauni e salu le kapeta lea sa fesoasoani ai lo’u toalua e faapipii. O le tulaga lea ua tu ai nei le pulelaa sa i ai se tamai palau sa faaaoga e aveese ai le pefu, ma sa mafiafia le pefu i totonu o lenei fale. Ina ua to’a, sa to’a i luga o le kapeta fou. O lau vaega o le faamamaina lea i le tamai masini mitipefu. Ma o lea sa ou faamamaina ai ma faamamaina ma faamamaina. Ina ua mavae aso e tolu, na le toe ola si au tamai masini mitipefu!

O le aoauli a o lumanai le uluai konafesi aoao i totonu o lenei maota matagofie, sa telefoni mai ai lo’u toalua ia te a’u. Sa saunia e faapipii le vaega mulimuli o le kapeta—i lalo o lenei pulelaa lauiloa.

Na fesili mai o ia, “O le a se mau e tatau ona tusia i le pito i tua o le kapeta lenei?”

Na fesili mai o ia, “Mosaea 18:9: ‘Tu o [se molimau] a le Atua i taimi uma ma i mea uma, ma i nofoaga uma.’”

I se lalolagi ua matuai luitauina lava, o le mea lena o loo o’u vaai

o fai e tamaitai talavou ma tamaitai uma o lenei Ekalesia. O i latou o se faatosinaga mo le lelei. O i latou e mama ma fai ma faaitaiga, atamamai ma galulue malosia. O loo latou faia se eseese aua e ese i latou. O loo lelei le faatinoga o lo latou vaega.

I tausaga ua mavae, a o ou saluina lenei kapeta—sa taumafai e fai lelei la’u vaega faatauvaa—ou te le’i iloa o le a i ai se aso o le a tu ai o’u vae i luga o le kapeta o loo i lalo o lenei pulelaa.

I le asō i le avea ai o se afafine o le Atua, ou te tulai e avea o se molimau o loo soifua o Ia. O Iesu o le Keriso. O Ia o lo tatou Faaola. E ala atu i Lana taulaga togiola e le iu, o le a mafai ai ona ou toe foi atu i se aso e mafuta ma Ia—faamaonia, mama, ma faamauina i se aiga e faavavau. O le a faavavau pea ona ou viia o Ia mo le faamanu-iaga o le avea ma se tamaitai, se avā, ma se tina. Ou te molimau atu o loo taitaia i tatou e se perofeta a le Atua, o Peresitene Thomas S. Monson, ma ou te faafetai mo tamalii amiotonu, o le mana o o latou perisitua ua manuia ai lo’u olaga. Ma o le a ou faafetai pea lava mo le malosia o loo ou maua e ala mai i le mana gafatia o le Togiola le iu a le Faaola a o faaauau ona ou taumafai e “fai lelei [la’u] vaega.” I le suafa o Iesu Keriso, amene. ■

FAAMATALAGA

1. *Ahualu i Luma a Tamaitai Talavou* (tamaitusi, 2009), 3.
2. Mosaea 18:9.
3. Tagai Matthew O. Richardson, “‘What E’er Thou Art, Act Well Thy Part’: John Allan’s Albany Crescent Stone,” *Journal of Mormon History*, vol. 33 (Fall 2007), 31–61; Francis M. Gibbons, *David O. McKay: Apostle to the World, Prophet of God* (1986), 45.
4. Mataupu Faavae ma Feagaiga 82:10.
5. Gordon B. Hinckley, “Tu Malosi ma le Mausali,” *Fonotaga Faaleaoaoga a Taitai i le Lalolagi Atoa*, 10 Ian., 2004, 21.
6. “O Le Aiga: O Se Folafolaga i le Lalolagi,” *Liahona*, Nov. 2010, 129.
7. Tagai Moronae 9:9.
8. Tagai *Ahualu i Luma a Tamaitai Talavou*, 70.



Saunia e Elder Craig A. Cardon

○ Le Fitugafulu

E Finagalo le Faaola e Faamagalo Atu

E alofa le Alii ia i tatou ma e finagalo ia tatou malamalama i Lona naunau e faamagalo.

I le taimi o le auaunaga a le Faaola i le lalolagi, e toatele na mulimuli atu ia te Ia, e aofia ai le au tusiupu ma le au Faresaio “mai faoa aai uma o Kali-laia, . . . Iutaia, ma Ierusalem.”¹ O se tagata ma’i supa sa taoto i lona moega, sa mana o ia faamaloloina, sa aumai o ia i se faapotopotoga toatele, ae sa le mafai ona latalata atu o ia i le Faaola, o lea sa ave ai e ana uo i le tauluga o le fale sa afio ai le Faaola ma tuutuu ifo ai o ia i lalo. O le vaaia o lenei faatinoga o le faatuatua, faatasi ai ma le faamoemoega tele sa le’i iloa e Ana au faalogologo, sa fetalai atu ai le Faaola, “Sole, ua faamagaloina au agasala.”²

Atonu sa faateia lea alii i lenei mea, ma e ui ina e le o ta’ua mai i tusitusiga paia se mea e uiga i sona uiga na faaalua, atonu sa mafaufau o ia pe na malamalama lelei le Faaola i le mafuaaga na ia sau ai.

Sa silafia e le Faaola e toatele tagata sa mulimuli ia te Ia ona o Ana vavega ofoofogia. Ua uma ona Ia faaliu uaina le suavai;³ tutuliese agaga leaga;⁴ ma faamalolo le atalii o le alii sili,⁵ o se lepela,⁶ le tina o le toalua o Peteru⁷ ma le tele o isi [vavega].⁸

Ae i le alii ma’i supa lenei, sa filifili le Alii e tuu atu le faamaoniga i le au

soo ma i latou sa le’i talitonu i Lana matafaioi tulaga ese o le Faaola o le lalolagi. O le faalogoina o le fetalaiga a le Faaola, na amata ai ona manatunatu le au tusiupu ma le au Faresaio ia i latou lava, ma talanoa faavalevala ai e uiga i le upu leaga [i le Atua] ma faapea ai e na o le Atua lava e mafai ona faamagaloina agasala. O le silafia ai e le Faaola o o latou manatunatuga, sa Ia fetalai atu ai ia i latou e faapea:

“Se a le mea tou te manatunatu ai i o outou loto?”


“Po o le fea le faigofie, po o le fai atu, Ua faamagaloina au agasala; po o le fai atu, Tulai ia, ina savali?”⁹

Sa le faatali mo sa latou tali, ae sa faaaauu le fetalaiga a le Faaola: “A e peitai ina ia iloa ai e outou o i le Atalii o le tagata le pule *i le lalolagi* e faamagalo ai agasala, [Ona Ia liliu atu lea i le supa] Ou te fai atu ia te oe, Tulai ia, ina ave lou moega, ma e alu i lou fale.”¹⁰ Ona ia faia ai lea!

E ala mai i lenei faamalologa ofoofogia faaletino, sa faamautuina ai e le Faaola ia i tatou uma lenei upumoni faaleagaga e le iu ma ua sili ona mamana: e faamagalo e le Atalii o le Tagata ia agasala!

E ui o lenei upumoni ua taliaina fiafia e tagata uma ua talitonu, ae peitai o le le faigofie ona faailoaina o le isi lea mea moni taua fesootai: e faamagalo e le Faaola agasala “i luga o le fogaelele” ae le na o le taimi o le Faamasinoga Mulimuli. Na te le tuusaunoaina i tatou *i a* tatou agasala.¹¹ Na te le faatagaina i tatou ia toe foi atu i agasala ua mavae.¹² Ae a tatou salamo ma usitai i Lana talalelei, Na te faamagaloina i tatou.¹³

I lenei faamagaloga tatou te vaaia ai le faaaogaina lelei ma le matagofie o le mana gafatia *ma le* [mana] faaola o le Togiola. A tatou faaaogaina le faatuatua i le Alii o Iesu Keriso, e *faamalosisia* ai i tatou e le mana gafatia o Lana Togiola i taimi tatou te manaomia ai,¹⁴ ma o Lona mana togiola e *faapaia* ai i tatou a o tatou “[tuu] ese le tagata natura.”¹⁵ O lenei mea e aumai ai le faamoemoe i tagata uma, ae maise ia



i latou o e manatu o vaivaiga faisoo o le tagata e le oo i ai le finagalo o le Faaola e fesoasoani ma laveai.

O le saunia o se avanoa mo le Faaola e faapupula ai lo tatou malamalama,¹⁶ sa i ai se taimi na fesili ai Peteru pe e tatau ona faafia ona ia faamagalogo atu i lona uso ona fesili atu lea, “Seia faafitu?” E mautinoa lava ua matuai lava ma totoe lena. Ae o le tali a le Faaola na matala tele ai le faitotoa i *Lona* finagalo alofa: “Ou te *le* fai atu ia te oe, Seia atu fitu: a, Ia fitugafulu ni fitu.”¹⁷

E alofa le Alii ia i tatou ma e finagalo ia tatou malamalama i Lona naunau e faamagalogo. E silia ma le 20 ni taimi i le Mataupu Faavae ma Feagaiga, sa ta’u atu ai e le Alii ia i latou sa Ia fetalai atu i ai, “Ua faamagaloina au agasala,” po o ni fetalai ta’uta’uta. I le pe a o le afa o na taimi, sa faapitoa le fitoitonu o fetalai a le Alii i le Perofeta o Iosefa Samita, o nisi taimi sa fetalai atu ai ae na o ia lava, o nisi taimi a o faatasi ai ma isi.¹⁹ O le vaega muamua o nei fetalai sa faamaumauina i le 1830, ae o le vaega mulimuli i le 1843. O lea, i le va o ni tausaga se tele, sa faafia ona fofoga mai ai e le Alii ia Iosefa, “Ua faamagaloina au agasala.”

E ui sa le’i “tausalaina [Iosefa] i ni agasala tetele pe matuia,”²⁰ ae o le a lelei mo i tatou ona manatua o ni nai tuusaunoaga laiti lava, o le fetalai a le Alii ia “faafitugafulu ni fitu” e le faatapulaaina ai le faamagalogo e tusa ai ma le matuia o le agasala.

A o fetalai atu i toeaia sa tauaafia i Katelani, na fetalai ai le Alii, “Ou te loto ia outou manumalo i le lalolagi; o *le mea lea* o le a i ai lo’u agaalofa i luga o outou.”²¹ Ua silafia e le Alii o tatou vaivaiga ma taunuuga e faavavau “o le lalolagi” i luga o alii ma tamaitai le atoatoa.²² O le upu o *le mea lea* i le fuaiupu lena o Lana faamautinoaga lena ua na o le amiotonu o Lona agaalofa e mafai mulimuli ane ai ona tatou “manumalo



mai le lalolagi.” E faapefea ona faaali mai lena agaalofa? I nei lava foi toeaia i Katelani sa Ia fetalai atu i ai, “Ou te faamagaloina outou ia outou agasala.”²³ *E finagalo le Faaola e faamagalogo atu.*

E le tatau ona faapea se tagata o lena faamagalogo e oo mai e aunoa ma le salamo. E moni, ua folafola mai e le Alii, “O A’u o le Alii, Ou te faamagaloina agasala a i latou o e e ta’uta’u mai a latou agasala i o’u luma ma ole mai mo se faamagalogo,” ona Ia faapoopo mai lea o se tulaga manaomia faapoopo “o e ia e le’i agasala e oo i le oti.”²⁴ E ui o le Alii “e le mafai ona vaai i luga o le agasala ma sina tikeri ititi o le faatagaina,”²⁵ ae Na te silafia lelei le matuia o nisi o agasala. Ua Ia poloai mai o le a leai se faamagalogo mo le “upuleaga e faasaga i le Agaga Paia.”²⁶ Ua Ia folafola mai foi le matuia o le fasioti tagata²⁷ ma faamamafa mai le ogaoga o agasala tau i feusuaiga e pei o le mulilua.²⁸ E tusa ai ma le faia pea lava pea o agasala matuia tau i feusuaiga, ua Ia faailoa mai ai le faateteleina o le faigata ona maua o Lana faamagalogo.²⁹ Ma ua Ia fetalai mai “o ia o le e agasala faasaga i le malamalama tele atu, o le a maua e ia le tausalaga tele atu.”³⁰ Ae, i Lona alofa mutimutivale, ua Ia faatagaina ai le faaleleia i le aluga o le taimi, nai lo o le poloai faamalosia o le atoatoa i se taimi vave. E ui lava foi i le faateteleina o le agasala e mafua

mai ona o vaivaiga o le olaga nei, ae o soo se taimi tatou te salamo ai ma sailia Lana faamagalogo, e faamagalogo mai pea lava pea o Ia.³¹

Ona o lena mea, o i tatou uma, e aofia ai i latou o loo tauivi e faatolalo amioga ua fai ma vaisu e pei o le faaoga sese o fualaau ma vailaau faasaina po o ponokalafi faapea ma i latou e vavalalata ia i latou, e mafai ona iloa o le a silafia e le Alii a tatou taumafaiga amiotonu ma o le a faamagalogo mai ma le alofa pe a atoatoa le salamo, “ia fitugafulu ni fitu.” Ae e le faapea ai la e mafai ai e se tagata ona foi atu ma le *loto i ai* i le agasala e aunoa ma le faasalaina.³²

O taimi uma lava e silasila mai ai le Alii i o tatou loto,³³ ma o le tauamiotonuina o le faatuatua sese e le tauamiotonu ai le agasala.³⁴ I le tisipenisione lena, sa lapataia ai e le Alii se tasi o Ana auauna ona o na ituaiga o ‘alofaga i le folafola atu e faapea, “Ia tuu atu [ia te ia] ia maasiasi i le au Nikalaitai ma a latou mea inosia faalilolilo uma.”³⁵ O le au Nikalaitai o se vaega faalelotu i aso anamua sa tautino mai e faapea na latou maua le faatagaga e soli ai agasala tau i feusuaiga e ala i le agalelei o le alofa tunoa o le Alii.³⁶ O lena mea e le o se mea lelei i le Alii.³⁷ O Lona agaalofa ma le alofa tunoa e le o se tatou ‘alofaga lea pe a “le faamalieina o [tatou] loto. Ma [tatou] le usiusitai i le upumoni, ae ua fiafia i le amioletonu.”³⁸ Ae, a mavae ona tatou faia o mea uma tatou te mafaia,³⁹ O Lona agaalofa ma le alofa tunoa o auala ia e mafai ai “i le gasologa o le taimi”⁴⁰ ona tatou manumalo i le lalolagi e ala i le mana gafatia o le Togiola. Ao tatou sailia ma le lotomaulalo lena meaalofo faapelepele, “o mea vaivai [e] avea ma mea malolosi ia te i [tatou]”⁴¹ ma e ala mai i *Lona* malosiaga, e mafai ai ona tatou faia o mea e le mafai ona tatou faia na o i tatou.

E silasila mai le Alii i le malamalama ua tatou maua,⁴² i manaoga o o tatou loto,⁴³ ma a tatou amioga,⁴⁴ ma a tatou salamo ma saili Lana faamagaloga, e faamagaloga mai o Ia. A o tatou iloiloina i o tatou lava olaga ma olaga o e pele ia i tatou ma a [tatou] uo, e tatau ona tutusa lo tatou naunau e faamagaloga i tatou lava faapea ma isi.⁴⁵

O loo talanoa mai le *Tala'i La'u Talalelei* e uiga i le faigata o le faatoilaloina o amioga ua fai ma vaisu ma uunaia taitai perisitua ma le au paia e “aua le faateia ai pe lotovaivai” pe afai e faaauau pea ona tauivi tagata sailiili po o tagata fou o le ekalesia ma faafitauli faapena. Ae, ua fautuaina i tatou, e “tatau ona faaali atu le talitonu i le tagata ae aua le faamasino atu . . . [ae ia taulimaina] o se faafitauli e le tumau ma malamalama gofie.”⁴⁶ Mata e itiiti ai ni mea tatou te faia i a tatou lava fanau po o tagata o aiga o e tauivi ma ni faafitauli faapena foi, ma o ese le tumau atu ai mai le ala o le amiotonu? E mautinoa lava lo latou faatauaina o lo tatou tutumau, onosai, ma le alofa—ma ioe, o la tatou faamagaloga.

I le konafesi aoao ia Oketopa talu ai, sa fautua mai ai Peresitene Monson: “E manaomia ona tatou manatua pea e mafai ona sui ia tagata. E mafai ona latou lafoai ni mausa leaga. E mafai ona latou salamo mai solitulafono. . .

“ . . . E mafai ona tatou fesoasoani ia i latou ia faatoilalo o latou vaivaiga. E tatau ona tatou atiina ae le malosiaga e vaai atu ai i alii, e le o tagata o loo latou i ai i le taimi nei, ae o tagata e mafai ona avea ai i latou.”⁴⁷

I se uluai konafesi a le Ekalesia, e tali tutusa ma lenei konafesi, sa fetalai mai ai le Alii i le au paia:

“E moni ou te fai atu ia te outou, ua outou mama, ae le o outou uma; . . .

“Ona ua leaga *tagata uma* i o'u luma. . . .

“ . . . E i ai ni isi o outou ua sala i o'u luma, *peitai, o le a ou alofagia lo outou vaivai.*”⁴⁸

O lena lava foi Lana savali i le asō.

Ua silafia e lo tatou Tama Faalelagi mea o loo tatou faafeagai, tatou te agasala uma ma ua faafia ona “le oo i le viiga mai le Atua.”⁴⁹ Na Ia auina mai Lona Alo, o le ua “silafia vaivaiga o le tagata ma le ala e fesoasoani ai ia i latou o e ua faaosoosoina.”⁵⁰ Ua aoao mai e Lona Alo i tatou ia “tatalo e le aunoa ina ia [tatou] le ulu atu i faaosoosoga.”⁵¹ Ua ta'u mai ia i tatou ia “tagi atu [i le Atua] mo le *alofa mutimutivale*, ona ua malosai o ia e faaola.”⁵² Ua poloaiina i tatou e le Faaola ia salamo⁵³ ma ia faamagaloga atu.⁵⁴ Ma e ui e le faigofie le salamo, ae a o tatou taumafai ma o tatou loto atoa e usitai i Lana talalelei, ua Ia tuuina mai le folafolaga lenei: “E moni ou te fai atu ia te outou, e ui ia [outou] agasala, *ua tumu lo'u loto i le agaalofoa ia te [outou].* O le a ou le lafoaia ese atoatoa [outou]; *ma o le a Ou manatua le alofa mutimutivale i le aso o le toasa.*”⁵⁵ E finagalo le Faaola ia faamagaloga atu.

O vaiaso taitasi e amata ai e le Au-faipese a le Tapeneko ana faasalalauga



musuia i upu faagaetia o le viiga masani a William W. Phelps “Si'i Malie Viiga Paia.” [Tatou] te tau le masani i upu faamafanafana o le fuaiupu e fa:

Ua paia lava o le Alii.

Ua Ia fetalai mai: . . .

Ia salamo, te ola ai;

E ui i au agasala,

*A e salamo, na te faamama.*⁵⁶

Ou te valaaulia outou ia manatua ma talitonu i afioga a le Alii ma ia faatino le faatuatua ia te Ia e oo i le salamo.⁵⁷ E alofa o Ia ia te outou. E finagalo o Ia e faamagaloga atu. Ou te molimau atu ai i le suafa paia o Iesu Keriso, amene. ■

FAAMATALAGA

1. Luka 5:17; tagai foi Mareko 2:2.
2. Luka 5:20; tagai foi Mataio 9:2; Mareko 2:5.
3. Tagai Ioane 2:1–11.
4. Tagai Mareko 1:21–28; Luka 4:33–37.
5. Tagai Ioane 4:46–54.
6. Tagai Mataio 8:1–4; Mareko 1:40–45; Luka 5:12–15.
7. Tagai Mataio 8:14–15; Mareko 1:29–31; Luka 4:38–39.
8. Tagai Mataio 8:16–17; Mareko 1:32–34; Luka 4:40–41.
9. Luka 5:22–23; tagi foi Mataio 9:3–5; Mareko 2:6–9.
10. Luka 5:24; faaopoopo le faamamafa; tagai foi Mataio 9:6–7; Mareko 2:10–12.
11. Tagai 1 Korinito 6:9–10; Alema 11:34, 37; Helamana 5:10–11.
12. Tagai 2 Peteru 2:20; Iakopo 2:10; Mataupu Faavae ma Feagaiga 82:7.
13. Tagai Isaia 1:18; Ieremia 31:34; Luka 7:36–50; Enosa 1:5; Alema 24:10; Moronae 6:8; Mataupu Faavae ma Feagaiga 1:32; 58:42–43.
14. Tagai Iakopo 4:7; Alema 14:26; Moronae 10:7.
15. Mosaea 3:19; tagai foi 2 Nifae 10:24–25.
16. Tagai Alema 32:28, 34.
17. Mataio 18:21–22; faaopoopo le faamamafa; tagai foi Luka 17:1–4.
18. Tagai Mataupu Faavae ma Feagaiga 20:5–7; 25:3; 29:3; 31:5; 36:1; 50:36; 60:6–7; 61:2; 62:3; 64:1–4, 5–7, 15–17; 75:6–8; 82:1; 84:60–61; 90:1, 6; 108:1; 110:5; 112:3; 124:74–76, 78; 132:50.
19. Tagai Mataupu Faavae ma Feagaiga 20:5–7; 29:3; 60:6–7; 61:2; 62:3; 64:5–7; 84:60–61; 90:1; 110:5; 132:50.
20. Iosefa Samita—Talafaasolopito 1:28.
21. Mataupu Faavae ma Feagaiga 64:2; faaopoopo le faamamafa.

22. Tagai 1 Nifae 20:9–11; Mataupu Faavae ma Feagaiga 24:2; 50:41; 63:47; 108:1–8.
23. Mataupu Faavae ma Feagaiga 64:3.
24. Mataupu Faavae ma Feagaiga 64:7.
25. Mataupu Faavae ma Feagaiga 1:31; tagai foi fuaiupu 32–33; Alema 45:16.
26. Mataupu Faavae ma Feagaiga 132:27; tagai foi Mataio 12:31; Luka 12:10.
27. Tagai Esoto 20:13; Mosaea 13:21; Mataupu Faavae ma Feagaiga 132:19; Mose 5:31–36.
28. Tagai Alema 39:5; Mataupu Faavae ma Feagaiga 42:24–26.
29. Tagai Mataupu Faavae ma Feagaiga 42:22–26, 75–78, 80–82; 63:13–17; 76:103.
30. Mataupu Faavae ma Feagaiga 82:3; tagai foi Ioane 15:22.
31. Tagai Moronae 6:8.
32. Tagai Mosaea 15:26.
33. Tagai 1 Samuēlu 16:7; Salamo 24:3–4; Faataoto 23:7; Mataio 15:18–20; Mareko 7:20–23; Eperu 3:12; 3 Nifae 12:19; Mataupu Faavae ma Feagaiga 59:8; 64:34.
34. Tagai Mataupu Faavae ma Feagaiga 20:29–30; 121:37.
35. Mataupu Faavae ma Feagaiga 117:11.
36. Tagai Bible Dictionary, “Nicolaitans.”
37. Tagai Faaaliga 2:6, 15.
38. Mataupu Faavae ma Feagaiga 56:15.
39. Tagai 2 Nifae 25:23; Mataupu Faavae ma Feagaiga 138:4.
40. Mose 7:21.
41. Eteru 12:27.
42. Tagai Ioane 15:22; Mataupu Faavae ma Feagaiga 1:33; 82:3.
43. Tagai Alema 41:5–6; 3 Nifae 9:20; Mataupu Faavae ma Feagaiga 137:9.
44. Tagai 1 Nifae 15:33; Alema 41:3–4; Mataupu Faavae ma Feagaiga 137:9.
45. Tagai Mataio 6:14–15; Mataupu Faavae ma Feagaiga 64:8–10; 98:39–48.
46. *Talai La’u Talalelei: O Se Taiala mo le Galuega Faafafeseautalai* (2004), 189.
47. Thomas S. Monson, “Vaai Atu i Isi i Tagata e Mafai ona Avea ai i Latou,” *Liahona*, Nov. 2012, 68, 69; faapoopo le faamamafa.
48. Mataupu Faavae ma Feagaiga 38:10–11, 14; faapoopo le faamamafa.
49. Roma 3:23.
50. Mataupu Faavae ma Feagaiga 62:1; tagai foi Alema 7:12.
51. Mataupu Faavae ma Feagaiga 61:39; faapoopo le faamamafa.
52. Alema 34:18; faapoopo le faamamafa; tagai foi 2 Nifae 31:19; Alema 7:14.
53. Tagai Helamana 13:11; Mataupu Faavae ma Feagaiga 19:4, 13–21.
54. Tagai Mataupu Faavae ma Feagaiga 64:8–10.
55. Mataupu Faavae ma Feagaiga 101:9; faapoopo le faamamafa; tagai foi Mataupu Faavae ma Feagaiga 82:1–7.
56. “Sii Malie Viiga Paia,” *Viiga*, nu. 81.
57. Tagai Alema 34:15–17.



Saunia e Elder M. Russell Ballard

○ Le Korama a Aposetolo e Toasefululua

“O La’u Galuega ma Lo’u Mamalu Lenei”

Ua foai fua mai e le Atua Lona mana ia i latou e taliaina ma faamamaluina Lana perisitua, lea e taitai atu ai i faamanuiaga folafolaina o le tino ola pea ma le ola e faavavau.

Peresitene Packer, ua matou tuli-matai atu uma i le lomiga lona 98 o lena solo matagofie. Oka se matagofie o le aoaoga na ia tuu mai ia i tatou.

I ni nai vaiaso talu ai, i se po malulu ma le pogisa o le taumalulu, sa ma matamata ai ma lo’u toalua o Barbara ma le maofa i le lagi. Sa foliga mai na tulaga ese le susulu ma le matagofie o le faitau miliona o fetu. Ona ou liliu atu lea i le Penina Tautele ma toe faitau ma le maofa le fetalaiga a le Alii le Atua ia Mose: “Ma e le mafaitaulia lalolagi ua Ou foafoaina; ma sa Ou foafoaina foi i latou mo lo’u lava faamoemoe; ma o lo’u Atalii, o lē o la’u Toatasi na Fanaua, na Ou foafoaina ai i latou” (Mose 1:33).

I o tatou aso ua faamautu mai ai e le mea vaai mamao a Hubble i le vanimonimo le taua o mea na vaai ai Mose. Fai mai saienitisi i Hubble, o le Vanimonimo o loo i ai le Malosiaga o le La, lea e avea ai le la ma lo tatou lalolagi na o sona vaega itiiti, ua fuafuaina e na o le tasi i le silia ma le 200 piliona vanimonimo faapenei o loo i ai. Mo au, e faigata ona malamalama i ai, e faigata ona mafaufau i ai,

ona e matua tetelē lava ma anoanoai foafoaga a le Atua.

Uso e ma tuafafine, o le mana lea sa foafoa ai ma o loo foafoa ai lagi ma le lalolagi o le perisitua lea. O tatou o tagata o le Ekalesia ua iloaina o le puna o lenei mana o le perisitua lea a le Atua Silisiliese ma Lona Alo, o Iesu Keriso. E le gata o le mana o le perisitua sa foafoaina ai lagi ma le lalolagi, ae o le mana lava lea na faaaogaina e le Faaola i Lana misiona i la le tino e faatino ai vavega, e faamanuia ai ma faamalolo ē mamai, e faola ai e na oti, ma, i le avea ai ma Alo e Toatasi na Fanaua a lo tatou Tama, na onosaia ai tiga lematatalia i Ketesemane ma Kalevario—o lea na faataunuuna ai tulafono o le faamasinotonu i le alofa mutimutivale ma le sauniaina o le Togiola le i’u ma faatoilalo ai le oti faaletino e ala i le Toetu.

O ki ia o lenei pule o le perisitua ma le mana o loo i ai, ia na Ia tuuina atu ia Peteru, Iakopo, ma Ioane faatasi ai ma isi o Ana Aposetolo e faamanuia ai isi ma fusifusia ai i le lagi mea e fusifusia i le lalolagi.

O le mana o le perisitua o se mea-alofa paia ma le taua a le Atua. E ese



mai i le pule o le perisitua, o le pule lea e galue ai i le suafa o le Atua. O lea pule po o le faauuga e tuuina atu e ala i le faaee atu o lima. O le mana o le perisitua e na o le pau le taimi e oo mai ai pe a faatinoina e i latou e agavaa ma galulue e tusa ma le finagalo o le Atua. E pei ona folafola mai e Perisitene Spencer W. Kimball, “Ua tuuina mai e le Alii ia i tatou uma lava, o e e umiaina le perisitua, se vaega o lana pule, ae faatoa mafai ona tatou faaaogaina mana o le lagi i tulaga o lo tatou amiotonu patino” (“Boys Need Heroes Close By,” *Ensign*, May 1976, 45).

I taimi o aso ofoofogia o le Toefua-taiga ma le toe faatuina o le Ekalesia a Iesu Keriso i le lalolagi i nei aso, na o mai ai Ioane le Papatiso; Peteru, Iakopo, ma Ioane; Mose; Elaia; ma Elia i le lalolagi ma toefuatai mai ki uma o le pule o le perisitua e auala mai ia Iosefa Samita mo le galuega a le Atua i nei aso e gata ai.

Ua auala mai i nei ki, i lenei pule, ma i lenei mana ua faatulaga ai le

Ekalesia a Iesu Keriso i aso nei, faatasi ai ma Keriso i le faauluuluga o loo Ia taitaia Lana perofeta soifua, o Thomas S. Monson, ma lagolagosua i ai Aposetolo na valaauina ma faauuina tatau.

I le fuafuaga sili a lo tatou Tama Faalelagi e maua ai le mana o le perisitua, ua i ai i alii le tiutetauave tupito e taitai ai le perisitua, ae e le o i latou o le perisitua. E eseese matafaioi ae tutusa lava le taua ua i ai i alii ma tamaitai. E pei lava ona le mafai i se tamaitai ona fanauina se tamaitiiti e aunoa ma se alii, e faapena foi, e le mafai i se alii ona faaaogaina atoa le mana o le perisitua e faavae ai se aiga e faavavau e aunoa ma se tamaitai. I se isi faaupuga, i se vaaiga e faavavau, o le mana foafoa atoa ai ma le mana o le perisitua e faaaogaina uma e se tane ma se ava. Ma i le avea ai ma se tane ma se ava, e tatau lava i se alii ma se tamaitai ona taumafai e mulimuli i lo tatou Tama Faalelagi. O uiga mama faa-Kerisiano o le alofa, lotomaualalo, ma le onosai e tatau lava ona avea ma o la

taulaiga a o la saili atu i faamanuiaga o le perisitua i o la olaga ma lo la aiga.

E taua tele mo i tatou le malamalama ua uma ona saunia e le Tama Faalelagi se auala mo Ona atalii ma Ona afafine uma e maua ai faamanuiaga ma faamalosi ai e le mana o le perisitua. E totonugalemu i le fuafuaga a le Atua mo Ana fanau agaga Lana lava Ia tautinoga: “O la’u galuega ma lo’u mamalu lenei—ia aumaia le tino ola pea ma le ola faavavau o le tagata” (Mose 1:39).

I le faaaliga na tuuina atu i le Perofeta o Iosefa Samita i le vaega 81 o le Mataupu Faavae ma Feagaiga, o loo faamalamalama mai ai e le Alii le mana o le perisitua e ao ona faaaogaina e “fesoasoani i e vaivai, sii i luga lima ua tautau i lalo, ma faamalosi tulivae ua vaivai” (fuaiupu e 5).

“Ma o le faia o [ia] mea o le a e faia ai mea lelei silisili atu mo ou uso a tagata, ma o le a e uunai lautele ai le mamalu o ia o le o lou Alii” (MF&F 81:4).

A o tatou mafaufau i ni ata o le fesoasoani atu i e vaivai, sii i luga lima ua tautau i lalo, ma faamalosi tulivae ua vaivai, ou te manatua ai se teineitiiti lelei e fitu tausaga na ia faaali atu i lona tama matua se tamai laau o le tamato na ia amata toto mai se fatu, o se vaega o ana galuega faatino i le vasega lua i le aoga.

Sa ia faamalalalama atu i ai e mai se tamai fatu itiiti e tupu mai ai se laau telē. Ma afai e tausi faalelei le laau, o le a ola ma tele ni tamato e fua mai ai ma tofu ai fua taitasi ma ni fatu se tele.

Sa ia fai mai, “Ma afai e totoina uma na fatu ma toe tupu mai ai nisi tamato se tele, ma totoina foi na fatu uma, i ni nai vaitau o le a e mauaina le faitau miliona o tamato.”

O le upu “*Uma*” sa ia ta’ua ma le maofa, “mai se fatu itiiti e tasi.”

Ona ia fai mai lea, “Ae toeitiiti lava a ou tapeina la’u laau. Sa ou tuua i totonu o se potu pogisa ma galo ai ona fui i le vai. Ina ua ou manatuaina le laau, sa mamae ma foliga a mate. Sa ou tagi ona na ou mafaufau i na tamato uma e faitau miliona o le a le ola lava.”

Sa fiafia o ia e faamatala atu i lona tama matua le “vavega” na tupu.

Sa ia faamalalalama atu, “Sa fai mai Mama atonu e le o mate le laau. Atonu na o le pau le mea o ia manao-mia ua na o se vai ma sina malamalama e toe ola ai.

“Ma sa sa’o o ia. Sa ou fuiina le laau i sina vai ma tuu i le faamalalama mo se malamalama. Ma e te iloa le mea na tupu?” sa ia fesili ai. “Sa toe ola, ma o lea o le a tupu mai ai le faitau miliona o tamato!

O lana tamai laau o le tamato, sa tumu i le gafatia ae sa faavaivaiina ma mamae mai le tuulafoaiina e lei mafau-fauina, sa faamalasia ma tofaaolaina e ala i se auaunaga faigofie a le vai ma le malamalama sa faia e lima agaalofo

ma le popole o se teineitiiti laitiiti.

Uso e ma tuafafine, i le avea ai ma fanau agaga moni a lo tatou Tama Faalelagi agaalofo—ua i ai ia i tatou le gafatia faalelagi e le faatapulaaina. Ae afai tatou te le faaeteete, e mafai lava ona avea i tatou ma tamato ua mamae. E mafai ona tatou see ese mai aoaoga faavae moni ma le talalelei a Keriso ma oo ai ina matelaina faaleagaga ma mamae ai, ona ua tatou aveesea i tatou lava mai le malamalama faalelagi ma le vai ola o le alofa e faavavau o le Faaola ma le mana o le perisitua.

O i latou e umiaina le perisitua ma toilalo e tauivi pea e faamamalu i ai e ala i le auauna atu i aiga ma isi o le a pei lava o i latou e le *mauaina* faamanuiaga o loo i ai i le mana o le

perisitua ma o le a mautinoa lava le mamae faaleagaga, ona ua aveesea mai ia i latou lava ia meaai faaleagaga taua, o le malamalama, ma le mana o le Atua i o latou olaga—e pei lava o le laau o le tamato e tumu i le gafatia ae na tuulafoaiina ma mamae ai.

O le mana lava lea e tasi o le perisitua na foafoa ai lalolagi, vanimonimo, ma le atulaulau e mafai ma e tatau lava ona avea o se vaega o o tatou olaga e fesoasoani atu ai, faamalasia, ma faamanuia ai o tatou aiga, a tatou uo, ma o tatou tuaoi—i se isi faaupuga, o le faia lea o mea o le a faia e le Faaola pe ana faapea o loo Ia auauna ia i tatou i le taimi nei.

Ma o le faamoemoega autu lava o lenei mana o le perisitua, ia faamanuia, faapaia, ma faamama ai i tatou ina ia mafai ona tatou mau faatasi ma o tatou aiga i le afioaga a o tatou matua faalelagi, ua fusia faatasi i faamauga o le perisitua, ma auai i le galuega ofoofogia a le Atua ma Iesu Keriso i le faalateleina pea e faavavau o lo *Lamalalalama* ma le mamalu.

I lea faamoemoega, i ni nai masina talu ai sa ou maua ai le avanoa e auai ai i le pueina o se ata e faatatau i aoaoga mo taitai i le lalolagi atoa e ta’ua o le *Faamalalasia o le Aiga ma le Ekalesia e ala i le Perisitua*.

Ua faaliliuina lenei DVD fou faale-aoaoga i gagana e 66. O loo aoao mai ai le auala e mafai ai e le mana o le perisitua ona faamanuiaina, faamalasia, ma toe faafouina ai o tatou olaga, o olaga o o tatou aiga, ma olaga o tagata uma o le Ekalesia.

Ua faaali mai ai ia i tatou uma—o alii, tamaitai, tamaiti; faaipoipo, o e ua maliliu taitoalua, pe nofofua; po o le a lava o tatou tulaga—le auala e mafai ai ona avea i tatou ma ē mauaina faamanuiaga o le perisitua. E tele ni vaega e tai 8 i le 12 minute le uumi o loo faamalalalama mai ai ki, pule,



ma le mana o le perisitua ma le auala e faamalosia ai tagata taitoatasi, aiga, ma le Ekalesia.

O se tasi o ata faapitoa sa pueina i le tamai fale paionia o le tina o le tina matua o lo'u tina, o Mary Fielding Smith. O ia o le ava a Ailama lea na maliu, le uso matua o le Perofeta o Iosefa. I le avea ai ma se matua nofofua, ma auala mai i le malosi o lona faatuatua i le perisitua, na ia valaauina ai lena mana ma faalagolago i ai e tausai ai ma faamanuiaina ai lana fanau i le alofa ma le malamalama o le tala-lelei. O aso nei o loo faafetaia ai e lana fanau e faitauafe o taitai faamaoni ma tagata o le Ekalesia o ia i lona faatuatua, lototele, ma faataitaiga.

O lenei aoaoga faaletaitaiga ua maua nei i luga o le initoneti i le LDS.org mo tagata uma e maimoa ma faaaafia ai (www.lds.org). E mafai ona e maimoa tuusao i ai mai le LDS.org, pe mafai foi ona e sii maia i lau komepiuta, smartphone, po o le tablet.

Ua talosagaina e le Au Peresitene Sili ia "au peresitene o siteki ma au epikopo ina ia tuuto atu se fonotaga se tasi pe sili atu o aufono a le siteki po o le uarota e maimoa ai i le DVD [atoa]. E tatau i aufono a le siteki ma uarota ona talanoaina pe faapefea ona faatino aoaoga ua tuuina mai ai" (Tusi a le Au Peresitene Sili, 1 Fep., 2013).

O le a musuia ma uunaia e le anotusi ia tagata i korama a le perisitua, Aualofa, Aoga Sa, Tamaitai Talavou, Alii Talavou (aemaise i latou o loo sauniuni mo ni misiona), faapea ai ma fonotaga a le Peraimeri, po o ni faatasiga tuufaatasi o le Aso Sa lona lima. Ona mafai lea e tagata o le aufono ona uunaia tagata taitoatasi ma matua e faaoga lenei aoaoga i o latou aiga. Uso e ma tuafafine, o lenei aoaoga faaletaitaiga e mo tagata uma lava o le Ekalesia. Matua, ia iloilo, fefaasoai, ma talanoaina mea tou te aoaoina ma



lagonaina faatasi ma a outou fanau, ma tuu atu ia i latou e matamata ma faia lea mea e tasi ma outou ina ia mafai ona faamalosia o outou aiga e ala i le perisitua.

Na fetalai Iesu:

"Afai e fia inu se tasi, ina sau ia ia te au e inu ai" (Ioane 7:37).

"A o se inu i le vai ou te avatu ia te ia, e le toe fia inu ia e faavavau; a o le vai ou te avatu ia te ia, e avea i totonu ia te ia o le vaipuna, e puna i luga i le ola e faavavau" (Ioane 4:14).

"O a'u nei o le malamalama o le lalolagi: o lē mulimuli mai ia te au . . . e ia te ia le malamalama o le ola" (Ioane 8:12).

Afai e i ai se tasi o outou e lagonaina ua faaitiitia lou faatuatua po o lau molimau o le fuafuaga a le Tama Faalelagi nai lo le mea e tatau ona i ai, ia e liliu atoa atu nei loa i le Faaola. Tuu atu i Lona malamalama ma Lana vai ola e faia mo oe ma lou aiga le mea na faia e sina vai ma sina malamalama i le toe faaolaina o le laau o le tamato sa mamae.

O lenei, sa ou amata i le ofoofogia ma le maofa o foafoaga a le Atua e ala i le mana o le perisitua. Ou te tu iinei ma tau mafaufau, e pei ona ou manatu e

faapena foi le toatele o outou, pe mata e mafai ona malamalama atoatoa i le mana o le Atua e aoao ai ma faamanuiaina ai i tatou. E matuai maoae lava, mamalu tele, ma matua mamana lava.

Sa saunoa mai Iosefa Samita, "O le Perisitua o se mataupu faavae e faavavau, ma sa i ai lava i le Atua mai le faavavau, ma o le a i ai pea e faavavau, e aunoa ma le amataga o aso po o le iuga o tausaga" (*Aoaoga a Peresitene o le Ekalesia: Iosefa Samita* [2007], 110).

Ua foai fua mai e le Atua Lona mana ia i latou e taliaina ma faamamaluina Lana perisitua, lea e taitai atu ai i faamanuiaga folafolaina o le tino ola pea ma le ola e faavavau.

Ou te molimau atu o le galuega a Iesu Keriso e faataunuuna e ala i le perisitua. O le mana lava lea na foafoaina ai e lo tatou Tama Faalelagi ma Lona Alo Pele lenei lalolagi ma amata ai le fuafuaga sili o le fiafia mo lo tatou manuia. Tau ina ia tatou atamamai ma saili atu i le faamalolosia o o tatou lava olaga, o olaga o o tatou aiga, ma le Ekalesia a Iesu Keriso o le Au Paia o Aso e Gata Ai e ala i le mana o le perisitua a le Atua o la'u tatalo faamaualalo lea, i le suafa o Iesu Keriso, amene. ■



Saunia e Peresitene Henry B. Eyring
Fesoasoani Muamua i le Au Peresitene Sili

“O Mai ia te Au”

E ala i Ana fetalaiiga ma Ana faataitaiga, ua faaali mai ai e Keriso ia i tatou le auala e faalatalata atili atu ai ia te Ia.

Ou te faafetai i le faatasi ai ma outou i lenei konafesi a Le Ekalesia a Iesu Keriso o le Au Paia o Aso e Gata Ai. O Lana Ekalesia lenei. Ua tatou tauaveina i o tatou luga Lona suafa a o tatou ulufale mai i Lona malo. O Ia o le Atua, o Lē Foafoa, ma le atoatoa. O tatou o tagata e noatia i le oti ma le agasala. Ae i Lona alofa mo i tatou ma o tatou aiga, ua Ia valaaulia ai i tatou ia latalata atu ia te Ia. O Lana fetalaiiga lenei: “Faalatalata mai ia te au ma o le a Ou faalatalata atu ai ia te outou; saili mai ia te au ma le filiga ma o le a outou maua ai au; ole mai, ma o le a outou maua ai; tuitui mai, ma o le a tatala atu ai ia te outou.”¹

I lenei vaitau o le Eseta ua faamanatu mai ai ia i tatou le mafuaaga tatou te alolofa ai ia te Ia atoa ai ma le folafolaga ua Ia faia i Ona soo faamaoni ia avea ma Ana uo pele. Sa faia e le Faaola lena folafolaga ma tau mai ia i tatou le auala, i la tatou auaunaga ia te Ia, e afio mai ai o Ia ia i tatou. O se tasi o faataitaiga o loo i se faaaliga ia Oliva Kaotui a o ia auauna atu i le Alii faatasi ma le Perofeta o Iosefa Samita i le faaliuga o le Tusi a Mamona: “Faauta, o oe o Oliva, ma ua Ou tautala atu ia te oe ona o ou manao; o lea ia teu nei upu i lou loto. Ia e faamaoni ma filiga, i le tausiga o poloaiga a le Atua, ma o le a Ou siomia ai oe i lima o lo’u alofa.”²

Sa ou oo i aafiaga o le olioli o le latalata atu i le Faaola atoa ai ma Lona latalata soo mai ia te au e ala i nai faatinoga faatauavaa o le usiusitai i poloaiga.

Ua outou maua foi na aafiaga. Atonu o le taimi sa e filifili ai e auai i se sauniga faamanatuga. Sa ou oo i ai i se Sapati a o ou laitiiti lava. I na aso sa matou maua ai le faamanatuga i se sauniga i le afaifi. O le manatuaina o lea aso e tasi i le silia ma le 65 tausaga talu ai, ina ua ou tausia le poloaiga e faapotopoto faatasi ma lou aiga ma le Au Paia, o loo ou faalatalata atili atu ai pea lava i le Faaola.

Sa pogisa ma malulu fafo. Ou te manatua le lagonaina o le malamalama ma le mafanafana i le falelotu i lena afaifi ma ou matua. Sa matou aai ma feinu i le faamanatuga, na tufa mai e le Au Perisitua Arona, na osifeaiga ai ma lo tatou Tama Faalelagi ia manatua pea Lona Alo ma tausi i Ana poloaiga.

I le faaiuga o le sauniga na matou usuina ai le viiga “Iesu, Se’i E Faatasi Mai,” faatasi ai ma upu o i ai: “Iesu, ia e faatasi mai, ua oo mai le po.”³

Sa ou lagonaina le alofa o le Faaola ma Lona latalata mai i lena afaifi. Ma sa ou lagonaina le mafanafana o le Agaga Paia.

Sa ou manao e toe faamumu tasi lava ia lagona o le alofa o le Faaola ma

Lona latalata mai lea na ou lagonaina i lena sauniga faamanatuga i lou talavou. O lea sa ou tausia ai lata mai nei se isi poloaiga. Sa ou saili i tusitusiga paia. I tusitusiga paia, sa ou iloa na mafai ona ou toe foi i tua ia maua le Agaga Paia ina ia ou lagona ai mea na lagonaina e soo o le Alii toetu ina ua Ia taliaina la laua valaaulia e afio atu i totonu i lo la fale ma faatasi ma i laua.

Sa ou faitau i le aso lona tolu ina ua mavae Lona Faasatauroga ma le tanuga. Sa maua e tamaitai faatuatua faatasi ma isi le maa ua fuliese mai le tuugamau ma vaaia ua le o i ai Lona tino iina. Sa latou o atu i lo latou alolofa mo Ia e faauu Lona tino.

Sa tutu ni agelu se toalua i talaane ma fesili atu pe aisea ua latou fefefe ai, ma faapea atu:

“Se a le mea tou te saili ai le ua soifua i e ua oti?”

“E le o iinei o ia, a ua tu: ia outou manatua i lona fetalai atu ia te outou ina o i Kalilaia o ia,

“Ua faapea atu, E tatau ona tuuina atu o le Atalii o le tagata i lima o tagata agasala, ma ia faasatauroina, ma toe tu mai i le aso tolu.”⁴

Ua faaopopo atu e le Talalelei a Mareko le taitaiga mai se tasi o agelu: “A ia outou o atu, ina tau atu i ona soo atoa ma Peteru, e muamua atu o ia ia te i latou i Kalilaia: tou te iloa ai o ia ia te outou.”⁵

Sa faapotopoto le Au Aposetolo ma soo i Ierusalem. E pei foi e ono tatou oo i ai, sa latou fefefe ma tuufesili a o latou fetalatalaa’i faatasi e faatatau i le uiga ia i latou o Lona maliu ma lipoti o Lona toetu.

E toalua ni soo sa savavali i lena aouli mai Ierusalem i le auala i Emua. Sa faaali atu le Keriso toetu i le ala ma savavali faatasi ma i laua. Sa afio atu le Alii ia i laua.

O le tusi a Luka ua faatagaina ai i tatou e savavali faatasi ma i laua:

“Ua la fetautalatalaai, ma fesueai, ona faalatalata mai ai lea o Iesu, ua o faatasi ma i laua.

“A ua punitia o laua mata, o lea ua le iloa ai o ia e i laua.

“Ua fetalai atu o ia ia te i laua, O a ea ia upu ua oulua felafolafoai ai, o oulua o savavali, ma ua mata faanoanoa?

“O le tasi o i laua e igoa ia Kaleopa, ua tali mai ia te ia, ua faapea mai, Pe na o oe ea lē aumau i Ierusalem ma le le iloa o mea ua tutupu ai i ona po nei?”⁶

Sa la tau atu ia te Ia lo la faanoanoaga ina ua maliu Iesu ae ua la faatua-tuaina o Ia o le Togiola o Isaraelu.

Atonu sa i ai se aafiaga i le siufogoga o le Alii toetu a o Ia fetalai atu i nei soo e toalua faanoanoa ma le faavavau:

“Ona fetalai atu lea o ia ia te i laua, O tagata valea, ma lotu faigata ona talitonu i mea uma ua fai mai ai e le au perofeta:

“E le tatau ea ona tiga o le Keriso i mea faapena, i le oo ai o ia i lona mamalu?

“Ona faamatala ai lea e ia ia te i laua o mea ua tusia ia te ia i Tusi uma, ua amata mai ia Mose atoa ma le au perofeta uma.”⁷

Ona oo mai lea o se taimi na faamafanafanaina ai lou lotu talu lo’u tamaitiiti:

“Ua latou faalatalata atu i le aai ua latou o i ai; a o ia ua aga atu peiseai a alu loa.

“A ua la pulunaunau ia te ia, ua faapea mai, Tatou te nonofo ma i maua nei; aua ua taugagaifo le la, ua lata i le afaifi. Ona ulufale atu lea o ia, latou te nonofo.”⁸

Sa talia e le Faaola i lena po le valaulaia e ulufale atu i le fale a Ona soo e latalata i le nuu o Emau.

Sa Ia taumafa faatasi ma i laua. Sa ave le areto, faamanuia, ona vavae lea, ma tuu atu ia i laua. Na matala o la



mata ona la iloa ai lea o Ia. Ona mou ese lea o Ia mai le la vaa. Sa tusia e Luka mo i tatou ia lagona o na soo faamanuiaina: “Ona la fetalatalaai lea, E lei mu ea o ta lotu i totonu ia i taua, ina ua fetalai o ia ia te i taua i le ala, ina ua faamatala mai foi e ia o Tusi ia te i taua?”⁹

I lena lava itula na faataalise atu ai ia soo e toalua i Ierusalem e tau atu i Aposetolo e toasefulutasi lea mea ua tupu ia i laua. I lena taimi na toe faaali atu ai le Faaola.

Na Ia toe iloilo ina valoaga o Lana misiona e togiola mo agasala a fanau uma a Lona Tama ma motusia noataga o le oti.

“Ua fetalai atu foi o ia ia te i latou, Ua faapea ona tusia, e faapea foi ona tatau ina tiga o le Keriso, ma toe tu nai e ua oti i le aso tolu:

“Ina ia talaiina foi le salamo ma le faamagaloina o agasala i nuu uma i lona igoa, e amata mai i Ierusalem.

“O molimau foi outou i nei mea.”¹⁰

O le fetalaiaga a le Faaola e moni lava mo i tatou e pei foi ona i ai mo Ona soo i na aso. O i tatou o molimau o nei mea. Ma o le poloaiga mamalu na tatou taliaina ina ua papatisoina i tatou i Le Ekalesia a Iesu Keriso o le

Au Paia o Aso e Gata Ai na faamaino mai lava ia i tatou e le perofeta o Alema i seneturi ua mavae i vai o Mamona:

“Ma sa oo ina fai atu o ia ia te i latou: Faauta, o vai nei o Mamona (ona sa faapea ona ta’ua o ia vai) ma o lenei, ona ua outou manao e o mai i le lafu a le Atua, ma ta’ua o ona tagata, ma outou lotu e tauave avega a le tasi, ina ia māmā;

“Toe, ma outou lotu e faanoanoa faatasi ma e faanoanoa; ioe, ma faamafanafana atu ia te i latou o e e manaomia le faamafanafana, ma tutu o ni molimau a le Atua i taimi uma ma i mea uma, ma i nofoaga uma atonu tou te i ai, seia oo lava i le oti, ina ia mafai ona togiolaina outou e le Atua, ma faitauina faatasi ma i latou o le uluai toetutu, ina ia mafai ona outou maua le ola e faavavau—

“O lenei ou te fai atu ia te outou, afai o le manao lea o o outou lotu, se a se mea tou te tetee ai i le papatisoina i le suafa o le Alii, o se molimau i ona luma ua outou ulu atu i se feagaiga faatasi ma ia, o le a outou auauna atu ia te ia ma tausi ana poloaiga, ina ia mafai ona liligi atili tele mai e ia lona agaga i luga o outou?”



“Ma o lenei ina ua faalogo mai tagata i nei upu, sa pati o latou lima i le olioli, ma alalaga mai: O le manao lea o o matou loto.”¹¹

Ua tatou osifeagaiga e le gata i le sii ae i luga o e mafatia ae ia avea foi ma molimau o le Faaola i le umi tatou te ola ai.

O le a mafai ona tatou faia e aunoa ma le toilalo a o tatou lagonaina le alofa mo le Faaola ma Lona alofa mo i tatou. A tatou faamaoni i folafolaga ua tatou osia, o le a tatou lagonaina le faateleina o lo tatou alolofa mo Ia. O le a tatou lagonaina Lona mana ma Lona latalata mai ia i tatou i Lana galuega.

Ua faamanatu mai e Peresitene Thomas S. Monson ia i tatou i le tele o taimi le folafolaga a le Alii i Ona soo faamaoni: “Ma ai se talia outou, o iina o le a Ou i ai foi, ona o le a Ou alu muamua atu i o outou luma. O le a Ou i ai i lo outou lima taumatau ma lo outou agavale, ma o le a i ai lo’u Agaga i o outou loto, ma si’o faataamilo outou e a’u agelu, e sapaapapai outou i luga.”¹²

O loo i ai se isi ala tatou te lagonaina ai Lona faalatalata atili mai ia i tatou. A tatou tuu atu ni auunaga tuuto ia te Ia, e faalatalata atili mai o Ia ia i latou tatou te alolofa i ai i o tatou aiga. O taimi uma e valaauina ai au i le galuega a le Alii e siitia ese pe tuua foi lo’u aiga, ou te vaaia ai lava

le faamanuiaina e le Alii o lou toalua ma lau fanau. Na te sauniaina ni Ana auauna agaalofa ma ni avanoa e faalatalata atili atu ai lo’u aiga ia te Ia.

Ua outou lagonaina foi lena faamanuiaga e tasi i o outou olaga. O le toatele o outou o loo i ai ni e pele o loo fesetasi solo i le ala i le ola e faavavau. E te mafaufau po o le a se isi mea e mafai ona e faia e toe faafoi mai ai i latou. E mafai ona e faalagolago i le Alii ia faalatalata atili atu ia i latou a o e auauna atu ia te Ia i le faatuatua.

Tou te manatua le folafolaga a le Alii ia Iosefa Samita ma Sini Rikitone ina o malaga ese i laua mai o la aiga i Lana galuega: “A’u uo o Sini ma Iosefa, o loo manuia o ouluga aiga; ua i ai i latou i o’u lima, ma o le a Ou faia ia te i latou e pei ona lelei ia te a’u; ona ua i ai ia te a’u le mana uma.”¹³

E pei foi o Alema ma le Tupu o Mosaea, o nisi o matua faamaoni o e o loo auauna atu ma le lelei tele i le Alii mo se taimi umi ae o loo i ai ni fanau o loo se ese e ui i le ositaulaga a o latou matua mo le Alii. O loo latou faia mea uma latou te mafaia, ae foliga mai e le o tauia a latou taumafaiga, e oo lava i fesoasoaniga mai uo agaalofa ma faamaoni.

Sa tatalo Alema ma le Au Paia i ona aso mo ona atalii ma atalii o le Tupu o Mosaea. Sa oo mai ai se agelu. O a outou tatalo ma tatalo a i latou o loo faatinoina lo latou faatuatua o le

a aumaia ai auauna a le Alii e fesoasoani i tagata o o outou aiga. O le a latou fesoasoani ia i latou e filifili le ala e toe foi ai i le aiga i le Atua, e tusa lava pe o loo osofaia i latou e Satani ma ana au, o lona faamoemoega o le faaumatia lea o aiga i lenei olaga ma i le faavavau.

Tou te manatua upu na fetalai e le agelu ia Alema le Itiiti ma atalii o Mosaea i lo latou fouvale: “Ma lea foi, sa fetalai mai le agelu: Faaui, ua faafogaina e le Alii talosaga a lona nuu, ma talosaga foi a lana auauna, o Alema, o le o lou tamā; ona sa tatalo atu o ia ma le faatuatua tele e uiga ia te oe, ina ia mafai ona aumai o oe i le malamalama o le upumoni; o lea, o le pogai lea ua ou sau ai, e faatalitonu oe i le mana ma le pule a le Atua, ina ia tali talosaga a ana auauna, e tusa ma lo latou faatuatua.”¹⁴

O la’u folafolaga ia te oe o loo tatalo ma auauna atu i le Alii e le mafai ona faapea o le a e maua uma faamanuiaga e te momoo i ai mo oe lava ma lou aiga. Ae e mafai ona ou folafola atu ia te oe o le a latalata atili atu le Faaola ia te oe ma faamanuia ia te oe ma lou aiga i le mea sili. O le a e maua le mafanafana o Lona alofa ma lagona le tali o Lona latalata atili atu ia te oe a o e aapa atu ou lima e auauna atu ai i isi. A o e fusifusi i manua o i latou o e mafatia ma ofo atu le faamamaina o Lana Togiola ia i latou o e faanoanoa i agasala, o le a lagolagoina oe e le mana o le Alii. O loo faalaloa atu Ona aao faatasi ma ou lima e fesoasoani ai ma faamanuia le fanau a lo tatou Tama Faalelagi, e aofia ai i latou i lou aiga.

O loo i ai se feiloaiga mamalu i le aiga ua saunia mo i tatou. O le a tatou iloaina i lena taimi le faataunuuina o le folafolaga a le Alii o loo tatou faame-melo i ai. O Ia lava lea o le a faafeiloaia i tatou i le ola e faavavau faatasi



Los Angeles, Kalefonia, ISA

ma Ia ma lo tatou Tama Faalelagi. Sa faamatalaina e Iesu Keriso i lenei ala:

“Saili e aumai i luma ma faatu la’u Siona. Tausi i a’u poloaiga i mea uma.

“Ma, afai e te tausia a’u poloaiga ma tumau e oo i le iuga, o le a e maua le ola e faavavau, le meaalofo silisili lea o meaalofo uma a le Atua.”¹⁵

“Aua o i latou o e e ola e fai mo o latou tofi le lalolagi, ma o e e oti o le a malolo mai ia latou galuega uma, ma o le a mulimuli atu a latou galuega ia te i latou; ma o le a latou maua se pale i maota o lo’u Tama, ua Ou saunia mo i latou.”¹⁶

Ou te molimau atu tatou te mafaia e ala i le Agaga ona mulimuli i le valaaulia a le Tama Faalelagi: “O Lo’u Atalii Pele lenei. Faalogo ia te Ia!”¹⁷

E ala i Ana fetalaiga ma Ana faa-taitaiga, ua faaali mai ai e Keriso ia i tatou le auala e faalatalata atili atu ai ia te Ia. O le a maua e fanau uma a le Tama Faalelagi o e filifili e ulufale atu i Lana Ekalesia e ui atu i le faitotoa o le papatisoga le avanoa i lenei olaga

e aoaoina ai i Lana talalelei mai i Ana auauna valaauina Lana valaaulia, “O mai ia te au.”¹⁸

O Ana auauna uma ua osifeagaiga i totonu o Lona malo i le lalolagi, ma i le lalolagi o agaga, o le a mauaina Lana taitaiga mai le Agaga a o latou faamanuia atu ma auauna atu i isi mo Ia. Ma o le a latou lagonaina Lona alofa, ma maua le olioli o le faalatalata atili atu ia te Ia.

O au o se molimau o le Toetu o le Alii ma le mautinoa e pei sa ou i ai iina i le afiafi faatasi ma soo e toalua i le fale i le ala i Emau. Ou te iloa o loo soifua o Ia ma le mautinoa e pei o Iosefa Samita ina ua ia vaai i le Tama ma le Alo i le malama o se taeao susulu i le togavao i Palamaira.

O le Ekalesia moni lenei a Iesu Keriso. Ua na o ki lava o le perisitua o loo umia e Peresitene Thomas S. Monson o i ai le mana mo i tatou e faamau ai i aiga ina ia ola ai e faavavau faatasi ma lo tatou Tama Faalelagi ma le Alii o Iesu Keriso. O le a tatou

tutu faafesagai i le Aso o le Faamasi-noga i luma o le Faaola. O le a avea ma se taimi o le olioli mo i latou o e latalata atu ia te Ia i Lana galuega i lenei olaga. O le a avea ma se mea fiafia le faalogo atu i upu: “Le auauna lelei e ma le faamaoni.”¹⁹ Ou te moli-mau atu ai o se molimau o le Faaola toetu ma lo tatou Togiola i le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 88:63.
2. Mataupu Faavae ma Feagaiga 6:20.
3. “Iesu; Se’i E Faatasi Mai,” *Viitaga*, nu. 93.
4. Luka 24:5–7.
5. Mareko 16:7.
6. Luka 24:15–18.
7. Luka 24:25–27.
8. Luka 24:28–29.
9. Luka 24:32.
10. Luka 24:46–48.
11. Mosaea 18:8–11.
12. Mataupu Faavae ma Feagaiga 84:88.
13. Mataupu Faavae ma Feagaiga 100:1.
14. Mosaea 27:14.
15. Mataupu Faavae ma Feagaiga 14:6–7.
16. Mataupu Faavae ma Feagaiga 59:2.
17. Iosefa Samita—Talafaasolopito 1:17.
18. Mataio 11:28.
19. Mataio 25:21.



Fofogaina e Peresitene Dieter F. Uchtdorf
Fesoasoani Lua i le Au Peresitene Sili

O Le Lagolagoina o Taitai o le Ekalesia

Etuuina atu ina ia tatou lagolagoina Thomas Spencer Monson o se perofeta, tagatavaai, ma talifaaaliga ma le Peresitene o le Ekalesia a Iesu Keriso o le Au Paia o Aso e Gata Ai; Henry Bennion Eyring o le Fesoasoani Muamua i le Au Peresitene Sili; ma Dieter Friedrich Uchtdorf o le Fesoasoani Lua i le Au Peresitene Sili.

O i latou e finagalo ai ia faailoa mai.

O i latou e au ese ai pe afai e i ai, faailoa mai.

E tuuina atu ia tatou lagolagoina Boyd Kenneth Packer o le Peresitene

o le Korama a Aposetolo e Toasefululua ma uso nei o lena korama: Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, ma Neil L. Andersen.

O i latou e finagalo ai, faamolemole ia faailoa mai.

A i ai se faatuiese ia faailoa mai.

E tuuina atu ia tatou lagolagoina ia fesoasoani i le Au Peresitene Sili ma Aposetolo e Toasefululua o ni perofeta, tagatavaai, ma talifaaaliga.

O i latou uma e finagalo ai, faailoa mai.

O e faatuiese, pe a fai o i ai, i le faailoga lava lea.

Ua faamalolo mai Elder Walter F. González o se uso o le Au Peresitene o Korama a Fitugafulu.

O i latou e fia aufaatasi ma i matou e tuu atu le agaga faafetai, faamolemole ia faailoa mai.

E tuuina atu ina ia tatou lagolagoina Elder Ulisses Soares o se uso o le Au Peresitene o Korama a Fitugafulu.

O i latou uma e finagalo ai, faailoa mai.

O i latou e au ese ai, pe afai e i ai.

E tuuina atu ina ia faamalolo mai Fitugafulu Eria nei i le aso 1 o Me, 2013: Rubén V. Alliaud, Sergio M. Anaya, Nolan D. Archibald, Carlos L. Astorga, Hector Avila, M. Anthony Burns, David Cabrera, Milton Camargo, Robert E. Chambers, Victor Kah Keng Chen, Kuo Chiang Chung, Nelson D. Córdoba, Gary L. Crittenden, Edward Dube, Matthew J. Eyring, Sione M. Fineanganofa, Alfredo L. Gessati, James B. Gibson, Jovencio A. Guanzon, Mario E. Guerra, Luis S. Hernandez, Hernan I. Herrera, Javier Ibañez, Paulo H. Itinose, Douglas W. Jessop, Stephen C. Kerr, Joni L. Koch, Faustino López, Richard K. Melchin, Freebody A. Mensah, Benson E. Misalucha, Abelardo Morales, W. T. David Murray, K. Brett Nattress, S. Gifford Nielsen, Satoshi Nishihara, Michael D. Pickerd, William F. Reynolds, Michael A. Roberts, Fernando A. R. Da Rocha, Manfred Schütze, Terrence C. Smith, Rubén L. Spitale, Joshua Subandriyo, Frank V. Trythall, Miguel R. Valdez, Arnulfo Valenzuela, Carlos A. C. Villanova, Terence M. Vinson, Louis Weidmann, and Richard C. Zambrano.

O i latou e fia auai faatasi ma i matou i le tuuina atu o le agaga





faafetai mo la latou auaunaga maoae, faamolemole ia faailoa mai.

E tuuina atu ia faamalolo mai ma le agaga talisapaia tele ia Sisters Elaine S. Dalton, Mary N. Cook, ma Ann M. Dibb o le au peresitene aoao o Tamaitai Talavou.

E faapena foi ona tuuina atu e faamalolo sui uma o le fono faatonu aoao o Tamaitai Talavou.

O i latou uma e fia auai ma i matou i le tuuina atu o le agaga talisapaia i nei tuafafine mo la latou auaunaga maoae ma le tuuto, faamolemole ia faailoa mai.

E tuuina atu ina ia tatou lagolagoina e avea ma uso fou o le Korama Muamua a Fitugafulu ia Edward Dube, S. Gifford Nielsen, ma Arnulfo Valenzuela; ma e avea ma uso fou o le Korama Lua a Fitugafulu, Timothy J. Dyches, Randy D. Funk, Kevin S. Hamilton, Adrián Ochoa, ma Terence M. Vinson.

O i latou uma e finagalo ai, faailoa mai.

O i latou e au ese ai, i lea lava faailoga.

Ona o lona valaauga o se tasi o le Korama Lua o Fitugafulu, matou te faamalolo mai ai foi ia Uso Adrián Ochoa o le fesoasoani lua i le au peresitene aoao o Alii Talavou.

O i latou e fia tuuina atu le agaga faafetai ia faaali mai.

E tuuina atu ina ia tatou lagolagoina i latou nei e avea ma Fitugafulu Eria: Ruben Acosta, Frederick O. Akinbo, Omar A. Alvarez, Sergio Antunes, Alan C. Batt, Grant C. Bennett, Fernando E. Calderón, Wilson B. Calderón, H. Marcelo Cardus, Yoke Sang (Freddie) Chan, Christopher Charles, Valeri V. Córdón, Paul R. Coward, M. T. Ben Davis, Massimo De Feo, Marion B. De Antuñano, Francisco J. Ruiz de Mendoza, Robert A. Dryden, Robert J. Dudfield, Daniel F. Dunnigan, Jeffrey D. Erikson, E. Xavier Espinoza, Meliula M. Fata, Sam M. Galvez, Claude R. Gamiette, Mervyn C. Giddey, João R. Grahl, David P. Homer, Daniel W. Jones, John A. Koranteng, Steven O. Laing, Axel H. Leimer, Gustavo Lopez, José E. Maravilla, Alfredo Miron, Hugo Montoya, Joaquim J. Moreira, Katsuyuki Otahara, José C. Pineda, Gary S. Price, Miguel A. Reyes, Gary B. Sabin, Alfredo L. Salas, Netzahualcoyotl Salinas, Ciro Schmeil, D. Zackary Smith, Michael L. Southward, G. Lawrence Spackman, Vern P. Stanfill, William H. Stoddard, Stephen E. Thompson,

George J. Tobias, 'Aisake K. Tukuafu, Jacques A. Van Reenen, Raul E. Vicencio, Raul S. Villanueva, Alan R. Walker, Keith P. Walker, ma Hoi Seng Leonard Woo.

O i latou uma e lagolagoina, faailoa mai.

I latou e faatuiese ai, pe afai e i ai.

E tuuina atu ia tatou lagolagoina ia Bonnie Lee Green Oscarson e avea ma peresitene aoao o Tamaitai Talavou, faatasi ai ma Carol Louise Foley McConkie e avea ma fesoasoani muamua ma Evelyn Neill Foote Marriott o le fesoasoani lua.

O i latou e finagalo ai ia faailoa mai.

A i ai se faatuiese faailoa mai.

E tuuina atu ia tatou lagolagoina isi Au Pulega Aoao, Fitugafulu Eria, ma au peresitene aoao o ausilali e pei ona i ai nei.

O i latou e finagalo ai, ia faailoa mai.

A i ai se faatuiese ia faailoa mai.

Faafetai atu, uso e ma tuafafine, mo la outou palota lagolago ma mo lo outou faatuatua ma tatalo faifai pea mo i matou.

Matou te valaau atu i le Au Pulega Aoao faatoa tofia ma le au peresitene aoao o Tamaitai Talavou e susu mai i o outou ava i luga nei. ■

Lipoti a le Matagaluega Suetusi, 2012

Fofogaina e Robert W. Cantwell

Pule Faatonusili, Matagaluega Suetusi a le Ekalesia

I Le Au Peresitene Sili o Le Ekalesia a Iesu Keriso o le Au Paia o Aso e Gata Ai

Uso Pele: E pei ona faamanino mai i le faaaliga o loo i le vaega e 120 o le Mataupu Faavae ma Feagaiga, o le Aufono e Faafoeina ia Sefuluai, e faatagaina tupe faaalu o tupe a le Ekalesia. O lea aufono e aofia ai le Au Peresitene Sili, o le Korama a Aposetolo e Toasefululua, ma le Au Epikopo Pulefaamalumalu.

O lenei aufono latou te faamaonia ia paketi mo matagaluega a le Ekalesia, o ana galuega fai, ma aofaiga ua faamatuu atu i iunite faale-ekalesia. O tupe faaalu i polokalama a le Ekalesia e ogatusa ma paketi ua faamaonia ma e tusa ai ma aiaiga ma faiga faavae a le Ekalesia.

Ua tuuina mai i le Matagaluega Suetusi a le Ekalesia le faatagaga e maua ai faamaumauga uma ma polokalama e tata ai, ina ia iloilo ai le tulaga solo lelei o le faafoeina o tupe maua, o tupe faaalu, ma le

malupuipua o aseta a le Ekalesia. E tutoatasi lava le Matagaluega Suetusi a le Ekalesia mai isi matagaluega uma ma galuega a le Ekalesia ma o le afaigaluega e aofia ai tausitusi lautele ua faamaonia, o suetusi faamaonia mai le lotoifale, o suetusi faamaonia o polokalama faakomepiuta, ma isi tamalii faapolofesa ua faamaonia.

E faavae i luga o suetagatusi ua uma ona faatino, ua i ai nei i le Matagaluega Suetusi a le Ekalesia le manatu, o mea uma, o saofaga na tauaaoina, o tupe na faaalu, ma aseta a le Ekalesia mo le tausaga 2012, sa tusi faamaumu ma taulimaina e tusa ai ma faiga faatausitusi talafeagai, o paketi sa faamaonia, ma aiaiga ma faiga faavae a le Ekalesia.

E tuuina atu ma le faaaloalo lava, Matagaluega Suetusi a le Ekalesia
Robert W. Cantwell
Pule Faatonusili ■

Lipoti Faafuainumera, 2012

Tuuina atu e Brook P. Hales

Failautusi i le Au Peresitene Sili

Mo le silafia e tagata o le Ekalesia, ua tuuina mai e le Au Peresitene o le Ekalesia le lipoti faafuainumera lenei e tusa ai ma le faatupulaia ma le tulaga o i ai le Ekalesia i le aso 31 o Tesema, 2012.

Iunite o le Ekalesia

O Siteki.....	3,005
O Misiona.....	347
O Itu.....	591
O Uarota ma Paranesi.....	29,014

Faitau Aofai o le Ekalesia

Aofaiga o Tagata o le Ekalesia.....	14,782,473
Tamaiti Fou o Faamaumauga i le 2012.....	122,273
Papatisoga Liliu Mai i le 2012.....	272,330

Faifeautalai

Faifeautalai Faamisiona.....	58,990
Faifeautalai o Auaunaga a le Ekalesia.....	22,961

O Malumalu

O malumalu na faapaiaina i le 2012 (Kansas City Missouri, Manaus Brazil, Brigham City Utah, ma Calgary Alberta).....	4
O malumalu na toefaapaiaina i le 2012 (Buenos Aires Argentina ma Boise Idaho).....	2
Malumalu o loo Faaogaina.....	140





Saunia e Elder Richard G. Scott

○ Le Korama a Aposetolo e Toasefululua

Mo Le Filemu i le Aiga

O se tasi o faamanuiaga silisili e mafai ona tatou ofoina atu i le lalolagi, o le mana lea o se aiga e faatotonugalemu ia Keriso lea e aoaoina ai le talalelei, tausia ai feagaiga, ma ola lauusi ai le alofa.

○ le anoanoai o leo mai le lalolagi o loo tatou ola ai, ua latou ta'u mai ia i tatou e tatau ona tatou ola saosasoa. E tele isi mea e tatau ona fai ma isi foi mau mea ia ausia. Ae peitai, o loo i le taele o o tatou loto taitoatasi se manaomia ona i ai o se nofoaga o le sulufaiga lea e i ai le toafilemu ma le toafimalie, se nofoaga e mafai ona toe faatulaga, toe faavasega, ma toe maua ai le faasiliga malosi e saunia ai mo faaifitauli i le lumanai.

O le nofoaga lelei lava mo lena toafilemu o totonu lava o puipui o o tatou lava fale, lea na tatou faia ai mea uma tatou te mafaia e faatotonugalemu ai le Alii o Iesu Keriso.

O nisi o aiga o loo i ai se tamā o se tagata agavaa ua umia le perisitua faatasi ai ma se tina faamaoni ma tuuto la te taitai faatasi i le amiotonu. O le tele o aiga e eseese ituaiga faatulagaga. E tusa lava po o a ou tulaga ae e mafai ona e faatotonugalemuina lou aiga ma lou olaga i le Alii o Iesu Keriso, aua o Ia o le puna o le filemu moni i lenei olaga.

Ia mautinoa o faaiuga uma e te faia, e tusa pe faaletino pe faaleagaga, e faavae i le mea e finagalo le Faaola e te faia. A avea o Ia ma totonugalemu o lou aiga, e i ai le filemu ma le toafimalie. E i ai se agaga o le faamautinoaga

lea e siomia ai le aiga, ma e lagonaina e tagata uma e nonofo ai iina.

O le faataunuuga o lenei fautuaga e le faapea na o matua e pa'ū i ai, e ui o la laua matafaioi o le taitai. E mafai ona nafa le fanau ma le faaleleia atili o taumafaiga i totonu o le aiga ia taulai atu ia Keriso. E taua i matua ona aoao le fanau ia iloa auala e aafia ai tagata taitoatasi e nonofo i le aiga i a latou amioga. O fanau o e faia, ia latou lagona e faamasinoina i latou i a latou amioga, pe amiotonu pe leai, e tutupu ae ma avea ma tagatanuu tauaogaina i le malo o le Atua.

Ou te mautinoa e mafai ona e iloa mataupu faavae taua o loo faatotonugalemu ai le Faaola i lou aiga. O le fautuaga faaperofeta e fai tatalo faaletagata lava ia ma faaleaiga i aso uma, suesueina e le tagata lava ia ma faaleaiga o tusitusiga paia, ma afiafi faaleaiga faalevaiaso o laau faalalava taua ia e tauaveina le mamafa o le fausia o se fale e faatotonugalemu ia Keriso. A aunoa ma nei faiga masani o le a faigata ona maua le filemu lea e matuai naunau i ai ma manaomia e avea ma sulufaiga mai le lalolagi.

Ia usiustai i aooga faaperofeta ua finagalo Keriso e te mulimuli ai. Aua le faataatiaesea le fiafia i le lumanai e ala



Sini, Ausetalia

i le uia o auala 'alo nai lo le faaaogaina o mataupu faavae atoatoa o le talalelei. Manatua: o mea laiti e oo atu ai i mea tetele. O nai faatamala e foliga mai e laiti po o le le ano i ai, e mafai ona oo atu ai i faaifitauli ogaoga. Ae e sili atu le taua, o mausa faigofie, faifai pea, ma lelei e oo atu ai i se olaga e tumu i faamanuiaga.

Outou le fanau i le Peraimeri, outou alii ma tamaitai talavou i polokalama a le autalavou, ma outou faifeautalai faamaoni o loo auauna i le taimi nei ua faia ni mea se tele i ni auala sili atu ona faamanuiaina nai lo mea sa mafai ona ou faia a'o ou matua pei o outou. I le muai olaga sa outou faamaonia ai lo outou totoa, usiustai, ma mama. O iina, sa outou galulue malosi ai e atiina ae taleni ma tomai e saunia ai outou e feagai ma le lalolagi ma le lototetele, taua o le tagata lava ia, mamalu, ma le faamanuiaina.

E le'i mamao atu na outou o mai ai i le lalolagi nei ma na gafatia uma

matagofie ma avanoa e le uma. Ae o loo i ai se tulaga lamatia moni i le siosiomaga ua siomia ai outou. O o outou gafatia ma tomai e mafai ona faatapulaaina pe faatamaiaina pe afai tou te gauai atu i mea leaga ua faaoso-fia e le tiapolo lea ua siomia ai outou. Ae peitai, o Satani e le taitai tutusa ma le Faaola. Ua uma ona iloa le iuga o Satani. Ua ia iloa ua toilalo o ia, ae o loo manao e faaleaga ni tagata se toatele na te mafaia. O le a taumafai o ia e faaleaga lou tagata lelei ma gafatia e ala i le faaoga sese o ou vaivaiga. Tumau i le itu a le Alii, ma o le a e manumalo ai i taimi uma.

Ua outou i ai se lalolagi ua matuai saosaoa lava i mea faatekinolosi. E faigata i le toatele o la matou tupulaga ona tulituli atu ia taumua tutusa ma avanoa. E faalagolago i le auala e faaoga ai tekinolosi, o nei atinaega e mafai ona avea ma se faamanuiaga po o se maagao. O le tekinolosi, pe a malamalama i ai ma faaogaina mo faamoemoega amiotonu, e le tataua ona avea ma se mea taufaamatau ae o se faaleleia atili ai o fesootaiga faaleagaga.

Mo se faataitaiga, o le toatele o i tatou ua i ai ni masini patino faaeletonika lea e ofi i totonu o a tatou taga. E seāseā mamulu ese ma i tatou; e tele ni taimi o le aso tatou te fetagofi atu i ai. O le mea e leaga ai, o nei masini e mafai ona avea ma puna o mea ele-elea ma faama'imau taimi. Ae, a pulea lelei le faaogaina, o nei tekinolosi e mafai ona avea ma se meafaigaluega o le puipuiga mai mea e sili ona leaga e fai e tagata.


O ai na manatu i tausaga e le'i mamao atu o le a ofi i totonu o lau taga ia tusitusiga faavae uma ma savali o konafesi aoao ua autausagā? O le na o le tuu o ia mea i lau taga o le a le puipuia ai oe, ae o le suesue, mafaufau loloto, ma le faalogologo i ai i taimi

paganoa i aso uma, o le a faaleleia atili ai fesootaiga e ala i le Agaga.

Ia atamai i le ala e te taulima ai tekinolosi. Faailoga mau taua i lau masini ma ia toe alu soo i ai e faitau. Afai e faitau soo e outou na tagata talavou ni mau i luga o lau masini e pei o le tele o taimi e auina atu ai e nisi o outou ia savali i tesi, o le a le umi ae outou taulotoina ni mau se fia selau. O na fuaitau o le a faamaonia le avea ma punavai malosi o musumusuga ma taitaiga a le Agaga Paia i taimi o faafitauli.

O le faia o mea uma tatou te mafaia e valaaulia ai le faatosinaga agamalu, tialaina a le Agaga Paia i totonu o o tatou olaga, e taua tele i a tatou taumafaiga e faatotonugalemu o tatou aiga i le Faaola. O le faia ma le usiusitai o na uunaiga e atili faamalolosa ai i tatou.

O le a oo atu ia te oe le filemu sili atu pe a fai faatasi au taumafaiga e usiusitai ma auauna atu ia i latou o siomiaina oe. E toatele naua tagata taitoatasi o e ua i ai le manatu e faapea e faaletalenia, e faaogaina ma le lotomauualalo ma le agalelei na taleni



e faamanuiaina ai olaga o ē e siomiaina i latou. O le manatu faapito o le pogai lea o le amioleaga tele. O le vaifofo i lena amioleaga, o loo faaaliamanino mai lava i le soifuaga o le Faaola. Ua ia faaaliamai le ala e taulai atu ai la tatou auauauna i isi.

Ua ou aoaoina se upumoni ua faafia ona ta'ua soo i lo'u olaga ua ou iloa ai o se tulafono atoatoa lava. Ua faamatalaina ai le ala e fesootai ai le usiusitai ma le auauna atu i le mana o le Atua. A tatou usitai i poloaiga a le Alii ma auauna atu i Ana fanau ma le le manatu faapito, o le taunuuga masani lava o le mana mai le Atua: o le mana e fai ai mea e tele atu nai lo o mea e mafai ona tatou faia na o i tatou lava. O o tatou manatu, a tatou taleni, o tatou tomai o le a faalauteleina ona ua tatou maua le malosi ma le mana mai le Alii. O Lona mana o se vaega taua e faavae ai se aiga e tumu i le filemu.

A o e faatotonugalemuina lou aiga i le Faaola, o le a mautinoa lava le avea ma se sulufaiga e le gata i lou lava aiga ae faapena foi i uo o e e nonofo i tulaga e sili atu ona faigata. O le a latou tosina atu i le toafimalie latou te lagonaina iina. Ia talia ituaiga uo faapena i totonu o lou maota. O le a latou tutupu ae ma alualu i luma i totonu o lena siosiomaga e taulai atu ia Keriso. Ia faauo atu i uo a lau fanau. Ia avea oe ma faataitaiga agavaa mo i latou.

O se tasi o faamanuiaga silisili e mafai ona tatou ofoina atu i le lalolagi, o le mana lea o se aiga e faatotonugalemu ia Keriso lea e aoaoina ai le talalelei, tausia ai feagaiga, ma ola lauusi ai le alofa.

O ni tausaga ua mavae, ina ua mavae se asiasiga taamilo i se misi-ona, sa faamatala mai ai lo'u toalua o Jeanene, e uiga i se alii faifeautalalai sa la feiloai. Sa fesili i ai Jeanene e uiga i lona aiga. Sa te'i o ia i lana tali mai e leai sona aiga. Sa ia faamatala atili



Aai o Niu loka, Niu loka, ISA

mai e faapea, i lona fanau mai, sa ave o ia e lona tina i le malo e tausi ai. Sa ia faaaluina lona olaga tamaitiiti e alu atu ai i lea aiga ma lea aiga e tausi ai. Sa faamanuiaina o ia i lona talavou i le mauaina o le talalelei. Sa fesoasoani se aiga agalelei o le uarota ia te ia, ia ona maua le avanoa e auuina atu ai i se misiona.

Mulimuli ane, sa fesili atu ai Jeanene i le faletua o le peresitene o le misiona e uiga i lenei alii faifeautalai lelei. Sa ia iloa ai o ni nai masina ma muamua atu, sa i ai lea alii faifeautalai i le fale o le misiona ona o se gasegase. O le taimi lena sa latou faatasi ai ma ia mo se afiafi faaleaiga. A o le'i toe foi atu o ia i le eria e galue ai, sa ia talosaga atu i le peresitene o le misiona, pe mafai ona toe faaalu ni aso se lua pe tolu pe a uma lana misiona i totonu o le fale o le misiona. Sa mana'o o ia e matau le auala e faagaioi ai se aiga e faatotonugalemu ia Keriso. Sa mana'o ia mafai ona ia mamanuina ai lona aiga e pei o lona aiga.

Ia fai mea uma tou te mafaia ia maua ai na o se aiga faapena. Aapa atu ia i latou o loo ola i tulaga faigata. Ia ave ma se uo moni. O lenei ituaiga o faauoga tumau e pei lava o le maata lea e faatutumu ai omoomo o le olaga ma

faalauleleia ma manaia atili ai la tatou faigamalaga. E le tatau ona ave ma se punaoa e faa'aoaga e maua ai se manuia faaletagata lava ia ae o se oa ia talisapaia ma faasoa atu. Ia talia i totonu o loo aiga isi o e e manaomia ona faamalosia e se aafiaga faapena.

Ou te tuuina atu ni manatu faaii mo i latou o e alolofa i se tagata o le aiga na te le o faia filifiliga lelei. O lona mea e mafai ona luitauina ai lo tatou onosai ma le faapalepale. E manaomia ona tatou faalagolago i le Alii ma i Lana taimi e mafai ona maua ai se tali lelei i a tatou talosaga ma tau-mafaiga laveai. Tatou te faia mea uma e mafai e auuina atu ai, e faamanuia ai, ma ia faailoa atu ma le usiusitai le finagalo o le Atua i mea uma. Tatou te faa'aoaga le faatuatua ae manatua e i ai nisi o mea e ao ona tuu pea i le Alii. Ua Ia valaaulia i tatou e lafo atu a tatou avega i lalo o Ona aao. Faatasi ai ma le faatuatua e mafai ai ona tatou iloa, o lenei tagata peleina ua se ese e le o tuulafoaia ae o loo i ai i le tausiga a se Faaola agaalofa.

Ia iloa le lelei o loo i isi, ae le o a latou mea sese. E i ai taimi e manaomia ai e se mea sese se vaaiga talafeagai ina ia faamamaina ai, ae ia taulai atu pea i ona uiga lelei.

Pe a e manatu e faapea ua na o se pitofilo lava le faamoemoe, o le mea moni e le o se pitofilo ae o se sooga tele lava, e pei o se puipui o le ola e faamalosia ma siitia oe. O le a tuuina mai le faamafanafanaga ina ia e le toe mata'u ai. Taumafai e ola agavaa ma tuu atu lou faatuatua i le Alii.

E le tatau ona tatou popole pe a le mafai ona tatou faia i le taimi lava lena ia mea uma ua fautuaina i tatou e le Alii e fai. Sa Ia fetalai foi e uiga i se vaitaimi ma se vaitau mo mea uma. I le tali mai i a tatou tatalo faamaoni mo le taitaiga, o le a Ia taiala ai i tatou i mea e tatau ona faamamafaina i vaega taitasi o o tatou olaga. E mafai ona tatou a'ao, tuputupu ae, ma ave e faapei o Ia e ala i le laa mausali e tasi i le taimi.

E tuuina atu la'u molimau o le ola i se olaga usiusitai, ua mausali le mauaa i le talalelei a Iesu Keriso, e tuuina mai ai le faamautinoaga aupito sili mo le filemu ma le sulufaiga i totonu o o tatou aiga. O le a tele pea luitau po o lototiga e i ai, ae e tusa lava pe o le totonugalemu o faigata, e mafai ona tatou olioli i le filemu i le loto ma le fiafia loloto. Ou te molimau atu o le Togiola a Iesu Keriso o le punavai lea o lona filemu tele i le suafa o Iesu Keriso, amene. ■



Saunia e Elder Quentin L. Cook

○ Le Korama a Aposetolo e Toasefululua

○ Le Filemu o Le Tagata Lava Ia: ○ Le Tauia lea o le Amiotonu

E ui lava foi i tofotofoga o le olaga, ae ona o le Togiola a le Faaola ma Lona alofa tunoa, o le a tauia ai i latou o e ola amiotonu i le filemu o le tagata lava ia.

○ ni aafiaga talu ai nei ua mafua ai ona ou mafaufau i le aoaoga faavae o le filemu aemaise ai o le matafaioi a Iesu Keriso i le fesoa-soani mai ia i tatou taitoatasi ia maua le filemu tumau o le tagata lava ia.

E lua ni mea na tutupu i ni nai masina ua mavae atu na matua ou ootia ai lava. Muamua, sa ou lauga i le falelauasiga o Emilie Parker, o se teineitiiti faapelepele e ono tausaga na maliu faatasi ai ma le isi toa 29, e aofia ai tamaiti laiti e 19, i se taugafana matautia i Newtown, Connecticut. Sa ou faanoanoa faatasi ma lona aiga ma sa ou iloa ai le toatele ua leai se filemu. Sa ou vaai le malosi ma le faatuatua i ona matua, o Robert ma Alissa Parker.

Lona lua, sa ou feiloai i le fiafe o tagata faamaoni o le Ekalesia i le aai o le Faga o Ivory o Abidjan.¹ O lea atunuu faa-Farani o Aferika i Sisifo, sa onosaia faigata o le tamaoiga, o le pulea faamalosi o le malo e le militeli, ma taua e lua faaupufai talu ai nei lea na faai i le 2011. Ae, sa ou lagonaina

lava se filemu faapitoa a o matou faatasi ai.

E tele ina tutupu mea e faoa ai lo tatou filemu ae faateleina ai le leai o se faamoemoe.

O ai e mafai ona faagaloina ia osofaiga mataga o Setema 11, 2001, i nofoaga eseese i le Iunaita Setete? O na mea e faamanatu mai ai ia i tatou le vave tele ona faaumatia o o tatou lagona o le filemu ma le saogalemu.

O le ma atalii matua ma lona toalua, sa faatalitali le fanau mai o la la'ua ulumatua, e tolu pitonuu mai le Nofoaga Autu o Fefaatauaiga a le Lalolagi i le Aai o Niu Ioka sa nonofo ai, ina ua sunu'i le vaalele muamua i le Olo i Matu. Sa o'i la'ua i luga o le taualuga o le fale sa mautotogi ai ma sa matua fefefe a o matamata atu i le mea sa manatu o se faalavelave matautia. Ona la molimauina lea o le sunu'i atu o le vaalele lona lua i le Olo i Saute. Sa vave ona la iloa ina e le o se faalavelave faafuasei ae talitonu loa ua osofaia le itu pito i lalo o Manhattan. Ina ua solovi ifo i lalo le

Olo i Saute, sa lilofia lo la fale mautotogi i le ao o le pefu na faatumulia ai Manhattan i saute.

I le le mautonu ai i le mea sa la'ua molimauina ma le popole tele i nisi osofaiga, o lea na la agai atu ai i se nofoaga saogalemu atu ma agai atu ai loa i le falelotu a le Ekalesia i le Siteki i Manhattan i Lincoln Center. Ina ua la taunuu atu, sa la iloa ai le toatele o isi tagata o le au paia i Manhattan i saute na faia foi lona lava faaiuga e tasi, e faapotopoto i le faleautu o le siteki. Sa valaau mai i la'ua e ta'u mai le mea la ua i ai. Sa ou toafilemu ua saogalemu i la'ua e aunoa ma le ofo i le nofoaga la ua i ai. Ua aoaoina i tatou i faaaliga i ona po nei, o siteki o Siona o se pui-puiga ma "se sulufaiga mai afa, ma mai le toasa pe a oo ina liligi mai le ipu o le toasa e le suia i le lalolagi uma."²

Sa le mafai ona la toe foi atu i le la falemautotogi mo le silia i le vaiaso ma sa lofituina i le malilili ai o tagata taumamaina, ae la te lei mafatia i se faatamaiga tumau.

I le mafaufau ai i nei mea na tutupu, ua matua aafia loloto ai lava au i le eseese faaleaoaoga faavae o le filemu lautele po o le filemu faalelalolagi ma le filemu o le tagata lava ia.³

I le soifua mai o le Faaola, sa vivii ai 'au o le lagi e faamanu atu i le Atua ma alalaga, "O le viiga i le Atua i mea aupito aluga, ma le *filemu* i le lalolagi; o le finagalo alofa i tagata."⁴

Peitai, sa matauina ma le faanoanoa ona o lea lava vaitau taua e faavavau ina ua mavae le soifua mai o le Alo o le Atua, na faatonuina ai e Herota le tupu le fasiotia o tamameamea ta'umamaina i Peteleema.⁵

E taua le faitalia i le fuafuaga o le fiafia. E mafai ai ona alofa, ositaulaga, tuputupu ae le tagata lava ia, ma le poto masani e tatau ai mo lo tatou alualu i luma e faavavau. O lea foi faitalia e mafai ai ona tutupu tiga ma

mafatiaga tatou te oo i ai i le olaga faitino, tusa lava pe afua ona o mea tatou te le malamalama i ai faapea foi fili-filiga leaga faataumaoui a isi. O le Taua i le Lagi, sa tauina e puipuia ai lo tatou faitalia tatau ma e taua e malamalama ai i le galuega a le Faaola i le lalolagi.

E pei ona ta'ua i le mataupu e 10 o le Mataio, na aoaina e le Faaola le Toasefululua ma faailoa atu o Lana misiona o le a le ausia ai le filemu lautele i lenei olaga. Na ta'u atu i le Au Aposetolo ia tuua le manuia po o le filemu i aiga e tatau ai latou te asia, ae sa lapataia o le a latou i ai "i le va o luko feai . . . [ma] inosia foi . . . e tagata uma ona o lo'u igoa; a o le tumau seia oo i le gataaga, e faaolaina o ia."⁶ E i ai se tautinoga taua o loo faia i le fuaiupu e 34: "Aua tou te manatu ua ou sau e avatu le filemu i le lalolagi."⁷ E manino lava e lei i ai le filemu lautele i le lalolagi i le taimi o le auaunaga i la le tino a Keriso, ma e le o i ai foi i le taimi nei.

I le tuleiga tomua a le Alii i le Mataupu Faavae ma Feagaiga, o loo aoao mai ai ni mataupu faavae taua lava. E faatatau ia i latou o ē e le salamo, o Lona Agaga (le Agaga o Keriso), lea e tuuina atu i tagata uma e o mai i le lalolagi,⁸ "e le taumafai pea i le tagata."⁹ E le gata i lea, "o le a aveesea le filemu mai le lalolagi."¹⁰ Ua tautino mai e perofeta, e moni lava na aveesea le filemu mai le lalolagi.¹¹ E lei noanoatiaina Lusifelo ma o loo faaagoga lona mana i lana puleaga.¹²

O le sini faamoemoeina faalelagi o tagata lelei i soo se mea, o loo i ai ma o le a i ai pea lava e le aunoa, o le filemu lea i le lalolagi. E le tatau lava ona tatou fiu i le faataunuuna o lenei sini. Peitai, na aoao mai Peresitene Iosefa F. Samita, "E le mafai lava ona oo mai i le lalolagi lena agaga o le filemu ma le alofa . . . sei vagana ua maua e tagata le upumoni a le Atua



ma le savali a le Atua . . . , ma iloa e paia lona mana ma lana pule."¹³

Tatou te faamoemoe ma le naunautai ma tatalo mo le filemu lautele, ae o a tatou matafaioi o ni tagata taitoatasi ma aiga, tatou te ausia ai le ituaiga o filemu o le taui folafolaina o le amiotonu. O lea filemu o se meaalofo folafolaina o le misiona ma le taulaga togiola a le Faaola.

O loo faamatala puupuu mai lenei mataupu faavae i le Mataupu Faavae ma Feagaiga: "Ae ia iloa o ia o le e faia galuega o le amiotonu o le a maua lona taui, o le filemu lea i le lalolagi lenei ma le ola e faavavau i le lalolagi a sau."¹⁴

Na aoao mai e Peresitene Ioane Teila o le filemu e le gata ina manao-mia, ae "o le meaalofo a le Atua."¹⁵

O le filemu lea ou te tautala i ai, ua le na o se toafimalie lē tumau. O se fiafia loloto e tumau ma faamalieleina faaleagaga.¹⁶

Na faamatalaina e Peresitene Heber J. Grant le filemu a le Faaola i le ala lenei: "O Lona filemu o le a māmā ai o tatou mafatiaga, e fusifusia ai o tatou loto momomo, e punitia ai lo tatou inoino, e faaosofia ai i o tatou loto se alofa i tagata lea e faatumulia ai o tatou agaga i le toafimalie ma

le fiafia."¹⁷ I la matou feiloaiga ma matua o Emilie Parker, sa ou vaaia ai le faamāmāina e le filemu o le Faaola o o la'ua mafatiaga ma fesoasoani ai e fusifusia o la'ua loto nutimomoia. Na matauina ina ua mae'a le taugafana, sa faaalai e Uso Parker le lotofaamagalalo i le tagata na matua'ia. E pei ona saunoa Peresitene Grant, o le filemu o le Faaola e mafai ona "punitia ai lo tatou inoino." O le faamasinoga e ā le Alii lea.

O le Au Paia i le Ivory Coast, i le taimi o le taua faaupufai i lo latou atunuu, na maua le filemu e ala i le taulai atu i le ola ai i le talalelei a Iesu Keriso, faatasi ai ma le faamamafa patino i galuega o talafaasolopito o aiga ma le malumalu mo o latou augatama.¹⁸

Tatou te moomoo uma lava mo le filemu. O le filemu e le na o se saogalemu po o le leai o ni taua, vesiga, fetauaiga, ma fefinuaiga. O le filemu e maua mai le iloa o loo silafia e le Faaola o tatou tagata, ma silafia e i ai lo tatou faatuatua ia te Ia, alolofa ia te Ia, ma tausi Ana poloaiga, e oo lava i tofotofoga ma mala faataumaoui o le olaga. O le tali a le Alii i le Perofeta o Iosefa Samita i le Falepuipui i Liperate e aumaia ai le faamafanafanaga i le loto:



“Lo’u atalii e, ia filemu lou agaga; o lou tiga ma ou puapuaga o le a na o sina minute laitiiti;

“Ma ona oo lea, afai e te talitalia lelei, o le a faaeaina oe e le Atua i luga.”¹⁹

Manatua, “o le Atua e le o le tufuga lea o le le maotonu ae [o le tufuga] o le filemu.”²⁰ Mo i latou e teenaina le Atua, latou te le maua se filemu. Na tatou tofusao uma i fonotaga i le lagi lea na saunia mo le faitalia saoloto, ma le iloa o le a i ai tiga i le tino e oo lava i mala e le matalatalaina ona o le faaoga sese o le faitalia. Sa tatou malamalama o lea mea e ono tuua ai i tatou ma le ita, fenumiai, lēmapuipua, ma leai se faamoemoe. Ae sa tatou iloina foi o le Togiola a le Faaola o le faatoilaloina ai ma toe totogi ai mea e le o paleni o le olaga nei ma tatou maua ai le fiafia. Sa i ai se faaupuga ua faavaa a Elder Marion D. Hanks i luga o lona puipui na tusia e Ugo Betti: “O le talitonu i le Atua o le iloa lea o le a lē faaitu’au tulafono uma, ma o le a i ai ni mea matagofie e lei mafaufauina.”²¹

O a punavai o le filemu? E toatele e sailia le filemu i ala faalelalolagi, lea lava e lei manuia ma o le a le manuia lava. E le maua le filemu i le mauaina o se tamaoiga tele, malosi, po o

le lauiloa.²² E le maua le filemu i le tulitulimatagauina po o le sailia o mea faamalieloto, faafiafiaga, po o mea faapasitaimi. E le mafai e se mea o nei mea, tusa lava pe ua faula’i, ona maua ai se fiafia tumau po o se filemu.

O le viiga faamama’i a Emma Lou Thyne o loo fesiligia ai le fesili talafeagai lea: “O fea ou te maua ai le filemu? Pe a leai se mea e mapu ai?”²³ O le tali o le Faaola, o le punavai ma le tufuga o le filemu. O Ia o le “Alii o le Filemu.”²⁴

E faapefea ona tatou tumau latalata i le Faaola? O le faalotomauualaloina o i tatou lava i luma o le Atua, tatalo e le aunoa, salamo i agasala, ulu atu i vai o le papatisoga ma se loto momomo ma se agaga salamo, ma avea ma soo moni o Iesu Keriso o ni faataitaiga maoae ia o le amiotonu lea e tauia i le filemu tumau.²⁵ Ina ua maea ona tuuina atu e le Tupu o Peniamina lana savali faagaetia loto e faatatau i le Togiola a Keriso, sa pauu le motu o tagata i le eleele. “Sa afio ifo i o latou luga le Agaga o le Alii, ma faatumuina i latou i le olioli, ina ua latou mauaina se faamagaloga o a latou agasala, ma ina ua latou maua le *filemu o le mafaufau*, ona o le faatuatua tele ia Iesu Keriso

sa ia te i latou.”²⁶ O le salamo ma le ola amiotonu e mafai ai ona maua le *filemu o le mafaufau*, lea e taua mo le faamalieina.²⁷ A i ai se solitulafono matuia, e manaomia ona ta’uta’u atu ia maua ai le filemu.²⁸ Atonu e leai se mea e faatusalia le filemu e maua mai e se tagata agasala ua faamatuu atu lana avega i le Alii ma maua ai faamanuiaga o le Togiola. E pei ona faaupu ai e se tasi viiga lauiloa a le Ekalesia, “E lafo la’u avega ia te Ia, ma ou pese fiafia.”²⁹

E olioli lo’u loto ina ua ou iloina ua taliaina e le fiasefulu afe o tatou alii talavou, tamaitai talavou, ma faifeau faamisiona matutua o o tatou taimi le valaau e avea ma avefeau a lo tatou Alii ma le Faaola, o Iesu Keriso. Ua latou avatu ai le talalelei o le filemu i le lalolagi, e taitasi le tagata ma le aiga e tasi i le taimi—o se galuega o le amiotonu e avatu ai lenei filemu i fanau a le Tama Faalelagi.

O le Ekalesia o se sulufaiga lea e mafai ai e soo o Keriso ona maua ai le filemu. Fai mai nisi o tupulaga talavou i le lalolagi, o i latou e faaleagaga ae le lolotu. O le lagonaina e faaleagaga, o se laasaga lelei muamua lea. Peitai, o totonu o le Ekalesia e faaameaina ai i tatou, aoao, ma fafaga i le afioga lelei a le Atua. Ae sili atu ona taua, o le pule o le perisitua i le Ekalesia e tuuina mai ai sauniga paia ma feagaiga e fusia faatasi ai aiga ma faagavaaina ai i tatou taitoatasi e toe foi atu i le Atua le Tama ma Iesu Keriso i le malo selesitila. O nei sauniga e aumaia ai le filemu aua o feagaiga ia ma le Alii.

O malumalu o nofoaga ia e faatino ai le tele o nei sauniga paia ma o se punavai foi o le malutaga o le filemu mai le lalolagi. O i latou e asiasi atu i laufanua o malumalu pe auai atu i maimoaga i malumalu, e lagonaina lena filemu. E i ai se aafiaga se tasi ou te manatuaina lelei o le fale tatala ma le faapaiaga o le Malumalu o Suva Fiti.

Sa i ai se toatuga faaupufai na mafua ai ona susunuina ma lepetia e le aufouvale le taulaga o Suva, ae nofoia faamalosi ia maota o le Palemene ma taofia faapagota le fono faitulafono. Sa pulea le atunuu e le militeli. Sa tuuina mai e le Militeli a Fiti se faatagaga faatapulaa e faapotopoto ai tagata mo le fale tatala, ma sina vaega toaitiiti o tagata mo le faapaiaga. Sa le mafai ona valaaulia tagata uma o le ekalesia ona o popolega mo lo latou saogalemumu. Na pau lea o le faapaiaga o le malumalu talu mai le uluai Malumalu i Navu na faia i lalo o tulaga faigata tele.

O se tasi na valaaulia i le maimoaga o se tamaitai lelei Hindu e tupuga mai Initia, o se Sui o le Palemene o lē sa muai taofia faapagota ae na toe tatala ona o ia o se tamaitai.

I totonu o le potu selesitila, ina ua saoloto mai le gaogaosa o le lalolagi, sa tagi o ia ao ia faamatalaina ona lagona o le filemu na lofituina ai o ia. Sa ia lagonaina le Agaga Paia o faamafanafanaina o ia ma tuuina atu ia te ia se molimau i le natura paia o le malumalu.

O le Faaola o le punavai o le filemu moni. E ui lava foi i tofotofoga o le olaga, ae ona o le Togiola a le Faaola ma Lona alofa tunoa, o le a tauia ai i latou o e ola amiotonu i le filemu o le tagata lava ia. I le faatulagaga patino lea na la faatuina ai le Paseka, sa folafola atu ai e le Faaola i Ana Aposetolo, o le a faamanuiaina i latou i le “Fesoasoani, o le Agaga Paia lea” ona la fetalai lea i upu taua nei: “Ou te tuuina atu ia te outou le [filemu]; o lo’u [filemu] ou te avatu ai ia te outou; ou te le avatu ia te outou faapei ona avatu e le lalolagi.”³⁰ Ina ua lata i le taimi o Lana Tatalo Faatoga: “Ua ou fai atu nei mea ia te outou, ina ia outou maua le filemu ia te au. E maua foi outou e le puapuaga i le lalolagi, a ia outou loto tetele, ua ou manumalo i le lalolagi.”³¹

Sa tusia ma le matagofie e Eliza R. Snow lenei manatu faavae:

*Faaea nei o outou ao;
Viia le Atua, ia le tuua.
E ui ina tele faigata,
Ua saunoa Iesu, “Ua na o a’u
tou te maua ai le filemu.”³²*



Copenhagen Tenimaka

Ou te molimau atu ai i le suafa o Iesu Keriso, amene. ■

FAAMATALAGA

1. E lua konafesi sa faia i Abidjan i le Aso Sa, 10 Fepuari, 2013; e 9,693 i latou sa auai—e 619 tagata e le auai i le Ekalesia sa i ai. O le aofaiga o tagata o le Ekalesia i Ivory Coast e tusa ma le 19,000.
2. Mataupu Faavae ma Feagaiga 115:6.
3. O le upu *filemue* eseese ona uiga. I le gagana masani Faa-Eleni o loo fasino i se iuga, o le le toe faaauauina, po o le le toe i ai o le faitagai i ni autau fetauai. I le Faa-Eperu o loo i ai i le upu se uiga manino ma o nisi taimi ua na o se ituaiga o faafeiloaiga. O le filemu o se “setete foi o le ola lea e na o le pau le taimi e oo mai ai i le tagata, ua na o aiaiga ma tuutuuga ua faatulagaina e le Atua.” (Howard W. Hunter, “Where Is Peace?” i le Conference Report, Oct. 1966, 14–71).
4. Luka 2:14; faapoopo le faamamafa
5. Tagai Mataio 2:16; tagai foi Ross Douthat, “The Loss of Innocents,” *New York Times*, Dec. 16, 2012, 12.
6. Mataio 10:16, 22.
7. Mataio 10:34.
8. Tagai Mataupu Faavae ma Feagaiga 84:46.
9. Mataupu Faavae ma Feagaiga 1:33.
10. Mataupu Faavae ma Feagaiga 1:35.
11. Sa folafola atu e Peresitene Woodruff lenei tautinoga i le 1894 ma faapena i le 1896. Tagai i le *The Discourses of Wilford Woodruff*, ed. G. Homer Durham (1946), 251–52; tagai foi i le Marion G. Romney, i le Conference Report, Apr. 1967, 79–82.
12. Tagai i le Fielding Smith, *The Predicted Judgments*, Brigham Young University Speeches of the Year (Mar. 21, 1967). Peitai, e pei ona ta’ua e Elder Neal A. Maxwell, “e mafai ona tatou maua le fiafia i le loto e tusa lava pe aveesea le filemu mai le lalolagi . . . ma o ‘mea uma [ua] vavao’” (“Behold, the Enemy Is Combined,” *Ensign*, May 1993, 79).
13. *Aoaoga a Peresitene o le Ekalesia: Iosefa F. Samita* (1998), 400.
14. Mataupu Faavae ma Feagaiga 59:23.
15. *Aoaoga a Peresitene o le Ekalesia: Ioane Teila* (2001), 151.
16. Mai le Faa-Eleni anamua e oo mai i o tatou aso, o nei upu—*fiafia* le *faamalieleina*—sa iloiloina, vaevaeina, ma taulimaina e le gata i lo la uiga ae faapena foi i le taiala la te aumaia i o tatou olaga. Tagai i le David Malouf, *The Happy Life: The Search for Contentment in the Modern World* (2011). Tagai foi i se iloilo o le tusi a Mr. Malouf, i le R. Jay Magill, “How to Live Well,” *Wall Street Journal*, Jan. 26–27, 2013, C6.
17. *Aoaoga a Peresitene o le Ekalesia: Heber J. Grant* (2002), 237.

18. O le tolu o siteki e lima i Ivory Coast o loo i ai lea i le 25 pito i luga i le Ekalesia i le pasene o tagata matutua o loo auina atua igoa o aiga mo sauniga o le malumalu, ma o le Siteki o Cocody Cote d'Ivoire o le siteki pito i maualuga lea (C. Terry Warner and Susan Warner, "Apostle Visits Ivory Coast, Is 'Impressed with Exceptional Spirit,'" *Church News*, Mar. 3, 2013, 4, 14). I le tutupu ai o taua faalemalo ma le malumalu aupito sili ona lata ane lea e 12 itula e malaga ai i le pasi i Accra, Ghana, o se faamaoniga ofoofogia lea o le faatuatua ma maua ai le filemu faaletagata lava ia ma faaleaiga.
19. Mataupu Faavae ma Feagaiga 121:7–8. Sa aoao mai Peresitene Harold B. Lee e faapea, "O lea, e ao ai ona faamamaina i tatou; e ao ona tofotofoina i tatou ina ia mafai ai ona faamaonia le malosi ma le mana lea o loo i totonu o i tatou" (*Aoaoga a Peresitene o le Ekalesia: Harold B. Lee* [2000], 208).
20. 1 Korinito 14:33.
21. I le Marion D. Hanks, "A Loving, Communicating God," *Ensign*, Nov. 1992, 63.
22. Tagai Jeffrey R. Holland, *For Times of Trouble* (2012), 79. Ua aoao mai Elder Jeffrey R. Holland e faapea, "O le mativa moni lava e mafai ona tele atu se mea na te faia e faaumatia ai le agaga o le tagata nai lo se isi lava tulaga vagana ai le agasala lav aia." Ae o le faaogaina ma le amiotonu o tupe e mafai ai ona faatupulaia le filemu.
23. "O Fea Lo'u Filemu?" *Viiga*, nu. 68.
24. Isaia 9:6.
25. Sa faigofie lava le faupuina e John Greenleaf Whittier: "Gauai atu i le auale e ola ai. Aua nei amio tau lava o le aso aua a oo mai le po o le a aveesea ai lou filemu" ("Conduct [From the Mahabharata], i le *The Complete Poetical Works of John Greenleaf Whittier* [1802], 484).
26. Mosaea 4:3; faapoopo le faamamafa; tagai foi i le Marion G. Romney, i le Conference Report, Apr. 1967, 79–82.
27. O le lotofuatiaifo o le tapasa o le amio mama lea e faasino atu i tatou i le filemu. E faagaioioia ia le itiiti ifo ma le lua ni puna: o le Malamalama o Keriso, o se tofi tautupu mai lo tatou Tama Faalelagi (tagai Mataupu Faavae ma Feagaiga 88:6–13; 93:2) ma le meaalofa o le Agaga Paia (tagai Mataupu Faavae ma Feagaiga 39:6).
28. "E lua vaega o le faamagaloga e manaomia e aumai ai le filemu i le tagata solitufono—o le tasi e mai le au pulega tatau ai o le Ekalesia a le Alii, ma le isi tasi e mai le Alii lava ia. [Tagai Mosaea 26:29.]" (*Aoaoga a Peresitene o le Ekalesia: Spencer W. Kimball* [2006], 41).
29. "E Malu ma Alofa Poloaiga a le Atua," *Viiga*, nu. 66.
30. Ioane 14:26–27.
31. Ioane 16:33.
32. "E Ui i Ala Faigata," *Viiga*, nu. 63.



Saunia e Elder Stanley G. Ellis
 O Le Fitugafulu

O Le Ala a le Alii

O le ala a le Alii o le, tatou te faalogo atu i taitaiga a o tatou taitai, malamalama i mataupu faavae sa'o, ma pulea ai i tatou lava.

Fitugafulu

O loo o'u auauna atu o se Fitugafulu. O Fitugafulu e valaauina e avea ma ni avefeau—e faasoa atu le afiga a le Alii e pei ona matou mauaina mai aporetolo ma perofeta ma mai le Agaga ma ia avea ma molimau faapitoa a Keriso, i le talaiina atu o le talalelei i le lalolagi atoa, i le atinaeina o le Ekalesia, ma i le vaaiga o ana fuafuaga (tagai MF&F 107:25, 34).

Tama Faifaatoaga

Na ou ola ae i se faatoaga e lata i Burley, Idaho—o se "tama faifaatoaga moni mai Idaho!" I le avea ai ma se tama faifaatoaga sa ou aoao ai:

1. Ia galue—afai e te le totō, e te le selesele foi.
2. Ia galue ma le poto—afai e te faasūsūina ma faafetalaisa, e tele mea e te seleseleina.
3. O le taua o le taimi—afai e te le totoina i le taimi sa'o, e mafai e se kiona e vave toulu ona faaleaga le seleselega.
4. Ia fai le mea e manaomia po o le mea e tatau ona fai e tusa lava po o le a le mea e te fiafia i ai, manao i ai, pe talafeagai—e te tatauina susu o le povi pe a tatau ona tatauina, ae le o le pe a e manao ai.

5. Ia tuusa'o—i le aafia ai o meaola ma masini o le faatoaga, e leai sou taimi e "faataamilomilo ai au faamatalaga" pe popole i le faatiga i tagata ua ova tele le maaleale. (E faatatau i le mataupu faavae lenei, a o o'u auauna atu i le Ekalesia atoa, e masani ona ou fesili, "Tou te finagalo ou te tautala tuusa'o pe afeifei?" O le tulaga masani, e filifili lava le Au Paia e "tuusa'ol!" O le a ou tautala tuusa'o atu i le asō.)
6. Ma le mulimuli, i le avea ai ma se tama faifaatoaga i Idaho, sa ou aoao ai ia taula'i lava i mea faavae.

E leai se mea e sili atu ona faigo-fie ia i tatou uma, ma o tatou aoaoga faavae, nai lo upumoni o le mataupu faavae muamua o le faatuatua: "Matou te talitonu i le Atua, le Tama Faava-vau, ma Lona Alo o Iesu Keriso, ma le Agaga Paia" (Mataupu Faavae o le Faatuatua 1:1).

Ma le isi, o Ia o lo *tatou* Tama Faalelagi, e na te silafia i tatou, alofa ia i tatou, ma finagalo tatou te toe foi atu ia te Ia. O Iesu o lo *tatou* Faaola ma le Togiola, o lē e ala mai i le Togiola na mautinoa ai o le *tatou* faatoailo-ina le oti ma toe ola ai ma ia mafai ai ona faaeaina i *tatou* ma maua le ola e faavavau. O le Agaga Paia o lo *tatou*

fesoasoani, talifaaaliga, faiaoga, moli-mau, ma le taiala.

Mafaufau i ai, uso e ma tuafafine—e le o i tatou o ni tagata ua matuaoti faaleagaga! E le o tuua na o i tatou.

O a ni tulaga e lelei ai le i ai o ni matua—o le le ave ma se tagata ua matuaoti? E mafai ona tatou aoao mai ia i latou, manuia i o latou aafiaga, aloese mai i mailei latou te lapataia ai i tatou, ma malamalama lelei ona o mea ua latou silafia. E le tatau ona tatou leiloloa, le mautonu, faaseseina, pe faaitiitia le tauaogaina. E faapitoa le moni o lenei mea i le tulaga o lo tatou Tama Faalelagi, o lē ua aoaoina ma faali mai ia i tatou, e le na o se ala ae *o le* ala.

O Loo i le Atua le Ala

O le mea moni o loo i le Atua le ala e ola ai,¹ e alofa atu ai,² e fesoasoani atu ai,³ e tatalo ai,⁴ e tautala ai,⁵ fega-legaleai ai ma le tasi ma le isi,⁶ e taitai ai,⁷ e faaiipoipo ai,⁸ e tausi ai fanau,⁹ e aoao ai,¹⁰ e iloa ai le upumoni,¹¹ e faasoa atu ai le talalelei,¹² e filifili ai ma le atamai mea tatou te taumamafa ai,¹³ ma isi mea faapena.

Faatasi ai ma tusitusiga paia, o nisi o punaoa maoae mo le mauaina o le ala a le Alii o le *Faamaoni* i le *Faatuatua*, *Mo le Malosi* o le *Autalavou*, ma isi aoaoga a perofeta ma aposetolo soifua.

1. Mo se faataitaiga, ua aoaoina i tatou e le Alii i tusitusiga paia:

“Aua o o’u manatu e le o outou manatu, o o’u ala e le o outou ala, ua fetalai mai ai le Alii.

“Aua e pei ona sili ona maualuga o le lagi i le lalolagi, ua faapena ona sili ona maualuga o o’u ala i o outou ala, ma o’u manatu e sili i o outou manatu” (Isaia 55:8–9).

2. O le tasi o amioleaga o nei aso amulu ua “taitoatasi le tagata ma savali i lona lava ala” (MF&F 1:16). I le Faataoto ua lapataia ai i tatou



Sini, Ausetalia

“aua e te faafiapoto” ma le “aua le faalagolago i lou lava atamai” (tagai Faataoto 3:5–7).

3. Ua aoaoina i tatou afai tatou te faia i le ala a le Alii, ua noatia o Ia e faamanuia i tatou ma e i ai la tatou aia i Ana folafolaga; ae afai e le o Lana ala, e leai se folafolaga mo tatou (tagai MF&F 82:10).
4. Na faatusatusa e le Alii Lana ala i lo tatou ala i Lona aoaoina o le perofeta o Samuelu, o lē na auina atu e su’e se tupu fou: “A ua fetalai mai Ieova ia Samuelu, Aua e te vaai i lona tino, po o le maualuga o lona tino; aua ua ou tetee ia te ia: aua e le vaai Ieova pei o le vaai o tagata; aua e vaai tagata i le tino, a e vaai Ieova i le loto” (1 Samuelu 16:7).
5. E oo lava foi i le manao ua matele ina taliaina, o le fesoasoani atu i e matitiva ma limavaivai, ua talia e le Alii la tatou sini ae ua lapatai mai, “Peitai e tatau ona faia i la’u lava ala” (MF&F 104:16). Ne’i meaane o a tatou taumafaiga e fesoasoani atu, tatou te ono faatiga moni ai ia i latou. Ua aoao mai e le Alii ia i tatou le tatau ona faalauiloa atu o le faalagolago o le tagata ia te ia lava. E tusa lava pe e mafai ona tatou fesoasoani atu, e le tatau ona tatou avatu pe tuuina atu mea e mafai ma e tatau ona latou faia mo i latou. Soo se mea lava o loo faia ai, ua iloa e le

lalolagi le leaga o mea e mauafua e aunoa ma le galue i ai. E moni o loo silafia e le Atua le mea sili.

Tatou vaavaai i ni isi faataitaiga. O loo i ai le ala a le Alii e fai ai le galuega faafaifeautalai. Ua faamalalamaina mai i tusitusiga paia ma i le *Tala’i La’u Talalelei* ma faia e pei ona taitaiina ai e le Agaga.

O loo i ai i le Alii Lana, po o *le* ala e alofa atu ai. Fai mai tagata o le lalolagi, na pau lava le mea e taua moni o le alofa o tagata e toalua i le tasi ma le isi. Ua aoao mai lo tatou Tama oi le Lagi e taua lenei mea, ae ua Ia aoao mai ia te i tatou se mea e sili atu: ua i ai se ala ma se taimi faatagaina e faailoa ai lena alofa.

Pulea o i Tatou Lava

Na aoaoina Iosefa Samita mai lona laitiiti i ala o le Alii. Ina ua fesiligia pe na faapefea ona ia taitaia le Ekalesia, sa ia faamalalamama atu, sa ia aoao atu mataupu faavae sa’o ona pulea lea e le au paia i latou lava.¹⁴ Uso e ma tuafafine, o loo aoao mai pea e o tatou aposetolo ma perofeta soifua ia mataupu faavae sa’o. O le fesili la, “O tatou faaaogaina ea nei mataupu faavae e pulea ai i tatou lava?”

O se tasi o mea ua faafia ona aoaoina ai i tatou o le atiina ae ma faataunuu mea tatou te gafatia i

nofoaga o loo tatou i ai. Ae o nisi taimi e faaososoina ai i tatou e masii atu i se eria fou, ma le manatu e faapea o le a maua ai e a tatou fanau ni uo se tele ma o le a lelei atu foi ia polokalama a le autalavou.

Uso e ma tuafafine, pe tatou te manatu moni lava o le vaega taua i le faaolataga o a tatou fanau o le vaifale tatou te nonofo ai? Ua faafia ona aoa mai aposetolo ma perofeta e faapea, o mea e tutupu i totonu o le aiga e sili atu lena ona taua nai lo o mea o loo tau i ai a tatou fanau i fafo. O leo *faapefea* ona tatou tausia a tatou fanau e sili atu le taua nai lo o le *o fea* tatou te tausia ai i latou.

E mautinoa lava o loo i ai isi vaega e aafia i le filifilia po o fea e aumau ai, ma e faafetai, ona o le a taiala i tatou e le Alii pe afai tatou te sailia Lana faamautinoaga.

O le isi fesili o le “O fea o loo manaomia ai i tatou?” E 16 tausaga o o’u auauna i le au peresitene o le Siteki a Houston Texas Matu. E toatele na siitia mai i lo tatou eria i na tausaga. E masani ona matou maua se valaau mai le telefoni e faailoa mai ai se tasi ua siitia mai ma fesili mai po o fea le uarota e sili ona lelei. E na o le faatasi lava i le 16 tausaga na ou maua ai se valaau na fesili mai, “O fea le uarota e manaomia se aiga lelei? O gafea e mafai ona matou fesoasoani atu ai?”

I tausaga popofou o le Ekalesia, e valaauina ai e Peresitene Polika Iaga ma isi ia tagata o le au paia e o atu i se nofoaga faapitoa e atiina ae ai le Ekalesia iina. O le mea e malie ai e oo lava i aso nei o loo i ai tagata faamoani o le Ekalesia i le atulaulau o e e mafai ona o i soo se mea e talosagaina ai i latou e le perofeta e o i ai. Tatou te mananao moni lava ia Peresitene Monson e ta’u taitoatasi mai i le silia ma le 14 miliona o i tatou ia nofoaga o loo manaomia ai o tatou aiga? O le



ala a le Alii o le, tatou te faalogo atu i taitaiga a o tatou taitai, malamalama i mataupu faavae sa’o, ma pulea ai i tatou lava.

E Faapitoa le Taua

Faatasi ai ma mea uma o loo tutupu i le Ekalesia i aso nei, ma a o faatelea’iina e le Alii Lana galuega i itu uma, e faapena foi le matuai taua o le tatou faia o mea uma tatou te faia i Lana ala!

Ae maise i le galuega o le faaolataga tatou te aoa ai “i le meaalofa o lona Alo se ala e silisili ona lelei” (Eteru 12:11). O le aoaoga faavae o Keriso “o le ala lenei; ma ua leai se isi lava ala po o se isi suafa ua tuuina mai i lalo ifo o le lagi, e mafai ona faaolaina ai o le tagata i le malo o le Atua” (2 Nifae 31:21).

Faaiuga

A o tatou vaaia le toatele i le lalolagi i aso nei o loo nonofo i le le mautonu, pe sili atu foi le leaga, feofeoi solo i ala o le agasala, ma mafatia i taunuuga le aoga o filifiliga le lelei, e oso ai lo’u fia taualaga e pei ona sa faia e Alema:

“E, pe ana o a’u o se agelu, ma mafai ona ou maua le moomooga o lo’u loto, ina ia mafai ona ou alu atu ma tautala atu ma le pu a le Atua, ma

i se leo e luluina ai le eleele, ma alaga atu le salamo i tagata uma!

“Toe, po ua ou alaga atu i agaga uma taitoatasi, . . . le fuafuaga o le togiolaina, ina ia latou salamo ma o mai i lo tatou Atua [ma Ona ala], ina ia le toe i ai se faanoanoa i luga o le lalolagi uma” (Alema 29:1–2).

Ou te toe molimau atu, o loo i ai i le Alii le ala! O lo tatou Tama Faalelagi e silafia i tatou, alofa ia i tatou, ma finagalo e fesoasoani mai. E sili atu lona silafia o le auala e fesoasoani atu ai. E le o i tatou o ni tagata ua matuaoti faaleagaga!

O lo tatou Faaola, o Iesu Keriso, “o le ala, ma le upumoni, ma le ola” (Ioane 14:6; tagai foi Alema 38:9). O Lana ala ua faavae i upumoni e faavavau ma taitai atu ai i tatou i le “filemu lea i le lalolagi lenei ma le ola e faavavau i le lalolagi a sau” (MF&F 59:23). Ou te molimau atu ai i le suafa o Iesu Keriso, amene. ■

FAAMATALAGA

1. Tagai 2 Nifae 5:27; Mosaea 4:27; Alema 7:23–25.
2. Tagai Esoto 20:14; Teuteronomie 6:5; Ioane 13:34–35; Roma 1:24–32; 1 Tesalonia 4:3; Alema 39:3–5.
3. Tagai Mosaea 4:21–27; Mataupu Faavae ma Feagaiga 104:15–18.
4. Tagai Mataio 6:5–13; 2 Nifae 32:8–9; 3 Nifae 18:21; Mataupu Faavae ma Feagaiga 10:5.
5. Tagai Faataoto 15:1; Kolose 4:6; Iakopo 5:12; 3 Nifae 11:29–30.
6. Tagai Mataupu Faavae ma Feagaiga 64:10–11; 121:41–46.
7. Tagai Mataio 25:14–30; Ioane 10:1–14; Mataupu Faavae ma Feagaiga 50:26; 107:99–100; 121:34–40.
8. Tagai Kenese 2:24; Iakopo 2:27; Mataupu Faavae ma Feagaiga 42:22; 132:19.
9. Tagai Mosaea 4:14–15; Mataupu Faavae ma Feagaiga 68:25–28.
10. Tagai Mataupu Faavae ma Feagaiga 43:8–9; 88:77–79, 118.
11. Tagai Moronae 7:15–19; 10:3–5; Mataupu Faavae ma Feagaiga 9:7–9.
12. Tagai Mataupu Faavae ma Feagaiga 33:8–10; 100:3–8.
13. Tagai Mataupu Faavae ma Feagaiga 89.
14. Tagai Aoaoga a Peresitene o le Ekalesia: *Iosefa Samita* (2007), 284.



Saunia e Elder John B. Dickson

○ Le Fitugafulu

○ Le Talalelei i le Lalolagi Atoa

O loo agaigai lelei atu lava le Ekalesia i le lalolagi mai lea malo i lea malo, aganuu i lea aganuu, o tagata i tagata e tusa ma Lana lava taimi.

Na maea lelei le auaunaga a le Faaola i la le tino. Ua uma Lona mafatiaga i Ketesemane ma luga o le satauro. Ua tatou aoao mai le Galuega e faapea sa auauna atu o Ia mo le 40 aso ina ua mavae Lona Toetu, “na iloa o ia” e le Au Aposetolo ma “na fetalai atu i mea o le malo o le Atua” (Galuega 1:3).

Na Ia tau atu ia te i latou “e maua e outou le mana, pe a afio ifo le Agaga Paia i luga ia te outou; e fai foi outou ma molimau ia te au i Ierusalem ma Iutaia uma lava, ma Samaria, e oo lava i le tuluiga o le lalolagi” (Galuega 1:8).

E lei leva ae, “siitia ae o ia; ua avea foi o ia i le ao nai o latou luma.

“Ua latou tulimatai ae i le lagi, a o afio ae o ia, faauta foi, o tagata e toalua ua tutu mai ia te i latou ma ofu sisina;

“Ua la fai mai, O outou tagata Kalilaia e, se a le mea tou te tutu ai, ma vaavaai i le lagi? O Iesu lena, ua aveina ae nai ia te outou i le lagi, e faapea ona toe afio mai o ia, pei o lona afio atu i le lagi ua outou vaavaai i ai” (Galuega 1:9–11).

E moni lava, o le a toe afio mai le Faaola i Lona Afio Mai Faalua, ae o le taimi nei, ua tataua ona oo atu le

talalelei a Iesu Keriso “i le tuluiga o le lalolagi.”

Mai le Mataio ua tatou aoao ai e uiga i se poloaiga faapitoa i Aposetolo ina ia ave le talalelei i atunuu uma:

“Ona maliu ane ai lea o Iesu, ua fetalai atu ia te i latou, ua faapea atu, Ua tuuina mai ia te au le pule uma lava i le lagi ma le lalolagi.

“O lenei, ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Paia” (Mataio 28:18–19).

I le popofou o le Ekalesia, i le tau-lotoaiga o taimi, na avatu ai le talalelei na o le aiga o Isaraelu; ona oo mai lea o le faaaliga ia Peteru, le Aposetolo sinia, e faapea ua oo mai le taimi e avatu ai le talalelei i talaatu o Isaraelu ma tagata o Nuuese. E fesoasoani mataupu e 10 ma le 11 o le Galuega tatou te malamalama ai i le faasologa o le mamanu na faalauiloa mai ai lenei faalautetelega manaomia o le Ekalesia i isi fanau a le Atua, i ona taitai pulefaa-malumalu ma le lautele o le ekalesia.

I le faaaogaina o Konelio, o se tagata o Nuuese, o se taitai o le toase-lau, ma o se tagata lelei, sa fesoasoani le Alii ia Peteru ia malamalama o le

a oo atu le talalelei i Nuuese, o se manatu faavae e ese ma e fou i le Au Paia o na taimi. O le faaaliga na faia ai le suiga i mataupu a le Ekalesia na oo mai ia Peteru, le Aposetolo sinia. Ua tatou iloa na oo ai lava ina televave le oo atu o le talalelei i malo o Nuuese.

O se faataitaiga o le faalautetelega o le Ekalesia i lena taimi o le faaliliuina lea o Paulo, o lē na avea ma Apose-tolo maoae i Nuuese. Sa ia maua se faaaliga a o i ai o ia i le ala i Tama-seko, lea na ia vaai ai i se malamalama ma faalogo ai i se leo, na salamo i ana agasala, ma sa valaauina e le Atua (tagai Galuega 22:6–18) ona avea ai lea ma malosiaga maoae i le faasalauina o le talalelei a Iesu Keriso.

Ia sei o tatou mafaufau i le 1,800 tausaga e oo atu i le taimi o le Toefuataiga o le talalelei, po o le toefuatai mai o mea uma a o lei oo i le Afio Mai Faalua. Ou te molimau atu na ala mai i le Perofeta o Iosefa Samita, ua toefuatai mai ai le Ekalesia ma ua faaaauai ona agai i luma i lalo o le taitaiga a le Au Peresitene Sili ma le Korama a Aposetolo e Toasefululua. O la latou matafaioi e ave le talalelei i le lalolagi e tutusa lelei lava ma Aposetolo anamua.

Mai le taimi o le faatulagaina o le Ekalesia a Iesu Keriso o le Au Paia o Aso e Gata Ai i le 1830, o loo agaigai lelei atu lava le Ekalesia i le lalolagi mai lea malo i lea malo, aganuu i lea aganuu, o tagata i tagata, e tusa ma Lana lava taimi.

I le 1978, i le mulimuli ai i le mamanu faavae o faaaliga e ala mai i le Aposetolo sinia, o Peresitene Spencer W. Kimball, na oo mai i ai se faaaliga e uiga i le faalauaiteteleina atu o faamanuiaga o le perisitua i tamatane agavaa uma i le lalolagi atoa. O le uiga o lenei mea o le a mafai e fanau uma a le Tama Faalelagi i le lalolagi atoa ona taumamafa i faamanuiaga uma



o le talalelei toefuataiina i lo tatou vaitaimi. O se tulaga talafeagai lelei lea i le malo o le Atua i le fogaeleele i le taimi ua latalata mai le Afio Mai Faalua o Keriso.

O so'u aafiaga patino e faapea, sa faatoa tofia lava au e avea o se peresitene o le misiona ma e le o toe mamao ona ma malaga lea ma Sister Dixon ma lo matou aiga i Mekisiko ae ta'u mai ai e Elder Richard G. Scott, o le taimi lea o ia o se Fitugafulu, le oo mai o lenei faaaliga faapitoa. Ou te manatua le maligi o o'u looimata a o ia faamatala maia le mea sa tupu. Sa le mafai e upu ona faamatala lo'u fiafia aua sa ou iloa ua sa'o, ma ua oo mai le taimi ua tata ai ona maua e tagata uma ia sauniga, feagaiga, ma faamanu-iaga o le talalelei.

Ua toeitiiti atoa le 34 tausaga talu ai, ae ou te lei iloina i lenei taimi o le a ou faaaluina ni tausaga o la'u auunaga i le Au Fitugafulu, i le Eria o Aferika Sisifo o le Ekalesia i ni tagata talitonu, faamaoni o o latou olaga

o le a matua aafia ai i le faaaliga o le 1978 e uiga i le perisitua. Sa ma nonofo ai ma Sister Dixon iina mo le fa tausaga, ma sa matuai matagofie lo ma aafiaga ma o se suiga o le olaga mo i ma'ua.

Pe a manatu i ai o se nuu, o tagata Aferika Sisifo e talitonu i le Atua, e matua lē mama lava i le tautino atu ma faasoa atu o latou talitonuga i isi, ma e maoae o latou tulaga faaleautaitai. E televave tele lo latou o mai i le Lotu, ma o vaiaso uma pe a e faatu ai se uarota po o ni uarota ma paranesi i se vaipanoa i le Eria o Aferika Sisifo, ma le toetoe lava o Aferika mao'i lava o taitai perisitua ma ausilali.

Maimau e pe ana mafai ona tatou afaatasi ai ma le Au Paia i le malumu o Abuja, Nigeria, po o Accra, Ghana, sei mafai ai ona lagonaina le naunautai o le Au Paia ma iloa ai au peresitene uma o malumu o Aferika mao'i. Maimau e foi pe ana mafai ona ou faamasani outou i au Fitugafulu Eria Aferika, o loo tatou mafuta faatasi

iinei i le Maota Autu mo Konafesi i le aso, ma o i latou o ni loia, polofesa, pule o pisinisi, pe faamasani atu ai foi outou i au taitai o siteki ma uarota a Aferika ma o latou aiga.

I Aferika atoa, o le auai i se Aoga Sa, ausilali, po o se vasega a le au perisitua o se aafiaga paia tele e mulimulita'ia ai mataupu aoaoina a le Ekalesia ma e i ai se malamalamaaga tele i le talalelei, aoao atu ma le aoao mai e ala i le Agaga.

O le talalelei i Aferika o loo alu atu i ni tagata fiafia, e faaleano i vaaiga faalelalolagi lea e aafia tele ai olaga o tagata i le lalolagi i Sisifo. E le popole i latou i oa o le lalolagi e leai se iuga.

Sa ta'ua faapea o tagata Aferika e matua utiuti lava ni mea o ia i latou e le afaina tele ae tele naua mea e sili atu ona taua. E faalē fiafia i latou i ni fale tetele ma ni taavale mananaia ae e tele atu lo latou naunau ia iloa lo latou Tama Faalelagi ma Lona Alo, o Iesu Keriso, ma le maua o ni aiga e faava-vau. Ua avea o se taunuuga masani

o lo latou faatuatua, le siina o i latou e le Alii i ni auala maoae.

O le iloaina o i latou e faapei ona i ai, matou te le ofo ai faapea o le a avea i latou o se vaega taua o le faalauteleaga o le Ekalesia a Iesu Keriso i aso mulimuli. Ina ua vaai Tanielu, le perofeta o le Feagaiga Tuai i se faaaliga o le malo o le Atua i aso amuli “o le a [taavale] atu ai i luma i tuluiga o le lalolagi, e pei o [se] maa na tofi mai le mauga e aunoa ma lima [o le a] tumu ai le lalolagi atoa” (MF&F 65:2), e matua fetau lelei i o tatou uso ma tuafafine maoae o Aferika o le a avea o se vaega taua o le faataunuuga o lena valoaga ma ua mafai ona o faaaliga ina ia mulimuli ai i mamanu na faavaeina e le Alii.

Ou te molimau atu e alofa lo tatou Tama Faalelagi i Ana fanau uma, o Iesu o le Keriso, ma ua avanoa le talalelei mo tagata uma, o e ola ma e ua oti. I le suafa paia o Iesu Keriso, amene. ■



Saunia e Elder David A. Bednar

○ Le Korama a Aposetolo e Toasefululua

Matou Te Talitonu i le Nofomama

O le usiusitai i le tulafono o le ola mama o le a faateleina ai lo tatou fiafia i le olaga nei, ma mafai ai ona tatou agai i luma i le faavavau.

○ la’u savali e tali ai se fesili taua o se taunuuga maoae faaleagaga: Aisea e taua tele ai le tulafono o le ola mama? Ou te tatalo o le a faamautu atu e le Agaga Paia le moni a’ia’i o mataupu faavae o le a ou faamamafaina.

O Le Fuafuaga o le Fiafia a le Tama

O le taua e faavavau o le ola mama e na o le lotoifale o le matalalaga lautele o le fuafuaga a lo tatou Tama Faalelagi o le fiafia mo Lana fanau e malamalama ai i ai. “O tagata uma—tane ma tamaitai—na foafoaina i le faatusa o le Atua. O i latou taitoatasi o se atalii po o se afafine faapelepele o ni matua faalelagi, ma . . . e i ai se natura paia” (“O Le Aiga: O Se Folafolaga i le Lalolagi,” *Liahona*, Nov. 2010, 129). Sa nonofo alii uma ma tamaitai faatasi ma le Atua o Ana fanau agaga a o lei o mai i le lalolagi o ni tagata ua faitino. O le fuafuaga a le Tama ua mafai ai e Ona atalii ma afafine agaga ona maua ni tino faitino, ia maua le potu masani i le tino, ma ia agaigai ai i luma i le faaeaga.

O Le Taua o se Tino Faitino

O o tatou tino faitino ua mafai ai ona tatou maua se potu masani lautele, loloto, ma le maoae lea e le mafai ona maua i lo tatou i ai i le muai olaga. O le mea lea, o a tatou sootaga ma isi tagata, o lo tatou malosia e iloa ai ma faitino e tusa ai ma le upumoni, ma lo tatou tomai e usitai ai i mataupu faavae ma sauniga o le talalelei a Iesu Keriso e faateleina e ala i o tatou tino faaletino. A o tatou ola ai, tatou te iloaina le agamalu, alofa, agalelei, faanoanoa, le fiafia, tigo e oo lava i luitau o tapulaa faaletino o ni auala e saunia ai i tatou mo le faavavau. I se faaupuga faigofie, e i ai lesona e ao ona tatou aoaoina ma aafiaga e tatau ona tatou maua, e pei ona faamatala mai i tusitusiga paia, “e tusa ma la le tino” (1 Nifae 19:6; Alema 7:12–13).

O Le Mana e Foafoa ai Fanau

Ina ua maea ona foafoaina le lalolagi, sa tuu Atamu i le Faatoaga o Etena. Peitai, o le mea taua, sa fetalai atu le Atua “e le lelei ona mau toatasi o le tagata” (Mose 3:18; tagai foi Kenese 2:18), ma sa avea Eva ma ava



ma se fesoasoani ia Atamu. O le tuu-faatasiga maoae o mana faaleagaga, faaletino, faalemafaufau, ma faalelagona o tane ma tamaitai, sa manaomia e faatino ai le fuafuaga o le fiafia. “E leai se tane pe a le o i ai le fafine, e leai foi se fafine pe a le o i ai le tane, i le Alii” (1 Korinoto 11:11). Ua faamoe-moe le tane ma le fafine e aoao mai, faamalosi, faamanuia, ma faaatoatoa e le tasi le isi.

O le auala ua foafoaina ai le ola faaletino na atofa mai le lagi. “O le poloaiga muamua . . . na tuu atu e le Atua ia Atamu ma Eva e faatatau i lo la’ua gafatia mo le tulaga faamatua o se tane ma se ava” (*Liahona*, Nov. 2010, 129). O le poloaiga ia fanafanau ma ululuola ma ia tumu ai le lalolagi, o loo tumau pea e oo mai i le taimi nei. O le mea lea, o le faaipoipoga i le va o le tane ma se tamaitai o le alafua faatagaina lea, e ulufale mai ai agaga o le muai olaga i le olaga nei. O le faafitia atoatoa o feusuaiga a o lei faaipoipo ma le faamaoni a’ia’i i totonu o le faaipoipoga, e puipuia ai le paia a’ia’i o lenei alafua paia.

O le mana o le foafoaina o fanau e matuai taua faaleagaga. O le faa-aoga sese o lenei mana e faatoilalo ai faamoemoega o le fuafuaga a le Tama ma lo tatou i ai i le olaga nei. O lo tatou Tama Faalelagi ma Lona Alo o tufuga ia ma ua faamatuu mai

ia i tatou taitoatasi se vaega o lo La’ua mana foafoa. O ni taiala patino mo le faaaogaina tatau o lenei tomai e foafoa ai le ola, o ni elemene taua ia i le fuafuaga a le Tama. O o tatou lagona e uiga i ai ma le faaaogaina o lenei mana faalelagi, o le a fuafua ai se fuataga tele o lo tatou fiafia i le olaga nei ma lo tatou taunuuga i le faavavau.

Na faamalalalama mai e Elder Dallin H. Oaks:

“O le mana e foafoa ai le ola faaletino o le mana aupito sili lea ona faeaina na tuuina mai e le Atua i ana fanau. O lona faaaogaaga sa faatonuina mai i le poloaiga muamua, ae sa i ai se isi poloaiga taua sa tuuina mai e faasa ai lona faaaogaina sese. O le faamamafa tatou te tuuina i le tulafono o le ola mama o loo faamatalaina e ala i lo tatou malamalama i le faamoemoega o o tatou mana e foafoa ai fanau i le faataunuuna o le fuafuaga a le Atua. . . .

“I fafo atu o noataga o le faaipoipoga, o le faaaogaina o le mana foafoa i auala uma lava, o ni faaaogaina sese ia ma agasala inosia o le uiga paia silisili o tane ma fafine” (“The Great Plan of Happiness,” *Ensign*, Nov. 1993, 74).

O Le Tulaga Faatonuina o le Ola Mama Faalefeusuaiga

O Le Ekalesia a Iesu Keriso o le Au Paia o Aso e Gata Ai e i ai se

tulaga faatonuina e tasi, e mausali o le ola mama faalefeusuaiga: o sootaga mafana felata’i e na o le va lava o se alii ma se tamaitai i le sootaga o le faaipoipoga ua faatonu mai i le fuafuaga a le Atua, e tatau ai. O na sootaga ua le na o se naunau e fiailoa, se manaoga ia faamalieina, po o se ituaiga o taaloga po o faafiagi e tulimatai ma le manatu faapito. E le o se osigatolalo pe ua na o se taga e faatino. Ae, ua latou i ai i le olaga faitino o se tasi o faailoaga taua o lo tatou natura paia ma gafatia, ma o se auala o le faamalolosa o noataga faalelagona ma faaleagaga i le va o le tane ma le ava. O i tatou o tagata ua faamanuiaina i le faitalia e filifili ai le mea tonu, ma ua tulaga ese i lo tatou tofi paia o ni fanau a le Atua—ae le o amioga feusui po o uiga ma tulafono faanei ona po, po o filosofia faalelalolagi.

O Le Tagata Natura

I se isi itu, o le tagata natura o loo faamatalaina e le Tupu o Peniamina o loo ola pea ma o loo i ai i totonu o i tatou taitoatasi (tagai Mosaea 3:19). O le tagata po o le fafine natura e le salamo, e tuinanau ma faatiapolo (tagai Mosaea 16:5; Alema 42:10; Mose 5:13), e faalologo ma soonafai, ma e faamaualuga ma manatu faapito. E pei ona aoao mai Peresitene Spencer W. Kimball, “O le ‘tagata natura’ o le ‘tagata i le lalolagi’ o lē na te faatagaina naunauga masani a manu e faapogisaina ona lagona faaleagaga” (“Ocean Currents and Family Influences,” *Ensign*, Nov. 1974, 112).

I se tulaga faafeagai, o le “alii [po o se tamaitai] o Keriso” (Helamana 3:29) e faaleagaga ma pulea tuinanau uma (tagai Alema 38:12), e faautauta ma e amio pulea, ma e agalelei ma e le manatu faapito. O alii ma tamaitai o Keriso e taofimau i le upu a le Atua, e faafitia i latou lava ma amoina Lona

satauro (tagai Mataio 16:24; Mareko 8:34; Luka 9:23; MF&F 56:2), ma fetaomi atu i luma i se ala sa'o ma le vaapiapi o le faamaoni, ususitai, ma le tuuto atu i le Faaola ma Lana talalelei.

Ona o i tatou o atalii ma afafine o le Atua, ua tatou maua ai gafatia paia mai ia te Ia. Ae o loo tatou nonofo i le taimi nei i se lalolagi pau. O elemene tonu lava sa foafoaina mai ai o tatou tino, o lo latou natura lava o le pau ma e aafia lava i le agasala, o mea piopio, ma le oti. O le mea la lea, o le Pau o Atamu ma ona taunuuga faaleagaga ma faaletino ua aafia tuusao ai lava i tatou e ala i o tatou tino faitino. Ae ui i lea o i tatou o ni tagata e itulua, aua o o tatou agaga o se vaega e faavavau o i tatou ua faaofuina i se tino faitino lea e aafia i le Pau. E pei ona faamamafa atu e Iesu i le Aposetolo o Peteru, "Ua manao i ai le loto, a o le tino ua vaivai" (Mataio 26:41).

O le uiga moni lava la o le suega i le olaga nei, e mafai ona aoteleina i le fesili lea: Pe o le a ou tali atu ea i faamoemoega o le tagata natura, pe o le a ou gauai atu i uunaiga a le Agaga Paia ma tuu ese le tagata natura ae avea ma tagata paia e ala i le Togiola a Keriso le Alii (tagai Mosaea 3:19)? O le suega lena. O naunauga uma, manaoga, faamoemoega, ma moomooga o le tagata natura, e mafai ona faatoilalo e le, ma ala i le Togiola a Iesu Keriso. Ua tatou i ai iinei i le lalolagi e atiina ae uiga auaumama faale-atua ma ia pulea lelei tuinanau uma o le tino.

O Le Faamoemoega o le Fili

O le fuafuaga a le Tama ua mamana ina ia tuuina mai ai le taitaiga mo Ana fanau, e fesoasoani ai ia i latou ia fiafia, ma toe auamaia saogalemu i latou ia te Ia ma ni tino faaeaina. E finagalo le Tama Faalelagi ia i tatou ia faatasia i le malamalama ma ia faatumuina i le faamoemoe. O

le eseese, e galue Lusifelo e faafenumiai atalii ma afafine o le Atua ma ia lē fiafia ma faalavelaveina lo latou agaigai i luma e faavavau. O le faamoemoega autu lava o le tamā o pepelo, ia tatou "faanoanoa uma e pei o ia lava" (2 Nifae 2:27). E manao Lusifelo ia tuua moni na o i tatou i le pogisa e aunoa ma se faamoemoe.

E galue pea lava pea Satani e mimilo ia elemene aupito taua o le fuafuaga a le Tama. E leai sona tino, ma ua muta lona alualu i luma e faavavau. E pei lava ona taofia e se punivai le vai e tafe i se vaitafe, ua faapena foi ona punitia le alualu i luma e faavavau o le fili aua e leai sona tino faitino. Ona o lona fouvale, ua faafitia ai e Lusifelo mo ia lava o faamanuiaga uma i le tino ma aafiaga e mafai ona maua e ala i se tino o aano ma ivi. E le mafai ona ia aoaoina ia lesona ia e na o se agaga ua i ai se tino e mafai ona aoaoina. E inoino o ia i le moni a'ia'i o se toetu patino atoatoa o tagata uma. O se tasi o faauigaga malosi faatusi-paia o le upu *faamalaiaina* o loo faapupula mai i lona le mafaia lea ona atiae ma avea e faapei o lo tatou Tama Faalelagi.


Talu ai o se tino faaletino e matua totonugalemu i le fuafuaga o le fiafia a le Tama ma lo tatou atina'ega faaleagaga, ua saili ai Lusifelo e faalavelaveina lo tatou alualu i luma e ala lea i le faaosoosoina o i tatou e faaoga ma le faaletatau o tatou tino. O se tasi o faafeagai o le faavavau o le fili, o lē ua matuai faanoanoa lava ona e leai sona tino faitino, na te faaosoosoina i tatou ia tatou faanoanoa faatasi ma ia e ala i le faaoga sese o o tatou tino. O le meafaigaluega tonu lava na te le o maua, o lea ua avea ai ma uluai tulimataiga o ana taumafaiga e maileia ai i tatou ia faataumaoia faaleagaga.

O le solia o le tulafono o le ola mama o se agasala inosia ma o se

faaogaina sese lea o o tatou tino faaletino. Ia i latou ua iloa ma malamalama i le ata o le faaolataga, o le faaleagaina o le tino o se aga o le fouvale (tagai Mosaea 2:36–37; MF&F 64:34–35) ma se faafitia o lo tatou faasinomaga moni oni atalii ma afafine o le Atua. A tatou vaavaai i talaatu o le olaga nei i le faavavau, e faigofie ona tatou iloaitino ai le mafutaga taufaasese o loo fautuaina mai e le fili, e na o sina taimi ma e gaogao.

O Faamanuiaga o le Ola Mama

Na fautuaina e Alema lona atalii o Sepulona ina ia "pulea [ona] tuinanau uma, ina ia faatumuina [o ia] i le alofa" (Alema 38:12). E maoae lava, o le aoaiina o le tagata natura i totonu o i tatou taitoatasi, e mafai ai ona maua se alofa e sili atu ona anoa, loloto, ma tumau o le Atua ma Ana fanau. E faateleina le alofa e ala pe a tatou puipuia i tatou lava i le amiotonu, ma e faaitiitia pe a tatou faamatuu atu i faaosoosoga.





Na tautino mai e Peresitene
Marion G. Romney:

“Ou te le iloa po o a faamanuiaga e sili atu ona manaomia malosi nai lo faamanuiaga ua folafola mai i e mama a’ia’i ma amioatua. Na fetalai Iesu e uiga i tau patino mo amioatua eseese ae sa ia taofia le mea aupito silisili, o lea la e foliga mai ia te au, mo ē loto mama, ‘aua latou te’ na ia fetalai ai ‘iloa atu le Atua’ (Mata. 5:8). E le gata la ina latou vaai atu i le Alii, ae o le a latou lagona foi le toafinale i lona afoaga.

“O le folafolaga . . . lenei a le Faaola: ‘Ia tuu le amiomama e teuteuina ai ou mafauauga e le aunoa; ona solo malosi ai lea o lou lototele i luma o le Atua’ (MF&F 121:45)” (“Trust in the Lord,” *Ensign*, Me 1979, 42).

Ua folafola mai foi ia i tatou e faapea, a tatou tulimataia le ala o le amioatua, “o le a avea le Agaga Paia ma [a tatou] soa e le aunoa” (MF&F 121:46). O le mea lea, o le ola ai i le tulafono o le ola mama e valaaulia ai nisi o faamanuiaga silisili e mafai ona maua e alii ma tamaitai i le olaga nei—le mautinoa talafeagai faaleagaga i le i ai i le aiga, uo, paaga i le Ekalesia, ma, o le mea silisili, o le Faaola. O lo tatou lava naunautai faalenatura ia avea ai ma itutino moni, e faataunuuna lea i le amiotonu a o tatou savavali i le malamalama ma le faamoemoe.

O Le Mataupu Faavae o le Salamo

O nisi o outou e mauaina lenei savali, e manaomia ona salamo mai agasala feusuai po o isi foi. E tele taimi e faasino atu i le Faaola o le Fomai Sili, ma o lenei faalagiga e taua i se tulaga faa-faatusa ma e sa’olele foi. Ua tatou oo uma lava i le tiga o se lavea po o se manu’a faaletino. A oo ina tatou tiga, e masani lava ona tatou sailia se toomaga ma e faafetai foi mo vilaaui ma togafitiga ia e fesoasoani ai e faaitiitia ai lo tatou mafatia. Mafaufau i le agasala o se manu’a faaleagaga e afua ai lagona tausallaina, e pei ona faamatalaina e Alema i lona atalii o Korianetona, o le “faanoanoa o le mafaufau” (Alema 42:18). O le aafiaga o le tausallaina i o tatou agaga e faapei foi o le aafiaga o le tiga i o tatou tino—o se lapataiga i se tulaga matautia ma o se puipuiga mai le faataumaoia. Mai le Togiola a le Faaola e maua mai ai le suauu faamafanafana e mafai ona faamaloloina ai o tatou manu’a faaleagaga ma aveesea ai le tausallaina. Peitai, o lenei suauu e na o mataupu faavae lava o le faatuatua i le Alii o Iesu Keriso e mafai ai ona faaoga, salamo, ma le usiusitai faifai pea. O taunuuga o le salamo ma le loto faamaoni o le filemu o le mafaufau, mafanafana, ma le faamalologa ma le faafouga faaleagaga.

O lou epikopo po o le peresitene o le paranesi o le fomai fesoasoani faaleagaga lea ua faatagaina e fesoasoani ia e salamo ma faamaloloina. Peitai, faamolemole ia manatua o le lautele ma le loloto o lou salamo e tatau ona ogatusa ma le natura ma le matuia o au agasala—aemaise o le Au Paia o Aso e Gata Ai o ē ua osia feagaiga paia. O manu’a faaleagaga matuia, e manaomia ai togafitiga faifai pea ma le taimi e matuai faamalolo atoatoa ai.

O Se Folafolaga ma se Molimau

O le aoaoga faavae sa ou faamatalaina atu o le a foliga mai ua autausagā ma ua le toe aoga i le tele o tagata i se lalolagi ua faateleina le faatauemu i le paia o le mana foafoa ma ua faaitiitia le taua o le ola o le tagata. Peitai, o le upumoni a le Alii e le suia e tifica, lauiloa, po o le palotaina o manatu o tagata lautele. Ou te folafola atu o le usiusitai i le tulafono o le ola mama o le a faateleina ai lo tatou fiafia i le olaga nei, ma mafai ai ona tatou agai i luma i le faavavau. O le ola mama ma le amioatua i le taimi nei, ma sa i ai lava, ma o le a avea pea lava ma mea e “silisili ona pele ma taua i lo mea uma” (Moronaē 9:9). Ou te molimau atu ai i le suafa paia o le Alii o Iesu Keriso, amene. ■



Saunia e Elder Russell M. Nelson

○ Le Korama a Aposetolo e Toasefululua

Pu'e le Galu

Ou te faafetai i le Atua ma Lona Alo, o Iesu Keriso, mo le Toefuataiga ma lona mana e faatupuina ai se galu maoae o le upumoni ma le amiotonu i le lalolagi atoa.


Uso e ma tuafafine pele, e faaopopo atu lo'u leo ia Peresitene Thomas S. Monson ma isi e viia i latou o ē ua tali mai i le valaau a se perofeta mo nisi mau faifeautalai agavaa. Ua i ai nei se galu fafati o le nautaitaiga mo le galuega faafaifeautalai ua lilofia ai le lalolagi uma. Talu mai le folafolaga faasolopito a Peresitene Monson ia Oketopa talu ai, ua faitau afe ia alii faifeau, o tamaitai faifeau, ma ulugalii faamisiona ua valaauina, ma le anoanoai o isi o loo sauniuni.¹ O le taimi nei ua oo mai ai fesili e pei o le, "O le a se mea o le a e faia i nei faifeautalai uma?" E faigofie lava le tali. O le a latou faia lava le mea latou te faia i taimi uma. O le a latou talai atu le talalelei! O le a latou faamanuaina fanau a le Atua Silisiliese!

O le a toatele isi o outou alii ma tamaitai talavou o le a pu'eina lenei galu pe a outou taumafai ia agavaa mo valaauga faamisiona. Tou te vaai i lenei mea o se galu o le upumoni ma le amiotonu. Tou te vaai i lo outou avanoa e auai atoatoa ai i le faasalalauina o le upumoni ma le amiotonu.

Outou le tupulaga talavou, opogi la outou mataupu aooina fou ma aoao atu e le tasi le isi i le mataupu a Iesu Keriso. O lo outou taimi lenei e

sauniuni ai e aoao atu isi e uiga i le agalelei o le Atua.

Alii ma tamaitai talavou, e matua taua tele le a'otauina o outou—ia i matou, ia te outou, ma i le Atua. A faapea e mafai, afai e te fia manao e aoga i se kolisi po o se iunivesite *pe a uma* lau misiona, matou te fautuaina oe e tuu i totonu lau talosaga e lesitala ai i le a'oga e te filifilia *ao lei* amataina lau misiona. E tele a'oga mauaululuga e tuu mai le 18 i le 30 masina talu ona talia, e faatoa a'e atu ai i latou ua faamoemoe e faamisiona. O iina o le a mafai ai e outou alii ma tamaitai ona



faamisiona e aunoa ma le popole po o fea o le a amata ai ona a'otau faalau-tele ai oe. Matou te faafetai lava i taitai o a'oga ua faia na fuafuaga!

Outou matua, faiaoga, ma isi, pu'e le galu ao outou tapenaina a outou tupulaga faia'e ia agavaa mo le galuega faafaifeautalai. O le taimi nei, o o outou soifuaga amiotonu o le a faatosina maia le naunau o a outou uo ma tuaoi. Ia saunia e tuu atu se tali ia i latou e fesili mai pe aisea tou te ola ai e pei ona i ai. Ia saunia e tuu atu se mafuaaga mo le faamoemoe ma le olioli ua latou vaaia ia te outou.² A oo mai ituaiga fesili faapena, e mafai ona outou tali atu faapea, "Tatou fesili i faifeautalai! E mafai ona fesoasoani mai ia i tatou! Afai foi e te manao ai, o le a ta i ai faatasi a o tali atu ma aooina oe e faifeautalai."

Outou tagata matutua, pu'e le galu e ala i le tapenaina faaleagaga, faaletino, ma mea tautupe mo faifeautalai i le lumanai. Ua avea ma mea masani ia te oe le faaputupu o nai tupe mo misiona. O le a sili ona e faafetai mo lau auaunaga. A o lei oo mai lena taimi, atonu e mafai e nisi o outou ona auina mai a outou tupe e lagolago ai le galuega faafaifeautalai i le faia lea o au saofaga i le Tupe Lautele mo Faifeautalai, e pei ona toe fautuaina ai foi e Peresitene Monson ananei i le taeao.³

O se aofaiga faateleina o alii filifilia ma a latou soa faapelepele ua pu'eina le galu pe a valaauina i latou e pulefaa-malumu i misiona a le Ekalesia. I lena auaunaga, o le a latou mamanuina ai le taunuuga o tupulaga ua fananau mai ma ē lei fananau mai. E umia e peresitene o misiona ia ki o le tiutetauave mo le soifua manuia, saogalemu, ma le manuia o a latou faifeautalai. A una ona feutagai ma peresitene o siteki ma itu i lana misiona, ona tofia lea e peresitene taitasi o misiona ia faifeautalai e galulue i siteki patino, uarota, ma paranesi.



E pu'eina e peresitene o siteki ma epikopo le galu pe a latou faaaluina le tele o itula e faatalanoa ai i latou ua faamoemoe e avea ma faifeautalai. O nei taitai faaleperisitua ua umia ki o le tiutetauave mo le galuega faafaifeautalai i a latou iunite ma latou te uunaia ia tagata o le au paia e auai i le faatinoga.

O uso ma tuafafine i aufono taitasi a uarota, ua amata ona pu'eina le galu. E i ai i lenei aufono le taitai misiona a le uarota.⁴ Ou te fia tautala faapitoa atu ia te outou taitai misiona taitasi o uarota. Ua valaauina oe e lou epikopo e taitaia le galuega faafaifeautalai i le uarota. Ma ua matua faamanuina lava nisi o outou ma o lea ua valaauina ai se fesoasoani e fesoasoani atu ia te oe. Faatasi ai la ma isi o le aufono, e te faailoa atu ia tagata ua le toaaga mai o le au paia, o aiga e lolotu se vaega, ma tuaoi ua fia aoao. Tou te fono e le aunoa ma faifeautalai faamisiona. E te fautuaina ma lagolago atu i faifeautalai. Faamolemole fesoasoani ia i laua e faatumu a la'ua fuafuaga mo aso taitasi i ni avanoa tulimata'i ma le anoa e aoao atu ai. O lou tiutetauave lenei. O lau matafaii e taua tele, e matua taua lava mo le manuia o lenei galuega. Afai e te pu'eina le galu i le faatuatua ma le naunautai, o le a faapena foi ona faia e isi. O oe, i le avea ai o se taitai misiona a le uarota, o le sootaga

i le va o tagata o le au paia ma faifeautalai i lenei galuega paia o le laveai mai o fanau a le Atua.⁵

O a tatou uo ma tuaoi e le lolotu e mafai foi ona latou pu'eina le galu. Matou te fautuaina i latou e teuina mea uma e lelei ma tonu i o latou olaga. Ma e tatou te valaauliaina foi i latou ina ia maua atili nisi mea, aemaise ai o le upumoni mamalu o le fuafuaga e faavavau a le Atua, e mafai ona faavavau aiga.⁶

O lenei galu o le upumoni ma le amiotonu e ofoofogia! E lei faia e se tagata! E mai le Alii, o le na fetalai, "O le a ou faanatinatiina la'u galuega i lona taimi."⁷ Ua faamamanaina lenei galu i se folafolaga na faia i le 193 tausaga ua mavae. E iva ona upu: "O Lo'u Atalii Pele Lenei. Faalogo ia te Ia!"⁸ I le tuleiga a le Atua Silisiliese, na faafeiloaia mai ai i lenei faasilasilaga le taulealea o Iosefa Samita i le Alii o Iesu Keriso. O na lava upu na amatalia ai le Toefuataiga mai o Lana talalelei. Aisea? Aua o lo tatou Atua soifua o se Atua e alofa! E finagalo o Ia i Ana fanau ia iloa o Ia ma Iesu Keriso, o le na Ia auina mai!⁹ E finagalo foi o Ia ia maua e Ana fanau le tino ola pea ma le ola e faavavau!¹⁰

Ona o lenei faamoemoega mamalu, ua aoao atu ai e o tatou faifeautalai le Toefuataiga. Ua latou iloa pe tusa ma le 2,000 tausaga talu ai, sa faatuina ai

e le Alii Lana Ekalesia. Ina ua mavae Lona Faasatauroga ma le maliliu ai o Ana Aposetolo, sa suia e tagata le Ekalesia ma ona aoaoga faavae. Ona, mavae lea o augatupulaga o le pogisa faaleagaga, ma e pei ona valoia ai e perofeta anamua,¹¹ na toefuatai mai ai e le Tama Faalelagi ma Iesu Keriso le Ekalesia, o ona aoaoga faavae, ma lana pule faaleperisitua. Ona o lenei Toefuataiga, ua toe avanoa ai le malamalama ma sauniga e tatau ai mo le faaolataga ma le faaeaga i tagata uma.¹² O le faatumutumuga, o lenei faaeaga e mafai ai e i tatou taitoatasi ona nonofo faatasi ma o tatou aiga i le afioaga o le Atua ma Iesu Keriso e faavavau!

E le mafai ona ou tautala e uiga i le Toefuataiga e aunoa ma le sagisagi fiafia. O lenei itu moni o le talafaasolopito e matua ofoofogia lava! E maoae! E faagaetia! Pe le ofoofogia ea le o mai o avefeau mai le lagi e aumai le pule ma le mana mo lenei galuega?

E tele isi taimi na faaali mai ai lo tatou Tama Faavavau ma Iesu Keriso i le Perofeta o Iosefa Samita.¹³ I lalo o la La'ua taitaiga, na o mai ai isi avefeau faalelagi, e tofu lava ma se faamoemoega patino. Mo se faataitaiga:

- O le agelu o Moronae na faailoa maia le Tusi a Mamona.¹⁴
- O Ioane le Papatiso na toefuatai maia le Perisitua Arona.¹⁵
- O Peteru, Iakopo, ma Ioane na toefuatai maia le Perisitua Mekisateko.¹⁶
- O Mose na faaee maia ki o le faapotopotoina o Isaraelu.¹⁷
- O Elaia na faaee maia ki o le malamalama e uiga ia Aperamo.¹⁸
- O Elia na toefuatai maia ki o le pule o faamauga.¹⁹

E le gata i lea, o le Toefuataiga ua faaopoopo mai ai le malamalama sa i ai i le Au Paia anamua. Na tuuina mai ai

e le Alii se tusi fou o tusitusiga paia. Na Ia faaopoopo mai i le Tusi Paia le Tusi a Mamona: O Se Tasi Molimau ia Iesu Keriso. O se faamaumauga o valoaga ma le auunaga a le Alii toetu i tagata o Amerika anamua. O loo faamatalaina ai le fuafuaga sili o le—fiafia²⁰ a le Atua—le ata o le faaolataga.²¹ E ogatusa lelei lava le Tusi a Mamona ma le Tusi Paia. O ni faamaumauga paia uma e faamautu ai le moni o le talalelei a Iesu Keriso ma le taua o Lana Togiola.²²

Ua faataunuu e le Toefuataiga le tele o valoaga i le tusi paia. Mo se faataitaiga, na valoia e Isaia o le a faatuina le fale o le Alii i tumutumumu o mauga.²³ O le malaga umi a paionia Mamona i atumauga o Amerika sisifo, o se mea maoae na faatino ai osigataulaga ma le faatuatua. Na muai ta’u mai foi e Isaia o le a faia e le Atua “se galuega maoae ma le ofoofogia.”²⁴ Ua faataunuuina nei lena mea e ala i le

galuega paia a la tatou ‘au ua faatupu-laia o faifeautalai.

O aoaoga a le Feagaiga Tuai e uiga i le sefuluai ua toefuatai mai.²⁵ O le taunuuga, ua atili toatele le au totogi sefuluai ua faamanuiaina ona o lo latou usiusitai. O mau faasino ia Mekisateko ua faamanino mai e tusitusiga paia o le Toefuataiga.²⁶ O valoaga faapea o le laau a Iosefa (Tusi a Mamona) ma le laau a Iuta (le Tusi Paia) o le a tasi i le aao o le Atua, ua faataunuuina nei.²⁷

Ua faamanino mai foi e le Toefuataiga ia tusitusiga paia o le Feagaiga Fou. O lona mau faasino i le papatisoga mo e ua maliliu ua sili nei ona malamalama i ai.²⁸ O sauniga mo o tatou augatama ua maliliu ua faatino ina nei e tagata sui i malumalu e 141 i le lalolagi atoa! E leai lava se isi auala e ofo atu ai le faaolataga i o tatou augatama o ē ua maliliu e aunoa ma

le silafia i le talalelei!²⁹ O le faaaliga ia Ioane le Talifaaaliga e uiga i “le tasi agelu [na lele] i le taulotoaiga o le lagi, ua ia te ia le tala lelei e faavavau e folafola atu i e nonofo i le lalolagi i atunuu uma,” na muai ta’u mai ai le misiona a le agelu o Moronae ma le Tusi a Mamona.³⁰

O le Tusi a Mamona o le vaega taua tele o le Toefuataiga. Na tusia, faasaoina, ma auina mai i lalo o le taiga a le Alii. Na faaliliuina “e ala i le meaalofa ma le mana o le Atua.”³¹ O le tusi o Mataupu Faavae ma Feagaiga o loo i ai isi faaaliga e tele na tuuina mai i le Perofeta o Iosefa Samita. Na ala mai ia te ia, ua tatou maua ai isi mau itulau o tusitusiga paia nai lo se isi lava perofeta. I se taimi atonu sa ia manatunatu loloto ai, na ia fai atu ai i le Au Paia i Navu, Ilinoi, “Ou te lei fai atu lava ia te outou ua ou atoatoa; ae e leai lava se mea sese i faaaliga ua ou aoao atu.”³²

E auaatasi tagata o le au paia ma faifeautalai e valaaulia tagata uma e aoao e uiga i le Atua, e uiga ia Iesu Keriso ma Lana Talalelei. E ao foi i tagata uma o loo tuufesilisili ona saili ma le faamaoni ma tatalo faatauana mo se faamautinoaga faapea e moni nei mea. O le a faaaliga le mea moni e ala i le mana o le Agaga Paia.³³

Ou te faafetai i le Atua ma Lona Alo, o Iesu Keriso, mo le Toefuataiga ma lona mana e faatupuina ai se galu maoae o le upumoni ma le amiotonu i le lalolagi atoa. Talosia ia tatou pu’eina lena galu ma faataunuuina ai le poloaiga a le Alii e “folafola atu le talalelei i atunuu uma, ma ituaiga, ma gagana, ma tagata,”³⁴ Ou te tatalo ai i le suafa o Iesu Keriso, amene. ■



FAAMATALAGA

1. Tagai Thomas S. Monson, “Maliu Mai i le Konafesi,” *Liahona*, Nov. 2012, 4–5.
2. Tagai 1 Peteru 3:15.
3. Tagai Thomas S. Monson, “Ua Toe Oo Mai Foi le Konafesi,” *Liahona*, Me 2011, 6.
4. Tagai *Tusitaulima 2: Taitaiina o le Ekalesia* (2010), 5.1.
5. Matou te faafetai mo le Au Paia o e o loo tauivi ma le faamaoni mo le faapaia. O loo latou taumafai ina ia paia atili. Ua latou saili “muamua e fausia le malo o le Atua, ma faatu lana amiotonu” (Faaliliuga a Iosefa Samita, Mataio 6:38 [i le Mataio 6:33, vae faamatalaga a]).
6. Tagai “E Mafai na Faavavau Aiga,” *Viiga*, nu. 183; o isi faamalamalama faaopoopo o loo maua i le Mataupu Faavae ma Feagaiga 132:7, 19.
7. Mataupu Faavae ma Feagaiga 88:73.
8. Iosefa Samita—Talafaasolopito 1:17.
9. Tagai Ioane 17:3.
10. Tagai Mose 1:39.
11. Tagai Mataio 17:11; Galuega 3:20–21; Efeso 1:10; 2 Nifae 30:8; Mataupu Faavae ma Feagaiga 132:40, 45.
12. Tagai 3 Nifae 27:13–14, 21; Mataupu Faavae ma Feagaiga 39:6; Mataupu Faavae o le Faatuatua 1:4.
13. Tagai Karl R. Anderson, *The Savior in Kirtland* (2012), 228–43.
14. Tagai Mataupu Faavae ma Feagaiga 27:5; tagai foi Iosefa Samita—Talafaasolopito 1:33–34.
15. Tagai Mataupu Faavae ma Feagaiga 13.
16. Tagai Mataupu Faavae ma Feagaiga 20:2–3; 27:12; 128:20; tagai foi Larry C. Porter, “Dating the Restoration of the Melchizedek Priesthood,” *Ensign*, June 1979, 4–10.
17. Tagai Mataupu Faavae ma Feagaiga 110:11.
18. Tagai Mataupu Faavae ma Feagaiga 110:12.
19. Tagai Mataupu Faavae ma Feagaiga 110:13–16.
20. Tagai Alema 42, aemaise le fuaiupu 8.
21. Tagai, mo se faataitaiga, Alema 12:28–30.
22. Tagai, mo se faataitaiga, 1 Korinito 15:22; Alema 34:9.
23. Tagai Isaia 2:2.
24. Isaia 29:14.
25. Tagai Kenese 14:18–20; Malaki 3:8–10; Mataupu Faavae ma Feagaiga 119–20.
26. Tagai Kenese 14:18; Salamo 110:4; tagai foi Alema 13:14–18; Mataupu Faavae ma Feagaiga 84:14–22.
27. Tagai Esekielu 37:16, 19; Mataupu Faavae ma Feagaiga 27:5.
28. Tagai 1 Korinito 15:29; Mataupu Faavae ma Feagaiga 128.
29. Tagai Mataupu Faavae ma Feagaiga 137:7; 138:31–34.
30. Faaaliga 14:6; tagai foi Mataupu Faavae ma Feagaiga 133:36–39.
31. Itulau autu o le Tusi a Mamona, na tusia e Moronae; Mataupu Faavae ma Feagaiga 135:3.
32. *Aoaoga a Peresitene o le Ekalesia: Iosefa Samita* (2007), 522.
33. Tagai Moronae 10:4–5.
34. Faaaliga 14:6; tagai foi 1 Nofae 19:17; Mataupu Faavae ma Feagaiga 133:37.



Saunia e Elder Robert D. Hales

O Le Korama a Aposetolo e Toasefululua

Tutu Malolosi i Nofoga Paia

O le tutu malolosi ma usiusitai i aoaoga faavae a lo tatou Atua, ua tatou tutu ai i nofoaga paia, aua o Lana aoaoga faavae e paia ma e le masuia.

Uso e, o se tulaga faamamaluina le faatasi ai ma e umia le perisitua paia a le Atua. O loo tatou ola ai i aso e gata ai, o “aso faigata.”¹ I le avea ai ma e umia le perisitua, ua ia i tatou le tiutetauave ina ia tutu malolosi ma ave le talita o le faatuatua e tetee atu ai i ufanafana mu a le fili. O i tatou o ni faataitaiga i le lalolagi, e puipuia ia saolotoga ma aia tatau ua tuuina mai e le Atua ma e le mafai ona aveesea. Tatou te tutu e puipui o tatou aiga ma o tatou auaga.

Ao ou i ai i le vasega iva, sa matou toe foi mai ma le matou au peisipolo sinia lea sa matou taaalo i se isi nuu. Na lagonaina e lou tama, i le taimi o le tietiega umi mai le pasi na ou molimauina ai ni gagana ma uiga sa le ogatasi ma tulaga faatonuina o le talalelei. I le avea ai ma se tusiata faapolofesa, sa ia nofo i lalo ma tusi se ata o se toa—o se fitafita e mafai ona puipuia ni olo ma ni malo.

Ao ia tusia ma faitau mai tusitusiga paia, sa ou aoao i le auala e avea ai ma se tagata faamaoni e umia le perisitua—e puipuia le malo o le Atua. Na

avea upu a le Aposetolo o Paulo ma ou taiala:

“O le mea lea ia outou tago ai i ofutau atoatoa mai le Atua, ina ia outou mafaia ona tetee atu pe a oo i le aso vale, pe a uma ona outou faia o mea uma, tou te *tutumau ai*.

“O lenei, ina *tutumau* ia outou o fusia o outou sulugatiti i le faamaoni, ia oofu foi outou i le ufifatafata o le amiotonu;

“Ma ia faaseevaeina o outou vae i le sauniga o le tala lelei o le filemu;

“Ia faaopoopo i na mea uma ona tago atu i le talipupuni o le faatuatua, tou te mafai ai ona tinei o ufanafana mu uma lava o loo leaga.

“Ma ia outou ave le puloutau o le olataga, ma le pelu a le Agaga, o le afioga lea a le Atua.”²

Uso e, afai tatou te faamaoni i le perisitua, o le a aumaia ia i tatou lenei ofutau o se meaalofoa mai le Atua. Tatou te manaomia lenei ofutau!

Alii talavou e, e lei fetaii lava o outou tama ma tama matutua ma ni faaososoga ia o loo outou feagai ai i se tulaga masani. Ua outou ola i aso

e gata ai. Afai na manao lou tama i se faafitauli, sa ia alu ma saili i ai. E le o toe i ai se na mea! I lenei vaitaimi ua saili outou e faaososoga! Faamole-mole ia manatua lena mea! O loo manao Satani ia te outou, ma o loo “taoto i le faitotoa le agasala.”³ Mata e faapefea ona e tetee i ana faiga faamalosi? Ia oofu i ofutau atoatoa o le Atua.

Sei ou aoao atu ia te oe se isi aafiaga mai lou olaga:

Ia Ianuari o le 1982, sa ou lauga ai i se faigalotu i le lotoa o BYU i Provo, Iuta. Sa ou valaauliaina ia tamaiti aoga e vaai faalemafaufau faapea sa i ai le Ekalesia i le isi itu o le pulelaa, iinei, ma sa na o le tasi se futu pe lua foi sa mamao ese ai le lalolagi i le isi itu. Sa avea lenei mea o se faatusa o le “matuai latalata lava o le va sa i ai le lalolagi ma le mea o i ai ia tulaga faatonuina a le Ekalesia” ao ou i ai lea i le kolisi. O lo’u tu atu la i luma o tamaiti i le 30 tausaga mulimuli ane, sa ou tuuina i luga ou lima i lea lava tulaga e tasi ma faamalamalama atu ai faapea, “Ua mamao lava le tulaga o i ai le lalolagi; [sa femalagaai; ua le o toe iloa atu;] ua mamao lava le tulaga ua oo i ai, ma ua alu ese atu mai lenei [fale ma ua taamilo i le lalolagi]. . . . O le mea e tatau ona matou manatuaina ma lau fanau ma a latou fanau, o le a tumau pea le Ekalesia, [o loo i ai pea iinei; ae] o le a faaauau pea ona fealuai le lalolagi—o le a atili ai lava ona lautele lena avanoa. . . . O le mea lea, ia matuai faaeteete ai lava. Afai e te faatusaina au galuega ma tulaga faatonuina a le Ekalesia i le tulaga o i ai le lalolagi ma le mea o agai i ai, o lona uiga e te le o i ai i le nofoaga e tatau ona e i ai.”⁴

I lena vaitaimi sa le mafai ona ou iloina le tulaga o le mamao ma le vave sa mamao ese ai le lalolagi mai aoaoga, mataupu faavae, ma poloaiga ua tuuina mai e le Atua, sa faigata ona malamalama i ai. Ae peitai e lei masii



ese ia tulaga faatonuina a Keriso ma Lana Ekalesia. E pei ona Ia fetalai mai, “E *mau* le upumoni e faavavau ma faavavau lava.”⁵ Afai tatou te malamalama ma taliaina lenei mea, o le a saunia i tatou e fetai ai ma faigata faaagafesootai, ulagia, ma e oo lava i le faamasinoina mai e le lalolagi ma isi o e ua tatou ta’ua o ni uo.

O le toatele o i tatou o le a iloina se tagata o le a faapea mai, “Afai e te manao e avea ma a’u uo, e tatau ona e talia ou tulaga faatauaina.” O se uo moni na te le fesiligia i tatou e filifili i le va o le talalelei ma ia. Ou te fia tali atu mai upu a Paulo, “Ia e alo ese lava i tagata faapena.”⁶ O se uo moni e faamallosia i tatou e tumau i le ala lauitiiti ma le vaapiapi.

O le tumau ai i le ala o le talalelei o feagaiga, poloaiga, ma sauniga o le a puipuia ai i tatou ma saunia ai e faatino

le galuega a le Atua i lenei lalolagi. Afai tatou te usitaia le Upu o le Poto, o le a malupuipua lo tatou faitalia mai mausa e pei o le pia, fualaa faasaina, ma le sikareti. Afai o tatou totagiina a tatou sefuluai, suesue i tusitusiga paia, talia le papatisoga ma le faamauga, ola ai mo le mafutaga faifaipea a le Agaga Paia, ai ma inu ma le agavaa i le faamanatuga, usitai i le tulafono o le ola mama, saunia ma maua le Perisitua Mekisateko, ma osia feagaiga paia i le malumalu, ua tatou saunia la e auauna atu.

I le malumalu ua tatou saunia ma folafola atu e ola i le tulafono o le faapaiaga. E amata ona ola ai ia alii talavou malolosi i lenei tulafono e ala i le sailia o se valaauga faamisiona—tuuina atu o se sefuluai o muai tausaga o o latou olaga i le auaunaga faamisiona mo le Atua. O le a faamallosia e lena ositaulaga i latou e agai atu i luma i le

feagaiga sili o le olaga—mo le toatele o le faamauina lea i le malumalu ma amatalia se aiga e faavavau.

Ao tatou fetuleni atu i luma i le ala sao ma le vaapiapi, o le a tatou fausia se malosiaga faaleagaga alualu i luma—malosiaga i le faaaogaina o lo tatou faitalia e filifili ai mo i tatou lava. Mo alii talavou ma tamaitai talavou uma, o le a lagolagoina lenei tuputupu ae pe a latou aoao i aoaoga faavae ma faasoa atu a latou molimau i le mataupu aoaoina fou i luga o le initoneti o le, *Sau, Mulimuli mai ia te Au*.

E le gata i lea, faaoga lou faitalia e te atinaeina ai oe lava ia faaletagata. Afai e te iloaia au meaalofo ma taleni, ia manatua e mafai ona fesoasoani atu matua ma faufautua ia te oe, peitai e

tatau ona e tuu i le Agaga e taiala oe. Filifili ma galue mo oe lava ia. Ia musuia oe lava mai totonu. Fai se fuafuaga mo lou olaga, e aofia ai le aoga po o se aoaoga faalematata. Saili mea e fiafia i ai ma tomai. Galue ma ia ola tutoatasi. Seti ni sini, foia ni measese, maua se aafiaga, ma faauma se mea na e amataina.

I le aluga o le ala, ia mautinoa o e auai i gaoioiga faaleaiga, korama, vasega, ma Mutuale tuufaatasi. Fiafia faatasi i gaoioiga lelei ma malie. O nei aafiaga o le a e faaaloalo ai ma talisapaia ia meaalofo faaleagaga a isi, faapea ma uiga faaletagata e faavavau o atalii ma afafine a le Atua.

O le mea sili, ia faatuatua i le Faaola! Aua le fefe! A o tatou ola naunautai ai i le talalelei, o le a tatou maua

le malosi mai le Alii. O Lona malosi o le a mafai ai ona tatou tetee atu ai i le aneti-Keriso o faapea mai, “Aai, feinu, ma fiafia,” aua o le Atua “o le a tauamionuina [oe] i le faia o se agasala ititi; . . . ua leai se afaina i lena mea . . . , o taeao tatou feoti.”⁷ O le malosiaga a le Alii tatou te tutu ai e tetee atu i soo se manatu po o se faatuatua o tetee mai i le Faaola ma faasagatau mai i le fuafuaga tele ma faavavau o le fiafia mo fanau uma a le Atua.

E le o ia i tatou se faatagaga e talanoaina ai ia tulaga o lena fuafuaga e faavavau. Manatua Neemia lea na tuuina atu i ai se tiute o le fausiaina o se papuipui e puipuia ai Ierusalema. Na mananao nisi e sau o ia i lalo ma talanoa i lona tulaga, peitai na musu Neemia. Na te lei fia faalogo i nisi; na ia faapea mai, “O loo fai e a’u le galuega tele, ou te le mafai ai ona alu ifo: se a le mea e tuu ai le galuega . . . ?”⁸

O nisi taimi e avefa ai i tatou ma mea o taulai atu i ai ma e tatau ona tatou taliaina talisuga ma ulaga ona o loo tatou ola e tusa ai ma tulaga faatonuina a le Atua ma faia Lana galuega. Ou te molimau atu e le tatau ona tatou fefefe pe afai o loo faavaeina o tatou olaga i Ana aoaoga faavae. Atonu e le malamalama nisi ia i tatou ma o le a faitioina, ma o le a oo lava ina tuuaia sese i tatou, peitai e le o tuua na o i tatou. Sa “inosia ma teena [lo tatou Faaola] e tagata.”⁹ O se avanoa paia lo tatou tutu faatasi ma Ia!

O le tutu malolosi i nisi taimi o lona uiga o le aluese po o le sosolaese mai le lalolagi. Na fetalai atu le Faaola, “Satani e, ina alu ese ia oe i o’u tua.”¹⁰ Na solaese Iosefa mai Aikupito mai faaososoga a le ava a Potifara,¹¹ ma na tuua e Liae ma lona aiga ia Ierusalema ma agai atu i le vao.¹²

Ia faamautinoa atu o perofeta uma na muamua atu ia i tatou na tutu malolosi i o latou vaitaimi:



Na faataunuuina e Nifae se galuega tulaga ese a le Alii e ui i tu'iga a Satani ma sauaga a Lamana ma Lemuelu, o ona uso.¹³

Na molimau Apinati e uiga ia Keriso i le fetai ai ma masalosologa, faamaasiasia, ma le oti.¹⁴

Na puipua e le autau malolosi e 2,000 o latou aiga mai e na le fiafia i tulaga faatauaina o le talalelei.¹⁵

Na sisiina i luga e Moronae le tagavai o le saolotoga e laveai ai aiga ma le saolotoga faalelotu a lona nuu.¹⁶

Na tu Samuelu i luga o le puipui ma valoia le afio mai o Keriso, e ui lava sa fetogiina o ia i maa ma tafanaina i aū.¹⁷

Na toefuatai mai e le Perofeta o Iosefa Samita le talalelei a le Faaola, ma faamau ai lana molimau i lona toto.¹⁸

Ma sa tutu malolosi ia paionia Mamona i le feagai ai ma sauaga ma faigata, ma mulimuli ai i se perofeta i la latou malaga maoae ma faamautu ai i Sisifo.

O nei auauna maoae ma Au Paia a le Atua na mafai ona latou tutu malolosi ona sa latou tutu faatasi ma le Faaola. Mafaufau i le auala na tu malosi ai le Faaola:

A o laitiiti, na faataunuuina ma le faamaoni e Iesu le galuega a Lona Tama, na talai atu le talalelei i alii aoao sa i le malumalu.¹⁹ I le faagasologa o Lana galuega, na Ia faataunuuina le galuega o le perisitua—aoao atu, faamaloloina, auauna atu, ma faamanuaina ma uunaia isi. I le talafeagai ai, na Ia tu e tetee malosi atu i le leaga, e oo lava i le faamamaina o le malumalu.²⁰ Sa Ia tu lava mo le Upumoni—pe o le tali atu i upu po o le leai foi. Ina ua tuuaia o Ia e le au faitaulaga sili i luma o Kaiafa, na i ai ia Iesu le potu ma le lototele e le tali atu ai i mea le moni ma sa tumau ai Lona filemu.²¹

I le Faatoaga o Ketesemane, e lei taofia e lo tatou Faaola ma le Togiola le inuina o le ipu oona o le Togiola.²²



Ma i luga o le satauro sa Ia toe mafatia ai ina ia faia le finagalo o Lona Tama, ona Ia fetalai ane ai lea, “Ua taunuu.”²³

Na Ia onosaia e oo i le iuga. O le tu malosi o le Faaola ma Lona ususitai atoatoa, na fetalai mai ai lo tatou Tama Faalelagi, “Faauta i lou Atalii Pele, o le ua ou fiafia lava i ai, o le ua ou faamamaluina ai lou igoa.”²⁴

Ou uso e talavou ma matutua pele o le perisitua, ia tatou faamamaluina le suafa o le Atua e ala i le tutu malolosi faatasi ma lo tatou Faaola o, Iesu Keriso. Ou te tuuina atu lau molimau faapitoa o loo soifua o Ia ma ua “valauina i latou i se valaauga paia”²⁵ e auai i Lana galuega. “O le mea lea, ia outou tutu ai i nofoaga paia, ma aua le masii ese.”²⁶ O le tutu malolosi ma ususitai i aoaoga faavae a lo tatou Atua, ua tatou tutu ai i nofoaga paia, aua o Lana aoaoga faavae e paia ma e le masuia i matagi o agafesootai ma faapolitiki o o tatou aso. Ou te folafola atu, e pei ona fai mai le Aposetolo o Paulo, “Ina matala ia outou, ia outou faatamatane, [ma] ia faamalolosi outou.”²⁷ Ou te tatalo

atu ai ma le naunautai ia te outou, i le suafa paia o Iesu Keriso, amene. ■

FAAMATALAGA

- 2 Timoteo 3:1.
- Efeso 6:13–17; faapoopo le faamamfa.
- Mose 5:23.
- Robert D. Hales, “This Is the Way; and There Is None Other Way,” i le *Brigham Young University 1981–82 Speeches* (1982), 3–4; o loo maua i le speeches.byu.edu.
- Mataupu Faavae ma Feagaiga 1:39; faapoopo le faamamafa.
- 2 Timoteo 3:5.
- 2 Nifae 28:8.
- Neemia 6:3.
- Isaia 53:3; Mosaea 14:3.
- Luka 4:8.
- Tagai Kenese 39:7–12.
- Tagai 1 Nifae 2.
- Tagai, mo se faaitaiga, 1 Nifae 18.
- Tagai Mosaea 11–17.
- Tagai Alema 53, 56–58.
- Tagai Alema 46:11–13.
- Tagai Helamana 13–16.
- Tagai Mataupu Faavae ma Feagaiga 135.
- Tagai Luka 2:46–49.
- Tagai Mataio 21:12–13.
- Tagai Mataio 26:57, 59–63.
- Tagai Mataupu Faavae ma Feagaiga 19:16–19.
- Ioane 19:30.
- 3 Nifae 11:7.
- Alema 13:3; tagai foi 2 Timoteo 1:9.
- Mataupu Faavae ma Feagaiga 87:8.
- 1 Korinito 16:13.



Saunia e Elder Tad R. Callister
○ Le Au Perisitene o Fitugafulu

○ Le Mana o le Perisitua i le Taulealea

E tutusa lava le mamana o le perisitua o loo i se taulealea ma le perisitua o loo i se alii pe a faatinoaina i le amiotonu.


I le 1878 sa 17 ai tausaga o George F. Richards o le tama o le tama matua o lo'u tina. E pei ona i ai i nisi taimi i na aso, sa faauuina ai o ia o se toeaina. I se tasi Aso Sa sa oi ai lona tina i se tiga tele. Talu ai sa le avanoa [le tama o Siaosi], sa valaaulia ai le epikopo ma nisi e tuu atu i lona tina se faamanuiaga, ae sa lei maua se toomaga. O lea sa ia liliu atu ai i lana tama o Siaosi ma fai atu i ai e tuu ona lima i luga o lona ulu. Sa tusi e Siaosi i lana api talaaga, "A o ou tagi i le mafatia o si ou tina ma le tiute o le faatinoaina o se faamanuiaga lea ou te lei faia muamua lava, sa ou alu atu ai i se isi potu lea sa ou tagi ai ma tatalo."

Ina ua maua lona toafimalie, sa ia faaee ona lima i ona luga ma tuu atu ia te ia se faamanuiaga faigofie. Mulimuli ane sa ia ta'ua, "Sa muta le oi o lo'u tina ma maua le toomaga mai i ona mafatiaga a o tuu pea ou lima i luga o lona ulu." Ona ia tusia lea i lana api talaaga lena matauga e sili ona malamalama i ai. Sa ia fai mai sa ia lagonaina pea o le mafuaaga na le maua ai e lona tina le toomaga mai le faamanuiaga a le epikopo e le i faapea sa le faamamaluina e le Alii le faamanuiaga a le epikopo ae ona

sa faapolopolo e le Alii lena faamanuiaga mo se taulealea, e aoao atu ai ia te ia se lesonea e faapea e tutusa lava le mamana o le perisitua o loo i se taulealea ma le perisitua o loo i se alii pe a faatinoaina i le amiotonu.

O le po nei ou te fia talanoa atu e uiga i lena mana. E ui o le a ou talanoa atu i perisitene o korama a tiakono, ae o mataupu faavae o loo talanoaina e faatatau foi i le autalavou uma i le Perisitua Arona ma o latou taitai patino, e aofia ai perisitene o korama a aoao ma fesoasoani o le perisitene o le korama a ositaulaga.

A o auauna ai o se perisitene o se misiona, sa ou matauina sa i ai se faateleina maoae i le faaleagaga ma tomai faaletaitaiga o alii talavou i tausaga o a latou misiona. Afai e mafai ona tatou fuaina nei tulaga auau mama i le aluga



Faaleagaga ma le Taitaiga

o tausaga o lo latou Perisitua Arona ma misiona, masalo o le a foliga i se laina faapenei o loo e tagai i ai i lena kalafi. I lo'u manatu o loo i ai pe tusa ma le tolu ni vaega autu o loo saofaga i lea tuputupu ae tele i tausaga faamisiona: (1) E tatau ona tatou faatuatuaina nei alii talavou e sili atu i lo le taimi muamua, (2) e i ai o tatou faamoemoega mauaululuga ae agaalofo mo i latou, ma le (3) tatou te aoao ma toe aoao i latou ina ia mafai ona latou faataunuuna nei faamoemoega i le tulaga silisili.

Atonu e fesili se tasi, "Aisea e le mafai ai ona faaaogaina nei lava mataupu faavae e tasi i perisitene o korama o tiakono?" Afai e fai lena mea, masalo o le a vave amata lo latou tuputupu ae a o talavou ma foliga ai i se tulaga faapenei. Sei ou talanoaina lava mo sina taimi pe faapefea ona faatatau nei mataupu faavae i se perisitene o se korama a tiakono.

Muamua—faatuatuaina. E mafai ona tatou faatuatuaina ia perisitene o korama o tiakono i tiutetauave tetele. E mautinoa lava le faatuatuaina e le Alii—e pei ona faaaliga ai i Lona naunautaiga e tuu atu ia i latou ia ki, o lona uiga o le aia tatau e pulefaamalumu ai ma taitai le galuega i a latou korama. E tusa ai ma se faamaoniga o lena faatuatuaina, tatou te valaauina ai perisitene o korama a tiakono e ala i faaaliga, e le faapea o le tagata ua leva ona i ai i le korama po o se isi lava tulaga faapena. O taitai uma lava i lena Ekalesia, e aofia ai ma le perisitene o le korama a tiakono, ua i ai le aia tatau e iloa ai, ma e tatau ona iloa, ua valaauina o ia e ala i faaaliga. Ua fesoasoani lena faamautinoaga ia te ia e iloa ai e faatuatuaina ma lagolagoina o ia e le Atua.

O le uiga paia lona lua ma le lona tolu e fesootei lelei—o faamoemoega mauaululuga ma le aoaoga fesootei e faataunuu ai. Sa ou aoaoina se lesonea

maoae i le galuega faamisiona: e masani lava ona tulai ae pe pa'u ifo faifeautalai i le tulaga o faamoemoe-ga a le peresitene o le misiona, ma e faapena foi i peresitene o korama a tiakono. Afai ua na ona faamoemoeina i latou e taitai ia fonotaga a le korama ma auai i fonotaga a le komiti talavou a le au epikopo, e na o le pau lava la lena o le mea latou te faia. Ae o outou taitai, e mafai ona outou tuu atu ia i latou se vaaiga mamao tele atu—le vaai mamao a le Alii. Ae aisea e taua tele ai le vaai mamao? Aua a faateleina le vaai mamao e faateleina foi le uunaiga.

Ua i ai lava i valaauga uma i lenei Ekalesia le aia tatau e maua ai faaaliga. O le mea lea, e manaomia e nei peresitene o korama a tiakono le iloaina ua ia te i latou le aia tatau e maua ai faaaliga e fautua atu ai o latou fesoasoani, le aia tatau e maua ai faaaliga e faatatau i le laveaiina o le ua leiloa, ma le aia tatau e maua ai faaaliga e aoao ai tagata o le korama i o latou tiute.

O se taitai atamai o le a ia aoaoina le peresitene o le korama a tiakono i na mataupu faavae ia o le a fesoasoani e maua ai faaaliga. E mafai ona ia aoao atu ia te ia le folafolaga manino a le Alii: “Afai e te ole mai, o le a e maua lea faaaliga e faaopoopo i luga o lea faaaliga” (MF&F 42:61). Ua sili lava le agalelei o le Alii i le tuuina mai o faaaliga. Pe Na te lei faamanatu atu




ea ia Iosefa Samita ma Oliva Kaotui, “O le tele o taimi na e ole mai ai na e maua ai faatonuga mai lo'u Agaga” (MF&F 6:14)? Ma e mafai foi ona tupu lena mea e tasi ia te outou peresitene o korama a tiakono. E alofa le Alii ia te oe ma e finagalo e faaali atu ia te oe Lona mafaufau ma Lona finagalo. Pe mafai ea ona e mafaufau i le i ai o se faaaitaui i le Alii e le mafai ona Ia foai-ina? Leai. Ona ua e agavaa i faaaliga, e mafai ona Ia fesoasoani ia te oe e foia popolega uma o loo ia te oe i le avea ai ma se peresitene o lau korama pe a e saili atu i Lana fesoasoani.

Outou na taitai lelei tele e mafai ona outou aoaoina lenei peresitene o le korama a tiakono o faaaliga e le o se mea e suitulaga mo le galue malosia ma taumafaiga patino. Sa fesili Peresitene Henry B. Eyring ia Peresitene Harold B. Lee i se tasi taimi, “E faapefea ona ou mauaina faaaliga?” Sa tali Peresitene Lee, “Afai e te fia mauaina faaaliga, fai lau matafaioi.”¹ E mafai e le taitai atamai ona talanoaina ma lana peresitene o le korama a tiakono nisi o matafaioi faaleagaga e mafai ona ia faia e saunia ai e fautua atu ni ona fesoasoani. Atonu e manaomia ona ia faia ma tali ni fesili e pei o le: O ai e ono avea ma se faataitaiga lelei e mafai ona siitiaina isi tama? Po o le, o ai e ono iloaina manaoga o i latou o loo feagai ma ni luitau faapitoa?

Ma le mea mulimuli e mafai e lenei taitai atamai ona aoao [le peresitene] i le auala e iloa ai ma faatino e tusa ma faaaliga pe a oo atu. Ua tatou ola i se lalolagi ua tumu i faiga saosaoa ma fiafiaga o loo i ai moli susulu ma le leotetele o laau sipika lea ua masani ai. Ae e manaomia ona iloaina e lenei alii talavou o le ala lenei a le lalolagi, ae le o le ala a le Alii. Sa soifua mai le Faaola i se faatanoa vao e leiloa e le toatele; Sa Ia faatinoina le galuega aupito silisili ona ofoofogia ma lē mafaatusalia o taimi uma i le toafilemu o se togalaau; ma sa maua e Iosefa lana Uluai Faaaliga i se togavao tulaga ese. E oo mai tali a le Atua i le leo filemu ma le itiiti—o lagona o le filemu po o le mafanafana, o uunaiga e faia ai mea lelei, ma faamalalamalaina—o nisi taimi i le tulaga o ni fatu ninii o mafaufauga ia pe afai e mafaufau loloto i ai ma le migao e mafai ona tuputupu ae i ni laau mafala tetele faaleagaga. O nisi taimi o nei uunaiga po o mafaufauga e mafai lava ona faaosofia outou peresitene o korama a tiakono e fautua atu se fesoasoani pe tuu atu foi se tofiga i se alii talavou e le o toaga mai.

I ni tausaga ua mavae a o i ai i se au peresitene o se siteki, na uunaia i matou e valaau se alii lelei e avea ma failautusi a le siteki. I lea taimi sa tauivi lē tumau ai o ia e auai soo i le



Lotu. Peitai, na matou iloaina afai na te taliaina le valaauga, o le a ia faia se galuega ofoofogia.

Sa matou tuu atu i ai le valaauga, ae sa ia tali mai, “Leai, ou te manatu e le mafai ona ou faia.”

Ona oo mai lea o se uunaiga. Sa ou fai atu i ai, “Ia, ou te manatu la o le a leai se failautusi a le siteki o Glendale.”

I lona tei, sa tali mai ai, “O le a le uiga o lau tala? E tatau lava ona i ai se failautusi a le siteki.”

Sa ou tali atu, “E te manao la ia i matou e valaau se isi tagata i le taimi nei e auauna o le failautusi a le siteki ae sa uunaia i matou e le Alii e valaau oe?”

“Ua lelei, sa ia fai mai ai, “O le a ou faia.”

Ma sa faapena ona ia faia. E le o na o alii e toatele ae e toatele foi taulelea o le a tali atu i se valaau pe a latou iloaina ua valaauina i latou e le Alii ma e manaomia i latou e le Alii.

O le isi mea e sosoo ai e mafai ona e faailoa atu i lenei peresitene o le korama a tiakono e faapea o se tasi o mea ua faamoemoeina e le Alii mai ia te ia o le laveai lea o le ua leiloa, o e le toaaga faatasi ma ē e le auai i le ekalesia. Na folafola mai e le Alii Lana misiona autu i upu nei: “Aua ua sau le Atalii o le tagata e faaola i le na le iloa” (Mataio 18:11). Afai la o le faamuamua a le Faaola o le laveai i le ua leiloa, afai o le faamuamua a Peresitene Thomas S. Monson o le faia o lea lava mea e tasi, e pei ona faaaliga i lona soifuaga atoa, pe le tatau ea ona avea ma faamuamua a taitai uma, a peresitene uma o korama a tiakono i lenei Ekalesia le faia o leni lava mea? O le ute o la tatou taitaiga, o se vaega autu o la tatou galuega, e tatau ona avea ma naunautaitaiga faatauanau ma le tumau le o atu e aumai ē ua leiloloa ma faafoi mai.

Sa fai mai se tasi alii talavou na asia e uso o lana korama: “Sa faateia lava au i lenei aso ina ua . . . o mai tagata



e 30 i lo’u fale. . . . Sa faaosofia ai au e alu i le lotu i le taimi nei.” E mafai faapefea e se talavou ona teenaina se alofa ma se popolega faapena?

E faagaetia lava au pe a ou faalogo i le tele o tala e uiga i peresitene o korama a tiakono o e ua mauaina le vaaiga mamao ma mai lea taimi i lea taimi latou te aoao atu se lesona atoa po o se vaega foi o se lesona i a latou fonotaga a korama. I ni vaiaso talu ai sa ou auai atu ai i se vasega a le korama a tiakono. Sa tuu atu e se taulelea e 12 tausaga le matua se lesona 25 minute e uiga i le Togiola. Sa ia amata i le fesili atu i ona uso a tiakono po o le a so latou manatu e uiga i le Togiola. Ona ia faasoa atu lea o nisi o mau anoa ma fesili atu ni fesili taua, ia na latou tali atu ai. Ae ui i lea, sa ia iloaina e telē atu le taimi nai lo anomea o le lesona o totoe, ae sa lava lona atamai ma masalo o nisi o aoaoga na muai maua mai lona tama e fesili ai i taitai sa auai po o a ni fesili na latou fesiligia e uiga i le Togiola i taimi o a latou misiona faatasi ai ma a latou tali. Ona ia faamaea lea i lana molimau. Sa ou faalogo ma le maofa. Sa ou manatu ifo ia te au, “Ou te le manatuaina se taimi na ou tuu atu ai se vaega taua o se lesona a o avea au o se talavou i le Perisitua Arona.” E mafai ona tatou siitia le maua luga ma le vaai mamao mo nei alii talavou, ma o le a latou tali mai.

O outou taitai e siitiaina nei peresitene o korama a tiakono i le tulaga silisili pe a outou tuu atu ia i latou

e taitai ae outou faamalumalu mai tua. Tou te le faalateleina o outou valaauga i le tulaga silisili pe a outou tuu atu se lesona maoae ae pe a outou fesoasoani ia i latou e tuu atu se lesona maoae; e le o le taimi tou te laveai ai le tasi ae o le taimi tou te fesoasoani ai ia i latou e laveai le tasi.

E i ai se muagagana ua leva: aua nei e oti ma lau musika e teu pea ia te oe. I lea lava faatatauga ou te fia faapea atu ia te outou taitai matutua, aua nei faamaloloina outou faatasi ma o outou tomai faaletaitai e teu pea ia te outou. Aoao atu a outou autalavou i avanoa uma; aoao i latou i le ala e saunia ai se lisi o mataupu talanoaina, le auala e taitai ai fonotaga i le mamalu ma le agalelei, le auala e laveai ai le tasi, le auala e saunia ai ma tuu atu se lesona musuia, ma le auala e maua ai faaaliga. O le fuataga lea o lou manuia—o le talatuu o le taitaiga ma le faaleagaga e te tuua ma le mauaa i loto ma mafau-fau o nei alii talavou.

Afai o le a faalateleina e outou peresitene o korama a tiakono o outou valaauga, o le a avea outou ma tufugaaa o le Atua, i le taimi nei, aua o le perisitua o loo i le taulelea e tutusa lava le mamana ma le perisitua o loo i le alii pe a faatinoina i le amio-tonu. Ma a oo ina outou osia feagaiga o le malumalu ma avea outou ma faifeautalai ma taitai o lenei Ekalesia i le humanai, o le a outou iloaina le auala e maua ai faaaliga, le auala e laveai ai le tasi, ma le auala e aoao atu ai aoaoga faavae o le malo i le mana ma le pule. Ona avea ai lea o outou ma tupulaga o le tofi tautupu. Ou te molimau atu ai i nei mea i le suafa o Iesu Keriso, o le Faaola ma le Togiola o le lalolagi, amene. ■

FAAMATALAGA

1. I le Henry B. Eyring, “Waiting upon the Lord,” i le *Brigham Young University 1990–91 Devotional and Fireside Speeches* (1991), 17.



Saunia e David L. Beck
Peresitene Aoao o Alii Talavou

O Lou Tiute Paia e Auauna Atu

Na e maua le mana, le pule, ma le tiute paia e auauna atu ai i le taimi lava na faauuina ai oe i le perisitua.

O Olioliga i le Auaunaga

Alii talavou o le Perisitua Arona, o outou o atalii faapelepele o le Atua, ma o loo ia te Ia se galuega tele mo outou e fai. Ina ia ausia lenei galuega, e ao ona e faataunuuna lou tiute paia o le auauna atu i isi.¹

Tou te iloa le uiga o le auauna atu? Mafaufau i le fesili lenei a o o'u faamatala atu ia te outou e uiga i se teineitiiti e igoa ia Chy Johnson.

Ina ua amata Chy i le aoga maua-luga i le tausaga ua te'a, sa avea ai o ia ma tagata na afaina fua i sauaga faalealofa ma le le magafagafa. Sa sauaina, tulei solo, ma taufaifai i ai pe a savali atu o ia i vasega—o nisi lava o taimi sa tauai atu ni lapisi ia te ia. Atonu sa outou vaai foi o faia le lelei faapea nisi o tagata i o outou aoga.

Mo le toatele o tagata, o tausaga o le talavou o se taimi o le tuua toatasi ma le fefe. E le tatau ona faapena. O le mea na laki ai Chy, sa i ai ni alii talavou i lana aoga o e sa malamalama i le mea e ta'u o le auauna atu.

Sa talosaga atu le tina o Chy i faiaoga o le aoga e fesoasoani e taofi le fia fasitagata, ae sa faauau pea. Ona ia faafesootaia lea o Carson Jones, o se e umia le Perisitua Arona ma o le taitai

autu e muamua taalo o le au lapaki a le aoga. Sa ia talosaga atu ia te ia e fesoasoani atu i lona sueina o le tagata sa faia le fia faasaunoa.

Sa malie Carson e fesoasoani atu, ae o lona loto sa ia lagonaina e tele atu ni mea e mafai ona ia faia nai lo na o le faailoaina o le au fia fasitagata. Sa musumususu atu le Agaga ia te ia e tatau ona fesoasoani ia Chy ia lagona le alofaina.

Sa fai atu Carson i nisi o tama o lana au e auai atu faatasi ma ia i le

fesoasoani atu ia Chy. Sa latou valaaulia o ia latou te nonofo faatasi i le taimi o le malologa. Sa latou savavali e momoli atu o ia i le vasega ia mautinoa ai na saogalemu o ia. E le o se mea na faateia ai, faatasi ai ma le au taaalo lakapi sa fai ma ana uo lelei, sa le'i toe fia faasaunoa lava se tasi ia Chy.

O le vaietaimi manaia lenei mo le au lakapi. Ae e ui lava foi i le fiafia tele o se vaietau e le'i toilalo lava, sa le'i galo ai i nei alii talavou ia Chy. Sa latou valaaulia o ia e auai atu ma le au i le malae pe a uma taaloga. Sa lagona e Chy le alofaina ma le talisapaiaina. Sa ia lagona le saogalemu. Sa fiafia o ia.

Sa oo atu le au lakapi i le manumalo i le siamupini i le setete. Ae sa i ai se mea na sili atu le taua nai lo o se siamupini i le lakapi sa tupu i le latou aoga. O faataitaiga a nei alii talavou na faaosofia ai isi tamaiti aoga ina ia faateleina lo latou taliaina, faateleina lo latou faauo. O le taimi nei ua latou faia ai le tasi ma le isi i le agalelei ma faaaloalo faateleina.

Na iloa e le au faasalalau o talafou i le lotoifale le mea na fai e nei alii talavou ma faasoa atu ai le latou tala i le



atunuu atoa. O le mea sa amataina o se taumafaiga e auuana atu i se tagata e toatasi ua musuia ai le faitau afe o isi e faia foi faapea.


E ta'u e le tina o Chy ia nei alii talavou o "agelu faalilolilo." E vave le fai mai o Carson ma ana uo e faapea, ua sili atu ona faamanuiaina o latou olaga e Chy nai lo latou faamanuiaina o ia. O le mea lena e tupu pe a e faamaumau oe lava i le auuana atu i isi—e te faasaoina ai oe lava.² E te sui ma tuputupu ae i auala na semanu e le mafai ai i lena taimi. O nei alii talavou na maua le olioli i le auuana ma faauau ai ona saili mo avanoa e faamanuia ai isi. Ua latou naunau e faalatele atu la latou auuana i masina a sau pe a latou auuana atu o ni faifeautalai faamisiona.³

O Se Manaoga ma se Tiute

E faitau afe Chy Johnson i le lalolagi atoa—o tagata o e manaomia ona lagona le alofa o le Faaola. O loo i ai i totonu o a outou aoga, i totonu o a outou korama, ma faapena foi i totonu o o outou aiga. O ni isi e vave ona manatua. O isi e i ai ni manaoga e tau le iloa. E toetoe lava o tagata uma e te iloa e mafai ona faamanuaina i se auala faapitoa e ala i lau auuana. O loo faalagolago mai le Alii ia te oe e te aapa atu ia i latou.

E le faapea e tau avea oe ma se tagata taalo lauiloa e auuana atu ai i isi. Na e maua le mana, le pule, ma le tiute paia e auuana atu ai i le taimi lava na faauuina ai oe i le perisitua. Na aoao mai Peresitene James E. Faust, "O le Perisitua o le pule lea ua faasafua atu i alii e *auuana atu* ai i le suafa o le Atua."⁴ O le Perisitua Arona ua umia ki o le auuana a agelu.⁵

A o e alofa atu i Ana fanau, o le a taiala oe e le Tama Faalelagi ma o le a lagolagoina oe e agelu.⁶ O le a tuuina atu ia te outou le mana e faamanuia ai olaga ma laveai ai agaga.



O Iesu Keriso o lou faataitaiga lea. E "le'i sau o Ia ina ia auuana mai tagata ia te ia, a ia auuana atu."⁷ O le auuana atu o lona uiga ia alofa ma agalelei atu i isi. O lona uiga o le tali atu i o latou manaoga faaletino ma faaleagaga. I se faaupuga faigofie, o lona uiga o le faia o le mea e ono fai e le Faaola pe ana fai o iinei o Ia.

Lou Aiga

Amata i totonu o lo oe lava aiga. O le nofoaga lena e mafai ona e faia ai le tele o au auuana taua.⁸

Tou te mananao e faataitai se suega manaia? O le isi taimi e fai atu ai lou tina e te fesoasoani i mea o le fale, fai atu i ai se faaupuga e pei o le "Faafetai mo le faailoa mai Tina. O le a ou fiafia e fesoasoani atu." Ona matau lea o ona uiga faaalua. O nisi o outou atonu e mananao e faalelei muamua a outou tomai faafesoasoani muamua ona faataitai ai lea o le mea lena. Atonu e te faamatapogiaina o ia. A uma ona e toe faate'iina o ia, o le a e iloa lelei ai se alualu i luma i la oulua mafutaga ma se faateleina o le Agaga i totonu o lou aiga.

Ua na o se tasi lena o auala e auuana atu ai i lou aiga; o loo tele lava isi auala. E te auuana atu a o e tautala atu i upu alofa i tagata o le aiga. E te

auuana atu a o e faia nai ou tei e pei o au uo lelei lava.

Atonu o le mea e sili ona taua, e te auuana atu a o e fesoasoani atu i lou tamā i ona tiute o se taitai faaleagaga i totonu o lou aiga. Tuu atu lau lagolago atoa ma faamalosiaga i afiafi faaleaiga, tatalo faaleaiga, ma le faitauina faaleaiga o tusitusiga paia. Fai lau vaega ia mautinoa ai le i ai o le Agaga i totonu o lou aiga. O lena mea o le a faamalosiaga ai lou tamā i ona matafaioi ma saunia ai oe e avea ma se tamā i se aso. Afai e le o i ai se tama i totonu o lou aiga, o lou tiute-tauave o le auuana atu i lou aiga e sili atu ona manaomia.

Lau Korama

O loo i ai foi sou tiute e auuana atu i totonu o lau korama.

Ua salalau atu le perisitua i salafa o le lalolagi. O le toatele o outou ua usitai i le valaau a Peresitene Monson ia laveai. Ua toatele atu i latou e sili ona toaaga o loo umia le Perisitua Arona i le taimi lena nai lo se isi lava taimi na muamua atu i le talafaasolopito o le Ekalesia. Ae o loo i ai pea lava i latou o ē e le o toaaga ma ē e manaomia outou.

O Iuni i le tausaga ua te'a, ina ua faavaeina se paranesi fou i Bangalore, Initia, na pau lava le alii talavou i le fonotaga a le au perisitua sa o se tia-kono na faauuina lata mai nei e igoa ia Gladwin.

Sa amata e Gladwin, faatasi ai ma le peresitene o Alii Talavou ona telefoni atu i alii talavou e le toaaga ma asiasi atu ia i latou i o latou aiga. E le'i leva, ae amata ona toe sau i le lotu se alii talavou lona lua.

O vaiaso taitasi e telefoni atu ai Gladwin ma Samuelu ia i latou o e sa le'i auai mai i fonotaga a le korama, ma faasoa atu i ai mea sa laua aooina. Sa laua telefoni atu foi pe asiasi

atu foi ia i latou i aso o o latou aso fanau. Sa taitasi, ona avea alii talavou le toaaga ma a laua uo ma amata ona talia valaaulia e o mai i gaoioiga a le korama, e auai i fonotaga a le korama, ma iu ai lava ina fai a latou lava auunaga. O le taimi nei, o alii talavou uma i le paranesi ua toaaga uma i le Lotu.

Ua aoao mai tusitusiga paia e faapea o korama o le Perisitua Arona e fono faatasi ma aoao atu—pe atinae ma faamalosi—e le tasi le isi.⁹ E te aoao atu a o e aoaoina atu upumoni o le talalelei, faasoa atu aafiaga faaleagaga, ma molimau atu. O mataupu aoaoina a le autalavou ua uunaia ai nei ituaiga o fegalegaleaiga i fonotaga a korama, ae e pau le taimi e mafai ona tupu ai lenei mea, pe afai lea e lagona e tagata uma o le korama le alofaina ma le faaalologia. O le taufaifai ma le taufaalili e leai ni avanoa i se fonotaga a le korama—ae maise lava pe afai e faasoa faalauaitele atu ni lagona. E ao i au peresitene o korama ona taulamua i le

faamautinoaina o fonotaga a korama o se nofoaga saogalemu mo tagata uma e auai ai.

Ua apoapoi mai le Aposetolo o Paulo, “Aua ne’i alu atu se upu leaga ai o outou gutu, na o le upu lelei e ati ae ai i mea e aoga, e tupu ai le lelei i e faalogologo i ai.”¹⁰

O e umia le perisitua e le faaoga-ina gagana masoa pe eleelea. Latou te le faalumaina pe faatiga i isi. Latou te atinae ma faamalosi isi i taimi uma. O se auala faatauvaa ae mamana lenei e auuna atu ai.

I Taimi Uma

O le galuega o le auuna atu e le pau mai i sauniga po o asiasiga i aiga po o galuega faatino e seāseā ona faia. O i tatou o ni alii o le perisitua i taimi uma lava—e le na o Aso Sa ma e le na o taimi tatou te faia ai ni ofutino papae ma ni fusiua. Ua i ai se tatou tiute e auuna atu i soo se mea tatou te tutu ai. O le auuna atu e le na o se mea tatou te faia—e faamatalaina ai foi po o ai i tatou.



Ia auuna atu i aso uma. O loo siomia outou i avanoa. Vaavaai mo na avanoa. Ole atu i leAlii e fesoasoani ia e iloa na avanoa. O le a e iloa ai o le tele lava e aofia ai ni faatinoga laiti, faamaoni, e fesoasoani ai i isi ia avea ma soo o Iesu Keriso.¹¹

A o e taumafai ia agavaa mo le Agaga, o le a e iloa ai manatu ma lagona e uunaia oe e auuna atu. A o e faatinoina nei uunaiga, o le a e maua nisi uunaiga se tele, ma o le a faateleina ma faalauteleina ou avanoa ma gafatia e auuna atu ai.

O’u uso e talavou, ou te molimau atu ua tuuina atu ia te outou le pule ma le mana o le Perisitua Arona mataina e auuna atu ai i le suafa o le Atua.

Ou te tautino atu a o outou faia, o le a avea oe ma se tufugaaao o le Atua e fesoasoani atu ai i isi. O le a sili atu ona lelei ma sili atu ona anoa lou olaga. O le a e maua ai le malosili sili atu e tetee ai le tiapolo. O le a e maua ai le fiafia moni—le ituaiga lea e na o soo moni o Iesu Keriso e iloaina.

Talosia ia outou maua le olioli i le faataunuuna o lou tiute paia e auuna atu, o la’u tatalo lea i le suafa o Iesu Keriso, amene. ■

FAAMATALAGA

1. Tagai Mataupu Faavae ma Feagaiga 84:111.
2. Tagai Mareko 8:35.
3. Tagai Trent Toone, “Kindness of Arizona High School QB Carson Jones and Teammates Has Gone Viral,” *Deseret News*, Nov. 9, 2012, deseretnews.com/article/865566351/Kindness-of-Arizona-high-school-QB-Carson-Jones-and-teammates-has-gone-viral.html.
4. James E. Faust, “Savali i Atalii o La’u Fanau,” *Liahona*, Me 2007, 54; ua faaopoopo le faamamafa.
5. Tagai Mataupu Faavae ma Feagaiga 13:1.
6. Tagai Mataupu Faavae ma Feagaiga 84:88.
7. Tagai Mataio 20:27–28.
8. Tagai *Tusitaulima 2: Taitaiina o le Ekalesia* (2010), 2.4.5.
9. Tagai Mataupu Faavae ma Feagaiga 107:85.
10. Efeso 4:29.
11. Tagai *Tusitaulima 2*, 3.2.3.



Saunia e Peresitene Dieter F. Uchtdorf
Fesoasoani Lua i le Au Peresitene Sili

○ Faalagiga e Fa

Ou te fia fautuaina atu ni faalagiga se fa . . . e mafai foi ona fesoasoani tatou te iloa ai o tatou matafaioi faapitoa i le fuafuaga paia a le Atua ma o tatou gafatia i le avea ai ma e umia le perisitua.

○'u uso pele ma uo peleina, ua tumu lo'u loto i le agaga faafetai ma le olioli e faatasi ma outou. E to lo'u pulou ia te outou o tamā ma tama matutua o e ua aumaia o outou atalii ma alo tama a a outou fanau. Ou te faamalō atu ia te outou alii talavou o e ua filifili e i ai iinei i lenei aso. O le nofoaga lenei e tatau ona outou i ai. Ou te faamoemoe e mafai ona outou lagonaina le usoga lea e fusia ai i tatou, ma ou te tatalo o iinei, faatasi ai ma o outou uso, o le a outou maua ai le auai, lagolago, ma faauoga.

O i tatou o alii, o nisi taimi tatou te faailoa ai i tatou i ni faalagiga. O le toatele o i tatou ua i ai ni faalagiga se tele, ma o ia faalagiga taitasi e ta'u mai ai se mea taua e uiga i o tatou faasinomaga. Mo se faataitaiga, o nisi o faalagiga e faamatala ai o tatou tiute i totonu o aiga o se *atalii*, *uso*, *tane*, ma se *tama*. O isi faalagiga e faamatala ai a tatou galuega i le lalolagi, e pei o se *fomai*, *fitafita*, po o e *tufuga*. Ae o nisi e faamatala ai o tatou valaauga i totonu o le Ekalesia.

O le asō ou te fia fautuaina atu ai ni faalagiga se fa ou te talitonu e talafea-uga i e uma o loo umia le perisitua i le lalolagi atoa—o faalagiga e mafai foi ona fesoasoani tatou te iloa ai o tatou matafaioi faapitoa i le fuafuaga paia a le

Atua ma o tatou gafatia i le avea ai ma e umia le perisitua i Le Ekalesia a Iesu Keriso o le Au Paia o Aso e Gata Ai.

Atalii o le Tama Faalelagi

O le faalagiga e tasi e faamatala ai i tatou uma lava i le auala aupito sili ona taua o le *alo o le Tama Faalelagi*. E tusa lava po o le a se isi mea e avea ai i tatou po o a foi mea [tatou] te faia i le olaga, e le tatau ona galo ia i tatou o i tatou o fanau agaga moni o le Atua. Sa avea i tatou ma Ana fanau ae tatou te le'i o mai i lenei lalolagi, ma o le a avea pea i tatou ma Ana fanau e faavavau. O lenei upumoni autu e tatau ona suia ai le ituaiga vaai o loo tatou vāai ai ia i tatou lava, o tatou uso ma tuafafine, ma le olaga lava ia.

O le mea e faanoanoa ai, e leai se tasi o i tatou ua atoatoa le ola ai i mea uma o loo faaalai i lenei faalagiga, “aua ua agasala tagata uma lava, ma ua le oo i le viiga mai le Atua.”¹

E tau faalotovaivai i nisi o taimi le iloa o le uiga o le avea ma se atalii o le Atua ae peitai e le o ausia o tatou gafatia. E fiafia le tiapolo e faaoga lelei nei lagona. E sili atu ia Satani lou faamatalaina o oe lava e ala i au agasala nai lo o lou gafatia faalelagi. Uso e aua ne'i faalogo ia te ia.

Ua tatou vaai uma i se tamaitiiti laitiiti o aoao e savali. O si tamai laa lava ma tautevateva. E pau. Pe tatou te otegiaina ea se taumafaiga faapena? E leai. O ai se tamā e faasalaina se tamaitiiti laitiiti ona o le pau? Tatou te faamalosiau, tatou te patipatia, ma tatou te viia, aua o tamai laa uma, e avea atili ai le tamaitiiti e pei o ona matua.

O lenei, uso e, e faatusa atu i le atoatoa o le Atua, o i tatou o tagata faaletino ua le ese lava i tatou ma tamaitiiti laitiiti e tautevateva. Ae e fingalo lo tatou Tama Faalelagi agaalofa ia tatou avea atili e faapei o Ia, ma, uso pele e, e tatau foi ona avea lena ma a tatou sini. E silafia e le Atua tatou te oo atu iina e le i se taimi vave ae e ala i ni laa taitasi i le taimi.

Ou te le talitonu i se Atua e na te faatulagaina ni tulafono ma ni poloaiga ona faatalitali lea mo i tatou ia toilalo ina ia mafai ona Ia faasalaina i tatou. Ou te talitonu i se Tama Faalelagi e agalelei ma agaalofa ma o lē e olioli i a tatou taumafaiga uma ia tutu maualuga ma savavali agai atu ia te Ia. E tusa lava foi pe tatou te tevateva, na te fautuaina i tatou e aua le faavaivai—aua le fiu pe sosola ese mai o tatou tiutetauve atofaina o le galuega—ae ia lototetele, maua o tatou faatuatua, ma taumafai pea.

O le tatou Tama oi le Lagi e taitaia Ana fanau ma e masani ona [Ia] auina mai ni fesoasoani le vaaia faalelagi ia i latou o e e mananao e mulimuli i le Faaola.

Soo o Iesu Keriso

O lena tulaga ua taitai mai ai i tatou i le isi faalagiga ua tatou laugatasia uma ai: o i latou uma o e taumafai ma le punouai e mulimuli i le Keriso e ta'ua o Ona *soo*. E ui ua tatou iloa e leai se tasi o i tatou e atoatoa, tatou te le faaogaina lena mea moni e fai ma se alofaga e tuutiitia ai o tatou faamoemoega, e le faaoga ai o tatou


avanoa, e faatuai ai le aso o lo tatou salamo, pe mumusu ai e atiina ae lelei atu, atoatoa sili atu, pe mama atili atu, o ni soo o lo tatou Matai ma le Tupu.

Ia manatua o Le Ekalesia a Iesu Keriso o le Au Paia o Aso e Gata Ai ua faatuina e le mo alii ma tamaitai o e e atoatoa pe le afaina i faaososoga o le olaga nei, ae ua faatuina mo tagata tonu lava e pei o oe ma a'u. Ma ua fausia i luga o le papa o lo tatou Togiola, o le Alii o Iesu Keriso,² e ala mai i Lana Togiola e mafai ai ona faamamaina ma avea ai ma “nuu faatasi . . . o le aiga foi o le Atua.”³

A aunoa ma le Togiola a Iesu Keriso, o le a avea le olaga ma se auala e gata e aunoa ma se faamoe-moega po o se lumanai. O le i ai o le Togiola, e avea le olaga ma se faigamalaga faamamaluina ma musuia o le tuputupu ae ma le atinaega lea e tau atu i le ola e faavavau i le afioaga o lo tatou Tama Faalelagi.

Ae e ui o le Togiola ua fuafuaina e fesoasoani ia i tatou uma ia avea atili e faapei o Keriso, e le'i fuafuaina ia tatou tutusa uma. O nisi taimi tatou te aveseina ai uiga faaalua ma le agasala. E mafai foi ona tatou faia le mea sese o le mafaufau e faapea, ona o le ese o se tasi mai ia i tatou, o lona uiga latou te le o faia mea e fialia ai le Atua. O leni ituaiga manatu e taitai atu ai nisi e talitonu e faapea, e manao le Ekalesia ia faia tagata uma [o le Ekalesia] ia tutusa—ia tatau ona foliga, lagona, mafaufau, ma amio tagata uma ia pei o isi tagata uma. O leni mea o le a feteenai ma le poto o le Atua, o lē na foafoaina tagata uma ia ese mai lona uso, atalii uma ia ese mai lona tamā. E oo lava foi i masaga e tutusa lelei foliga, e le tutusa o latou uiga faaalua ma faasinomaga faaleagaga.

E feteenai foi ma le manulauti ma le faamoemoega o le Ekalesia a Iesu Keriso, lea e faailoaina ma puipuia le



aia tatau faitalia—ma ona taunuuga taua uma lava—o fanau uma ma tai-toatasi a le Atua. I le avea ai ma soo o Iesu Keriso, ua tatou autasi ai i la tatou molimau o le talalelei toefuataiina ma la tatou tautinoga e tauti poloaiga a le Atua. Ae eseese mea tatou te fialia i ai i a tatou aganuu, agafesootai, ma faaleupufai.

E manuia le Ekalesia pe a tatou faa-aogaina leni eseese e faamalosiua ai e le tasi le isi ia atinae ma faaoga o tatou taleni e siitia ma faamalosiua ai o tatou uso a soo.

Uso e, o le avea ma soo o se faigamalaga i le olaga atoa e mulimuli i le Faaola. I le tatou auala faafaatusa mai Peteleema i Kolokota, o le a tele ni avanoa tatou te maua e lafoai ai le tatou faigamalaga. E i ai taimi e foliga ai e tele atu mea e manaomia i le ala

nai lo o mea sa tatou mananao i ai. Ae i le avea ai o ni alii o le perisitua, e tatau ona tatou maua le lototele e mulimuli ai i lo tatou Faaola, e tusa lava pe e foliga mai ua mamafa tele le tauaveina o lo tatou satauro.

Faatasi ai ma laa uma tatou te uia e mulimuli ai i le Alo o le Atua, e mafai ona faamanatu mai ia i tatou, tatou te le'i oo i le atoatoa. Ae ia avea i tatou ma ni soo tutumau ma finafinau pea. Ia aua nei o tatou fiu. Ia tatou faamaoni i a tatou feagaiga. Ia aua lava ne'i sipa la tatou vaai i lo tatou Fautua ma le Faaola a o tatou savavali agai atu ia te Ia, i ni laa e le atoatoa.

Faamalolo o Agaga

Uso e, afai tatou te mulimuli moni i le tatou Alii o Iesu Keriso, e tatau ona tatou taliaina le faalagiga lona tolu:

o le faamalolo o agaga. O i tatou o e ua faauuina i le perisitua a le Atua ua tofia e faaaoga “le faatufugaga a le faamalolo.”⁴

O le tatou galuega o le fausia, toe-faaleleia, faamalosia, ma siitia, ma faa-atoatoa. O le tatou tofiga o le mulimuli i le faataitaiga a le Faaola ma aapa atu ia i latou o e ua mafatia. Tatou te “faanoanoa faatasi ma e e faanoanoa . . . ma faamafanafana atu ia te i latou o e e manaomia le faamafanafanaga.”⁵ Tatou te fusifusia manua o e mafatia. Tatou te “fesoasoani i e vaivai, sii i luga lima ua tautau i lalo, ma faamalosi tulivae ua vaivai.”⁶

I le avea ai ma faiaoga o aiga, o i tatou o le au faamalolo. I le avea ai ma taitai perisitua, o i tatou o le au faamalolo. I le avea ai o ni tamā, atalii, uso, ma ni tane, e tatau ona avea i tatou ma ni au faamalolo tautino ma tuuto. Tatou te tauaveina i le tasi lima se fagu suauu ua faapaiaina mo le faamanuiaina o e mamai; i le isi lima tatou te tauaveina ai se pāpā falaoa e fafaga ai e ua fiaaai; ae o totonu o o tatou loto tatou te tauave ai le afioga malie a le Atua, “e faamalolo ai le agaga ua manualia.”⁷

O le tatou tiutetauave autu muamua lenei i le avea ai ma e e umia le perisitua—ma e faatatau uma i e umia le Perisitua Arona ma le Perisitua Mekisateko. O le talalelei toefuataiina a Iesu Keriso e faamanuia ai olaga ae le na o le taimi tatou te talitonu i ai—ae e sili atu pe a tatou ola ai. O le faaaogaina o mataupu faavae o le talalelei e siitia ai tagata taitoatasi ae faamalosia ai aiga. O lo tatou avanoa ma le tiutetauave e le na o le tautatala i aoaoga sa’o ae ia savavali ai foi i mea sa’o.

O le Faaola o le fai vavega. O Ia o le Faamalolo sili. O Ia o lo tatou faataitaiga, lo tatou malamalama, e oo lava i taimi faigata, ma Na te faaalua mai le ala sa’o ia i tatou.

Ia tatou mulimuli ia te Ia. Ia fai o tatou tiute ma avea ma au faamalolo e ala i le auuina atu i le Atua ma o tatou uso a tagata.

Suli o le Ola e Faavavau

O le faalagiga lona fa ua tatou laugatasia uma ai e toe faafoi atu ai i tatou i le faalagiga muamua i le tatou lisi. I le avea ai o ni atalii o lo tatou Tama Faalelagi, o i tatou o *suli* i mea uma o loo ia te Ia.

“O loo molimau mai lea lava Agaga i o tatou agaga, o fanau i tatou a le Atua:

“Afai foi o fanau i tatou, o suli foi; o suli lava o le Atua, o suli faatasi ma Keriso; pe afai tatou te tiga faatasi ma ia, ina ia faamanuiaina foi i tatou faatasi ma ia.”⁸

Mafaufau i lenei mea, o’u uso e peleina. Ua tatou suli faatasi ma Keriso!

Ia, e fetau i ea le faapea e toatele naua i tatou e faaalua le tele naua o o tatou taimi taua, manatu, tamaoaiga,

ma malosi i le tulitulimatagauina o viiga po o oa faalelalolagi pe ina ia faafiafaina i masini faaeletonika aupito fou ma mananaia?

Ua fofola mai e le Alii i o tatou luma le folafolaga paia e faapea “ai se tasi e faamaoni i le mauaina o ia perisitua e lua, . . . faalauteleina o latou valaauga, . . . [o le a] talia a’u, ua fetalai mai ai le Alii; . . . ma o ia o le e talia a’u ua ia talia lo’u Tama; . . . o lea, o mea uma ua i ai i lo’u Tama o le a tuu atu ia te ia.”⁹

E le oo le malosi o lo’u vaai faalemafaufau i mea uma e aafia i lenei folafolaga. Ae ua ou iloa e mataina, e paia, e faavavau, ma e aoga ai a tatou taumafaiga uma i le olaga.

O le iloaia o lenei mea, e mafai la faapefea ona tatou le auai ma le naunautai ma le olioli i le tautuaina o le Alii ma o tatou uso a tagata ma ola e tusa ai ma o tatou tiutetauave i le perisitua a le Atua?

O le galuega aupito mamalu lenei o le a luita ai o tatou sane uma



ma faloina ai o tatou tomai uma. Pe tatou te fia vaai i le matala o lagi ma molimauina uunaiga a le Agaga Paia e faaali mai ia i tatou le ala? Ia fetagofi laia i a tatou suotosina ma saga'i ane i lenei galuega maoae—o se faapogai e sili atu ona maoae nai lo o i tatou lava!

O le auauna atu i le Atua ma o tatou uso a tagata o le a luuina ai i tatou ma liua ai i tatou i se mea e sili atu nai lo o se mea tatou te manatu e mafai ai.

Atonu e te ono manatu e faapea e le o manaomia oe, e faapea e le o amanaiaina pe moomia oe, e faapea o oe o se tagatanoa.

Ou te faamalie atu lava pe afai e i ai se perisitua o i ai ni lagona faape- nei. E mautinoa lava e le o le amana- iaina pe e le o le manaomia oe e lou Tama Faalelagi. E alofa o Ia ia i tatou. Ma ou te ta'u atu ma le mautinoa e manaomia oe e lau Ekalesia.

E te le iloa “ua filifilia e le Atua mea valea a le lalolagi ina ia [faamaina] e popoto; ma mea vaivai a le lalolagi ua filifilia ia e le Atua e [faamaina ai] mea malolosi?”¹⁰

Atonu e mo'i tatou te vaivai. Atonu tatou te le popoto pe malolosi. Ae a galue le Alii e ala mai ia i tatou, e leai se tasi ma e leai se mea e mafai ona faasagatau mai ia i tatou.¹¹

O le pogai lena e manaomia ai oe. O loo i ai la ou lava saofaga taua e fai, ma e mafai e le Atua ona faalauteleina lena saofaga i se auala malosi. O lou gafatia e saofaga e le faalagolago lea i lou valaauga i totonu o le Ekalesia. E le uma ou avanoa mo auaunaga. Afai o loo e tutu i autafa, ou te uunaia oe e te oso i totonu o le taaloga.

Aua le faatalitali mo se valaauga faapitoa ona faatoa e auai atoatoa lea i le fausiaina o le malo o le Atua. I le aveai ai ma se e umia le perisitua, o lena ua valaauina oe i le galuega.



Suesue i afioga a le Atua i aso uma, tatalo i le Tama Faalelagi i aso uma, ia faaoga mataupu faavae o le talalelei toefuataiina, avatu le faafetai i le Atua, ma ole atu mo Lana taitaiga. Ona e ola lea i mea ua e aoaoina, muamua i totonu o lou aiga ae faapena foi i tulaga uma o lou olaga.

I le fatuga a le Fatupese sili, ua i ai lava la oe vaega faapitoa e fai—a oe nota e lagi. O lou le mafai ona lagiina, e mautinoa lava e faaauau pea le au- faipese. Ae afai e te tulai ma pese atu i le tali ma faataga le mana o le Atua e galue e ala atu ia te oe, o le a e vaaia ai le matala “o pupuni o le lagi”, ma o le a Ia “sasaa atu le manuia mo outou ina seia silisili ona tele.”¹² Ia tulai atu i lou gafatia moni o se atalii o le Atua, ma e mafai ona aveai oe ma malosiaga mo le lelei i lou auaiga, lou aiga, lou alala- faga, lou atunuu, ma ioe i le lalolagi.

Ma i le faagasologa, a o “faamau- mau [lou] ola” i le auauna atu i isi,¹³ o le a e tuputupu ae ma atinae seia oo ina e ausia “le oo i le fua o le ua matua e tatau ma le tumu o Keriso.”¹⁴ Ma o le a faapea ona e saunia e maua, faatasi ma Keriso, mea uma o loo i le Tama.

E Taua Oe i le Atua

O'u uso pele ma uo peleina, e taua outou. E alofaina outou. E manaomia outou. E moni le galuega lenei. O le perisitua ua faamanuiaina outou e tauave e a le Atua moni lava lea.

Ou te tatalo a o outou mafaufau loloto i le tele o faalagiga o se tagata agavaa ua umia le perisitua, o le a outou maua se savili faalelagi i ou tua, e siia'e oe i luga agai atu i le tofi maoae ua faapolopoloina e lou Tama Faalelagi mo oe. Ou te tuuina atu ai lenei faamanuiaga ma la'u moli- mau i le suafa paia o Iesu Keriso, amene. ■

FAAMATALAGA

1. Roma 3:23.
2. Tagai Helamana 5:12.
3. Efeso 2:19.
4. “Faaola e ia Ou Alofa,” *Viiga*, nu. 150.
5. Mosaea 18:9.
6. Mataupu Faavae ma Feagaiga 81:5.
7. Iakopo 2:8.
8. Roma 8:16–17.
9. Mataupu Faavae ma Feagaiga 84:33, 35, 37–38.
10. 1 Korinito 1:27.
11. Tagai Roma 8:31.
12. Malaki 3:10.
13. Mataio 16:25.
14. Efeso 4:13.



Saunia e Peresitene Henry B. Eyring
Fesoasoani Muamua i le Au Peresitene Sili

E Tasi Lava i Tatou

Ou te tatalo po o fea lava le mea o tatou i ai ma po o a foi o tatou tiute o i ai i le perisitua a le Atua, o le a tuufaatasia lava i tatou i le galuega o le aumaia o le talalelei i le lalolagi uma.

Sa faamanino mai e le Alii i le amataga lava o lenei tisipenisi-one faaii e ao ona tatou avatua le talalelei i le lalolagi atoa. O le mea sa Ia fetalai atu ai i ni nai tagata na umiaina le perisitua i le 1831, o Lana fetalai fo'i lona i tagata e toatele i le taimi nei. Po o le a lava lo tatou matutua, malosi, valaaua i le Ekalesia, po o nofoaga, ua tasi i tatou o e ua valaauina i le galuega e fesoasoani ia te Ia i Lana seleselega o agaga seia toe afio mai o Ia. Sa Ia fetalai atu i na uluai tagata faigaluega i le tovine:

“Ma ou te toe fai atu ia te outou, Ou te tuu atu ia te outou se poloaiga, ia o atu tagata taitoatasi, e aofia ai le toeaina, le ositaulaga, le aoao, ma tagata o le ekalesia, ma lona malosi, ma le galue o ona lima, e sauni ma faataunuu mea ua Ou poloaiina ai.

“Ma ia tuu atu a outou talaiga e avea ma leo o le lapataiga, o tagata taitoatasi i lona tuaoi, i le mālū ma i le agamalu.

“Ma ia outou o ese atu i fafo mai totonu o e ua amioleaga. Ia outou laveai outou lava. Ia mama outou o e e tauaaoina ipu a le Alii.”¹

Ua mafai nei e outou o uso o le Perisitua Arona ona iloaina o loo aafia ai outou i le poloaiga a le Alii. Talu ai tou te iloaina e saunia lava e le Alii se ala e tausi ai Ana poloaiga, ua mafai foi

la ona outou faamoemoeina o le a Ia faia lona lava mea mo outou taitoatasi.

Sei ou tau atua ia te outou le auala na Ia faia ai mo se tasi taulealea ua umiaina nei le tofi o le ositaulaga i le Perisitua Arona. E 16 ona tausaga. E nofo o ia i se atunuu lea na faatoa taunuu i ai faifeautalāi i le tausaga ua mavae. Sa tofia i laua i ni aai se lua, ae le o le aai lea e nofo ai le taulealea.

Ao laitiiti lava o ia, na aumai o ia e ona matua i Iuta mo le saogalemu. Sa aoaoina ma papatisoina le aiga e faifeautalāi. Sa lei papatisoina o ia i le Ekalesia ona sa lei atoa lona valu tausaga i lona taimi.

Sa maliliu ona matua i se faalavelave. Ona toe faafoi atu lea o ia i lona tinamatua i lona aiga, e sopoia atuvasa, i le aai na fanau ai o ia.

Sa savalivali o ia i le alatele ia Mati o le tausaga ua tea i le taimi na ia lagona ai e tatau ona ia talanoa atu i se tamaitai na te le masani ai. Sa la talanoa i le Faa-Peretania o loo ia manatua pea. O ia o se tausima'i na auina atu e le peresitene o le misiona i lona aai e saili se fale faafomai ma se fale e nonofo ai faifeautalāi ia o le a le pine ae atofa atu iina. Sa avea i laua ma ni uo a o la talanoa. Ina ua taunuu le tausima'i i le ofisa o le misiona, na ia faamatala atu i faifeautalāi le taulealea.

Na taunuu uluai faifeautalāi e toalua ia Setema o le 2012. O le taulealea matuaoti o le la uluai papatisoga lea i Le Ekalesia a Iesu Keriso o le Au Paia o Aso e Gata Ai. Na atoa ia Mati i le tausaga nei le fa masina talu ona avea o ia ma tagata o le ekalesia. Ua faauuina o ia o se ositaulaga i le Perisitua Arona ma mafai ai ona ia papatisoina le tagata lona lua e liliu mai i le Ekalesia. O ia le uluai paionia o le perisitua e faapotopotoina isi fanau a le Tama Faalelagi faatasi ma ia e faatu le Ekalesia i se aai e tusa ma le 130,000 tagata.

I le Aso Sa o le Eseta, 31 o Mati, 2013, na oo atu ai i se numera tele e toaono tagata auai o le Ekalesia i lona aai. Sa na o ia lava le tagata i le lotoifale sa auai i le sauniga i lona Aso Sa. Sa manua lona tulivae i le aso na muamua atu, ae sa naunau lava o ia ia auai iina. Sa tatalo o ia ina ia mafai ona ia savali i le lotu. Ma o lea sa i ai o ia iina. Sa latou taumamafa faatasi i le faamanatuga ma faifeautalāi talavou e toafa ma se ulugalii faamisiona—o le aofaiga atoa lona o le faapotopotoga.

O lona tala e le foliga mai e ofofofia sei vagana ua e iloaina i le tala le mamanu o le aao o le Atua i le fausiaina o lona malo. Ua ou vaaia i le tele o taimi.

Sa ou vaaia i New Mexico a o ou talavou. Mo le tele o augatupulaga na tau mai ai e perofeta ia i tatou e tatau ona tatou fesoasoani atu i faifeautalāi e saili ma aoao ē loto faamaoni ma alolofa ia i latou o e e o mai i totonu o le malo.

Ua ou vaaia mo au lava ia mea e mafai ona faia e taitai perisitua ma tagata faamaoni o le ekalesia. I le 1955 na avea ai au ma taitai i le Fuavaalele a le Iunaite Setete. Na tuu mai e lou epikopo ia te au i le fale se faamannuiaga ae ou te lei tuua mo lau uluai nofoaga e faamautu i ai, lea sa i ai i Albuquerque, New Mexico.

I lana faamanuiaga na ia faapea mai ai o lo'u taimi i le fuavaalele o le a avea ma taimi o galuega faamisiona. Sa ou taunuu i le lotu i lo'u Aso Sa muamua i le Paranesi Muamua a Albuquerque. Sa savali mai se alii ia te au, faailoa mai o ia o le peresitene o le itu, ma tau mai ia te au o le a ia valaauina au e auauna atu o se faifeautalai o le itu.

Sa ou tau atu ia te ia o le a ou i ai iina mo aoaoga mo nao ni nai vaiaso ona tofia ai lea o au i se isi nofoaga i le lalolagi. Sa ia fai mai, "Ou te le iloa lena mea, ae ua ao ona matou valaauina oe e auauna atu." I le ogatotonu o au aoaoga faamiliteli, lea sa atagia mai o se avanoa, sa filifilia ai au mai le

faitau selau o taitai sa aoaoina e suitulaga i se taitai i le nofoaga tutotonu o lē na maliu faafuasei.

O lea, mo le lua tausaga sa ou i ai iina, sa ou faigaluega ai i lou ofisa. I le tele o afiafi ma faaiuga o vaiaso uma, sa ou aoao atu ai le talalelei a Iesu Keriso i tagata sa aumai e le au paia ia i matou.

Sa matou iloiloina ma au soa e silia ma le 40 itula i le masina le averesi o a matou auaunaga faamisiona e aunoa ma se tuitui se tasi i faitotoa e sue se tagata e aoao. Sa matua faapisi lava matou e le au paia lea sa tele ai ina matou aoaoina ni aiga se toalua i se afiafi. Sa ou vaaia mo au lava ia le mana ma faamanuiaga i le valaau

faifai pea a perofeta mo tagata uma o le ekalesia ia avea ma se faifeautalai.

I le Aso Sa mulimuli ae ou te lei tuua Albuquerque, sa faatulaga ai le uluai siteki i lena aai. Ua i ai nei iina se malumalu paia, o se maota o le Alii, i se aai sa matou feiloai ai i se falesa faatasi ma le Au Paia na aumaia ni uo ia i matou ina ia aoaoina ma lagonaina le molimau a le Agaga. Sa latou lagonaina se aiga talimalo i le Ekalesia moni a le Alii.

Sa sosoo ai ona ou vaaia i New England a o ou aoga ai. Sa valaauina au e avea ma fesoasoani i se peresitene maoae o le itu o le sa aumai mai se le fia auai i le Ekalesia i se alii o se mana maoae faaleagaga. Sa lava le alofa o lona faiaoga o aiga ia te ia na ia le amanaia ai lana sikareti ma vaai i le mea e mafai ona silafia e le Atua o ia te ia. Sa ma malaga ma le peresitene o le itu i atumauga ma talafatai e asiasi i ni paranesi laiti na togitogia ai Massachusetts ma Rhode Island ina ia fausia ma faamanuiaina le malo o le Atua.

I tausaga sa ou auauna faatasi ai ma lena taitai maoae, sa ma vaaia tagata o aumaia uo i le Ekalesia e ala i a latou faataitaiga ma a latou valaaulia e faalogologo i faifeautalai. Ia te au o le tuputupu ae o na paranesi na foliga mai e telegese ma faalotolotolua. Ae i le Aso Sa na ou tuua ai, i le lima tausaga mulimuli ane, na malaga atu ai ni Aposetolo se toalua e faatulaga la matou itu i se siteki i le falesa i Longfellow Park i Cambridge.

I tausaga mulimuli ane sa ou toefoi atu ai e faatautaia se konafesi faalesiteki iina. Sa ave au e le peresitene o le siteki i se mauga papa i Belmont. Sa ia tau mai ia te au e ono avea ma se nofoaga tonu mo se malumalu o le Atua. O loo tu ai i le taimi nei se malumalu. A ou mafaufau atu i ai, ou te manatuaina ni tagata faatauvaa na matou nonofo faatasi i ni paranesi





Los Angeles, Kalefonia, ISA

laiti, o tuaoi na latou valaauliaina, ma faifeautalai na aoaoina i latou.

O loo i ai se tiakono fou i lenei sauniga i le po nei. Sa ou i ai faatasi ma ia i le Aso Sa lava lea o le Eseta, lea sa savali atu ai le ositaulaga, lea sa ou talanoa atu ai i le taimi ua tea, i lana sauniga na o ia lava. Sa ata atu le tiakono i lona tama ma fai atu o le a i ai o ia i lenei sauniga perisitua faatasi ma ia i le po nei. O lenei tama sa avea ma se faifeautalai maoae i le misiona lava lea e tasi sa avea ai lona tama ma peresitene. Sa ou vaai i le *Tusitaulima a Faifeautalai* o le 1937 a le tama o lona tama matua. O lona talaaga o le aumaia o tagata i le Ekalesia e matua loloto lava.

O lea sa ma talanoa ai ma le epikopo o lona tiakono ina ia iloa ai aafiaga e ono faamoemoeina e le tau-lealea i le faafetaiaia o le poloaiga a le perisitua e galulue i le faapotopotoina o agaga mo le Alii. Sa fiafia tele le epikopo a o ia faamatalaina le auala e tulitatao ai e le taitai misiona le alualu i luma o tagata sailiili. Na te maua mai lona faamatalaga mai fesoootaiga faifai soo ma faifeautalai.

E talanoaina e le epikopo ma lana aufono a le uarota ia tagata sailiili uma. Latou te filifilia mea e mafai ona latou faia mo tagata taitasi o o latou aiga e fesoasoani ai ia i latou

ia avea ma ni uo a o lei papatisoina, ia faaaofia i latou i gaoioiga, ma ia faafaileleina i latou e papatisoina. Sa ia fai mai o nisi taimi e toatele ai tagata e aoaoina e faifeautalai, o lea latou te ave ai le Au Perisitua Arona e fai ma a latou soa.

Ua aofia ai i le fuafuaga a le misi-ona a le uarota ni sini a korama e valaaulia ē latou te iloina e faafeiloai atu i faifeautalai. E oo lava i le peresitene o le korama a tiakono e valaaulia lava e seti ni sini ma fuafua mo latou uso o le korama ia fesoasoani e aumai ē latou te iloina i le malo o le Atua.

Ia, o le tiakono i le uarota malosi ma le ositaulaga fou—le tagata liliu mai—i le vaega toalaiti atonu e foliga mai e i ai sina mea e tutusa ai le tasi ma le isi po o oe foi. Ma atonu e te le vaaia ni mea se tele e tutusa ai ma ou aafiaga i le fausiaina o le Ekalesia ma mea na ou vaaia o ni vavega i New Mexico ma New England.

Ae o loo i ai se ala se tasi lea e tasi ai i tatou i la tatou poloaiga faaleperisitua. Tatou te faapaiaina i tatou ma faataunuu o tatou tiute taitoatasi i le poloaiga e avatu le talalelei i fanau uma a lo tatou Tama Faalelagi.

Tatou te feaasoai ia aafiaga i le ala lea e fausia ai e le Alii Lona malo i le lalolagi. I Lana Ekalesia, faatasi ai ma meafaigaluega matagofie uma ma

faalapotopotoga ua tuu mai ia i tatou, o loo i ai lava pea se upumoni autu o loo aoaoina e perofeta e uiga i le auala e ao ona tatou faataunuu ai la tatou tiute faaleperisitua o le galuega faafaifeautalai.

I le konafesi aoao ia Aperila 1959, sa aoao mai ai e Peresitene Tavita O. MaKei le mataupu faavae lenei, e pei foi ona faia e perofeta talu mai lona vaitaimi, e aofia ai Peresitene Thomas S. Monson. Sa taua e Peresitene MaKei i lana saunoaga faaii e faapea i le 1923 i le Misiona a Peretania, sa i ai se faatonuga aoao na auina atu i tagata uma o le Ekalesia. Sa tau atu ia i latou e aua nei faaalua ni tupe e faia ai ni faasalalauaga e faasagatau ai i lagona leaga o tagata e tete e i le Ekalesia. Fai mai Peresitene MaKei o le faaiuga e faapea: “Ia lafo atu le tiutetauave i luga o tagata uma o le Ekalesia e faapea i le tausaga 1923 e sosoo ai, o le a avea ai tagata uma ma faifeautalai. O tagata uma o se faifeautalai! E mafai ona e aumaia lou tina i le Lotu, pe atonu foi o lou tama; masalo foi o au uo i le fale faigaluega. O le a faalogo lava se tagata i le savali lelei o le upumoni e auala atu ia te oe.”

Ma sa faaauu ai le saunoaga a Peresitene MaKei: “Ma o le savali lona o le asō. *O tagata uma*—e miliona ma le afa—o se faifeautalai!”²

Ina ua faasilasila mai i le 2002 o le a avea le galuega faafaifeautalai ma tiute-tauave o epikopo, sa ou maofa. Sa avea foi au ma se epikopo. Sa foliga mai ia te au o loo latou tauaveina lava se avega ua latalata atu i o latou faatapulaa i le auauna atu i tagata ma le taitaiina o faalapotopotoga i totonu o le uarota.

Sa vaaia e se tasi o epikopo ou te iloaina lenei mea e le o se tiute faapoopo ae o se avanoa e faalatalata faatasi mai ai le uarota i se galuega tele lea e avea ai tagata uma o se faifeautalai. Sa ia valaauina se taitai misiona a le uarota. Sa ia fono ma faifeautalai i Aso Toonai uma e aoao i le la galuega e faamalosiua ia i laua, ma aoao i le alualu i luma o a la tagata sailiili. Sa maua e le aufono a le uarota ia auala mo faalapotopotoga ma korama e faaaoaga ai aafiaga o au-aunaga e avea ma sauniuniga faafaifeautalai. Ma i le avea ai ma faamasino o Isaraelu, sa ia fesoasoani i tagata talavou ia lagonaina faamanuiaga o le Togiola e tausua ai lo latou mama.

Talu ai nei sa ou fesili atu i ai pe faapefea ona ia faamatalaina le faatele-levaveina o papatisoga liliu mai i lana

uarota ma le faateleina o le aofai o le autalavou e saunia ma naunau e avatu le talalelei a Iesu Keriso i le lalolagi. Sa ia fai mai o lea mea na foliga mai ia te ia e le na o le faia e se tasi o ni tiute patino ae o le ala sa avea ai i latou uma ma tagata lotogatasi i lo latou naunautai-iga e aumai tagata i le nuu o le Au Paia lea na latou maua ai le fiafia.

Mo nisi tagata, e sili atu i lo lena. E pei o atalii o Mosaea, sa latou lagona-ina le aafiaga o agasala i o latou lava olaga ma le faamalologa ofoofogia o le Togiola i totonu o le Ekalesia a le Atua. Ona o le alofa ma le lotofaafetai mo le meaaloa a le Faaola ia i latou, sa latou mananao ai e fesoasoani i tagata uma latou te mafaia, ia sosola ese ai mai le faanoanoa o le agasala, lagona ai le olioli o le faamagaloga, ma le faapotopoto faatasi ma i latou i le saogalemu i le malo o le Atua.

O le alofa o le Atua ma le alofa mo o latou uo ma tuaoi na tuufaatasia ai i latou e auauna atu i tagata. Na latou mananao e avatu le talalelei i tagata uma i lo latou vaega o le lalolagi. Ma sa latou saunia a latou fanau ia agavaa ina ia valaauina e le Alii ia aoao atu,

ia molimau atu, ma ia auauna atu i isi vaega o Lana tovine.

E tusa pe o totonu o se uarota telē i le nofoaga o le a faatino ai e le tiakono fou lona tiute e faasoa atu le talalelei ma fausia le malo pe o totonu o se vaega toalaite e mamao ese, lea e auauna ai le ositaulaga fou, o le a tasi lava i latou i le faamoemoega. O le a musuia le tiakono e le alofa o le Atua e aapa atu i se uo e le o avea ma se tagata o le ekalesia. O le a ia faaaoafia lana uo i nisi o sauniga po o gaioiga a le Ekalesia ma valaaulia o ia ma lona aiga ina ia aoaoina e faifeautalai. Ia i latou ua papatisoina, o le a avea o ia ma uo latou te manaomiaina.

O le a valaaulia e le ositaulaga isi e auai faatasi ma ia i le vaega toalaite o le Au Paia lea na te lagonaina ai le alofa o le Atua ma le filemu faamanuiaina o le Togiola.

Afai e faaauu ai ona ia faia ma le faamaoni lona tiute faaleperisitua, o le a ia vaaia le avea o le vaega ma se paranesi, ona oo atu ai lea o se siteki o Siona i lona aai. O le a i ai se uarota e i ai se epikopo agalelei. E ono avea ma se tasi o ona atalii po o atalii o se tasi o le fanau o le a i ai se aso na te avea ai se auauna a le Atua i se mauga lata ane ma fai atu i ai, “O le nofoaga matagofie lenei mo se malumalu.”

Ou te tatalo po o fea lava le mea o tatou i ai ma po o a foi o tatou tiute o i ai i le perisitua a le Atua, o le a tuufaatasia lava i tatou i le galuega o le aumaia o le talalelei i le lalolagi uma ma o le a tatou faamalosiua atu i tagata tatou te alolofa i ai ina ia faamamaina mai agasala ma ina ia fiafia faatasi ma i tatou i le malo o le Atua. I le suafa o Iesu Keriso, le e ana lenei Ekalesia, amene. ■

FAAMATALAGA

1. Mataupu Faavae ma Feagaiga 38:40–42.
2. Tavita O. MaKei, i le Conference Report, Apr. 1959, 122.





Saunia e Peresitene Thomas S. Monson

O Mai Alo o le Atua

Uso e, tau ina ia suesue i tatou uma taitoatasi i tusitusiga paia ma le filiga, fuafua lou olaga i se faamoemoega, aoao atu le upumoni i le molimau, ma auauna atu i le Alii i le alofa.

E faalua i tausaga taitasi e foliga mai e faapea mai ia i tatou lenei Maota Autu ofoofogia mo Konafesi, faatasi ma lona leo faatauanau, “O mai, outou uma o alo o le Atua ua mauaina le perisitua.”¹ O loo i ai se agaga patino lea e lofia atoa ai le sauniga aoao a le au perisitua a le Ekalesia.

O le po nei e faitau afe lo tatou aofai i le lalolagi atoa o loo auauna atu i le Alii o Ana faifeautalai. E pei ona ou ta’ua i lau savali ananei i le taeao, o le taimi nei ua silia ma le 65,000 a tatou faifeautalai o loo i le galuega, faatasi ai ma le isi faitau afe o loo faatalitali e ulufale atu i nofoaga autu e aoao ai faifeautalai pe o loo faagasolo foi a latou talosaga i le taimi nei. Matou te alolofa ma faamalo atu ia i latou ua loto ma le naunautai e auauna atu.

E le o i ai i tusitusiga paia se isi folafolaga sili atu ona fitoitonu, leai se isi tiutetauave sili atu ona mausali, leai se isi faatonuga e sili atu ona tuusao nai lo le poloaiga na tuuina mai e le Alii toetu ina ua Ia faaali atu i Kalilaia i aposetolo e toasefulutasi. Na Ia fetalai:

“O lenei, ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Paia:

“Ia outou aoao atu ia te i latou ia tausi i mea uma ua ou fai atu ai ia te

outou; faauta foi, ou te ia te outou i aso uma lava, e oo lava i le gataaga o le lalolagi.”²

O lenei poloaiga paia, ua vaavaalua ma lana folafolaga mamalu, o la tatou anavatau lea i aso nei e faapei ona i ai i le taulotoaiga o taimi. O le galuega faafaifeautalai o se mea ua iloa ai le Ekalesia a Iesu Keriso o le Au Paia o Aso e Gata Ai. E pei lava ona i ai, o le a faapena foi lava ona i ai. E pei ona tautino mai e le Perofeta o Iosefa Samita, “Ina ua uma ona tautalagia o mea uma, o le tiute tupito ma sili ona taua o le talai o le Talalelei.”³

I totonu o tausaga pupuu e lua, o faifeautalai faamisiona uma o loo auauna atu i le taimi nei i lenei autau tautupu a le Atua, o le a faamaeaina a latou galuega ma o le a toe foi atu i o latou aiga ma e pele. Mo alii, o e o le a suia i latou o loo maua i le po nei i totonu o le Perisitua Arona a le Ekalesia. Alii talavou pe ua outou saunia ea e tali atu? Ua outou naunau ea e galulue? Ua outou saunia ea e auauna atu?

I se vaaiga sili, e manaomia e le galuega faafaifeautalai ni fetuunai maoae i se ala e ola ai se tasi. E manaomia ni itula se tele ma se tuuto sili, se ositaulaga le manatu faapito ma tatalo faatauanau. O se taunuuga, o auaunaga tuuto faafaifeautalai e toe

maua mai ai se tau i le olioli e faavavau, lea e oo atu i le olaga nei ma le ola e faavavau.

O le luitau o le avea lea ma ni faifeautalai faamanuiaina sili i le tovine a le Alii. E faatatau lenei mea ia i tatou uma, po o le a lava le matua, ae le faapito autasi ia i latou o loo sauniuni e auauna atu o ni faifeautalai faamisiona, aua o i tatou uma taitoatasi ua poloaina e faasoa atu le talalelei a Keriso.

Sei ou fautua atu se mamanu o le a faamautinoa ai lo tatou faamanuiaina: muamua, **suesue i tusitusiga paia ma le filiga**; lua, **fuafua lou olaga i se faamoemoega** (ma ou te fia faaopoopo atu, fuafua lou olaga e tusa lava po o le a lou matua); tolu, **aoao atu le upumoni i le molimau**; ma le fa, **auauna atu i le Alii i le alofa**.

Sei tatou iloilo ina vaega taitasi e fa o le mamanu

Muamua, **suesue i tusitusiga paia ma le filiga**.

O loo molimau mai tusitusiga paia i le Atua ma o loo i ai upu o le ola e faavavau. Ua avea na upu ma faavae o la tatou savali.

O le faamamafa o mataupu aoaoina a le Ekalesia o tusitusiga paia, ua faapolokalamaina ma faamaopoopoina e ala i taumafaiga tuufaatasi. O loo uunaia foi i matou e suesue le tagata lava ia i tusitusiga paia i aso taitasi, faapea ma o matou aiga.

O le a ou tuu atu se mau faasino se tasi lea o loo i ai se faatatauga tonu i o tatou olaga. I le Tusi a Mamona, le mataupu 17 o Alema, tatou te faitau ai i le tala e uiga i le olioli o Alema ina ua ia toe vaai i atalii o Mosaea ma iloaina lo latou tumau i le upumoni. Ua tau mai e faamaumauga ia i tatou, “Sa latou matua malolosi i le malamalama o le upumoni; ona o i latou o ni alii mafaufau lelei ma sa latou suesue i tusitusiga paia ma le filiga, ina ia latou iloa le afioga a le Atua.

“Ae sa le ona pau ai lea; sa latou tuu atu i latou lava i le tatalo tele, ma le anapogi; o lea na i ai ai ia i latou le agaga o valoaga, ma le agaga o faaaliga, ma a latou aoao atu, sa latou aoao atu ma le mana ma le pule mai le Atua.”⁴

Uso e, **suesue i tusitusiga paia ma le filiga.**

Lona lua, i la tatou mamanu: **fua-fua lou olaga i se faamoemoega.**

Atonu e leai se tupulaga o talavou na fetaii ma ni faaiuga alualu mamao faapea e pei o talavou i aso nei. O sauniuniga e tatau ona faia mo aoga, misiona, ma faaiipoipoga. Mo nisi, o auaunaga faamiliteli o le a aofia ai.

O sauniuniga mo se misiona e vave amata lava. E faaopoopo atu i sauniuniga faaleagaga, o se matua atamai o le a sauniaina ni auala o le a mafai ai e sona atalii talavou ona amata faaputu lana tupe patino mo se misiona. E mafai ona uunaia lelei o ia a o gasolo ia tausaga e suesue se gagana ese, ina ia mafai ai pe a talafeagai, ona faaaoaga-ina ona tomai i gagana. Mulimuli ane, ona oo mai ai lea o lona aso mamalu pe a valaaulia e le epikopo ma le perezitene o le siteki le alii talavou mo se faatalanoaga. E iloiloaina le agavaa; ma faatumuina se talosaga mo se misiona.

Ma e leai se isi taimi e vaavaai atu ai ma faatalitali ma le naunautai tele le aiga atoa mo le tagata tiliva meli faatasi ma le tusi o loo i ai le tuatusi *47 East South Temple, Salt Lake City, Utah*. Ua taunu le tusi; ua lofituina i le le mautonu; ua faitauina le vala-uga. E masani lava o le misiona e tofia e galue ai e mamao ese lava mai le aiga. Peitai, e tusa lava po o le a le nofoaga, o le tali a le faifeautalai ua saunia ma usiusitai e tutusa lava: “O le a ou auauna atu.”

O sauniuniga mo le malaga ese atu ua amata. Alii talavou, ou te faamoemoe o loo outou talisapaia



ia osigataulaga o loo faia e o outou matua ma le naunautai tele ina ia mafai ai ona outou auauna atu. O a latou galuega o le a lagolagoina ai outou, o lo latou faatuatua o le a uunaia ai outou, o a latou tatalo o le a tausai ai outou. O se misiona o se mataupu faaleaiga. E ui atonu o le a va i vasa ma konetineti, ae o loto e tasi lava.

Uso e, a o outou fuafua i se faamoemoega o outou olaga, ia manatua o o outou avanoa faafaifeautalai e le o faatapulaaina i le vaitaimi o se valaauga aloaia. Mo i latou e auauna atu i le militeli, o na taimi e mafai ma e tatau lava ona faamanuiaina. O tausaga taitasi o o tatou alii talavou o loo i ai i le militeli e aumaia le tele o agaga i le malo o le Atua e ala i le faamamaluina o lo latou perisitua, i le ola ai i poloaiga a le Atua, ma le aoaoina atu o isi i le afioga paia a le Alii.

Aua nei e le amanaiaina lou avanoa e avea ai ma faifeautalai a o e tulituli-matagauina au aoaoga aloaia. O au faaitaiga o se tasi o le Au Paia o Aso e Gata Ai o le a matauina, faamasinoina, ma o le tele o taimi o le a faaitaia.

Uso e, po o le a lava lou matua, po o a lava ou tulaga, ou te apoapoai atu ia te outou ia **fuafua lou olaga i se faamoemoega.**

I le manatu lona tolu i la tatou mamanu: **aoao atu le upumoni i le molimau.**

Ia usiusitai i le fautuaga a le Apisetolo o Peteru, lea na agani mai: “Ia saunia pea lava outou e tali atu ma le agamalu ma le matau ia i latou uma o e fesili mai ia te outou i le uiga o le faamoemoe o loo ia te outou.”⁵ Ia sii ae o outou leo ma molimau atu i le natura moni o le Aiga Atua. Tau-tino atu lau molimau e faatatau i le



Tusi a Mamona. Faailoa atu upumoni mamalu ma matagofie o loo i ai i le ata o le faaolataga.

A o ou auauna ai o se peresitene o se misiona i Kanata i le silia ma le 50 tausaga talu ai, sa maofa ai se tasi o faifeautalaitalavou na sau mai se tamai nuu maotua, i le tele o Toronto. Sa fai si ona puupuu ae sa umi i lana molimau. E lei leva ona taunuu o ia, faatasi ai ma lana soa, ae asiati atu i le fale o Elmer Pollard i Oshawa, Ontario, Kanata. I le loto momomo ai mo alii talavou i se taimi o le matagi kiona malosai, sa o atu i lea fale ma lea fale, sa valaaulia ai e Mr. Pollard ia faifeautalaitalavou o lona fale. Sa la tuu atu ia te ia lana savali. Na te lei mauaina le agaga. Ina ua maea na ia fai atu ia i laua e o ese ma aua nei toe foi atu. O ana upu mulimuli i faifeautalaitalavou a o la o ese atu mai lona faitotoa i luma sa tautala atu ai ma le faatau-emu: “E le mafai ona oulua tau mai ia te au e te lua talitonu moni o Iosefa Samita o se perofeta a le Atua!”

Sa tapuni le faitotoa. Sa savavali atu faifeautalaitalavou i le ala. Sa fai atu la tatou tama maotua lea i lana soa: “Soa, ta te

lei tali atu ia Mr. Pollard. Sa ia fai mai ta te le talitonu o Iosefa Samita o se perofeta moni. Ta toe foi atu ma tuu atu a ta molimau ia te ia.” I le taimi muamua sa tau le mautonu ai le faifeautalaitalavou sili atu ona atamai ae na iu lava ina malie e o atu ma lana soa. Sa taia o la loto i le fefe a o la latalata atu i le faitotoa lea na teenaina ai i laua. Sa la tuitui, faailoa atu ia Mr. Pollard, faatali ma le tiga mo sina taimi, ona tautala atu loa lea o la tatou faifeautalaitalavou e le lava se poto masani, i le mana mai le Agaga: “Mr. Pollard, na e fai mai ma te le talitonu moni lava o Iosefa Samita o se perofeta a le Atua. Ou te molimau atu ia te oe o Iosefa o se perofeta. Sa ia faaliliuina le Tusi a Mamona. Na ia vaai i le Atua le Tama ma Iesu le Alo. Ua ou iloaina.”

I se taimi mulimuli ane, na tu ai Mr. Pollard, lea ua Uso Pollard nei, i se sauniga perisitua ma tautino ai: “O lona po sa le mafai ona ou moe. Sa ou faalogoina pea upu: O Iosefa Samita o se perofeta a le Atua. Ua ou iloaina. Ua ou iloaina. Ua ou iloaina.” O le aso na sosoo ai sa ou telefoni ai i faifeautalaitalavou ma fai atu i ai e toe foi

mai. O le la savali, na afaatasi ma le la molimau, na suia ai lou olaga ma olaga o lou aiga.” Uso e, **aoao atu le upumoni i le molimau.**

O le manatu mulimuli i la tatou mamamu o le **auauna atu i le Alii i le alofa**. E leai se mea e suitulaga i le alofa. O faifeautalaitalavou faamanuaina e alolofa i a latou soa, o o latou taitai o misiona, ma tagata faapelepele latou te aoaoina. I le vaega lona fa o le Mataupu Faavae ma Feagaiga, na faavae ai e le Alii ni agavaa mo galuega o le auauna atu. Sei o tatou iloiloaina ni nai fuaiupu:

“O outou e, o e o atu i le galuega a le Atua, vaai ia outou auauna atu ia te ia ma o outou loto atoa, mafaufau atoa, manatu atoa, ma le malosai atoa, ina ia mafai ona outou tutu ma le le pona i luma o le Atua i le aso gataaga. . . .

“Ma o le faatuatua, faamoemoe, alofa mama ma le alofa, ma le manatu tasi i le mamalu o le Atua, e agavaa ai o ia mo le galuega.

“Ia manatua le faatuatua, amio mama, poto, faautauta, onosai, agalelei faaleuso, amio-atua, alofa mama, lotomauualalo, filiga.”⁶

Ia manatua le faatuatua, amio mama, poto, faautauta, onosai, agalelei faaleuso, amio-atua, alofa mama, lotomauualalo, filiga?”

E ala i la outou tuuto faamaoni i le aiga po o nuu mamao, o na agaga o loo e fesoasoani e laveai o le a avea ma i latou e sili ona e alofa i ai.

I le tele o tausaga talu ai sa o mai ai i lou ofisa ni au uo pele, o Craig Sudbury ma lona tina, o Pearl, a o loma le malaga a Craig mo le Misiona a Ausetalia Melepone. O le tama o Craig, o Fred Sudbury, sa lei auai. I le lua sefululima tausaga na muamua ai na faaipoipo atu ai le tina o Craig ia Fred, o le sa le fiafia i le Ekalesia ma, o le mea moni, sa le o se tagata o le Ekalesia.

Sa tau mai e Craig ia te au lona alofa loloto ma le tumau mo ona matua ma lona faamoemoe ia i ai lava se ala, o le a ootia ai lona tama i le Agaga ma tatala ai lona loto i le talalelei a Iesu Keriso. Sa ou tatalo mo se musumusuga i se auala e mafai ai ona faaunuunuina sea manao. Na oo mai le musumusuga, ma sa ou fai atu ia Craig, “Auauna atu i le Alii ma lou

loto atoa. Ia e usiusitai i lou valaauga paia. I vaiaso taitasi ia e tusia ai se tusi i ou matua; ma i lea taimi ma lea taimi, ia tusi patino atu ia Tama, ma faailoa atu ia te ia le tele lou alofa ia te ia, ma tau i ai le mafuaaga e te lotofaafetai ai i le avea o oe ma ona atalii.” Sa ia faafetai mai ia te au ma, faatasi ai ma lona tina, sa la tuua ai le ofisa.

Sa ou lei toe vaaia le tina o Craig mo le 18 masina, seia oo ina ua ia sau i lou ofisa ma, a o tagi o ia, sa ia faapea mai ia te au, “Ua toetoe atoa le lua tausaga talu ona alu Craig mo lana misiona. E lei misi lava sana tusi ia i maua i vaiaso taitasi. Talu ai nei, sa tu ai lo’u toalua o Fred mo le taimi muamua lava i se lotu molimau ma faateia au ma tagata uma sa i ai iina i lona faasilasila mai ua ia faia se faaiuga e avea ma tagata o le Ekalesia. Sa ia faailoa mai o le a ma o atu i Ausetalia e feiloai ai ma Craig i le maea ai o lana misiona ina ia mafai ai ona avea Fred ma papatisoga mulimuli a Craig o se faifeautalai faamisiona.”

E lei ma se faifeautalai sa sili atu ona mitamita nai lo Craig Sudbury, i le

mamao o Ausetalia, ina ua ia fesoasoani e taitai atu lona tama i totonu o le vai e oo i puimanava ma, sii ae lona lima i le sikuea, ma ta’ua na upu paia: “Frederick Charles Sudbury, ona ua tofia au e Iesu Keriso, ou te papatiso ia te oe i le suafa o le Tama, ma le Alo, ma le Agaga Paia.”

Ua manumalo le alofa. **Auauna atu i le Alii i le alofa.**

Uso e, tau ina ia **suesue i tatou uma taitoatasi i tusitusiga paia ma le filiga, fuafua lou olaga i se faamoemoega, aoao atu le upumoni i le molimau, ma auauna atu i le Alii i le alofa.**

O le Leoleo Mamoe atoatoa o agaga, le faifeautalai na togiolaina tagata, na tuu mai ia i tatou Lana faamautinoaga paia:

“Ma afai e faapea lua te galulue i o oulua aso uma i le alagaina o le salamo i lenei nuu, ma aumai, nao se agaga e toatasi ia te au, e matua tele lava lo oulua olioli faatasi ma ia i le malo o lo’u Tama!

“Ma o lenei, afai o le a tele lo oulua olioli faatasi ma se agaga e toatasi na oulua aumai ia te au i le malo o lou Tama, e matua tele atu lo oulua olioli pe afai lua te aumai ni agaga e toatele ia te au!”⁷

Ia te Ia o le na fetalai i nei upu, ou te tautino atu ai lau molimau: O ia o le alo o le Atua, lo tatou Togiola, ma lo tatou Faaola.

Ou te tatalo ina ia tatou tali atu pea i Lana valaaulia agamalu, “Mulimuli mai ia te au.”⁸ I Lona suafa paia—le suafa o Iesu Keriso le Alii—amene. ■

FAAMATALAGA

1. “O Mai Alo o le Atua,” *Viiga*, nu. 200.
2. Mataio 28:19–20.
3. *Aoaoga a Peresitene o le Ekalesia: Iosefa Samita* (2007), 330.
4. Alema 17:2–3.
5. 1 Peteru 3:15.
6. Mataupu Faavae ma Feagaigai 4:2, 5–6.
7. Mataupu Faavae ma Feagaiga 18:15–16.
8. Ioane 21:22.





Saunia e Peresitene Dieter F. Uchtdorf
Fesoasoani Lua i le Au Peresitene Sili

O Le Faamoemoe o le Malamalama o le Atua

A tatou saili atu e faateleina lo tatou alofofa i le Atua ma taumafai e alofofa i o tatou tuaoi, o le a siomia i tatou e le malamalama o le talalelei ma siitia i tatou.

Faitotoa i le Malamalama

E i ai sa'u atavali i lo'u ofisa e faaulutalaina *Faitotoa i le Malamalama*. Sa fatu e sa'u uo, o le tusiata Tenimaka o Johan Benthin, o le sa avefa ma uluai peresitene o le siteki i Copenhagen, Tenimaka.

O loo faaalua i le atavali lea se potu pogisa o loo i ai se faitotoa o loo matala lea e susulu mai ai le malamalama. E mata'ina lava ia te au ona o le malamalama lea e sau mai le faitotoa e le o malamalama uma ai le potu atoa—ae ua na o le avanoa o loo i luma tonu o le faitotoa.

Ia te au, o le pogisa ma le malamalama i lenei atavali o se faataoto mo le olaga. O se vaega o lo tatou tulaga o tagata i la le tino lea i nisi taimi e lagonaina e pei o loo siomia i tatou e le pogisa. Atonu ua maliu se tasi e pele ia i tatou; atonu ua se ese se tasi o le fanau; atonu ua tatou maua i se faamai ua tatou atuatuvaale ai; atonu o i ai ni o tatou luitau faalegaluega ma ua avefa ma avega mamafa ona o le masalosalo po o le fefe; pe atonu ua tatou lagonaina le tuatoatasi po o le alofaina.

Ae e ui atonu tatou te lagonaina le le mautonu i le lotolotoi o o tatou tulaga o i ai nei, ae ua folafola mai e le Atua le faamoemoe o Lona malamalama—Ua Ia folafola mai e faamalalama le ala o loo i o tatou luma atu ma faaali mai ia i tatou le auala e alu ese ai mai le pogisa.

O Se Potu ua Faatumulia i le Pogisa

Ou te fia faamatala atu ia te outou se tamaitai na ola ae i se potu na faatumulia i le pogisa—o le a ou faaigoa ia te ia o Sieni.

Mai le taimi ina ua tolu tausaga le matua o Sieni, sa fasi soo o ia, faatautemu i ai, ma sauaina. Sa taufaamatauina o ia ma faifai i ai. Sa ala ae o ia i taeao uma ma le iloaina pe o le a aulia e ia le isi aso e sosoo ai. O tagata sa tatau ona puipua o ia o i latou ia sa sauaina o ia pe faatagaina foi le faaauau pea o le sauaina.

Ina ia mafai ona puipua o ia lava, sa aoao ai Sieni ina ia taofi ona lagona. Ua leai sona faamoemoe mo se laveai, o lea sa ia faamaaaina ai o ia lava i faigata moni o loo ia oo i ai. Sa

leai se malamalama i lona lalolagi, o lea sa ia taliaina ai le pouliuli. Faatasi ai ma le leai o ni lagona ona ua na o le fesootaiga faifai pea lava ma le alofa ma le tiapolo, na ia taliaina ai le mea moni e faapea atonu e oti o ia i soo se taimi lava.

Ae, ina ua 18 ona tausaga, sa maua ai e Sieni le Ekalesia a Iesu Keriso o le Au Paia o Aso e Gata Ai. O le olioli ma le faamoemoe o le talalelei toefuataiina na tuia ai lona loto, ma sa ia taliaina le valaaulia ina ia papatisoina. Mo le taimi muamua lava, na faatoa ulufale atu ai le malamalama i lona olaga, ma sa ia vaaia ai se ala susulu i ona luma. Sa ia tuua le pogisa o lona lalolagi ma filifili e aoga i se aoga e mamao ese mai ia i latou na sauaina o ia. Mulimuli ane na ia lagonaina le saoloto mai se siosiomaga o le pogisa ma le leaga—saoloto e olioli i le suamalie o le filemu o le Faaola ma le faamalologa faavavega.

Peitai, i tausaga mulimuli ane, ina ua maliliu e na sauaina o ia, sa toe oo foi faafitauli ia Sieni ona o sauaga na tutupu i lona talavou. O faanoanoga tetele ma le ita na taufaamatau e faaumatia le malamalama matagofie sa ia maua i le talalelei. Sa ia iloaina afai na te faatagaina le pogisa e faavaivaia o ia, o le a iu ina manumalo i latou na sauaina o ia.

Sa ia saili atu i fautuaga ma fesoasoaniga faafomai ma amata ai ona ia iloaina, mo ia lava, o le ala sili mo le faamaloloina o le malamalama lea ma taliaina o loo i ai le pogisa—ae aua nei nofo ai iina. Aua, e pei ona ia iloaina nei, o loo i ai foi le malamalama—ma o iina le mea sa ia filifili e nofo ai.

Ona o faigata na ia oo i ai i le tuaina, sa ono faigofie lava ia Sieni ona tauimasui, tumu i le ita, pe faamisa. Ae sa ia le faia. Na ia teenaina le faaososoga e faasalalau le pogisa, na musu e faamisa ona o le ita, tiga, po o le



Au Pulega Aoao O Le Ekalesia a Iesu Keriso o le Au Paia o Aso e Gata Ai

O LE AU PERESITENE SILI



Henry B. Eyring
Fesoasoani Muamua



Thomas S. Monson
Peresitene



Dieter F. Uchtdorf
Fesoasoani Lua

O LE KORAMA A APOSETOLO E TOASEFULULUA



Boyd K. Packer



L. Tom Perry



Russell M. Nelson



Dallin H. Oaks



M. Russell Ballard



Richard G. Scott



Robert D. Hales



Jeffrey R. Holland



David A. Bednar



Quentin L. Cook



D. Todd Christofferson



Neil L. Andersen

O LE AU PERESITENE O FITUGAFULU



Ronald A. Rasband



L. Whitney Clayton



Donald L. Hallstrom



Tod R. Callister



Richard J. Maynes



Craig C. Christensen



Ulisses Soares

O LE KORAMA MUAMUA A FITUGAFULU

(i le faasologa faaalafapeta)



Marcos A. Adlakonis



Jose L. Alonso



Carlos H. Amado



Ion S. Ardern



Mervyn B. Arnold



David S. Baxter



Shayne M. Bowen



Craig A. Cardon



Yoon Hwan Choi



Don R. Clarke



Carl B. Cook



Lawrence E. Cochrane



Claudio R. M. Costa



Leonard R. Curtis Jr.



Benjamin De Hoyos



John B. Dickson



Edward Dubie



Kevin R. Duncan



Larry J. Echo Hawk



Stanley G. Ellis



David F. Evans



Enrique R. Fababella



Eduardo Gavaret



Robert C. Gay



Carlos A. Goady



Christofel Golden Jr.



Gerrit W. Gong



Walter F. Gonzalez



C. Scott Grow



James J. Hamula



Daniel L. Johnson



Paul V. Johnson



Patrick Keaton



Paul E. Koelliker



Marcus B. Nash



S. Gifford Nielsen



Brent H. Nielson



Allan F. Parker



Kevin W. Pearson



James B. Martino



O. Vincent Haleck



Kevin S. Hamilton



Larry R. Lawrence



Per G. Malm



Anthony D. Perkins



Paul B. Pieper



Rafael E. Pino



Bruce D. Porter



Dale G. Reiland



Michael T. Ringwood



Lynn G. Robbins



Joseph W. Sitari



Steven E. Snow



Michael John U. Teh



Terence M. Vinson



Kent D. Watson



Kent F. Richards



Larry Y. Wilson

O LE KORAMA LUA A FITUGAFULU

(i le faasologa faaalafapeta)



Wilford W. Andersen



Koichi Aoyagi



Randall K. Bennett



Bruce A. Carlson



J. Devin Cornish



Timothy J. Dyches



Bradley D. Foster



Randy D. Funk



O. Vincent Haleck



Kevin S. Hamilton



Larry R. Lawrence



Per G. Malm



James B. Martino



Kevin S. Hamilton



Larry R. Lawrence



Per G. Malm



Gregory A. Schwitzer



Terence M. Vinson



Kent D. Watson



Kent F. Richards

O LE AU EPIKOPO PULEFAAMALUMALU



Claudio D. Zivic



Juan A. Urceta



Arnulfo Valenzuela



Francisco J. Vinas



W. Christopher Watfield



William R. Walker



F. Michael Watson



Scott D. Whiting




Kazuhiko Yamashita




Jorge E. Zaballo




Gerald Coussé
Fesoosani Muamua



Gary E. Stevenson
Epikopo Pulefaamalumalu



Dean M. Davies
Fesoosani Luu



Ua potopoto le Au Paia o Aso e Gata Ai i le lalolagi atoa mo le Konafesi Aoa Lona 183 Faaletausaga. Atapue faasolo i le taumatau mai le pito i luga i le agavale, o tagata o le Ekalesia ma faifeautalai i Guayaquil, Ekuatoa; Pretoria, Aferika i Saute; Santiago, Chile; Copenhagen, Tenimaka; Aai o Niu loka, Niu loka, ISA; Brasilia, Pasila; ma Edinburgh, Sikotilani.

masalosalovale. Ae, sa ia pipii mau i le faamoemoe lea e faatasi ai ma le fesoasoani a le Atua o le a mafai ai ona faamaloloina o ia. Sa ia filifili e faasusulu atu le malamalama ma tuuto atu lona ola e fesoasoani ai i isi. O lenei faaiuga na ia mafai ai ona lafoai lona tuanai ae amatalia se lumanai matagofie ma susulu.

Sa oo ina avea o ia ma faiaoga, ma o le asō, i le tele o tausaga mulimuli ane, ua uunaia e lona alofa ia olaga o le faitau selau o tamaiti, ua fesoasoani ia i latou ia latou iloaia e i ai so latou tau, e taua i latou. Ua avea o ia ma tagata e le vaivai e puipui i e vaivai, o e ua sauaina, ma e ua faalotovaivaiina. Ua ia fausia, faamalosia, ma uunaia tagata uma o siomia o ia.

Sa aoaoina e Sieni e oo mai le faamalologa pe a tatou o ese mai le pogisa ma savavali atu i le faamoemoe o se malamalama sili atu. Sa na o le faatinoga moni lava o le faatuatua, faamoemoe, ma le alofa mama na le gata sa suia ai lona lava ia olaga ae ua faamanuiaina ai foi e faavavau olaga o le anoanoai o isi.

O Le Malamalama e Pipii i le Malamalama

Atonu o loo i ai nisi o outou o loo lagonaina le faateleina o le pogisa i o outou luga. Atonu o loo outou lagonaina le mamafatu ona o le popole, fefe, po o le masalosalo. Mo outou ma i tatou uma, ou te toe fia ta'ua se upu-moni matagofie ma le mautinoa—e moni lava le malamalama o le Atua. Ua avanoa mo tagata uma! Na te avatua le ola i mea uma.¹ Ua i ai le mana e faamāmā ai le tiga o se manua aupito loloto. E mafai ona faamaloloina le tuutoatasi ma le gasegase o o tatou agaga. E oo lava i taimi o faigata, na te mafai lava ona aumaia se faamoemoe susulu. E mafai ona faamalalamaina ni taimi aupito sili ona faanoanoa. E



mafai ona faamalalamaina le ala i o tatou luma ma taitai atu i tatou i pouliuli aupito sili ona pogisa i se folafolaga o se taeao fou.

O le “Agaga lava lea o Iesu Keriso,” lea e tuu maia le “malamalama i tagata taitoatasi e sau i le lalolagi.”²

E ui i lea, e seasea sau le malamalama faaleagaga ia i latou e na ona nofonofo i le pogisa ma faatalitali mo se tasi e kiina le moli. E manaomia ai se faatinoga o le faatuatua e pupula ai o tatou mata i le Malamalama o Keriso. E le mafai e mata faaletino ona iloaia le malamalama faaleagaga. Na aoao mai Iesu Keriso lava Ia, “O a’u o le malamalama ua susulu i le pouliuli, ae ua le malamalama i ai le pouliuli.”³ Aua “e le talia e le tagata faaletino o mea a le Agaga o le Atua: aua o mea valea ia ia te ia, na te le mafai foi ona iloa, aua e faamasinoina faaleagaga.”⁴

E faapefea la ona pupula o tatou mata i le faamoemoe i le malamalama o le Atua?

Muamua, amata i le mea o e i ai.

Pe le matagofie ea le iloaia e le seiloga tatou te atoatoa faatoa tatou mauaina lea o faamanuiaga ma mea-alofa a lo tatou Tama Faalelagi? Tatou te le tau faatali sei taunuu i le tini ona faatoa maua lea o faamanuiaga a le Atua. O le mea moni, e amata ona matala mai le lagi ma amata ona liligi mai faamanuiaga o le lagi i o tatou luga i a tatou laa muamua lava e agai atu i le malamalama.

O le nofoaga sili lava e amata ai o le mea tonu lava lena e te i ai i le taimi nei. E le afaina pe e te manatu e te le o agavaa po o lou lagonaina o le faifaiaga tele o isi. O le taimi lava e te amata sailia ai lou Tama Faalelagi, o le taimi foi lena o le a amata ai ona fagua, faaola, ma faamalualiiina e Lona malamalama lou agaga.⁵ Atonu o le a le mou ese atu le pogisa i se taimi e tasi, ae e pei lava o le mautinoa i taimi uma o le alu ese atu o le po pe a oo mai le taeao, o le a oo mai ai lava le malamalama.

Lona lua, liliu atu lou loto i le Alii.

Ia sii ae lou agaga i le tatalo, ma faamatala atu i lou Tama Faalelagi mea o loo e lagonaina. Faailoa i ai ou faaletonu. Sasaa atu i ai lou loto ma faailoa atu lou lotofaafetai. Faailoa ia te Ia ia tofotofoga o loo oulua fetaiai. Aioi atu ia te Ia i le suafa o Keriso mo le malosi ma le tausiga. Ole atu ina ia tatala ou taliga, ina ia mafai ona e lagonaina Lona siufofoga. Ole atu ina ia pupula ou mata, ina ia mafai ona e vaaia Lona malamalama.

Lona tolu, savavali i le malamalama.

Ua silafia e lou Tama Faalelagi o le a e faia ni mea sese. Na te silafia o le a e tautevateva—masalo o le tele o taimi. E faanoanoa ai o Ia i lena mea, ae e alofa o Ia ia te oe. E le finagalo o Ia e faaumatia lou agaga. I se isi itu, e finagalo o Ia ia e tulai ae ma avea ma tagata na foafoaina oe e avea ai.

I lena tulaga, sa Ia auina mai ai Lona Alo i lenei lalolagi e faamalalama le ala ma faaali mai ia i tatou le auala e sopoia ai ma le saogalemu ia maa tu’ia ua taatitia i lo tatou ala. Ua Ia aumai ia i tatou le talalelei, lea o loo aoao mai ai le ala o le soo. Ua aoao ai i tatou i mea e tataua ona tatou iloa, faia, ma ia savavali ai i Lona malamalama, i le mulimuli ai i tulagaao o Lona Alo Pele, lo tatou Faaola.



E Faatoilalo e le Malamalama le Pogisa

Ioe, o le a tatou faia ni mea sese.
Ioe, o le a tatou vaivai.

Ae a tatou saili atu e faateleina lo tatou alolofa i le Atua ma taumafai e alolofa i o tatou tuaoi, o le a siomia i tatou e le malamalama o le talalelei ma siitia i tatou. O le a mautinoa lava le mou atu o le pogisa, ona e le mafai ona i ai faatasi ma le malamalama. A tatou latalata atili atu i le Atua, o le a Ia latalata atili mai foi ia i tatou.⁶ Ma i lea aso ma lea aso, o le a tuputupu ae pea le faamoemoe o le malamalama o le Atua i totonu o i tatou, ma “susulu malamalama tele pea lava pea seia oo i le aso e atoatoa ai.”⁷

Ia i latou uma o loo lagonaina o loo savavali i le pogisa, ou te valaauliaina outou ia faalagolago i lenei folafolaga mautinoa na fetalai e le Faola i tagata uma: “O au nei o le malamalama o le lalolagi: o le mulimuli mai ia te au, e le savali o ia i le pouliuli, ae ia te ia le malamalama o le ola.”⁸

O Se Malamalama i Aferika

I ni nai tausaga talu ai, sa ma maua ai ma lo’u toalua o Harriet se aafiaga e le faagaloina lea na ma vaaia ai le faataunuaina o lenei folafolaga. Sa ma i ai i Aferika i Sisifo, o se vaega

matagofie o le lalolagi lea sa tupu-tupu ae ai le Ekalesia ma fialia ai le Au Paia o Aso e Gata Ai. Peitai, e anoanoai foi luitau i Aferika i Sisifo. Aemaise lava, sa ou faanoanoa i le mativa sa ou vaaia. I aai, e anoanoai ē e leai ni galuega, ma e tele lava na tauivi aiga e saunia mea e manaomia i aso uma faapea ai ma lo latou saogalemumu. Sa momomo lou loto i le iloina o le toatele o o tatou tagata faapelepele o le Ekalesia o loo ola i ia tulaga mativa. Ae sa ou iloa ai foi o nei lava tagata lelei o loo fesoasoani le tasi i le isi ina ia faamama i a latou avega mamafa.

Sa mulimuli ane matou taunuu i se tasi o a tatou falelotu e latalata i se aai tele. Ae nai lo le mauaina o se nuu o mafatia ma faavaivaia e le pogisa, sa matou maua atu se nuu fialia o e sa susulu i le malamalama! O le fialia na latou lagonaina mo le talalelei na matou aafia ai ma siitia ai o matou agaga. Sa latou faailoa mai se alofa faamaualalo mo i matou. O o latou fofoga fialia na matou fialia ai foi.

Ou te manatua sa ou tau mafau-fau i lena taimi pe faamata o i ai nisi tagata o fialia atu i lo latou nei i luga o le paneta. E ui na siomia nei Au Paia

pele i faigata ma tofotofoga, ae sa faatumulia i latou i le malamalama!

Na amata le sauniga, ma amata ona ou lauga. Ae e lei pine ae pe le eletise i le fale, ma tuua ai matou i se pogisa atoa.

Mo sina taimi sa le mafai ona ou vaai atu i se tasi i le faapotopotoga, ae na mafai ona ou vaaia ma lagonaina ia lau fofoga fialia susulu ma matagofie a o tatou Au Paia. Oka sou fialia tele e faatasi ma nei tagata lelei!

Sa faaauau pea ona pogisa le falelotu, ma o lea sa ou nofo ifo ai i talaane o lou toalua ma faatalitali mo le eletise e toe ola mai. A o matou faatali, sa tupu se mea ofoofogia.

Sa amata ona usuina e ni nai leo se tasi o viiga o le Toefuataiga. Ona pepese atu ai lea ma isi. Ma faaopoopo ai ma isi. E le i pine ae faatumulia le falelotu i pesega mālū ma faagaetia.

Sa lei manaomiaina e nei tagata o le Ekalesia ni tusipese; sa latou iloina upu uma o viiga uma na latou usuina. Ma sa latou lagiina lea pese ma lea pese i se malosi ma se agaga na ootia ai lo’u agaga.

Mulimuli ane, na toe mumu mai moli ma lilofia ai le potu i le malamalama. Sa ma fetilofa’i ma Harriet i le tasi ma le isi, a o susu o ma alafau i loimata.

I le lotolotoi ai o le pogisa tele, na faatumulia ai e nei Au Paia matagofie ma ofoofogia leni fale o le Ekalesia ma o matou agaga i le malamalama.

O se aafiaga o’oo’o tele lea mo i ma’ua—o se mea o le a le galo lava ia i maua ma Harriet.

O Mai i le Malamalama

Ioe, mai lea taimi i lea taimi atonu e foliga mai e pa’i mai, pe fusia foi o tatou olaga i le pogisa. O nisi taimi o le pouliuli lea e siomia ai i tatou o le a foliga mai e le tonu, faavaivailoto, ma taufaamatau.

E faanoanoa lou loto i le tele o faanoanoaga o loo feagai ma nisi o outou, mo le tiga o le tuatoatasi ma le fefe ua faalotovaivaia oe atonu o loo e oo i ai.

Ae ui i lea, ou te molimau atu o lo tatou faamoemoe ola o loo ia Keriso Iesu! O Ia o le faitotoa moni, mama, ma le mamana e oo atu ai i le malamalama faalelagi.

Ou te molimau atu ona o Keriso, e le mafai ai ona manumalo le pogisa. O le a le maua lava e le pogisa le manumalo i le malamalama o Keriso.

Ou te molimau atu e le mafai e le pogisa ona tatalia le malamalama susulu o le Alo o le Atua soifua!

Ou te valaaulia outou taitoatasi ia tatala atu o outou loto ia te Ia. Saili atu ia te Ia e ala i le suesue ma le tatalo. O mai i Lana Ekalesia, Le Ekalesia a Iesu Keriso o le Au Paia o Aso e Gata Ai. Aoa ia te Ia ma Lana talalelei, ia auai ma le punouai, fesoasoani i le tasi ma le isi, ma auauna atu ma le fiafia i lo tatou Atua.

Uso e ma tuafafine, e oo lava i le pouliuli aupito pogisa, o le a taitai lava oe e le Faaola o le lalolagi i se taeao e faasolosolo ina susulu ma le matagofie lea o le a mautinoa lava e oso ae i totonu ia te oe.

A o e savali atu i le faamoemoe o le malamalama o le Atua, o le a e iloaina le agaalofa, alofa, ma le lelei o se Tama Faalelagi alofa, “[o le] e leai lava se pouliuli o ia te ia.”⁹ Ou te molimau atu ai i nei mea i le suafa paia o Iesu Keriso, amene. ■

FAAMATALAGA

1. Tagai Mataupu Faavae ma Feagaiga 88:11–13.
2. Mataupu Faavae ma Feagaiga 84:45–46.
3. Mataupu Faavae ma Feagaiga 6:21.
4. 1 Korinito 2:14.
5. Tagai Alema 34:31.
6. Tagai Iakopo 4:8; Mataupu Faavae ma Feagaiga 88:63.
7. Mataupu Faavae ma Feagaiga 50:24.
8. Ioane 8:12.
9. 1 Ioane 1:5.



Saunia e Elder Neil L. Andersen

○ Le Korama a Aposetolo e Toasefululua

○ Se Vavega Lava

Afai e le o oe o se faifeautalai faamisiona e i ai se pine faifeautalai e faamau i lou pelaue, o le taimi la lenei e vali ai se pine i lou loto—ia vali e pei ona fai mai Paulo, “e le tusia i le vaitusi, a o le Agaga o le Atua soifua.”

○ le soifuaga faaletino o Iesu Keriso sa faatumulia i vavega. O se tina taupou, o se fetu fou, o agelu na faaali atu i leoleo mamoe, o le pupula o tauaso, o le savavali o pipili, o agelu i Ketesemane faapea ai le tuugamau, ma le vavega aupito silisili o vavega uma—O Lona Toetu mamalu.

E mafai ona outou vaai faalemafau-fau i le vaaiga o Aposetolo e Toasefulutasi i luga o le mauga e latalata i Kalilaia, ina ua afio mai le Alii toetu ia i latou ma fetalai mai: “Ia outou o atu e fai nuu uma lava ma soo, ma papatiso atu ia te i latou i le suafa o le Tama ma le Atalii, ma le Agaga Paia?”¹ “O atu ia outou i le lalolagi uma, ina tala’i atu ai le tala lelei i tagata uma lava.”²

“Nuu uma?” “Lalolagi uma?” “Tagata uma?” Pe sa faigofie ea? E ui na faamautinoa atu e Iesu ia i latou, ae atonu lava sa latou tuufesili pe o le a i ai moni lava ni vavega ma i latou i le faasalalauina o le talalelei.³

Sa faatoilaloina e le faatuatua le masalosalo, ma na siitia ai e Peteru lona leo, ma alaga atu:

“O outou . . . e ua nonofo i Ierusalem a lava, . . . ia faafofoga mai i au upu: . . .

“. . . O Iesu o le Nasareta, . . . [o le]

ua outou faamau i le laau ma fasioti i lima o tagata faaletaupulea: . . .

“O Iesu lava lena . . . ua toe faatuina e le Atua, [ma] o molimau i matou uma i lena mea.”⁴

Sa i ai se aafiaga tele faaleagaga e le mafaafitia i lena aso, ma na papatiso ai agaga e 3,000. E pei lava ona folafola mai e Iesu, na mulimuli atu lava faailoga ma vavega i le faatuatua o e na talitonu.

E pei ona toefuatai mai le Ekalesia a Iesu Keriso i le lalolagi i le 183 tausaga talu ai, o loo lagonaina pea le poloaiga a le Alii i Lana vaega toalaiti o soo i Lana fetalaiiga lea na fetalai ai i seneturi na muamua atu: “O le leo o le lapataiga ua mo tagata uma.”⁵ “Aua, e moni, e ao ona alu atu le leo . . . i le lalolagi atoa, ma i vaega aupito mamao o le lalolagi.”⁶

“Tagata uma?” “Lalolagi atoa?” “I vaega aupito mamao o le lalolagi?” Pe sa mafai ea?

Sa toe faamautinoa atu e le Faaola i Lana Au Paia o Aso e Gata Ai,⁷ ae pe na mafai ea ona latou muai vaaia le faalateleina ma le taunuuga o lenei galuega ofoofogia? Atonu sa latou tuufesili pe o le a i ai ea ni vavega ma i latou i le faasalalauina o le talalelei.



E toe faapea atu, sa faatoilaloina e le faatuatua le msalosalo, ma na papatisoina ai le faitau afe. I Egelani, sa maua ai e Elder Wilford Woodruff se nuu atoa na faatalitali i lona taunuu atu. Na oo ifo i o latou luga le Agaga o le Alii, ma na ia papatisoina ai failauga e 45 ma le faitau selau o isi tagata i lona masina muamua i le faatoaga i Benbow.⁸

E le ese lava foi o tatou aso. A o aveia i maua ma Elder David A. Bednar ma ni faifeautalalai pe tusa ua 40 tausaga talu ai (ma e mafai ona ou faamautinoa atu ia te outou e le o maua e aupito matutua ai lava i faifeautalalai ua uma misiona o loo nonofo i nofoa lanumumu), sa i ai faifeautalalai e 16,000. E pei ona sa lipotia mai e Peresitene Thomas S. Monson ananafi, o le taimi nei ua 65,000—ua sili atu nai lo se isi lava taimi muamua. Sa i ai siteki e 562 i lona taimi. O le asō ua sili ma le 3,000. I lona taimi, e 59 atunuu sa i ai a tatou uarota ma paranesi. O le aso, ua i ai a tatou faapotopotoga i malo e 189 mai le 224 o malo ma teritori o le lalolagi. E toaititi lava i tatou, e pei lava ona muai tau mai e Nifae.⁹ Ae i le taimi lava e tasi, o loo tatou molimauina ai le faataunuuga o upu faavaloga a Tanielu: o le “maa . . . e lei tofia i lima . . . ua tumu ai le lalolagi uma.”¹⁰

O o tatou aso o se taimi ofoofogia o vavega. I le ono masina talu ai ina ua faasilasila mai e Peresitene Monson le suiga i tausaga mo alii talavou ma tamaitai talavou e mananao e auuna atu faamisiona, sa i ai se aafiaga tele faaleagaga e le mafaafitia. Sa faatoilalo e le faatuatua le masalosalo, ma agai ai i luma alii ma tamaitai talavou. O le Aso Tofi ina ua maea le konafesi, sa tofia ai au e fautua atu valaauga mo faifeautalalai i le Au Peresitene Sili. Sa ou maofa i le vaaia o talosaga a alii talavou 18 tausaga ma tamaitai talavou 19 tausaga ua toe fetuunai a latou fuafuaga, asiasi atu i a latou

fomai, faatalanoaina e o latou epikopo ma peresitene o siteki, ma auina mai a latou talosaga faafaifeautalalai—na faia uma lava i totonu o aso e lima. E faitau afe isi ua auai faatasi ma i latou i le taimi nei. O se vavega lava.

Matou te faafetai mo le faatuatua ola o o tatou tuafafine, i le aofai faatupulaia o faifeautalalai mai atunuu i le salafa o le lalolagi, ma le aofai faateleina o ulugalii ua sauni e auuna atu. E lima sefuluvalu misiona fou ua faasilasila atu, ma ua maua nei e la tatou nofoaga autu mo le aoaoina o faifeautalalai i Provo lea ua matua faatumulua, sana soa fou i le Aai o Mekisiko [lea o le a faatu ai se isi MTC].

Sa saunoa mai Peresitene Thomas S. Monson e faapea: “E matua mamafa lava ia i tatou le poloaiga a le Faaola . . . ‘Ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Paia.’”¹¹ “O le a faaauau pea . . . ona agai i luma lenei galuega, o le suia ma le faamanuiaina o olaga. . . . E leai se malosiaga i le lalolagi atoa e mafai ona taofia le galuega a le Atua.”¹²

O loo tatou molimauina vavega a le Alii a o salalau atu Lana talalelei i le salafa o le lalolagi.

Uso e ma tuafafine, e pei lava ona mautinoa le musuiaina e le Alii o le toatele o faifeautalalai e auuna atu, o loo ia fagua foi mafaufau ma tatala loto o le toatele o tagata lelei ma faamaoni ia taliaina Ana faifeautalalai. Ua outou iloina i latou pe o le a iloina foi i latou. Latou te nonofo i o outou

aiga ma nonofo i o outou tuaoi. Latou te savavali ae ma pasia outou i luga o le alatele, tou te nonofo faatasi i aoga, ma outou fesootai i luga o le initoneti. O outou foi o se vavega taua o lenei vavega o loo tupu.

Afai e le o oe o se faifeautalalai faamisiona e i ai se pine faifeautalalai e faamau i lou pelaue, o le taimi la lenei e vali ai se pine i lou loto—ia vali e pei ona fai mai Paulo, “e le tusia i le vaitusi, a o le Agaga o le Atua soifua.”¹³ Ma ia te outou faifeautalalai ua foi mai, sue lau pine faifeautalalai tuai. Aua le faapipiina, ae ia tuu i se mea e mafai ona e iloa atu ai. Ua manaomia tele oe e le Alii i le taimi nei nai lo se isi lava taimi muamua e aveia ma Ona tufugaaa. E tofi i tatou uma ma se saofaga e faia i lenei vavega.

O loo mafaufau tagata amiotonu uma o le Ekalesia i auala e faasoa atu ai le talalelei. O nisi o se mea fua lava le faasoa atu o le talalelei, ma e mafai ona tatou aoa mai ia i latou.¹⁴ A o nisi o loo tauivi ma tuufesili pe faapefea ona faia ia lelei atili, ma moomoo ia maua e lona lagona tausala ina lea tatou te lagonaina i nisi taimi se isi mea e alu i ai.

O loo tatou manao e faasoa atu le talalelei tatou te tootutuli ai uma ai, ma e tatau, ona tatou te manaomia le fesoasoani a le Alii.

Ua talosaga mai Peresitene Monson ia tatou tatalo mo “na nofoaga o loo faatapulaaia ai la tatou uunaiga ma nofoaga e le o faatagaina ai i tatou e faasoa saoloto atu le talalelei.”¹⁵ A o tatou aioi faatasi atu ma le naunautai i loo tatou Tama i le Lagi, o le a faaauau pea ona tatala e le Alii ia faitotoa mo i tatou.

Tatou te tatalo foi mo o tatou lava avanoa e faasoa atu ai le talalelei. Na saunoa mai le Aposetolo o Peteru e faapea: “Ia saunia pea lava outou e tali atu ma le agamalua ma le mata’u ia



Sa faaipoipo i le Aso Faraile ma papatiso faatasi ai ma a latou fanau matutua i le Aso Toonai, na filifili ai nei ulugalii mai Mozambique e mulimuli i le Faaola, o Iesu Keriso.

i latou uma o e fesili mai . . . i le uiga o le faamoemoe o loo ia te outou.”¹⁶

Faatasi ai ma le fenumiai¹⁷ ma le vavao¹⁸ o le lalolagi i nei aso, e le o se mea faateia le faaitiitia pea o tagata e auai i o latou nofoaga o tapuaiga. E ui e toatele tagata e mananao ia latalata atili i le Atua ma ia malamalama atili i le faamoemoega o le olaga, ae o loo i ai lava a latou fesili e le o taliina. E toatele o loo i ai ni loto o loo tatala atu i le upumoni, ae e pei ona faamatala mai e le perofeta o Amosa, “latou te [taufetuli solo] e [saili] le afioga a Ieova, a e le maua.”¹⁹ E mafai ona e fesoasoani e tali a latou fesili. I a outou talanoaga i aso uma e mafai ona e faaopoopo atu i lo latou faatuatua ia Keriso.²⁰

Sa fetalai mai le Faaola: “Ia tuu i luga lo outou malamalama ina ia susulu atu i le lalolagi. Faauta o au o le malamalama lea e tatau ona outou tuu i luga.”²¹

Ou te folafola atu ia te outou, a o outou tatalo ia iloa po o ai e talanoa i ai, o le a oo atu i lou mafaufau ni igoa ma ni foliga. O upu e tautala atu o le a tuu atu i le taimi tonu lava e manaomia

ai.²² O le a tatala atu ia te outou ni avanoa. O le a faatoilalo e le faatuatua le masalosalo, ma o le a faamanuiaina oe e le Alii i ni vavega mo oe lava ia.

Na aoa mai e le Faaola ia i tatou le auala e faasoa atu ai le talalelei. Ou te fiafia i le tala ia Anetelea, lea na fesili, “Rapi e, o fea e te mau ai?”²³ Sa ono mafai ona tau atu e Iesu le nofoaga o afio ai o Ia. Ae nai lo lona na Ia fetalai atu ia Anetelea, “O mai ia, ina mata-mata.”²⁴ Ou te fia manatu faapea na fetalai atu le Faaola, “O mai ia ina vaai e le gata i le mea ou te nofo ai ae o le ala o loo ou ola ai. O mai ia ina vaai po o ai au. O mai ma lagonaina le Agaga.” Tatou te le iloina mea uma e uiga i lona aso, ae ua tatou iloa ina ua maua e Anetelea lona uso o Simona, na ia tautino i ai, “Ua ma maua . . . le Keriso.”²⁵

Ia i latou e faaalua se fiafia i a tatou talanoaga, e mafai ona tatou mulimuli i le faaitaiga a le Faaola e ala i le valaauliaina o i latou e “o mai ia, ina mata-mata.” O le a taliaina e nisi la tatou valaaulia, ae le taliaina e isi. Ua tatou iloina uma lava se tasi e tele ni taimi na valaaulia ai muamua, ua taliaina le valaaulia e “o mai ia, ina mata-mata.” Ia

tatou mafaufau foi ia i latou na tatou faatasi muamua ae ua seasea tatou toe vaaia, ia valaaulia i latou e toe foi mai ma toe vaai tasi lava.

Tatou te faaaloologiaina filifiliga ma le taimi a tagata taitoatasi. Na fetalai mai le Alii, “Ia tuu atu i tagata uma taitoatasi e filifili mo ia lava.”²⁶ O le lei o se fiafia mai o se tagata e le manao-mia ai ona faaitiitia a tatou sootaga o faigauo ma le alofa. Pe taliaina ni valaaulia pe lei a o outou valaauliaina isi e “o mai ina mata-mata,” o le a outou lagonaina lava le faamaoniga a le Alii ma, faatasi ai ma lona faamaoniga, e maua ai sina fuaataga faaopoopo o le faatuatua e faasoa atu ai pea lava pea o outou talitonuga.

Mo i latou o loo faaogaina le Initoneti ma telefoni feaveai, o loo i ai ni auala fou e valaaulia ai isi e “o mai ina mata-mata.” Ua tatou faia la tatou fefaasoaiga o lo tatou faatuatua i le initoneti ma se vaega sili atu o lo tatou olaga o aso uma. LDS.org, Mormon.org, Facebook, Twitter— o loo maua uma ai ia avanoa.

O le faasoaia atu o le talalelei, na amatalia ai e ni talavou i Boston ni nai

poloka (blogs).²⁷ O i latou na auai i le Ekalesia sa amata lo latou aoaoina i luga o le initoneti, na sosoo ai ma talanoaga ma faifeautalai. Sa fesoasoani foi lenei aafiaga i le autalavou e maua ai se faatuatua sili atu i le tala-talanoa patino ma le isi tagata e uiga i le talalelei. Sa fai mai se tasi o i latou: “E le o se galuega faafaifeautalai lenei. O se fiafiaga faafaifeautalai.”²⁸

Ua tatou au faatasi i lenei galuega. Faatasi ai ma uso a tagata o le uarota ma faifeautalai, ia tatou fuafua ma tatalo ma fesoasoania’i le tasi i le isi. Faamolemole ia mafaufau pea ma tatalo pea mo faifeautalai faamisiona. Ia faatuatuaina i latou i o outou aiga ma uo. E faatuatuaina i latou e le Alii ma valaauina i latou e aoao atu ma faamanuia i e e saili atu ia te Ia.

Na faasoa mai e Peresitene Paulo Kretly o le Misiona a Mozambique Maputo le aafiaga lenei: “E taatele lava i ulugalii i Mozambique le nonofo faatasi [e aunoa ma le faaipoipo ona] o le tu masani i Aferika e manaomia ai se meaalofo taugata e avatu e le tamaitai faaipoipo, o se meaalofo e le gafatia e le toatele o ulugalii.”²⁹

Sa mafaufau ma tatalo tagata o le Ekalesia ma faifeautalai i se auala e fesoasoani ai.

O le tali i a latou tatalo e faapea o le a latou faamamafaina le tulafono o le legavia ma le taua o le faaipoipo ma aiga e faavavau. Ma a latou fesoasoani atu i ulugalii ia salamo ma faaipoipo faaletulafono, o le a latou aoaoina le fiafia lea e na o le mulimuli lava ia Iesu Keriso e maua ai.

O le ata lenei o ni ulugalii mai ni aai eseese se lua i Mozambique. Sa faaipoipo i le Aso Faraile, ae papatiso-ina faatasi ma a latou fanau matutua i le Aso Toonai.³⁰ Sa valaaulia uo ma aiga e “o mai ina matamata,” ma e faitau selau na “o mai [ma] matamata.”

Na sosoo ai ma le papatisoga, sa

faapea mai se tasi tuafafine, “Sa manaomia ona matou filifili pe mulimuli i tu masani a o matou tama po o le mulimuli ia Iesu Keriso. Ua matou filifili e mulimuli ia Keriso.”³¹

Atonu tou te le nonofo i Mozambique, ae i la outou lava ala, i a outou lava aganuu, e mafai lava ona outou faasoa atu le talalelei toefuatai-ina a Iesu Keriso.

Tatalo atu i lou Tama Faalelagi. O Lana galuega paia lenei. O le a Ia taialaina outou i le mea e fai. O le a Ia tatalaina faitotoa, ma aveese ni papupuni, ma fesoasoani atu e faatoilalo ni faafitauli. Na tautino mai e le Alii, “O le leo o le lapataiga ua mo tagata uma, e ala atu i fofoga o o’u soo, . . . ma e leai se tasi o le a taofia i latou.”³²

Ou te molimau atu o “le siufofoga o le Alii [o le a] oo atu i tuluiga o le lalolagi, ina ia mafai ona faalogoina e i latou uma o e e fia faalogo.”³³ O se vavega lava. O se vavega lava. I le suafa o Iesu Keriso, amene. ■

FAAMATALAGA

1. Mataio 28:19.
2. Mareko 16:15.
3. Tagai Mataio 28:20; Mareko 16:17–18.
4. Galuega 2:14, 22–23, 32.
5. Mataupu Faavae ma Feagaiga 1:4.
6. Mataupu Faavae ma Feagaiga 58:64.
7. Tagai Mataupu Faavae ma Feagaiga 1:5.
8. Tagai *Aoaoga a Peresitene o le Ekalesia: Wilford Woodruff* (2004), 89–92.
9. Tagai 1 Nifae 14:12.
10. Tanielu 2:34–35.
11. Thomas S. Monson, “Susu Maia ma Talaaao Mai i le Konafesi,” *Liahona*, Me 2009, 5.
12. Thomas S. Monson, “A o Tatou toe Poto-poto Ai,” *Liahona*, Me 2012, 4.
13. 2 Korinito 3:3.
14. Tagai Clayton M. Christensen, *The Power of Everyday Missionaries: The What and How of Sharing the Gospel* (2013).
15. Thomas S. Monson, “Susu Maia ma Talaaao Mai i le Konafesi,” *Liahona*, Nov. 2009, 6.
16. 1 Peteru 3:15.
17. Na latou matauina upumoni ua loa ona toe faauigaina pe le amanaiaina; tagai Mataupu Faavae ma Feagaiga 1:16; tagai foi Mataupu Faavae ma Feagaiga 132:8.
18. Tagai Mataupu Faavae ma Feagaiga 45:26; 88:91.
19. Amosa 8:12.

20. Sa saunoa mai le Perofeta o Iosefa Samita: “O i ai i le Lotu Peresipiteriane ni upumoni? Ioe. O i ai i le Lotu Papatiso, Metotisi, ma isi ni upumoni? Ioe. . . . E tatou ona tatou aoina uma ni mataupu faavae lelei ma moni i le lalolagi ma teuina o ni oa” (*History of the Church*, 5:517). “Tatou te le fai atu i tagata e lafoa ese ni lelei o ia i latou . . . ; ae na ona tatou talosaga lava ia i latou e o mai ma avatu nisi mea sili atu. Ae faapefea pe a taliaina e le lalolagi uma lenei Talalelei? O le a latou vaai i le mata i le mata, ma o le a liligi mai i luga o tagata faamanuiaga a le Atua, ma o le mana-oga lea o lo’u loto atoa” (*Aoaoga a Peresitene o le Ekalesia: Iosefa Samita* [2007], 155). Sa saunoa mai Peresitene Gordon B. Hinckley e faapea: “Sei ou fai atu e faapea tatou te talisapaia upumoni o i ai i ekalesia uma ma le lelei o loo latou faia. Ia tau na ona tatou faapea atu i tagata, ia outou aumaia faatasi ma outou mea lelei uma ua ia te outou, ma tuu mai ia i matou e vaai pe mafai ona matou faaopoopo atu i ai. O le agaga lena o lenei galuega. O le ute lena o la tatou auauanga faafaifeautalai” (“Words of the Living Prophet,” *Liahona*, Ape. 1999, 19). “E tatou ona avea i tatou ma tagata tusaafia. E tatou ona tatou iloina le lelei i tagata uma. Tatou te lē o atu ma taufaaleaga i isi lotu. Tatou te talai atu ma aoao atu i se ala lelei ma mautu. Tatou te faapea atu i tagata o isi faatuatuaga, ‘ia outou aumaia faatasi ma outou mea lelei uma ua ia te outou, ma tuu mai ia i matou e vaai pe mafai ona matou faaopoopo atu i ai.’ O le ute moni lava lena o la tatou polokalama tele faafaifeautalai ma e fua mai ai taunuuga” (i “Messages of Inspiration from President Hinckley,” *Church News*, Nov. 7, 1998, 2; tagai ldschurchnews.com).
21. 3 Nifae 18:24.
22. Tagai Mataupu Faavae ma Feagaiga 84:85; 100:6.
23. Ioane 1:38.
24. Ioane 1:39.
25. Ioane 1:41.
26. Mataupu Faavae ma Feagaiga 37:4.
27. Tagai mo se faataitaiga, youngandmormon.com.
28. Talanoaga i le telefoni ma Jackson Haight i le aso 22 Mati, 2013.
29. Imeli patino mai ia Peresitene Paulo V. Kretly, 6 Mati, 2013.
30. O atapue na saunia e Peresitene Paulo V. Kretly. O le vaega muamua e mai Maputo; sa faaipoipo i le aso 30 Novema, 2012, ma papatisoina i le aso 1 Tesema, 2012. Ole vaega lona lua e mai Beira; sa faaipoipo i le aso 1 Mati, 2013, ma papatisoina i le aso 2 Mati, 2013.
31. Imeli patino mai ia Peresitene Paulo V. Kretly, 6 Mati, 2013.
32. Mataupu Faavae ma Feagaiga 1:4–5.
33. Mataupu Faavae ma Feagaiga 1:11.



Saunia e Rosemary M. Wixom
Peresitene Aoao o le Peraimeri

O Upu Tatou Te Tautatala Ai

O le auala tatou te talanoa atu ai i a tatou fanau ma upu tatou te faaaogaina e mafai ona uunaia ai ma musuia ai i latou ma faamalolosa ai o latou faatuatua.

Na iloaina talu ai nei e se tamā talavou le maliu o lona faiaoga uiga ese o le vasega lua. I lona manatuaina ai o ia, sa ia tusia ai: “Mai lagona uma ma aafiaga ou te manatuaina, o le lagona e sili ona ou mafaufau i ai o le ‘mafanafana.’ Atonu sa ia aoaoina au i le sipela, o le kalama, ma le numera, ae o le mea e sili ona taua sa ia aoaoina ai au o le fiafia i le aveia ai ma se tamaitiiti. I totonu o lona potuaoga, sa leai se afaina o le sese o le sipelaina o se upu i lea taimi ma lea taimi; ‘Ta galulue i ai’, o lana tala lea. Sa leai se afaina o le masaa o ni mea pe masae pe valivalia foi; ‘Tatou galulue e faaleleia ma faamama,’ o lana tali mai lea. E leai se afaina o le taumafai, o le lūiina o i tatou lava, o le moemiti, ma e leai se afaina o le fiafia i mea e le taua lea na o tamaiti lava e fiafia i ai.”

O se tasi o aafiaga sili e mauaina e se tagata i lenei lalolagi o le uunaia lea o se tamaitiiti. O talitonuga ma le faatauaina o le tagata lava ia e vave ona foafoaina i olaga o tamaiti. Soo se tagata lava o loo lagonaina mai lou leo ua i ai le mana e faateleina ai le talitonuga o se tamaitiiti ia te ia lava ma faateleina lona faatuatua i le Tama

Faalelagi ma Iesu Keriso e ala i upu latou te tautatala ai.

I le Helamana, mataupu e 5 tatou te faitau ai, “Ma o lenei, ou atalii e, ia manatua, ia manatua o luga lava o le papa o lo tatou Togiola, o le o Keriso lea, le Alo o le Atua, e ao ina oulua atinae ai lo oulua faavae.”¹

O upu nei a Helamana na aoao ai ona atalii. Ma tatou te faaauau pea ona faitauina: “Ma sa laua manatua ana upu; ma . . . na laua o atu ai . . . e aoao atu le afioga a le Atua i totonu o tagata uma.”²

E ui lava na sauaina ma lafoina ia atalii o Helamana i le falepuipui, ae e lei aveesea mai lava ia i laua na upu sa la faalogo i ai. Na puipuia ma

siosiomia i laua e se afi faaniutu. Ona oo mai ai lea o se siufofoga, ua fetalai mai i e na faapagotaina i laua:

“Ta outou salamo ia, ia outou salamo ia, ma aua tou te toe saili e faaumatia au auauna. . . .

“ . . . Sa le o se leo o le faititili, pe o se leo foi o se vavao tele, ae faauta, o se siufofoga filemu o le fimalie atoatoa, sa peiseai o se musumusū, ma sa ati e oo atu i totonu lava o le agaga.”³

E mafai ona tatou aoao mai lena siufofoga faalelagi. Sa lei leotele, otegia, pe faamaasiasiina; sa avea o se siufofoga filemu o le fimalie atoatoa, na aumaia se faatonuga mausali, faapea ma se faamoemoe.

O le auala tatou te talanoa atu ai i a tatou fanau ma upu tatou te faaaogaina e mafai ona uunaia ai ma musuia ai i latou ma faamalolosa ai o latou faatuatua ina ia tumau ai i le ala e toe foi atu ai i le Tama Faalelagi. Ua latou o mai saunia i lenei lalolagi e faalogologo.

O se faaitaiga o se tamaitiiti na faalogologo na tupu i se faleoloa e faatau ai ie. Na faatumulia le faleoloa i tagata faatau ae ua tetei tagata i le iloaina o loo i ai se tina popole ua leiloa lana tama tama laitiiti. I le taimi muamua, sa ia valaauina lona igoa. “Connor,” o lana valaau lea ma savali faatopetope i totonu o le faleoloa. Ao faagasolo pea le taimi, sa amata ona





leotele lona leo ma ua i ai le popole. Na vave ona faailoa atu i leoleo o le faleoloa ma sa aofia uma ia tagata sa i le faleoloa i le sailiga o le tamaitiiti. Na mavae se taimi umi peitai e lei manuia le sailiga. Na matauina le popole tele o le tina o Connor ma sa ia tauvalaau i taimi uma lona igoa.

Sa i ai se tasi o tagata, ina ua uma ona faia sana tatalo le leoa, sa ia mafau-fau e masalo ua fefe o ia i le faalogo mai i le tauvalaau leotele o lona igoa e lona tina. Sa ia tau atu lenei mea i se isi tamaitai na aofia foi i le sailiga, ma sa la faia faatopetope se fuafuaga. Sa la savavali i va o laulau o ie ma fai soo atu ma le lemu ia upu nei, “Connor, afai o e faalogo mai i lou leo, fai mai, ‘O au lenei.’” A o la savavali lemu agai i le pito i tua o le faleoloa ma toe fai atu lea fuaiupu, na mautinoa lava, sa la faalogoina se leo fefe ma le filemu o fai mai, “O au lenei.” Sa lafi Connor i le va o taaiga ie i lalo o se laulau. O se leo o le filemu ma le toafimalie atoatoa lea na uunaia Connor ina ia tali mai.

Tatalo ina ia Silafia Manaoga o se Tamaitiiti

Ina ia talanoa atu i le loto o se tamaitiiti, e tatau ona tatou iloina manaoga o se tamaitiiti. Afai tatou te tatalo ina ia iloa na manaoga, o upu tonu lava ia o loo tatou tautatala ai o le a i ai le mana e aapa atu ai i o latou loto. O le a faalateleina o tatou taumafaiga pe a tatou sailia le taitaiga a le Agaga Paia. Na fetalai mai le Alii:

“Tautala atu mafaufauga o le a Ou tuu i o oulua loto, . . .

“Aua o le a tuu atu ia te oulua i le itula tonu lava, ioe, i le minute tonu lava, mea e te lua fai atu ai.”⁴

Aluese mai ma Faalogo atu ma le Alofa

Ae paga lea, o le tele o faatosinaga o lenei lalolagi ua taofia ai le tele o fanau mai le faalogo atu i upu faamaalosiua lea e mafai ona mamanuina ai o latou vaaiga ia i latou lava.

O Dr. Neal Halfon, o se fomai tipitipi e taitaiina le Nofoaga Autu a le UCLA mo Tamaiti, Aiga, ma Alalafaga Malolosi, e faasino i le “matua e faia ni mea lelei ae ua le amanaia ai le fanau.” O se tasi o faataitaiga e aofia ai se pepe e 18 masina le matua ma ona matua:

“Sa foliga fiafia lava le la tama, e ulavale ma sa manino lava le fiafia i le mauaina o se taimi e aai pizza ai ma ona matua. . . . I le faaiuga o le taumafataga, sa tu i luga Tina e fai ana feau, ae ua tuu atu le tausiga i le Tama.’

“Sa amata . . . e Tama ona faitau ana tesi mai le telefoni ao taumafai le tamaitiiti e faagauai mai o ia e ala i le tau’ai solo o fasi pizza. Sa tuuese e Tama le telefoni, ae faasaga atu i le tamaitiiti ma la taaalo. E ui i lea, e lei leva ae sui i le matamata ma lona atalii i se ata vitio i lana telefoni, seia toe foi mai lona toalua.

“Sa matau e [Dr.] Halfon se mouese atu o le malamalama o i totonu o le tamaitiiti, ma le tuuititia o le fesootaiga i le va o matua ma le tamaitiiti.”⁵

O le tali i a tatou tatalo e uiga i le auala e fetai ai ma manaoga o a tatou fanau, atonu ia faatele se taimi e aluese ai mai mea faatekinolosi. E mouese atu ia taimi taua o avanoa e fegalealeai ai ma talatalanoa ai ma a tatou fanau pe a tatou pisi i mea faasalavei. Ae a pe a filifili se taimi i aso taitasi e aluese mai ai i mea faatekinolosi ae fesootai atu i le tasi ma le isi? Na o le tape lava o mea uma. A e faia lea mea, o le a foliga filemu lou fale i le taimi mua-mua; atonu foi o le a e leiloaina po o le a se mea e fai po o se tala e fai atu. A o e tuuina atu atoa lou mafaufau i lau fanau, o le a amatalia se talanoaga ma o le a e fiafia e faalogologo atu i isi.

Tusi atu e Faatauana a Tatou Fanau

E mafai foi ona tatou uunaia a tatou fanau e ala i upu tatou te tusi atu ia i latou. Na tusia e Nifae, “Ona ua matou galulue maelega e tusia nei mea, e faatauana atu ai ia matou fanau . . . ia talitonu ia Keriso, ma ia faalelei ma le Atua.”⁶

Na faasoa mai e Peresitene Thomas S. Monson se aafiaga e uiga ia Jay Hess, o se avevaalele lea na fanaina i lalo i Viatename Matu i le vaitau o le 1960. “E lua tausaga e le o iloa e lona aiga pe ua maliu o ia pe o soifua foi. Sa iu ina faatagaina o ia e i latou na faapagotaina o ia, e tusi i lona aiga, ae ia i lalo ifo o le 25 upu lana feau.” Na fesili atu Peresitene Monson: “Mata o le a se mea e te fai atu ai ma ou fai atu ai i o tatou aiga pe a na faapea o tatou i ai i lena lava tulaga—ua silia ma le lua tausaga e le o fevaaiia’i, ma e le mailoa foi pe toe fevaaiia’i? O le manao ina ia tau atu i lona aiga se mea e mafai ai ona latou iloa o se feau mai ia te ia, ma le manao foi ina ia tuu atu ia i latou se fautuaga taua, na tusia ai e Uso Hess [ia upu nei]: ‘O mea nei e taua: faaipogoga i le malumalu, misiona, kolisi. Fetuleni atu i luma, faatutu ni sini, tusi

talafaasolopito, tapue taifaalua ata i le tausaga.’”⁷

O a ni upu o le a e tusia i lau fanau pe afai e 25 upu pe itiiti ifo foi?

O le tamā talavou lea na taua muamua, lea na tusi e uiga i mea na te manatuaina e uiga i lona faiaoga o le vasega lua, o loo tausia nei se pepe teine aulelei. Ua ia lagonaina se faatua-tuaina faalelagi ua tuuina atu ia te ia. A oo ina matua o ia, o le a sona lumanai? O le a sana tala e fai atu o le a goto ifo i totonu o lona loto? O a upu o le a uunaia ai o ia, siitia ai, ma fesoasoani ia te ia ina ia tumau ai i le ala? Mata o le a se eseese o le a i ai pe a ia faaaluina se taimi e musumusu atu ai, “O oe o se afafine o le Atua”? Mata o le a ia manatuaina i se aso le fai soo atu e lona tama o upu ia, “Ou te fiafia i mea uma lava e uiga ia te oe”?

Pe le o le mea ea lona fetalai mai ai lo tatou Tama Faalelagi i Lona Alo faapea foi ma i tatou uma ina ua Ia fetalai mai, “O Lou Atalii pele lona ona faaopopo mai lea, “ua ou fiafia lava ia te ia”?”⁸

Tau ina ia atagia mai i upu o loo tatou tautatala ai ma tusiina i a tatou fanau le alofa o lo tatou Tama Faalelagi mo Lona Alo o Iesu Keriso, faapea ma i tatou. Ia tatou tutu ma faalogologo atu, aua o le tamaitiiti ua sili atu ona mafai ona talanoa mai i mea e sili ona maoae ma ofoofogia. Ou te fai atu nei upu i le suafa o Iesu Keriso, amene. ■

FAAMATALAGA

1. Helamana 5:12.
2. Helamana 5:14; faaopopo le faamamafa.
3. Helamana 5:29–30.
4. Mataupu Faavae ma Feagaiga 100:5–6.
5. Lois M. Collins, “Baby’s Development Potentially Harmed by Parents Texting,” *Deseret News*, June 4, 2012. deseretnews.com/article/print/865556895/Babys-development-potentially-harmed-by-parents-texting.html.
6. 2 Nifae 25:23.
7. Thomas S. Monson, “Mauaina o le Olioli i le Faigamalaga,” *Liahona*, Nov. 2008, 86.
8. Mataio 3:17.



Saunia e Elder L. Whitney Clayton

○ Le Au Peresitene o Fitugafulu

Faaipoipoga: Matau ma Aoa

Ua tuuina atu folafolaga a le Alii ia i latou uma o ē mulimuli i le mamanu o le olaga e fausia i sootaga o faaipoipoga fiafia, ma le paia.

I se tasi afiafi i le tele o tausaga ua mavae, sa ma asiasi ai ma lo’u toalua i le fale o se tasi o o’u atalii ma lona toalua ma le fanau matou te fai ‘aiga i le afiafi. O se mea masani mo se aiga e i ai fanau laiti: sa pisapisao ma sa tele foi mea malie. Ina ua uma le meaai, sa ma nonofo ai lava i le laulau ma le afafine o lo’u atalii, e fa tausaga o Anna. Ina ua ia iloina ua na o ia lea ou te āno atu i ai, sa tusa’o o ia i luga o se nofoa ma pupula sa’o mai ia te au. Ina ua ia mautinoa o la ou te tilotilo atu ia te ia, sa ia faatonuina lelei lava au e “matau ma aoa.” Ona siva lea o ia ma usu mai se pese mo au.

O le faatonuga a Anna ia “matau ma aoa” sa atamai mai le gutu o se tama meamea. E mafai ona tatou aoa mea e tele e ala i le matau ona mafafau lea i mea sa tatou vaaia ma lagonaina. O le mafafau la i lona mea, sei ou faasoa atu ai ni nai mataupu faavae sa ou matauina e ala i le tilotilo ma aoa mai i faaipoipoga matagofie, faamaoni. O nei mataupu faavae e fausia ai faaipoipoga malolosi, ma faamalieloto ia e ogatusa ma mataupu faavae faalelagi. Ou te valaaulia outou e matau ma tatou aoa faatasi.

Muamua, sa ou matauina, i faaipoipoga e aupito sili ona fiafia, e mafafau le tane ma le ava i la la’ua sootaga, o se penina tautele, o se oa e le mafai e tupe ona faatau. La te taufai tuua o la tama ma tina, ae sagai atu faatasi e fausia se faaipoipoga o le a manuia mo le faavavau. Ua la malamalama e la te savavali i se ala ua faauuina mai le lagi. Ua la iloa e leai lava se isi sootaga o soo se ituaiga e mafai ona maua ai le fiafiaga tele, e fua mai ai mea lelei e tele, pe aumaia ai le faaleleia tele faaletagata. Matau ma aoa: o ulugalii faaipoipo e aupito sili e mafafau i a latou faaipoipoga o ni penina tautele.

O le isi, faatuatua. O faaipoipoga faamanuiaina e faavavau e fausia i luga o le faavae o le faatuatua i le Alii o Iesu Keriso ma le usiuitai i Ona aoaoga.¹ Ua ou matauina o ulugalii e matuai faatauina a latou faaipoipoga, o loo ola i mamanu o le faatuatua: e o i sauniga faamanatuga ma isi sauniga i vaiaso uma, e fai afiafi faaleaiga, tatalo ma suesue faatasi ia tusitusiga paia ma suesue foi e le tagata lava ia, ma totogi ma le faamaoni ia sefuluai. O la latou lava naunautaiga masani o le usiuitai ma ia lelei. Latou te le mafafau i poloaiga



faapea o se taumafataga e te pule ai lava oe po o le a le mea e piki mai ma filifili na o mea e tosina i le vaai.

O le faatuatua o le faavae o amio-mama uma e faamalosia ai le faaiipo-poga. O le faamalosia o le faatuatua e faamalosia ai faaiipoipoga. E tupu le faatuatua pe a tatou tausia poloaiga. E faatupulaia le faatuatua pe a tatou tausia poloaiga ma ola fealofani ma olioli i le faaiipoipoga. O le mea lea, o le tausia o poloaiga e taua i le faavae-ina o faaiipoipoga malolosi e faavavau. Matau ma aoao: faatuatua i le Alii o Iesu Keriso o le faavae lea o faaiipoipoga fiafia e faavavau.

Tolu, salamo. Ua ou iloina o faaiipoipoga fiafia e faalagolago i le meaalofa o le salamo, o se elemene taua i sootaga lelei uma faalelulugalii. O taitoalua e faia e le aunoa se suesuega faamaoni o ia lava ma faatino loa lava ia laasaga e moomia e salamo ma faaleleia, e maua se pulupasama faamalolo i a latou faaiipoipoga. E fesoasoani le salamo e toefuatai ma faatumauina le felagolagomai ma le filemu.

O le lotomauualalo o le ute lea o le salamo. O le lotomauualalo e le manatu faapito, e le faaloloto. Na te le faumalo i se mea pe tautala ma le faasausili faapea e sili atu lona lelei. Ae, o le lotomauualalo e tali filemu² ma faalogo atu ma le agalelei mo le malamalamaaga, ae le o le faatiga. O le lotomauualalo e iloa e leai lava se tasi e mafai ona

suia se isi, ae faatasi ai ma le faatuatua, taumafaiga, ma le fesoasoani a le Atua, e mafai ai ona *tatou* lagonaina o *tatou lava* suiga tele o le loto.³ O le lagona-ina o le suiga tele o le loto e afua ai ona tatou taulimaina isi ma le agamalu⁴, aemaise lava o o tatou toalua. O le lotomauualalo o lona uiga e taufai saili ia tane ma ava e faamanuia, fesoasoani, ma si'i ae e le tasi le isi, e faamuamua e le tasi le isi i faaiuga uma. Matau ma aoao: o le salamo ma le lotomauualalo e fausia ai faaiipoipoga fiafia.

Fa, faaaloalo. Ua ou matauina e faapea i faaiipoipoga matagofie, ma fiafia, o tane ma ava e taulimaina e le tasi le isi o se paaga tutusa. O faiga mai se isi nofoaga po o se isi taimi e pule malosi ai tane i ava pe faia i latou i soo se auala e pei o ni paaga e vaai mauualalo i ai i faaiipoipoga, e le o ogatasi lea ma le tulafono faalelagi ma e tatau ona suia i mataupu faavae ma mamana sa'o o le amio.

O tane ma ava e lelei tele faaiipoipoga latou te faia faaiuga i le agaga autasi, e tofua faasoa uma le toalua o i la'ua ma e aia tutusa i o la manatu e fai ai faaiuga.⁵ La te taulai muamua lava i le aiga ma fesoasoania'i e tausoa faatasi o la tiutetauave.⁶ O le la faaiipoipoga e faavae i luga o le galulue faatasi ae le o le feutagai. O le taimi o la latou taumafataga i le afiafi ma le taimi faaleaiga e sosoo ai, e avea ma vaega aupito taua o lo latou aso ma le mea

na sili ona aoga i ai a latou taumafaiga silisili. E tapē a latou masini eletionika ma faapasi faafiafiaga mo le tagata lava ia, ina ia mafai ai ona fesoasoani i tiute i le fale. O le tele e mafai ai, latou te faitau atu ia latou fanau i po uma ma e taufai fesoasoani uma i la'ua e faamomoe tamaiti laiti. La te malolo faatasi foi. A mafai i o latou tiute ma tulaga, e galulue vaavaalua tane ma ava i le faia o galuega e aupito sili ona taua o i ai—le galuega tatou te faia i o tatou lava aiga.

A i ai le faaaloalo, e malamalama ma manino mea uma, o se elemene autu lea o faaiipoipoga fiafia. E leai ni mea faalilolilo i mataupu talafeagai i faaiipoipoga e faavae i le taufai faaaloalo ma malamalama ma manino mea uma. E fai faatasi e tane ma ava ia faaiuga e uiga i mea tautupe, ma e taufai maua foi e i la'ua ia faamatala-laga uma.


O le faamaoni a'ia'i o se uiga o le faaaloalo. Ua aoao mai perofeta e faapea o paaga faaiipoipo faamanuiaina e “matuai faamaoni a'ia'i” lava le tasi i le isi.⁷ Latou te faamautinoa e agavaa atoatoa i soo se itu i le faaagaina o ala o faasalalauga. Latou te le faatagaina lava e faia ni mea faalilolilo i le initoneti. E le nanaina e le tasi mai le isi a la'ua uputatala i upega fesooteai faaagafesooteai. La te le tilotilo lava i talaaga o se tasi i upega tafailagi i soo se itu e ono faalataina ai le faatuatuaga paia o lona toalua. La te le faia lava pe tautala foi i se mea e atagia mai ai le lē mafaufau, pe na ona faaōlioli pe na tino mai foi. Matau ma aoao: o faaiipoipoga maoae e matuai faaaloalo, malamalama ma manino mea uma, ma faamaoni a'ia'i.

Lima, alofa. O faaiipoipoga e aupito fiafia ua ou vaai i ai, e suluaia mai ai le usiuitai i se tasi o poloaiga aupito fiafia—ia tatou “nonofo faatasi i le alofa.”⁸ I le fetalaiga i tane, na poloai

mai ai le Alii, “Ia e alofa i lau ava ma lou loto atoa, ma ia e pipii atu ia te ia ae le o se isi.”⁹ Ua aoao mai e se tusitaulima a le Ekalesia: “O le upu *pipii* o lona uiga ia matua tuuto atoatoa atu ma faamaoni i se tasi. O ulugalii faaipoipo e pipii atu i le Atua ma le tasi i le isi e ala i le tautua ma le alofa ole tasi i le isi e ala ile tausia o feagaiga i le faamaoni atoatoa o le tasi i le isi faapea foi i le Atua.” O le tane ma le ava e tuua o latou olaga nofofua ae amatalia a latou faaipoipoga e avea ma [a latou] uluai faamuamua. . . . Latou te le faatagaina lava se isi tagata po o se mea e fiafia i ai, ia sili a’e se faamuamua i o latou olaga nai lo le tausia o feagaiga ua latou osia ma le Atua faapea foi le tasi i le isi.”¹⁰ Matau ma aoao: o ulugalii faamanuiaina e alofa le tasi i le isi i le tuuto atoatoa.

E i ai tagata e le matuai fiafia a latou faaipoipoga e pei ona latou moomoo i ai, o ē foi e lei faaipoipo lava, o ē ua tete’a, o matua nofotoatasi, pe ona o mafuaaga eseese e le o i ai se tulaga e faaipoipo ai. O nei tulaga e mafai ona tumu i luitau ma le lotonutimomoia, ae e le tatau ona faavavau. Ia te outou na o i ai i na tulaga, ae o loo “faia ma le fiafia mea uma ua i ai i lo [outou] mana”¹¹ e faasaoina ai, ia faamanuia tele atu le Atua. Saili i le mamau sili o le faia o se faaipoipoga e faavavau, e aofia ai ma le taumafai po o le tapenapena ia avea o se toalua agavaa. Tausi poloaiga ma faalagolago i le Alii ma Lona alofa atoa mo oe. E i ai se aso o le a avea ai mo oe ia faamanuiaga uma ua folafolaina e faatatau i faaipoipoga.¹²

O se tasi o fuaiupu aupito manaia i le Tusi a Mamona o loo fai mai, “Ma sa latou faaipoipo, ma tuu atu ia faaipoipo, ma faamanuiaina e tusa ma le tele o folafolaga na faia e le Alii ia te i latou.”¹³ Ua tuuina atu folafolaga a le Alii ia i latou uma o ē mulimuli i le



mamau o le olaga e fausia i sootaga o faaipoipoga fiafia, ma le paia. E oo mai ia faamanuiaga o ni taunuuga matagofie, faamoemoeina o le ola faamaoni ai i le talalelei a Iesu Keriso.

Ou te faafetai i lo’u toalua ofoofogia o Kathy, o ia o le ua sili ona ou alofa i ai i lo’u olaga atoa.

O le faaipoipoga o se meaalofo mai le Atua ia i tatou; o le uiga auauumama o a tatou faaipoipoga o se meaalofo mai ia i tatou ia te Ia. Ou te molimau atu i le fuafuaga ofoofogia a lo tatou Tama Faalelagi alofa, lea ua saunia ai le avanoa mo faaipoipoga ofoofogia e faavavau. I le suafa o Iesu Keriso, amene. ■

FAAMATALAGA

1. Tagai “O Le Aiga: O Se Folafolaga i le Lalolagi,” *Liahona*, Nov. 2010, 129.
2. Tagai Faataoto 15:1.
3. Tagai Alema 5:11–12, 26–31.
4. Tagai Moronae 7:43–48; 8:25–26.
5. Tagai Mataupu Faavae ma Feagaiga 107:27–31.
6. Tagai “O Le Aiga: O Se Folafolaga i le Lalolagi,” 129.
7. Tagai Thomas S. Monson, “O Le Mana o le Perisitua,” *Liahona*, Me 2011, 68; Gordon B. Hinckley, “Life’s Obligations,” *Liahona*, Me 1999, 4.
8. Mataupu Faavae ma Feagaiga 42:45.
9. Mataupu Faavae ma Feagaiga 42:22.
10. *Tusitaulima 2: Taitaiina o le Ekalesia* (2010), 1.3.1.
11. Mataupu Faavae ma Feagaiga 123:71.
12. Tagai *Tusitaulima 2*, 1.3.3.
13. 4 Nifae 1:11.



Saunia e Elder L. Tom Perry

○ Le Korama a Aposetolo e Toasefululua

O Le Usiusitai i Tulafono o le Saolotoga Lea

Ua maua e alii ma tamaitai o latou faitalia o se meaalofo mai le Atua, ae o lo latou saolotoga ma, o se taunuuga, o lo latou fiafia e faavavau e maua mai i le usiusitai i Ana tulafono.

Sa ou mauaina se meaalofo faapitoa i le Kerisimasi talu ai sa faapea ona aumaia ai ma le tele o mea e manatua. Sa aumai mai le tama teine a lo'u tuafafine. Sa i ai faatasi [le tusi] ma ni mea sa ou tuua i le fale tuai o le matou aiga ina ua ou siitia ese ina ua uma ona ou faaiipoipo. O le meaalofo o si tamai tusi enaena lenei ua ou tauli-maina. O se tusi sa tuuina mai i fitafita o le AAG o e sa ulufale atu i vaegaau i le taimi o le Taua Lona II a le Lalolagi. Sa ou manatu a'u lava o le tusi, o se meaalofo mai ia Peresitene Heber J. Grant ma ona fesoasoani o J. Reuben Clark Jr. ma David O. McKay.

I le pito i luma o le tusi, sa tusia ai e nei perofeta e toatolu a le Atua: "O mea e tutupu i auaunaga i vaegaau e le faatagaina ai lo matou fesootai patino atu ia te outou i taimi uma, pe tuusa'o pe e ala foi i se tasi e fai ma sui. O le isi a matou auala lelei e sosoo ai o le tuu atu i o outou lima ni na vaega o faaaliga i onaponei ma faamalamalama o mataupu faavae o le

Talalelei lea o le a aumaia ia te outou, po o fea lava tou te i ai, le faamoemoe ma le faatuatua faafouina, faapea foi ma le toamalie, faamafanafanaga, ma le toafilemu o le agaga."¹

O le asō ua tatou oo ai i se isi taua. E le o se taua ma ni auupega o le taua. Ae o se taua o mafaufauga, upu, ma faatinoga. O se taua ma le agasala, ma ua sili atu nai lo o se isi lava taimi, lo tatou manaomia o le faamanatu mai o poloaiga. O le faalelalolagi ua avea ma faiga masani, ma o le tele o ona talitounuga ma faiga ua matuai feteenai tonu lava ma mea sa faataunuaina e le Alii lava Ia mo le manuia o Ana fanau.

I totonu o lenei tamaitusi enaena, e sosoo mai lava ma le tusi mai le Au Peresitene Sili, o loo i ai se "Folasaga Amata i Alii i le Vaegaau," e faaautuina "O Le Usiusitai i le Tulafono O Le Saolotoga Lea." O le faamatalaga o loo faia ai se faatusatusaga i le va o tulafono a le militeli, lea e "mo le manuia o i latou uma o e o loo i le auaunaga," ma le tulafono faalelagi.

O loo faamatala mai, "I le atulaulau foi, lea e taitai ai le Atua, e i ai tulafono—tulafono aoao . . . faavavau—faatasi ma ni faamanuiaga faapitoa ma ni faasalaga e le masuia."

O upu faaii o le faamatalaga e taulai atu i le usiusitai i tulafono a le Atua: "Afai e te manao e te toe foi mai i e pele ia te oe ma lou ulu e ea i luga, . . . afai e te manao ia avea oe ma se tamalii ma ola fiafia—ia usitai i tulafono a le Atua. O le faia o lena mea, e mafai ona e faateleina ai na saolotoga taua lea o loo e tauivi e faasaosao, o le isi saolotoga lea e faalagolago tele i ai isi, saoloto mai le agasala; aua e moni 'o le usiusitai i le tulafono o le saolotoga lea.'"²

Aisea na fetau lelei ai ia te au i lena taimi le fuaitau "o le usiusitai i tulafono o le saolotoga lea"? Aisea ua fetau lelei ai ia i tatou i le taimi nei?

Atonu ona ua ia i tatou se malamalama na faaaliga mai e uiga i le talaaga o lo tatou muai olaga. Ua tatou iloa ina ua folasia mai e le Atua le Tama e Faavavau Lana fuafuaga ia i tatou i le amataga o taimi, sa manao Satani e sui le fuafuaga. Na fai mai o ia o le a ia faaola tagata uma. O le a leai se tagata e toatasi e se ese, ma sa talitonu lava Satani e mafai ona ia faataunuaina lana fautuaga. Peitai sa i ai se tau le talafeagai—o le faatamaiaina o le faitalia o le tagata, lea sa, ma o se meaalofo na tuuina mai e le Atua (tagai i le Mose 4:1–3). E faatatau i lenei meaalofo na saunoa ai Peresitene Harold B. Lee, "E sosoo atu i le ola lava ia, o le filifiliga saoloto o le meaalofo sili a le Atua i tagata."³ O lea la, sa le o se mea faatauvaa ia Satani le lafoaia o le faitalia o le tagata. O le mea moni, sa oo ina avea ma faaaitaui autu lea na mafua ai ona tupu le Taua i le Lagi. O le manumalo i le Taua i le Lagi sa o se manumalo mo le faitalia o le tagata.

Ae peitai, sa le gata ai iina faiga a Satani. O lana fuafuaga faaleoleo—o le fuafuaga lea sa ia faaaogaina talu mai le taimi o Atamu ma Eva—o le faaoso o alii ma tamaitai, ia faamaonia moni lea tatou te le agavaa mo le meaalofa ua tuuina mai e le Atua o le faitalia. E tele mafuaaga e fai ai e Satani mea o loo ia faia. Atonu o le mafuaaga aupito malosi lava o le faamoemoega o le tauimasui, ae e manao foi o ia ia faanoanoa alii ma tamaitai e pei o lona lava foi faanoanoa. E leai se tasi o tatau e tatau ona manatu faatauvaa i le matuai naunau o Satani ia manuia. O lana tiute i le fuafuaga paia a le Atua o le faatupuina “o le faafeagai o mea uma” (2 Nifae 2:11) ma su’e lo tatou faitalia. O filifiliga taitasi e te faia ma ou faia o se suega o lo tatou faitalia—pe tatou te filifili e usiusitai pe le usiusitai i poloaiga a le Atua, o se filifiliga moni lea i le va o le “saolotoga ma le ola e faavavau” ma le “faatagataotauaina ma le oti.”

O lenei aoaoga faavae taua ua manino le aoaoina mai i le 2 Nifae, le mataupu lona lua: “O le mea lea, ua saoloto tagata e tusa ma la le tino; ma ua tuuina mai ia te i latou mea uma e tatau aim o le tagata. Ma ua latou saoloto e filifili le saolotoga ma le ola e faavavau, e ala i le Puluvaiga sili o tagata uma, pe filifili le faatagataotauaina ma le oti, e tusa ma le faatagataotauaina ma le manao le tiapolo; ona ua saili o ia ia pagatia tagata uma e pei o ia lava” (2 Nifae 2:27).

I le tele o itu, o taimi uma lava na tau ai lenei lalolagi. Ou te talitonu ina ua auina mai e le Au Peresitene Sili la’u tamaitusi enaena, sa sili atu lo latou popole i se taua e sili atu le faigata nai lo o le Taua Lona II a le lalolagi. Ou te talitonu foi sa latou faamoemoe o le a avea le tusi ma talipupuni o le faatuatua e faasagatau atu ia Satani ma ana au i lenei taua



faigata atu—o le taua e tetee atu i le agasala—ma avea o se faamanatu ia te a’u ia ou ola i poloaiga a le Atua.

O le auala e tasi tatou te faia ai se tatou lava iloiloga ma faatusatusa i tatou i augatupulaga na muamua atu, e ala lea i se tasi o tulaga faatauaaina aupito leva e iloaina e tagata—o Tulafono e Sefulu. Mo le toatele o le lalolagi malamalama, ae maise lava i le lalolagi sa Iuta ma le faaKerisiano, o Tulafono e Sefulu ua avea ma tuaoi aupito taliaina ma leva i le va o le lelei ma le leaga.

I la’u faamasinoga, e fa tulafono o Tulafono e Sefulu ua sili atu ona tausia lelei i aso nei nai lo se isi lava taimi. I le avea ai ma se agamasani, ua tatou inoino ai ma tausialaina le fasioti tagata, gaoi, pepelo, ma o loo tatou talitonu pea i le matafaioi a le fanau i o latou matua.

Ae i le avea ai o se faapotopotoga lautele, ua fai ma a tatou masani le le amanaia o isi tulafono e ono:

- Afai o ni faailoga le faamuamua o mea o le lalolagi, ua mautinoa le i ai o “isi atua” ua tatou faamuamua i lo o le Atua moni.
- Ua tatou faia tupua o tagata lauiloa, o sitali o le olaga, o tamaoiga, ma ioe, o nisi taimi o tupua ua ta po o mea faitino.

- Tatou te faaaoga le suafa o le Atua i ituaiga uma o gagana faatufanua, e aofia ai a tatou faaumuumu ma a tatou palalauvale.
- Tatou te faaaoga le aso Sapati mo a tatou taaloga faitaulia, o tatou gaoioiga faafiafia sili ona taua, a tatou faatauga sili ona mamafa, ma o le mea moni o mea uma lava vagana ai tapuaiga.
- Tatou te faia mafutaga faalefeusu-aiga i fafo atu o le faaipoipoga o ni mea faatafaoga ma faataaloga.
- Ma o le manao ua avea ma se mea ua taatele i le olaga. (Tagai i le Esoto 20:3–17.)

Ua le aunoa ona lapatai mai perofeta mai tisipenisione uma e faatatau i le solia o tulafono e lua o tulafono e sili ona taua—o tulafono e faataatau i le fasioti tagata ma le mulilua. Ua ou vaaia se faavae tutusa mo nei poloaiga taua e lua—o le talitonuga e faapea o le ola lava ia o le aia a le Atua ma o tatou tino faaletino, o malumalu o le ola i le olaga nei, e tatau ona foafoaina i totonu o tulaga ua faatulagaina e le Atua. O le suia e le tagata i ana lava tulafono o tulafono a le Atua e uiga i le foafoaina ma le aveesea o le ola, o le faataitaiga aupito matautia lea, o matematega ma le loloto o le agasala.



O aafiaga sili lava o nei amioga ua tuuaititia le taua e faatatau i le paia o le faaiipoipoga o taunuuga ia i aiga—o le malolosi o aiga ua faifo i se saosasoa taufaamatau. Ma o lenei faifo ua mafua ai le salalau atu o le faaleagaina i le lalolagi. Ua ou vaai i le mafuaaga ma le aafiaga tonu lava. A tatou lafoai le tuuto ma le faamaoni a'ia'i i a tatou paaga faaiipoipo, ua tatou aveesea le kelū e taofiofia faatasi lo tatou lalolagi.

O se auala aoga e mafafau ai i poloaiga o le, o ni fautuaga alofa ia mai se Tama Faalelagi poto, ma ua silafia mea uma. O Lana sini o lo tatou fiafia e faavavau, ma o Ana poloaiga o faafanua ia ua Ia tuuina mai ina ia tatou toe foi atu ai ia te Ia, ma ona pau lea o le auala o le a tatou fiafia ai e faavavau. O le a le taua o le aiga ma le auai i lo tatou fiafia e faavavau? I le itulau e 141 o la'u tamaitusi enaena o loo faapea mai, “E moni o le tatou lagi e sili teisi atu nai lo o se faatusa o o tatou aiga e oo atu i le faavavau.”⁴

O le aooga faavae o le auai ma le aiga sa toe faamamafa lata mai nei i le manino tele ma le malosi i le “O Le Aiga: O Se Folafolaga i le Lalolagi.” O loo tautino mai ai le natura paia o aiga ona faamalalalama mai lea ma le sootaga i le tapuai i le malumalu. O loo folafolaga mai foi i le folafolaga le tulafono ua faavae ai le fiafia e

faavavau o aiga, o lenei mea, “O mana paia o le foafoaina o fanau, ua na o le va lava o le alii ma le tamaitai ua faaiipoipoina faaletulafono, o se tane ma le ava, e tatou ona faaogaina ai.”⁵

Ua faaali mai e le Atua i Ana perofeta e faapea, o loo i ai mataupu faavae o amioga lelei. O le agasala o le a avea pea ma agasala. O le le usi-usitai i poloaiga a le Alii o le a aveesea ai e le aunoa i tatou mai Ana faamanuiaga. O le lalolagi e fesuisuia soo ma tele ona suiga, ae o le Atua, Ana poloaiga, ma faamanuiaga folafolaina e le suia lava. E tumau ma e le masuia. Ua maua e alii ma tamaitai o latou faitalia o se meaalofo mai le Atua, ae o lo latou saolotoga ma, o se taunuuga, o lo latou fiafia e faavavau e maua mai i le usi-usitai i Ana tulafono. E pei ona fautuaina e Alema lona atalii faaloga-gata o Korianetona, “E le'i avea lava le amioleaga ma fiafia” (Alema 41:10).

I lenei vaitaimi o le Toefuataiga o le atoatoaga o le talalelei, ua toe faaali mai ai e le Alii ia i tatou ia faamanuiaga sa folafolaga mai mo i tatou ona o le usi-usitai i Ana poloaiga.

I le Mataupu Faavae ma Feagaiga 130 tatou te faitauina:

“E i ai se tulafono, na folafolaga le maaveesea i le lagi i luma atu o le faavaega o le lalolagi lenei ua faavae ai i luga faamanuiaga uma—

“Ma a tatou maua se faamanuiaga mai le Atua, e maua i le usi-usitai i lenei tulafono ua faavae ai i luga” (MF&F 130:20–21).

E mautinoa lava e leai se isi aooga faavae ua sili atu le malosi o le faailoaina mai i tusitusiga paia nai lo poloaiga lemasuia a le Alii ma lo latou sootaga i lo tatou fiafia ma le manuia o ni tagata taitotasi, o ni aiga, ma o se lalolagi. O loo i ai mataupu faavae o amioga lelei. O le le usi-usitai i poloaiga a le Alii o le a aveesea ai i taimi uma i tatou mai Ana faamanuiaga. E le mafai ona suia nei mea.

I se lalolagi ua faaletonu ai le tapasa o amioga lelei, e le taitai ai ona faavaivai le talalelei a Iesu Keriso ma e faapena foi i ona siteki ma uarota, ona aiga, po o ona tagata taitoatasi. E le tatou ona tatou ilo ma fili po o le fea poloaiga ua tatou manatu e taua ona tausua, ae ia talia poloaiga uma a le Atua. E tatou ona tatou tutu mausali ma tutumau, ma ia talitonu atoatoa i le tumau o le Alii ma talitonu atoatoa i Ana folafolaga.

Talosia ia avea pea i tatou ma malamalama i luga o le mauga, o se faataitaiga i le tausiga o poloaiga ia e le'i suia lava ma o le a le suia lava. E pei foi ona faamalosiaina e lenei tamaitusi fitafita o le AAG ia tutu mausali lelei i taimi o taua, talosia ia tatou, i lenei taua i aso e gata ai, avea ma se faataitaiga i le lalolagi atoa ae faapitoa lava i fanau a le Atua, o e o loo sailia faamanuiaga a le Alii. Ou te molimau atu ai i nei mea i le suafa o Iesu Keriso, amene. ■

FAAMATALAGA

1. Au Peresitene Sili, i le *Mataupu Faavae o le Talalelei* (1943), i.
2. *Mataupu Faavae o le Talalelei*, v, vii, viii.
3. *Aooga a Peresitene o le Ekalesia: Harold B. Lee* (2000), 4.
4. Stephen L Richards, i le *Mataupu Faavae o le Talalelei*, 141.
5. “O Le Aiga: O Se Folafolaga i le Lalolagi,” *Liahona*, Nov. 2010, 129.



Saunia e Peresitene Thomas S. Monson

O Le Usiusitai e Aumaia ai Faamanuiaga

O le iloa o le upumoni ma tali i a tatou fesili silisili e oo mai ia i tatou pe a tatou usiusitai i poloaiga a le Atua.

O u uso e ma tuafafine pele, ou te faafetai lava i le faatasi ai ma outou i lenei taeao. Ou te talo-sagaina lo outou faatuatua ma tatalo a o ou tali atu i le avanoa e lauga atu ai ia te outou.

I le aluga o tausaga, ua saili atu ai alii ma tamaitai mo le potu ma le malamalama e faatatau i le olaga faaletino ma lo latou tulaga ma le faamoe-moega o i ai, faapea ai foi ma le ala i le filemu ma le fiafia. O lea sailiga o loo faia e i tatou uma taitoatasi.

O lenei potu ma le malamalama o loo maua i tagata uma. O loo i ai i upumoni ia e faavavau. I le Mataupu Faavae ma Feagaiga, vaega 11, fuai-upu 39, tatou te faitau ai, “Aua faauta, ma tagai, o le Alii o le Atua lea, ma ua molimau ai le Agaga, ma ua moni le molimau ma e mau le upumoni e faavavau ma faavavau lava.”

Sa tusia e se tusisolo:

*E ui o mea uma i le lagi ma le lalolagi e mou atu ma faaumatiaina,
Ae o le upumoni, o le aotelega o le ola,
o le a tumau pea i lo mea leaga sili e mafai ona tutupu,
O le faavavau e le masuia lava e faavavau.¹*

O le a fesili nisi, “O fea e maua ai sea upumoni, ma e faapefea foi ona tatou iloaia?” I se faaaliga na tuu atu i le Perofeta o Iosefa Samita i Katelani, Ohaio, ia Me o le 1833, na tautino atu ai le Alii:

“O le upumoni o le iloa lea o mea e pei ona i ai, ma e pei ona sa i ai, ma e pei ona o le a oo mai. . . .

“O le Agaga o le upumoni ua mai le Atua. . . .

“Ma e leai se tagata na te mauaina se atoatoaga vagana ai ua tausi e ia ana poloaiga.

“O ia o le e tausia . . . poloaiga [a le Atua], e maua e ia le upumoni ma le malamalama, seia oo ina faamama-luina o ia i le upumoni ma iloa e ia mea uma.”²

E maeu lea folafolaga mamalu! “O ia o le e tausia ana poloaiga, e maua e ia le upumoni ma le malamalama, seia oo ina faamamaluina o ia i le upumoni ma iloa e ia mea uma.”

E le manaomia e oe ma au, i lenei vaitaimi ua anoanoai ai mea ua iloa ina ua toefuatai mai le atoaga o le tala-lelei, ona sailia le upumoni i ala e le i faia muamua ai lava. Ua uma ona tosi e se Tama Faalelagi alofa lo tatou ala ma saunia se taiala faatuatuaaina—

o le usiusitai lea. O le iloa o le upumoni ma tali i a tatou fesili silisili e oo mai ia i tatou pe a tatou usiusitai i poloaiga a le Atua.

Tatou te aoaoina le usiusitai i o tatou olaga atoa. E amata a o tatou laiti lava, o e nafa ma le tausiga o i tatou e faavaeina taiala ma tulafono e faamautinoa ai lo tatou saogalemu. O le a faigofie atu le olaga mo i tatou uma pe afai tatou te usitaia atoatoa na tulafono. Peitai o le toatele o i tatou, e aoaoina le atamai e usiusitai ai e ala i aafiaga.

A o ou tuputupu ae, o taumafanafana uma mai le amataga o Iulai seia oo i le amataga o Setema, e nonofo ai lou aiga i la matou tamai fale i Vivian Park i Provo Canyon i Utah.

O se tasi o au uo mamae lava i le taimi o na aso saoloto i le vanu o Danny Larsen, lea sa umia foi e lona aiga se tamai fale i Vivian Park. O aso uma ma te feofeoi ai ma ia i lo latou itu, e fagogota i le tamai vai ma le vai-tafe, e ao mai maa ma isi oa, savavali sopo, fe’aei, ma olioli i minute taitasi o itula taitasi o aso taitasi.

I se tasi taeao na tonu ai ia i maua ma Danny ma te mananao e fai se afi toluapi i lona afiafi faatasi ma a maua uo uma i le vanu. Sa manaomia le na ona faamama o se vaega i le fanua e lata ane e mafai ai ona matou potopoto ai. Sa mago lava le vao o le fanua lea, na le talafeagai ai mo lo matou faamoemoega. Sa amata ona ma seiina vao uumi, ma fuafua ai e faamama faataamilo se vaega tele. Sa ma tase’i ma tatoso ese i lo ma malosi uma, ae na o le pau le mea na maua sa na o ni nai vao ona o le fefeu. Na ma iloaia o lea galuega o le a alu ai le aso atoa, ma ua amata foi ona mou atu lo ma malosi ma le naunautaga.

Ona ou mafaufau lea i le tali tonu lea na oo mai i lo’u mafaufau e valu tausaga le matua. Sa ou fai atu ia Danny, “E na o le pau lava le mea ta

te manaomiaina o le susunuina o nei vao. E tau lava na ona ta *susunuina* o se li'o i totonu o vao!" Sa vave ona ia ioeina, ma ou tamoe atu ai i le matou tamai fale e aumai se afi tusi.

Ina ia leai se tasi o outou e manatu na faatagaina i maua i le valu tausaga e faaoga se afi tusi, o lea ou te fia faamanino atu ai o i maua uma ma Danny sa faasa ona faaogaina se afi tusi e aunoa ma le vaavaaiga a tagata matutua. O i maua uma na lapataia soo i tulaga lamatia o afi. Peitai, na ou iloaina le mea na teu ai afi tusi a lo matou aiga, ma sa manaomia ona faamama le fanua. Sa aunoa ma se toe tomanatu, sa ou tamoe atu ai i le matou tamai fale ma aumai se afi tusi, ma faamautinoa e leai se tasi o vaai mai. Sa vave ona ou nanaina i se tasi o a'u taga.

Sa ou toe tamoe atu ia Danny, ma le fiafia ua i ai i la'u taga le tali i le ma faafitauli. Ou te manatua le mafaufau ai o le a mu na o le mea lea ma te mananao i ai ona tape lea e le afi ia lava i se maneta pe ā.

Sa ou tusiina se laau i luga o se maa ma susunu loa le vao ma sasao ae ai. Sa mumu ae e pei sa sasaa i ai se penisini. I le taimi muamua sa ma fiafia lava ma Danny a o ma matamata i le mou atu o le vao, ae na vave lava ona ma iloaina o le a le tapeina e le afi o ia lava. Sa ma popolevale ina ua ma iloaina e leai se isi mea ma te mafaia e taofi ai. Sa amata ona sosolo atu le afi taufaamatau i le vao i luga o le itu mauga, ma lamatia ai laau paina ma isi mea uma i lo latou ala.

Mulimuli ane sa leai so ma faamoe-moe ae taufetuli loa mo se fesoasoani. E lei pine ae faataalise atu alii uma ma tamaitai i Vivian Park na avanoa ma taga susū, ma sasa le afi i se taumafaiga e tape ai. Ina ua mavae ni nai itula, sa manavaina ai ni nai lefulefu na totoe ai. Sa faasaoina laau paina

ua leva ona ola, faapea ai ma fale ia semanu e oo atu i ai le afi.

Sa ma aoaoina ma Danny ni lesona faigata ae taua i lena aso—o se vaega tupito lava, o le taua o le usiusitai.

O loo i ai aiaiga ma tulafono e fesoasoani ai e faamautinoa lo tatou saogalemu faaletino. E faapena foi, ua tuuina mai e le Alii ia taiala ma poloaiga e fesoasoani ai e faamautinoa lo tatou saogalemu faaleagaga ina ia mafai ona tatou faatautaia ma le manuia lenei olaga femoumouai faaletino ma toe foi atu ai i se taimi mulimuli i lo tatou Tama Faalelagi.

I ni seneturi ua mavae, i se augatupulaga na mamafa le aoaoina i le tu masani o taulaga e osi i manu, sa tautino atu ai ma le toa e Samuelu, "O le faalogo e sili lea i le taulaga, ma le usiusitai e sili lea i le ga'o o le mamoe poa."³

I lenei tisipenisione, na faaali atu ai e le Alii i le Perofeta o Iosefa Samita e faapea Na te manaomia "le loto ma le mafaufau malie; ma o e e loto malilie ma usiusitai o le a aia le lelei o le lauleele o Siona i aso nei e gata ai."⁴

O perofeta uma, o anamua ma ona po nei, ua iloaina o le usiusitai e taua i lo tatou faaolataga. Na tautino mai e Nifae, "O le a ou alu ma faia mea ua poloaiina ai au e le Alii."⁵ E ui na vai-vai isi i lo latou faatuatua ma lo latou usiusitai, ae e lei i ai se taimi na toilalo ai Nifae e fai le mea na poloaiina ai o ia e le Alii. E anoanoai tupulaga ua faamanuiaina o se taunuuga.

O le tala i le usiusitai o Aperaamo ma Isaako o se tala musuia lava. Atonu na matuai tiga ma faigata ia Aperaamo le usiusitai i le poloaiga a le Atua, e ave lona atalii pele o Isaako i le nuu o Moria e osi atu ai le taulaga. Pe mafai ona tatou mafaufau i le mamafatu na i ai i le loto o Aperaamo a o ia malaga atu i le nofoaga atofaina? E mautinoa lava o le tiga na matuai mafatia ai lona

tino ma faatiga ai lona mafaufau a o ia saisaia Isaako, faataoto o ia i le fata faitaulaga, ma tago atu i le naifi e fasioti ai o ia. Faatasi ai ma lona faatuatua le maluelue ma le faalagolago atoa i le Alii, na ia tali atu ai i le poloaiga a le Alii. E maeu le ofoofogia o le faasilasilaga, ma masalo na matuai olioli o ia ina ua oo mai: "Soia le oo lou lima i le tama, aua foi e te fai se mea e tasi ia te ia; aua ou iloa nei ua e matau i le Atua, ina ua e le taofia lou atalii, o lou atalii e toatasi, a ua e tuu mai ia te au."⁶

Sa tofotofoina Aperaamo, ma mo lona faatuatua ma le usiusitai na tuu atu ai e le Alii ia te ia le folafolaga mamalu lenei: "O lau fanau foi e manuia ai atunuu uma lava o le lalolagi; aua ua e usiusitai i la'u upu."⁷


E ui e le o talosagaina i tatou e faamaonia atu lo tatou usiusitai i se ala faigata ma matuitui faapea, ae ua manaomia foi mai ia i tatou le usiusitai.

Na tautino mai e Peresitene Iosefa F. Samita ia Oketopa 1873, "O le usiusitai o le uluai tulafono lea o le lagi."⁸

Sa saunoa Peresitene Gordon B. Hinckley, "O le fiafia o le Au Paia o Aso e Gata Ai, o le filemu o le Au Paia o Aso e Gata Ai, o le alualu i luma o le Au Paia o Aso e Gata Ai, o le faamanuiaina o le Au Paia o Aso e Gata Ai, ma le faaolataga e faavavau ma le faaeaga o lenei nuu o loo taoto lea i le savavali ai i le usiusitai i fautuaga a le . . . Atua."⁹

O le usiusitai o se uiga tupito lea o perofeta; ua latou maua ai le malosi ma le malamalama i le talafaasolopito atoa. E taua mo i tatou le iloaina tatou te agavaa foi i lenei puna o le malosi ma le malamalama. E faigofie ona avanoa ia i tatou taitoatasi i le asō pe a tatou usiusitai i poloaiga a le Atua.

I le aluga o tausaga ua ou iloa ai tagata e le mafaitaulia o e na patino lava le faatuatua ma le usiusitai. Ua faamanuiaina ma uunaia au e i latou.



Sei ou faasoa atu se tala o ni tagata faapea se toalua.

O Walter Krause o se tagata faamaoni tele o le Ekalesia sa nofo faatasi ma lona aiga i le mea ua igoa nei o Siamani Sasae ina ua maea le Taua Lona Lua a le Lalolagi. E ui i faigata na la fetai ai ona o le leai o se saolotoga i lona nofoaga o le lalolagi i lona taimi, ae o Uso Krause o se alii e alofa ma auauna atu i le Alii. Sa ia faataunuaina ma le faamaoni ma le maeaea ia tofiga taitasi na tuu atu ia te ia.

O le isi alii, o Johann Denndorfer, o se tagatanuu Hanikeri, sa liliu i le Ekalesia i Siamani ma sa papatisoina iina i le 1911 i le 17 o ona tausaga. E lei leva lona ae toe foi atu i Hanikeri. Ina ua mavae le Taua Lona Lua a le Lalolagi, sa toetoe lava a avea o ia ma pagota i lona lava nuu, i le aai o Debrecen. Sa aveesea foi le saolotoga mai tagata Hanikeri.

O Uso Walter Krause, na te lei iloaina Uso Denndorfer, na mauaina se tofiga e avea ma ona faiaoga o

aiga ma ia asiasi soo atu ia te ia. Sa valaau atu Uso Krause i lana soa o faiaoga o aiga ma fai atu ia te ia, “Ua ta maua se tofiga e asia ia Uso Johann Denndorfer. Pe e te avanoa ta te o faatasi ma au i lenei vaiaso e asi o ia ma avatu ia te ia se savali o le talalelei?” Ona ia toe faaopoopo atu lea, “O Uso Denndorfer e nofo i Hanikeri.”

Sa tei lana soa ma fesili mai, “O afea ta te o ai?”

“O taeao,” na tali mai ai Uso Krause.

“O afea ta te toe foi mai ai?” na fesili ai le soa.

Sa tali mai Uso Krause, “Oi, pe a ma se vaiaso—pe afai lena ta te toe *foi* mai.”

Sa tuua loa e le soa o faiaoga o aiga ma o e asia Uso Denndorfer, na malaga i le nofoaafi ma le pasi mai le nofoaga i matusasae o Siamani e oo atu i Debrecen, Hanikeri—o se malaga umi. Sa lei toe maua e Uso Denndorfer ni faiaoga o aiga talu mai le taimi ao lei amataina le taua. O lenei, ina ua ia vaaia nei auuana a le Alii, sa lofituina o ia i le lotofaafetai ua la o atu. I le taimi muamua sa ia musu ai e faatalofa atu ia i laua. Ae, sa ia alu atu i lona potumoe ma aumai se atigi pusa mai se tamai kapeneta sa i ai lana sefuluai na ia teuina mo tausaga e tele. Sa ia tuu atu le sefuluai i ona faiaoga o aiga ma faapea atu, “O lea la ua ma lelei ma le Alii. *O lea la* ua ou lagonaina le agavaa e faatalofa i aao o auuana a le Alii!” Sa tau mai e Uso Krause ia te au e faapea sa le mafai e upu ona faamatalaina lona ootia na i ai pe a mafaufau atu i lenei uso faatuatua, o le sa leai se fesootaiga ma le Ekalesia mo le tele o tausaga, sa aveesea ma le usiusitai ma le tumau mai lona totogi tau le lava le 10 pasene e totogi ai lana sefuluai. Sa ia teuina ma lona le iloa po o afea ma pe mata na te maua foi se avanoa e totogi ai.

Sa maliu Uso Walter Krause i le iva tausaga talu ai i le 94 o ona tausaga. Sa ia auuana atu ma le faatuatua ma le usiusitai i lona olaga atoa ma sa avea ma uunaiga ia te au ma i latou uma na iloaia o ia. Pe a talosagaina e faataunuu ni tofiga, e le mafai ona ia fesiligaina, e le mafai ona ia muimui, ma e le mafai ona ia faia ni alofaga.

Ou uso e ma tuafafine, o le suega tele lava o lenei olaga o le usiusitai. “O le a tatou tofotofoina ai i latou,” na fetalai ai le Alii, “e vaai pe latou te faia



mea uma o soo se mea e poloaia ai i latou e le Alii lo latou Atua.”¹⁰

Na tautino mai le Faaola: “Aua o i latou uma o e e fia mauaina se faamanuiaga i lo’u lima ia mau i le tulafono na tofia mo lena faamanuiaga, ma ona tulaga, e pei ona sa faatutuina mai i luma atu o le faavaega o le lalolagi.”¹¹

E leai se isi faaitaiga sili atu o le usiusitai o i ai nai lo lo tatou Faaola lava ia. Na saunoa Paulo e uiga ia te Ia:

“E ui lava o ia o le Alo, a o mea sa tiga ai o ia na aaoaina ai o ia ia usiusitai;

“Ua faaatoatoaina foi o ia, ona avea ai lea o ia ma tupuga o le ola e faavavau ia i latou uma o e usiusitai ia te ia.”¹²

Sa faailoa e le Faaola le alofa faamaoni o le Atua e ala i le soifua i se soifuaga atoatoa, e ala i le faamamaluina o Lana lava misiona. Sa lei faasausili o Ia. Sa lei faafefeteina o Ia i le faamaualuga. Sa lotonuu o Ia. Sa lotomauualalo o Ia. Sa faamaoni o Ia. Sa usiusitai o Ia i taimi uma.

E ui na faaososoina o ia e le alii o pepelo, o le tiapolo lava lea, e ui na Ia vaivai faaletino mai le anapogi i le 40 aso ma le 40 po ma sa matelaina, ae ina ua ofo atu i ai e le tiapolo ia Iesu ni talosaga aupito sili ona faatosina ma taufaosooso, sa ia tuu mai ia i tatou se faaitaiga faalelagi o le usiusitai e

ala i le musu e alu ese mai mea sa Ia silafia e sa’o.”¹³

Ina ua fetalai ma tiga i Ketesemane, lea sa Ia onosaia ai ia tiga ma o “lona afu foi ua pei o alualu toto ua pau ifo i le eleele,”¹⁴ o Ia o le faaitaiga atoatoa o le Alo usiusitai i lona fetalai mai, “Lo’u Tama e, a e finagalo i ai, ia e ave ese lenei ipu ia te au: a e aua le faia lo’u loto, a o lou finagalo.”¹⁵

E pei lava ona faatonuina e le Faaola Ana uluai Aposetolo, ua faapena foi ona Ia faatonuina oe ma au: “Mulimuli mai ia te au.”¹⁶ Pe ua tatou naunau ea e usiusitai?

O le malamalama lea tatou te sailia, o tali o loo tatou mananao ai, ma le malosi ua tatou manaomia i nei aso e faafetaiaia ai luitau o se lalolagi faigata ma fesuisuia e mafai lava ona fai mā tatou pe a tatou naunau e usiusitai i poloaiga a le Alii. Ou te toe sii maia le fetalaiga a le Alii: “O le e tausia poloaiga [a le Atua], e maua e ia le upumoni ma le malamalama, seia oo ina faamamaluina o ia i le upumoni ma iloa e ia mea uma.”¹⁷

O lau tatalo faamaualalo ina ia faamanuiaina i tatou i tau silisili ua folafolaina i e usiusitai. I le suafa o Iesu Keriso, lo tatou Alii ma le Faaola, amene. ■

FAAMATALAGA

1. “Upu Moni o A?” *Viiga*, nu. 170.
2. Mataupu Faavae ma Feagaiga 93:24, 26–28.
3. 1 Samuēlu 15:22.
4. Mataupu Faavae ma Feagaiga 64:34.
5. 1 Nifae 3:7.
6. Kenese 22:12.
7. Kenese 22:18.
8. Joseph F. Smith, “Discourse,” *Deseret News*, Nov. 12, 1873, 644.
9. Gordon B. Hinckley, “If Ye Be Willing and Obedient,” *Ensign*, Dec. 1971, 125.
10. Aperamo 3:25.
11. Mataupu Faavae ma Feagaiga 132:5.
12. Eperu 5:8–9.
13. Tagai Mataio 4:1–11.
14. Luka 22:44.
15. Luka 22:42.
16. Ioane 21:22.
17. Mataupu Faavae ma Feagaiga 93:28.



Saunia e Elder Jeffrey R. Holland

○ Le Korama a Aposetolo e Toasefululua

“Le Alii e, Ua Ou Faatuatua”

Ia faailoa ma le faamaoni au fesili ma ou popolega, ae ia tapili muamua motumotu o lou faatuatua, aua e mafai mea uma e i latou e talitonu.

Sa i ai se taimi na maliu atu ai Iesu i se vaega o matuai finau lava ma Ona soo. Ina ua fesili le Faaola i le mafuaaga o lenei finauga, na tulai ane ai le tamā o se tamaitiiti ma’i ma faapea mai na sau o ia i soo o Iesu mo se faamanuiaga o lona atalii, ae sa le mafai ona latou faia. A o lilivau nifo o le tamaitiiti, ma sau le piapia i lona gutu, ma taafili i le palapala i o latou luma, sa talosaga atu le tamā ia Iesu atonu i si toe malosi o le faanaunauga ogaoga i lona leo:

“Ai se mea e te mafaia,” na ia fai atu ai, “ia e alofa mai ia te i matou, ma ia e fesoasoani mai ia te i matou.

“Ona fetalai atu lea o Iesu ia te ia, Afai ua e mafaia ona faatuatua, e mafaia mea uma lava i le faatuatua.

“Ona alaga loa lea o le tamā o le tama, ua fai mai ma le tagi, Le Alii e, ua ou faatuatua; ia e fesoasoani i lo’u le faatuatua.”¹

O le uluai talitonuga o lenei tagata, i lana lava ta’utinoga, e faatapulaa. Ae e i ai lona naunautaiga faanatinati, mautinoa mo si ona atalii e toatasi. Ua ta’u mai ai ia i tatou ua lava lena e

amata ai. “E tusa pe ua le mafai ona e faia se isi lava mea nai lo le *fia talitonu*,” ua folafola mai ai Alema, “ia tuu lea manao e galue i totonu ia te oe; seia oo lava ina ia e talitonu ai.”² Ma le leai lava o se isi faamoemoe o totoe, na folafola atu ai e lenei tama le faatuatua o ia te ia ma aoi atu ai i le Faaola o le lalolagi, “Ai se meae te mafaia, ia e alofa mai ia te i *matou*, ma ia e fesoasoani mai ia te i *matou*.”³ O le faigata ia ona ou faitau i na upu e aunoa ma lo’u tagi. O le soanauna pelulale *matou* ua manino lava lona faaogaina ma le

loto i ai. O le uiga o le tala a le tamā, “O lo matou aiga atoa o loo aoi atu. E le o muta lava o matou faigata, ma ua matou le lavāvā. Ua pa’u atu le ma atalii i totonu o le vai. Ua pa’u atu o ia i totonu o le afi. O loo faaauau pea ona i ai o ia i tulaga lamatia, ma ua faaauau ai pea ona matou matata’u. Ua matou leiloa po o le a se isi mea e fai. Pe mafai ona e fesoasoani mai ia i matou? Matou te faafetai i *soo se mea*—sina fasi faamanuiaga, tau lava o sina aloiafi o le faamoemoe, sina masi’i ese itiiti o le avega o loo tauaveina e le tina o lenei tamaitiiti i aso uma o lona olaga.”

“Ai se meae te mafaia” lea na tautala ai le tamā na toe foi atu ia te ia, “Afai ua e mafaia ona *faatuatua*,” lea na fetalai ai le Matai.⁴

“Alaga loa,” o loo fai mai ai le mau—e lei faatelegese pe le mautinoa pe masalosalo ae ua “alaga loa”—ua alaga atu loa le tamā e faailoa atu lona tiga o se matua, “Le Alii e, ua ou faatuatua; ia e fesoasoani mai i lo’u le faatuatua.” I le tali atu i se faatuatua fou o la lava ua i ai sina vaega, na faamalolo ai e Iesu le tamaitiiti, toetoe lava ina a faatu moni mai o ia mai le oti e pei ona faamatalaina ai e Mareko le mea na tupu.⁵

I le mafaufau ai i lenei tala faatusi paia faamomoi, ou te fia tautala tuusao atu i tupulaga talavou a le



Ekalesia—e talavou i tausaga o le matua po o le talavou i le auai i le ekalesia po o le talavou foi i tausaga o le faatuatua. Po o le a lava, ua tatau ona aofia ai toetoe o i tatou uma lava.

O le mea muamua e matau i lenei tala o le taimi e feagai ai ma luitau o le faatuatua, sa faamautu muamua e le tamā lona malosia ma o iina na ia faailoa atu ai le mea e gata ai. O lana uluai tautinoga lava o lona ioeina e aunoa ma se faatuai: “Le Alii e, ua ou faatuatua.” Ou te fia fai atu ia i latou uma o ē moomoo ia tele atu se faatuatua, ia manatua lenei tagata! I taimi o le atu-atuvale po o le le mautonu po o taimi e fesouaiina ai, tausisi i le faatuatua lenei ua ia te oe, tusa lava pe itiiti lenei faatuatua. I le tuputupu ae e tatau ia i tatou uma ona iloa i le olaga faitino, o le a i ai se mea e tupu ia i tatou uma lava, i le itu faaleagaga e foliga tutusa i le mafatiaga o lenei tamaitiiti po o le faanaunauga ogaoga o lenei tamā. A alia’e mai na taimi ma oo mai faafitauli, ma a le vave ona maua se vaifofo, *ia taofi mau i mea ua uma ona outou iloa ma tutu malolosi seia oo mai se isi malamalama*. O i tonu lava, i lenei vavega patino, lea na fetalai ai Iesu, “Afai e tusa lo outou faatuatua ma le fua o le sinapi, e fai atu outou i lenei mauga, Alu atu ia oe i le la mea; ona alu atu ai lea; e leai foi se mea tou te le mafaia.”⁶ O le tele o lou faatuatua po o le maualuga o lou malamalama e le o le mea lea e taua—o lou faamaoni a’ia’i e te faatinoina e tusa ai ma lou faatuatua ma le upumoni ua uma ona e iloa.

Lona lua o mea e matau e fai sina ese mai le mea muamua. A oo mai faafitauli ma tulai mai ni fesili, aua nei amataina lau sailiga mo le faatuatua i lou faapea pe o le a le tele e te lē o maua, ma e amata ai i lou “le faatuatua.” E tusa lava lenei mea ma le taumafai e utu se pipi mai lona gutu! Sei ou faamanino atu le itu lea: Ou te

le o faapea atu e te faafoliga ua ia te oe le faatuatua e lē o i ai. O lea *ou te* fai atu ia e faamaoni i le faatuatua lenei ua ia te oe. O nisi taimi tatou te faia ai e faapei o se tautinoga ma le faamaoni o le le mautonu, o se faailoga maualuga lea o le lototoa lelei nai lo se tautinoga faamaoni o le faatuatua. E leai! Ioe, o le tagata le faatuatua, e matua utiuti lava ona faamoemoega i ana amio nai lo le tagata faatuatua. O le mea lea ia tatou manatua uma ai le savali manino o lenei tala faatusi paia: Ia e faamaoni e uiga i ou le mautonu e te manaomia; ua tumu le olaga i le le mautonu i lea mataupu ma lea mataupu. Ae afai e te manao ma mananao lou aiga ina ia faamaloloina, aua nei faatagaina na fesili e taofia ai le faatuatua mai le faia o ana vavega.

E le gata i lea, e tele atu lo outou faatuatua nai lo mea ua outou mafau-fauina ona o le mea lea ua ta’ua e le Tusi a Mamona “o le tetele o faamaoniga.”⁷ “Tou te iloa foi i latou i o latou fua,” na fetalai ai Iesu,⁸ ma o fua o le ola ai i le talalelei, ua faaalua i olaga o le Au Paia o Aso e Gata Ai i soo se mea. E pei ona fai atu o Peteru ma Ioane i le au Faresaio, ou te fai atu foi ia te outou, “E le mafai ona ma lē tautala i mea ua ma vaai i ai ma faalogo i ai” ma o mea ua tatou vaai ma faalogo i ai “o se vavega iloga ua faia” i olaga o le fia miliona o tagata o lenei Ekalesia. E le mafai ona faafitia lenei mea.⁹

Uso e ma tuafafine, o se galuega paia lenei o loo faagasolo faatasi ai ma le anoanoai o faamanuiaga o loo vaaia i soo se itu, o le mea lea faamolemole aua nei soona popole pe afai e tulai mai faafitauli e ao ona suesue, malamalama i ai, ma foia. O le a tulai mai lava. *I lenei Ekalesia, o le mea ua tatou iloa o le a sili atu ona taua i taimi uma nai lo mea tatou te le o iloa. Ma ia manatua, i lenei lalolagi, e ao lava ona savavali tagata uma i le faatuatua.*

O le mea lea ia agalelei ona o vaivaiga faaletagata—o ou vaivaiga faapea foi vaivaiga o i latou tou te galulue faatasi i se Ekalesia o loo taitaia e alii ma tamaitai e galulue fua. Vagana ai i le tulaga o Lona Alo Pele e Toatasi e atoatoa, na o tagata lē atoatoa lava sa galue ai le Atua. Ai lava se faigata tele ia te Ia, ae na Ia taulimaina lava. E tatau foi la ia i tatou. A e vaai foi la i ni lē atoatoa, ia manatua o le tapulaa e le o i ai i le paia o lenei galuega. E pei ona fautuaina ai e se tasi tusitala faamanuiaina: a oo ina liligi mai le atoaga e le i’u, a i ai se mea e maumau, e le o se lape o le suauu ae ona o ipu papa’u ua le mafai ona ofi uma ai.¹⁰ O na ipu papa’u e aofia ai oe ma au, o le mea lea ia onosai ma agalelei ma lotofaamagalalo.

Matauga mulimuli: a oo mai le le mautonu po o faigata, aua e te fefe e fesili mo se fesoasoani. Afai tatou te mananao i le fesoasoani ma le lotomauualalo ma le faamaoni e pei ona sa faia ai e lenei tamā, e mafai ona tatou maua. O le fasifuaitea i tusitusiga paia e pei o le “faamoemoega tonu,” tulimatai ma le “faamoemoe atoa o le loto,” ma lē faia se pepelo ma se faa’ole’ole i luma o le Atua.¹¹ Ou te moli-mau atu i le tali atu i ai i lenei ituaiga o augani, o le a auina mai e le Atua le fesoasoani mai i itu uma e lua o le veli e faamalolosa ai lo tatou talitonuga.

Sa ou fai atu ou te talanoa lava i le autalavou. O lea e fai. Na fai mai talu ai nei ma sina faalotolotolu se tamaitiiti e 14 tausaga, “Brother Holland, e le o mafai ona ou fai atu ua ou iloa e moni le Ekalesia, ae ou te talitonu e moni.” Sa ou matua opoina lenei tamaitiiti. Sa ou fai atu i ai ma le lagona naunautai mai lo’u loto, o le talitonu o se upu taua, o se taga e sili atu ona taua, ma e le tatau ai ona faatoese i le “na ona talitonu.” Sa ou fai atu ia te ia o Keriso lava Ia na fetalai, “Aua e te mata’u, tau

lava ina e talitonu,”¹² o se fasifuaitau na tauaveina e le alii talavou o Gordon B. Hinckley i le galuega faamisiona.¹³ Sa ou faamatala i lenei tamaitiiti, o le talitonu o le laasaga muamua lava lea i le talitonuga maumaututu, ma o mataupu faavae patino o lo tatou faatuatua autasi e amata uma lava i le fasifuaitau, “Matou te talitonu.”¹⁴ Ma sa ou ta’u atu foi ia te ia lo’u mitamita tele mo ia ona o le faamaoni o lana tauviga ia iloa e moni le ekalesia.

Ia, faatasi ai ma le toetiiti atoa le 60 tausaga o ou ola ma aoao talu mai ona 14 tausaga lo’u matua sa na ona talitonu, ou te tautino atu ai nisi o mea ua ou iloa nei. Ua ou iloa o le Atua i taimi uma ma i itu uma ma i tulaga uma o lo tatou Tama i le Lagi e alofa ma lotofaamagalo. Ua ou iloa o Iesu o

Lona alo atoatoa e toatasi, o lē sa ofoina mai ma le alofa lona soifua e ala i le finagalo o le Tama ma le Alo mo le togilaina o i tatou uma, o ē le atoatoa. Ua ou iloa na toetu o Ia mai lena maliu ia toe soifua ai, ma e talu ai ua Ia toetu, o lea o le a toetutu ai foi i tatou. Ua ou iloa o Iosefa Samita, o le foi na tautino mai e le atoatoa,¹⁵ o le meafaigaluega filifilia i aao o le Atua e toefuatai mai le talalelei e faavavau i le lalolagi. Ou te iloa foi o le faia o lena mea—aemaise o le faaliliuina o le Tusi a Mamona—ua ia aoaoina atili ai au i le alofa o le Atua, i le paia o Keriso, ma i le mana o le perisitua nai lo se isi lava perofeta ua ou faitau i ai, iloaina, pe faalogo i ai i se olaga atoa o la’u sailiga. Ou te iloa o Peresitene Thomas S. Monson, o lē o loo tuuto ma le laufofoga fiafia ao

lata ina faailoga le 50 tausaga talu ona faauuina o ia e avea ma se Aposetolo, o lē ua agatonu ona suitulaga i le vala-uga faaperofeta i le taimi nei. Ua tatou toe vaaia foi lena tiutetauave i ona luga i lenei konafesi. Ua ou iloa o isi tamalii e toa 14 ua outou lagolagoina o ni perofeta, tagatavaai, ma talifaaaliga, ua latou lagolagoina o ia i o latou aao, faatasi ai ma o latou loto, ma latou lava ki faaaposetolo.

Ou te tautino atu nei mea ia te outou faatasi ai ma le talitonuga na ta’ua e Peteru o le “upu o le valoaga e sili lona mausali.”¹⁶ O le mea sa avea o se fatu itiiti o le talitonu mo au, ua tupu ma avea ma laau o le ola, afai la o tofotofoina lou faatuatua i lenei taimi po o soo se taimi o le olaga, ou te valaaulia oe e te faalagolago mai i lo’u faatuatua. Ou te iloa o lenei galuega o le upumoni lava a le Atua, ma ou te iloa ua na o se tulaga lamatia pe afai tatou te faatagaina le le mautonu po o tiapolo e taitaiese i tatou mai lona ala. Tumau i le faamoemoe. Tumau i le malaga. Ia faailoa ma le faamaoni au fesili ma ou popolega ae ia tapili muamua motumotu o lou faatuatua, aua e mafai mea uma e i latou e talitonu. I le suafa o Iesu Keriso, amene. ■

FAAMATALAGA

1. Mareko 9:22–24; tagai foi i fuaiupu e 14–21.
2. Alema 32:27; faaopoopo le faamamafa.
3. Mareko 9:22; faaopoopo le faamamafa.
4. Mareko 9:22, 23; faaopoopo le faamamafa.
5. Tagai Mareko 9:24–27.
6. Mataio 17:20.
7. Helamana 5:50.
8. Mataio 7:16.
9. Tagai Galuega 4:16, 20.
10. Sii mau le Alfred Edersheim, *The Life and Times of Jesus the Messiah*, 2 vols. (1883), 2:108.
11. 2 Nifae 31:13.
12. Mareko 5:36.
13. Tagai Gordon B. Hinckley, i le Conference Report, Oct. 1969, 114.
14. Tagai Mataupu Faavae o le Faatuatua 1:1–13.
15. Tagai Aoaoga a Peresitene o le Ekalesia: *Iosefa Samita* (2007), 555.
16. 2 Peteru 1:19.





Saunia e Elder Dallin H. Oaks

○ Le Korama a Aposetolo e Toasefululua

○ Soo o Keriso

O le mulimuli ia Keriso e le o se faiga faasamasamanoa pe faavaitaimi, ae o se tautinoga e faifai pea ma o le ituaiga olaga e faaoga i taimi uma ma i nofoaga uma.

○ se tasi o a tatou viiga faapelepele, na lagiina e le Aufaipese a le Tapeneko i lenei taeao, e amata i upu nei:

*“Mulimuli mai, ia te au”
Le fetalaiga a Iesu,
Na o lea tatou te tasi ai
Ma le Alo o le Matai.¹*

O na upu, na musuia e le uluai valaaulia a le Faaola i Ona soo (tagai Mataio 4:19), na tusia e John Nicholson, o se tagata Sikotilani na liliu mai. E pei o le toatele o o tatou uluai taitai, sa le'i tele sona a'otauina aloaia ae sa maoae lona alofa mo lo tatou Faaola ma le ata o le faaolataga.²

O savali uma o lenei konafesi ua fesoasoani tatou te mulimuli ai i tulagaaao o lo tatou Faaola, o lē ona faataitaiga ma aoaoga ia ua faamanino ai le ala mo soo uma o Iesu Keriso.

E pei foi o isi Kerisiano uma, e suesue foi tagata o Le Ekalesia a Iesu Keriso o le Au Paia o Aso e Gata Ai i le soifuaga o lo tatou Faaola e pei ona lipotia mai i tusi o le Feagaiga Fou o le Mataio, Mareko, Luka, ma Ioane. O le a ou toe faamanatu atua faataitaiga ma aoaoga o loo i ai i nei tusi e fa o le Tusi Paia, ma valaaulia i tatou taitoatasi ma isi uma Kerisiano e mafaufau

pe faapefea ona agavaa lenei Ekalesia toefuataiina ma i tatou taitoatasi e avea o ni soo o Keriso.

Na aoa mai e Iesu e tatau ona i ai le papatisoga e ulufale atu ai i le malo o le Atua (tagai Ioane 3:5). Na amata Lana auaunaga i lona papatisoga (tagai Mareko 1:9), ona papapatiso ai lea e Ia ma Ona soo isi (tagai Ioane 3:22–26). Ua faapena foi ona tatou faia.

Na amata e Iesu Lana talaiga i le valaauliaina o e sa faalogologo ia te Ia ia salamo (tagai Mataio 4:17). O le savali lava lena a Ana auauna i le lalolagi.

I Lana auaunaga atoa na tuuina mai ai e Iesu ia poloaiga. Ma sa Ia aoa mai, “Afai tou te alolofa mai ia te au, tausii a'u poloaiga” (Ioane 14:15; tagai foi i fuaiupu e 21, 23). Sa Ia faamanino

mai o le tausiga o Ana poloaiga o le a manaomia ai e Ona soo le tuua o mea sa Ia ta'ua “o le mea e sili ona lelei i tagata” (Luka 16:15) ma “le uputuu a tagata” (Mareko 7:8; tagai foi i le fuaiupu e 13). Sa Ia lapatai mai foi, “Afai o ni tagata o le lalolagi outou, po ua alofa mai le lalolagi i ona tagata; ae le ni o le lalolagi outou, a ua ou filifilia outou nai le lalolagi, o le mea lea e inoino ai le lalolagi ia te outou” (Ioane 15:19). E pei ona sa tautino mai e le Aposetolo o Peteru mulimuli ane, o soo o Iesu o “le nuu na faatauina mai” (1 Peteru 2:9).

Ua malamalama le Au Paia o Aso e Gata Ai e le tatau ona avea i tatou o “ni o le lalolagi” pe noatia i “uputuu a tagata,” ae e faapei o isi soo o Keriso, o nisi taimi e faigata ai ona tatou mulimuli i le Faaola i lenei mea. O nisi ua latou ola i o latou olaga i ala o le lalolagi aua, e pei ona fetalai mai Iesu e uiga i nisi sa Ia aoaoina, “ua sili lo latou manao i le viiga mai tagata, i lo le viiga o le Atua” (Ioane 12:43). O nei toilalo e mulimuli ia Keriso ua matua tele nuaa ma e maaleale tele e lisi atu i i. E aofia ai mea uma e pei o faasa'oga faapolotiki ma laei ma teuga soona fai e oo atu i le faatafatafa ese mai tulaga faatauaina faavae e pei o le natura e faavavau ma le matafaioi a le aiga.

O aoaoga a Iesu sa lei faia e tau o ni faaupuga. O taimi uma lava sa tatau ona faatinoina. Na aoa mai Iesu, “Ai





se faalogo i a'u upu nei, ma faia e ia, ou te faatusaina o ia i le tagata potō," (Mataio 7:24; tagai foi i le Luka 11:28) ma "Amuia lea auauna pe a sau lona alii e maua o ia o loo faapea ona fai" (Mataio 24:46). I se tasi viiga pele tatou te lagiina ai:

*Faaola e, ia ou alofa ia Oe,
Ma ui i ou ala, ia ou sii ae se tasi . . .
I le mana mai luga—
Faaola e ou te mulimuli atu ia te oe.*³

E pei ona aoao mai Iesu, o i latou e alolofa ia te Ia o le a tausi i Ana poloaiga. O le a latou usiusitai, e pei ona aoao mai ai Peresitene Thomas S. Monson i lenei taeao. O le mulimuli ia Keriso e le o se faiga faasamasama noa pe faavaitaimi, ae o se tautinoga e faifai pea ma o le ituaiga olaga e faaoga i taimi uma ma i nofoaga uma. Na aoao mai e le Faaola lenei mataupu faavae ma le ala e mafai ai ona faamanatu mai ai ia i tatou ma faamalolosa ai e mulimuli ai ina ua faatuina le sauniga o le faamanatuga (komunio, e pei ona ta'ua ai e isi). Ua tatou iloa mai faaaliga i ona po nei, na Ia poloaiina Ona soo e aai ma feinu i faatusa e manatua ai o Ia (tagai Faaliliuga a Iosefa Samita, Mataio 26:22 [i le Mataio 26:26, vaefaamatalaga i, 24 [i le faaopoopoga i le Tusi Paia]; Faaliliuga a Iosefa Samita, Mareko 14:21–24 [i le faaopoopoga i le Tusi Paia]). E mulimuli ia tagata o Le Ekalesia a Iesu

Keriso o le Au Paia o Aso e Gata Ai i lena poloaiga i vaiaso taitasi i lo latou auai atu i se sauniga tapuai lea tatou te aai ai i le areto ma feinu i le vai ma osifeagaiga o le a tatou manatua pea o Ia ma tausi i Ana poloaiga.

Na aoao mai Iesu e "tatau i tagata ona tatalo" (Luka 18:1). Na Ia faatuina foi lena faataitaiga, e pei ona "aoina Lana tatalo i le Atua" (Luka 6:12) a o lei valaauina e Ia Ana Aposetolo e Toasefululua. E faapei foi o isi Kerisiano, tatou te tatalo foi i a tatou sauniga tapuai uma. Tatou te tatalo foi mo le taitaiga, tatou te aoao atu foi e tatau ona faia soo a tatou lava tatalo faaletagata lava ia ma tatalo i aso taitasi e tootutuli ai o se aiga. E faapei foi o Iesu, tatou te tatalo i lo tatou Tama i le Lagi, ma e tatou te faia i le suafa paia o Iesu Keriso.

Na valaauina e le Faaola ia Aposetolo e Toasefululua e lagolago i Lana Ekalesia ma sa tuuina atu ia i latou ia ki ma le pule e faaauu ai le galuega pe a mavae Lona maliu (tagai Mataio 16:18–19; Mareko 3:14–15; 6:7; Luka 6:13). O Le Ekalesia a Iesu Keriso o le Au Paia o Aso e Gata Ai, o le Ekalesia toefuataiina a Iesu Keriso, e mulimuli i lena faataitaiga i lona faatulagaga ma lona faaeina atu o ki ma le pule i luga o Aposetolo.

O nisi na valaauina e Iesu e mulimuli atu ia te Ia e lei tali vave atu i ai, ae na latou saili e faatuatua ae sei alo atu i a latou matafaioi fai faaleaiga. Sa

tali atu Iesu, "O lē tago lona lima i le suotosina ma tepa i tua, e le tatau ia i le malo o le Atua" (Luka 9:62). E toatele Au Paia o Aso e Gata Ai o loo faatinoina le faamuamua na aoao mai e Iesu. E aofia ai le faataitaiga matagofie o le fia afe o faifeautalai sinia ma isi ua tuua fanau ma fanau a fanau ae faatino ia tiute faamisiona ua valaauina ai i latou.

Na aoao mai e Iesu sa foafoaina e le Atua le tane ma le fafine ma e tatau i le tane ona tuua ona matua ae faatasi ma lana *ava* (tagai Mareko 10:6–8). O la tatou tautinoga i lenei aooga ua lauiloa.

I le faataoto ua masani ai o le mamoe na se, sa aoao mai ai e Iesu e tatau ona tatou faia mea uma tatou te mafaia e saili mai soo se tasi o le lafu ua sē (tagai 18:11–14; Luka 15:3–7). E pei ona tatou iloa, ua tuuina atu e Peresitene Thomas S. Monson se faamamafa tele i lenei faatonuga e ala i lana faataitaiga e lēmafagaaloina ma aooga e uiga i le laveai mai o o tatou uso ma tuafafine.⁴

I a tatou taumafaiga e laveai mai ma auauna atu, tatou te mulimuli ai i le faataitaiga maoae a lo tatou Faaola ma aooga faamomoioto e uiga i le alofa: "E te alofa atu i le lua te tuaoi ia pei o oe lava ia te oe" (Mataio 22:39). Na Ia poloaiina foi i tatou e alolofa atu i e ita mai (tagai Luka 6:27–28). Ma i ana aooga maoae i le faaiuga o Lana auaunaga i la le tino, na Ia fetalai ai:

"O le poloaiga fou ou te tuu atu ai ia te outou, ia outou fealofani; faapei ona ou alofa atu ia te outou, ia fealofani foi outou.

"O le mea lea e iloa ai e tagata uma lava o o'u soo outou, pe afai ua outou fealofani" (Ioane 13:34–35).

I le avea ai o se vaega o le fealofani po o le fealofaai, na aoao mai ai Iesu afai e agaleaga mai se tasi ia i tatou, e tatau ona tatou faamagalo atu i ai (tagai Mataio 18:21–35; Mareko 11:25–26;



Luka 6:37). A o toatele ē o tauivi ma lenei poloaiga faigata, ua tatou iloina uma lava ia faataitaiga musuia a le Au Paia o Aso e Gata Ai o ē na ofoina atu le faamagaloga ma le agaalofo, e oo lava i sesē aupito matuia. Mo se faataitaiga, na faalagolago Chris Williams i lona faatuatua ia Iesu Keriso e faamagalalo ai le avetaavale ‘onā lea na mafua ai le maliu o lona toalua ma le la fanua e toalua. Na o le lua aso talu ona uma le faalavelave ma o loo matua ogaoga le faanoanoa, ae saunoa lenei alii, o le sa avea ma o matou epikopo i lona taimi, “I le avea ai o se soo o Keriso, e leai se isi a’u filifiliga.”⁵

O le tele o Kerisiano e foai atu i e matitiva ma e le tagolima, e pei ona aoao mai e Iesu (tagai Mataiao 25:31–46; Mareko 14:7). I le mulimuli ai i lenei aoaoga a lo tatou Faaola, ua matuai lelei lava le faatinoga a Le Ekalesia a Iesu Keriso o le Au Paia o Aso e Gata ai ma ona tagata auai. E faia e o tatou tagata ni saofaga limafoai i auunaga alofa ma tuuina atu foi auunaga a le tagata lava ia ma isi meaalofa i e matitiva ma e le tagolima. E le gata i lea, e anapopogi foi o tatou tagata mo ‘aiga e lua i masina taitasi ma ofoina atu e le itiiti ifo i le tau o nei ‘aiga e lua mo se taulaga anapogi, lea e faaaoaga e o tatou epikopo ma peresitene o paranesi e fesoasoani ai i o tatou tagata e le tagolima. O lo tatou anapogi ina ia fesoasoani ai i ē o fia aai o se faatinoga o le alofa mama ma, a faia faatasi ma se faamoemoega mama, o le a avea ma se ‘aiga tele faaleagaga.

E le o lava le silafia i le auunaga a la tatou Ekalesia e fesoasoani ai i

tagata i le lalolagi atoa. I le faaogaina o tupe e ofoina mai e tagata limafoai o le ekalesia, e auina atu ai e Le Ekalesia a Iesu Keriso o le Au Paia o Aso e Gata ai ia taumafa, lavalava, ma isi mea taua e fesoasoani ai i le mafatia o tagata matutua ma tamaiti i le lalolagi atoa. O nei foai alofa, e faitau fiaselau miliona tala i le sefulu tausaga talu ai, e faia e aunoa ma se mafaufau i ni lotu, lanu, po o atunuu.

O la tatou taumafaiga faamāmā avega maoae ina ua mavae le mafuie ma le galulolo i Iapani i le 2011, na tuuina atu ai le tinoitupe e \$13 miliona ma sapalai mo toomaga. E le gata i lea, e silia ma le 31,000 tagata o le Ekalesia na ofofua atu e tuuina atu le silia ma le 600,000 itula o le auunaga. O la tatou fesoasoani alofa mo tagata i ē na aafia i le Afa o Sandy i sasae o le Iunaite Setete na aofia ai se foai tele o punaoa eseese, faatasi ai ma le toeitiiti atoa le 300,000 itula o le auunaga mo taumafaiga faamāmā e tagata pe tusa ma le 28,000 o le Ekalesia. Faatasi ai ma le tele o isi faataitaiga i le tausaga ua te’a, na tatou tuuina atu ai le 300,000 pauna (136,000 kg) o lavalava ma seevae mo le au sulufai i le malo o Aferika o Chad. I le lua-sefululima tausaga talu ai, ua tatou fesoasoani atu ai i le toeitiiti atoa le 30 miliona tagata i atunuu e 179.⁶ E moni lava, o tagata ua faaigoaina o “Mamona” e iloa le auala e foai atu ai i e matitiva ma e le tagolima.

I Lana toe aoaoga o ta’ua i le tusi paia, na faatonuina ai e le Faaola Ona soo e avatu Ana aoaoga i atunuu uma ma tagata uma. Mai le amataga o le

Toefuataiga, na saili ai e Le Ekalesia a Iesu Keriso o le Au Paia o Aso e Gata Ai e mulimuli i lona aoaoga. E oo lava foi a o avea i tatou o se ekalesia fou matitiva sa tauivi faatasi ma ni nai afe o tagata auai, sa auina atu lava e o tatou uluai taitai ia faifeautalai i atuvasa, i sasae ma sisifo. Sa faaauau pea ona tatou aoao atu le savali Kerisiano seia oo mai i le asō, ua silia ma le 60,000 faifeautalai faamisiona o la tatou polokalama faafaifeautalai, ma le isi fiafe o loo galulue faavaitaimi. Ua i ai o tatou faifeautalai i le silia ma le 150 atunuu ma teritori, i le lalolagi atoa.

I le faaiuga o Lana Lauga maoae i luga o le Mauga, sa aoao mai ai e Iesu, “Ia atoatoa ona lelei o la outou amio, e pei o lo outou Tama o i le Lagi e atoatoa ona lelei o ia” (Mataiao 5:48). O le faamoemoega o lenei aoaoga o le mulimuli i lo tatou Faaola, o le o mai i le Tama, lea na faasino i ai le Faaola o “lo’u Tama, ma lo outou Tama; ma . . . lo’u Atua, ma lo outou Atua” (Ioane 20:17).

Mai faaaliga i ona po nei, e tulaga ese i le talalelei toefuataina, ua tatou iloa ai o nei aoaoga o se vaega o le fuafuaga a le Atua le Tama mo le faaolataga o Lana fanau. I lalo o lona fuafuaga, o i tatou uma o *suli* o o tatou matua faalelagi. “O i tatou o fanau a le Atua,” na aoao mai e Paulo, “afai foi o fanau i tatou, o suli foi, o suli lava o le Atua, o suli faatasi ma Keriso” (Roma 8:16–17). O lona uiga, e pei ona ta’u mai i le Feagaiga Fou, o i tatou o “suli . . . i le ola e faavavau” (Tito 3:7) ma afai tatou te o mai i le Tama, o le a tatou “maua mea uma” (Faaaliga 21:7)—o mea uma ua ia te Ia—o se manatu faavae e faigata ona malamalama i ai o tatou mafaufau faaletagata. Peitai, o le mea sili e mafai ona tatou malamalama o le ausiaina o lenei taunuuga faaii i le faavavau e na o le pau le mea e mafai ai, pe afai

lea tatou te mulimuli i lo tatou Faaola, o Iesu Keriso, o le na aoao mai “e le alu atu lava se tasi i le Tama, pe a le ui mai ia te au” (Ioane 14:6). Tatou te saili e mulimuli ia te Ia ma avea atili ai e faapei o Ia, iinei ma le olaga a sau. I fuaiupu faaiu la o la tatou viiga “Mulimuli Mai ia te Au,” tatou te lagiina ai:

*Pe na o lenei olaga ea,
Tatou te fai ai o lenei mea,
Leai, e tatau foi i luga?
I na olaga e pa'ia.*

*Tatou te maua pule'aga,
Manuia, ma mamalu na'uā,
A tatou fai pei na fetalai,
Ia outou mulimuli mai.”⁷*

Ou te molimau atu i lo tatou Faaola, o Iesu Keriso, o lē ona aoaoga ma faataitaiga o loo tatou saili e mulimuli ai. Ua Ia valaaulia i tatou uma o ē ua mafatia i avega mamafa ia o mai ia te Ia, e aoao ia te Ia, ia mulimuli ia te Ia, ona tatou maua ai lea o le malologa mo o tatou agaga (tagai Mataiao 4:19; 11:28). Ou te molimau atu i le moni o Lana savali ma le misiona paia ma le pule o Lana Ekalesia toefuataiina i le suafa o Iesu Keriso, amene. ■

FAAMATALAGA

1. “Mulimuli Mai ia te Ai,” *Viiga*, nu. 62.
2. Tagai Karen Lynn Davidson, *Our Latter-day Hymns: The Stories and the Messages* (1988), 142–43, 419.
3. “Faaola, ia Ou Alofa,” *Viiga*, nu. 150.
4. Tagai, mo se faataitaiga, Heidi S. Swinton, *To the Rescue: The Biography of Thomas S. Monson* (2010), 149–61; Thomas S. Monson, “Ia Laveaiina,” *Liahona*, Iulai 2001, 57–60.
5. Chris Williams, in Jessica Henrie, “Father Relies on Faith to Forgive Intoxicated Teen Driver,” *Deseret News*, Aug. 1, 2012; tagai foi Chris Williams, *Let It Go: A True Story of Tragedy and Forgiveness* (2012).
6. Tagai “Emergency Response: Church Assists Worldwide,” *Church News*, Mar. 9, 2013, 9; Welfare Services Emergency Response, “2012 Year in Review,” 8.
7. *Viiga*, nu. 62.



Saunia e Elder Christoffel Golden Jr.
○ Le Fitugafulu

○ Le Tama ma le Alo

I le fatu o le talalelei a Iesu Keriso ma lona mana e laveai ai o se malamalamaaga tonu lea o le Tama ma le Alo.

Ou uso e ma tuafafine pele, ou te faafetai lava i le talanoa atu ia te outou i lenei aoauli i le faatulagaga o lenei konafesi aoao musuia!

I le tautalagia ai o se autu lea ou te manatu i ai e sili ona paia, ou te fia faailoa muamua atu ma le lotofaafetai le tuuto o le toatele o Kerisiano i le talafaasolopito atoa, e aofia ai ma ou augatuuua o Porotesano Farani ma Katoliko Aialani. Ona o lo latou faatuatua ma le tapuai i le Atua, o le toatele o i latou na ositaulagaina ia tofiga,

meatotino, ma e oo lava i o latou ola i le puipuiga o lo latou Atua ma lo latou faatuatuaga.¹

I le avea ai ma Au Paia o Aso e Gata Ai ma ni Kerisiano, e faapena foi le i ai o lo tatou faatuatua malosi ma le loloto i le Atua le Tama Faavavau ma Lona Alo, o Iesu Keriso. O le tuuto atu i le Atua o loo tumau pea o se mataupu paia ma patino i le va o i tatou taitoatasi ma lo tatou Mataisau.

O la tatou sailiga mo le ola e faavavau e leai lava se isi mea nai lo se



sailiga ia malamalama po o ai le Atua ma ia toe foi atu e mau faatasi ma Ia. Sa tatalo le Faaola i Lona Tama, “Ma o le ola e faavavau foi lenei ia latou iloa oe le Atua moni e toatasi atoa ma le ua e auina mai o Iesu Keriso lea.”²

E ui i se malamalamaaga o lenei tautinoga na faia e lo tatou Faaola lava Ia, ae o le manatu taatele lava o le natura o le Tama ma le Alo i le aluga o le tele o seneturi faatasi ai ma le tele o mataupu a tagata, ua manino lava e le o ogatusa ma aoaoga a tusitusiga paia.

Tatou te tuuina atu ma le faaaloalo e faapea i le fatu o le talalelei a Iesu Keriso ma lona mana e laveai ai o se malamalamaaga tonu lea o le Tama ma le Alo.³

O le taua o lenei mataupu faavae autu o le talalelei a Iesu Keriso ua faamautu mai e ala i le Uluai Faaaliga a le Perofeta o Iosefa Samita i le 1820. Na tusia e le Perofeta e faapea: “Sa ou vaaia ni Tagata e toalua, o lo laua pupula ma le mamalu e le mafaamatalaina, o tutu mai i o’u luga a’e i le ea. Sa fetalai mai le tasi o i laua ia te au, ma fofoga mai ia te au i lo’u igoa ma fetalai mai, a’o tusi ane i le tasi— *O Lo’u Atalii Pele lenei. Faalogo ia te Ia!*”⁴

O lenei aafiaga a le taulealea o Iosefa, lea na sosoo ma le tele o isi faali’ali’aga ma faaaliga, ua faali mai ai o loo i ai moni lava le Atua; le Tama ma Lona Alo, o Iesu Keriso, o ni tagata tulaga ese ma mavaevae se toalua; na foafoaina le tagata i foliga o le Atua; o lo tatou Tama Faalelagi o le tama moni lava o Iesu Keriso; o loo faaaauu pea ona faali mai le Atua o Ia lava i tagata; O loo latalata mai pea le Atua i taimi uma ma fiafia ia i tatou; ma e tali mai o Ia ia tatou tatalo.

E ui e seasea lava tutusa faaaliga o le Tama ma le Alo i totonu o tusitusiga paia, ae o le mea moni ofoofogia o le Uluai Faaaliga o loo matua talafeauga


lelei ma isi mea na tutupu ia na tusia i tusitusiga paia.

I le Feagaiga Fou, mo se faataitaiga, tatou te faitau ai i le molimau faaiu a Setefano i le taimi na maliu fasia ai. Na ia fai mai, “Faauta, ua ou iloa le lagi ua avanoa, ma le Atalii o le tagata o loo tu i le itu taumatau o le Atua.”⁵

A o i ai i se faaaliga maoae i le Motu o Patamo, na vaai ai le Apose-tolo o Ioane i le “Alii le Atua e ona le malosi uma lava”⁶ faapea ai ma le Tamai Mamoe a le Atua, o le na “faa-tauina . . . i [tatou] i [Lona] lava toto.”⁷

I le Tusi a Mamona, o loo tu ai le aoaoga faavae o le Tama ma le Alo i se molimau mamalu faatasi ma le Tusi Paia. Ua tusia i le Tusi a Mamona le asiasiga a lo tatou Faaola i sa Nifae, lea na faailoa mai ai i le siufofoga o le Tama, i le aofia pe a ma le 2,500 sa Nifae, le Keriso toetu: “Faauta i lou Atalii Pele, o le ua ou fiafia lava i ai, o le ua ou faamamaluina ai lou igoa— ia outou faalogo ia te ia.”⁸

I Talalelei e fa, e 160 taimi o loo faasino atu ai Keriso lava Ia i Lona Tama i le Lagi, ae i se taimi puupuu e tolu aso o Lana galuega i tagata sa Nifae, e pei ona tusia i le Tusi a Mamona, e 122 taimi o loo Ia ta’ua ai Lona Tama.



Mo se faataitaiga, i le Mataio, o loo fetalai ai Iesu, “E le sao atu i le malo o le lagi i latou uma o e fai mai ia te au, Le Alii e, le Alii e; na o le na te faia le finagalo o *lo’u Tama* o i le lagi.”⁹

I le Ioane, o loo Ia molimau mai ai, “E le mafai e le Atalii ona fai o se mea, na o ia lava, a o mea na te vaai atu i *le Tama* o faia.”¹⁰

Ma i le Luka, o loo Ia tautino mai ai, “*Tama e*, ou te tuuina atu lou nei agaga i ou aao.”¹¹

O taimi uma lava e faasino atu ai lo tatou Alii i Lona Tama Faalelagi, Na te faia lava ma le migao a’ia’i ma le agamalu.

I le ta’ua ai o lenei mea, ou te faamoemoe ai o le a leai se fenumiai. O Iesu Keriso o le Ieova sili, o le Atua o Isaraelu, le Mesia folafolaina, ma ona o Lana Togiola le iu, o Ia o lo tatou Faaola ma le Togiola o le lalolagi. O Ia lea na tautino mai ai le Aposetolo o Paulo, “Ona oo ai lea i le gataaga, e tuuina atu ai e [Keriso] le malo i le Atua, o le Tama lea, pe a uma ona faaumatia e [Keriso] o alii sili uma, ma faipule uma, ma e malolosi.”¹²

I le po a o lumanai le Togiola a le Faaola, na Ia tuu atu ai Lana Tatalo sili o Aioiga i Lona Tama. Sa Ia tatalo atu:

“E le faapito la’u tatalo mo i latou nei [o lona uiga, o Ana Aposetolo], a o i latou foi e faatuatua ia te au ona o la latou upu;

“Ina ia *tasi i latou uma*; faapei o oe le Tama o i totonu ia te au, ina ia *tasi i latou i totonu ia te i taua*: ina ia talitonu le lalolagi ua e auina mai au.

“O le manuia foi ua e foai mai ia te au, ua ou foai atu ia te i latou, ina ia tasi o i latou, faapei o i taua ua tasi.”¹³

O le Tama ma le Alo o ni tagata tulaga ese mavaevae, ae ua lotogatasi atoatoa i Laua ma tasi i le mana ma le faamoemoega. O lo La lotogatasi e le mo na o i Laua lava; ae, ua La finagalo ia maua lenei lava lotogatasi i tagata



uma o e o i ai le tuuto e mulimuli ai ma ususitai i a La poloaiga.

E faapefea i se tagata e saili atu ma le naunautai i le Atua ona masani i le Tama ma le Alo? Na folafola mai e lo tatou Faaola, “A o le fesoasoani o le Agaga Paia lea, . . . na te aoao ia te outou i mea uma lava.”¹⁴

I le Tusi a Mamona, na tautino mai ai Nifae, a o lauga atu e uiga i le mataupu a Keriso, e faapea o le Agaga Paia e “molimau i le Tama ma le Alo.”¹⁵

E moni lava o le mana po o le uunaiga a le Agaga Paia e mafai ona lagonaina mai lea taimi i lea taimi, e tusa ai ma le finagalo o le Alii, e soo se tagata lava e tusa lava po o le a le tapuaiga a lena tagata. Ae o le fuataga atoa, po o le meaalofa o le Agaga Paia e faatoa oo mai pe a uma ona taliaina e le tagata i “le loto momomo ma le agaga salamo,”¹⁶ o sauniga o le papatisoga ma le meaalofa o le Agaga Paia¹⁷ e ala i le faaee atu o lima. O nei sauniga ma isi sauniga e faatoa mafai ona faatinoina i lalo o le taitaiga ma le mana o le perisitua a le Atua. I lea tulaga ua aoaoina ai i tatou:

“Ma o le perisitua tele lea e pulea le talalelei ma umia le ki o mealilo o le

malo, o le ki lava lea o le malamalama e uiga i le Atua.

“O lea, o ona sauniga, ua faaalua ai le mana o le faale-atua.”¹⁸

I lea malamalama moni, o le aoaoga faavae o le Tama ma le Alo o le aoaoga faavae lea o le aiga e faavavau. Sa ola muamua uma tagata o ni agaga faatasi ma ni matua faalelagi,¹⁹ faatasi ma Keriso le Ulumatua a le Tama i lenei aiga faalelagi.²⁰

E faapena foi ia i tatou uma lava. O i tatou o fanau a lo tatou Tama Faalelagi.

Sa saunoa mai Peresitene Ezra Taft Benson i se malamalamaaga faape-rofeta e faapea, “E leai se mea o le a sili atu ona faateia ai i tatou pe a tatou pasi atu i le veli i le isi itu nai lo le iloa ina o lo tatou iloa ina lelei o lo tatou Tama [i le Lagi] ma lo tatou masani i ona fofoga.”²¹

Ua ou iloa e le mafai ona faamatalaina i le gagana a tagata na mea ia e na o le Agaga Paia ma le mana o le Atua e mafai ona iloa ai. O lea lava agaga ou te tuu atu ai lau molimau paia o le moni a’ia; i, le latalata mai, ma le lelei o lo tatou Tama Faavavau ma Lona Alo paia, o Iesu Keriso. I le suafa o Iesu Keriso, amene. ■

FAAMATALAGA

1. Tagai Kenneth Scott Latourette, *A History of Christianity, Volume 1: Beginnings to 1500*, rev. ed. (1975) and *A History of Christianity, Volume 2: Reformation to the Present*, rev. ed. (1975); tagai foi Diarmaid MacCulloch, *The Reformation* (2003).
2. Ioane 17:3.
3. Tagai *Lectures on Faith* (1985), 38–44.
4. Iosefa Samita—Talafaasolopito 1:17.
5. Galuega 7:56.
6. Faaaliga 4:8.
7. Faaaliga 5:9.
8. 3 Nifae 11:7.
9. Mataio 7:21; faapoopo le faamamafa.
10. Ioane 5:19; faapoopo le faamamafa.
11. Luka 23:46; faapoopo le faamamafa.
12. 1 Korinito 15:24. Mo se malamalamaaga atili e uiga i le Faaola ma Lana misiona, tagai i le “O Le Keriso Soifua: O Le Molimau a le Au Aposetolo,” *Liahona*, Ape. 2000, 2–3.
13. Ioane 17:20–22; faapoopo le faamamafa.
14. Ioane 14:26.
15. 2 Nifae 31:18.
16. 3 Nifae 9:20; Moronae 6:2.
17. Tagai Ioane 3:5; 3 Nifae 11:31–38.
18. Mataupu Faavae ma Feagaiga 84:19–20.
19. Tagai “O Le Aiga: O Se Folafolaga i le Lalolagi,” *Liahona*, Nov. 2010, 129.
20. Tagai Kolose 1:15; Mataupu Faavae ma Feagaiga 93:21.
21. Ezra Taft Benson, “Jesus Christ—Gifts and Expectations,” in *Speeches of the Year, 1974* (1975), 313; tagai foi “Jesus Christ—Gifts and Expectations,” *Tambuli*, May 1977, 24.



Saunia e Elder Enrique R. Falabella

○ Le Fitugafulu

○ Le Aiga: ○ Le Faleaoga o le Olaga

O lesona e aaoaina i totonu o se aiga—le nofoaga e mafai ona avea ma se vaega o le lagi iinei i le lalolagi.

○ nisi o matua e faia ‘alofaga mo mea sese latou te faia i le aiga, e fai mai o le mafuaaga o lenei mea ona e leai se faleaoga mo tulaga faamatua.

O le mea moni, o loo i ai se a’oga faapena ma e mafai ona avea ma a’oga silisili o a’oga uma. O lenei aoga e ta’ua o le *aiga*.

Pe a ou toe tepa i tua i aso ua mavae o lo’u olaga, ou te manatua taimi faapelepele na oo ia i maua ma lo’u toalua. A o o’u faasoa atu nei mea e manatua ia te outou, atonu tou te manatua ai ni o outou lava foi aafiaga—aafiaga fiafia ma faanoanoa; tatou te aoao mai i ia mea uma.

1. ○ Le Malumalu o le Nofoaga Lea

Ina ua ou foi mai i lau misiona, sa ou fetau i se tamaitai talavou lalelei fogaumi uliuli na pau mai i ona sulu-gatiti. O ona mata mananaia lapopoa lanumeli ma se ataata e faaosoa ataata. Na ou tosina atu ia te ia i le taimi mua-mua lava na ou vaai ai ia te ia.

Na faatu e lo’u toalua le sini ia faaiipoipo i le malumalu, e ui o aso la o le malumalu aupito latalata ana na manaomia ai se malaga e silia i le 4,000 maila (6,400 km).

O le ma faaiipoipoga faalemalo sa fiafia ma faanoanoa foi, ona sa ma faaiipoipo ae na i ai se aso e faamuta ai. Na saunoa mai le taitai i upu “Ia ou te faapea atu ua avea nei ouluga o se tane ma se ava,” ae na vave lava ona sosoo mai ai, ma lana faamatalaga, “seia oo ina ouluga mavae i le oti.”

O lea la faatasi ai ma le ositaulaga sa ma sefeina ai se seleni e totogi ai se pepa malaga mo na o le malaga atu i le Malumalu o Mesa Arisona.

I totonu o le malumalu, ao ma tootutuli ai i le fatafaitaulaga, sa fofogaina ai e se auauna faatagaina ia upu sa ou fia faalogo i ai, lea na folafola mai ai o i ma’ua o se tane ma se ava mo le olaga nei ma le faavavau atoa.

Sa ave i maua e se uo i le Aoga Sa. I le taimi o le fonotaga sa tulai o ia ma faailoa atu i maua i le vasega. Ina ua maea le fonotaga, sa sau se uso ia te a’u ma faatalofa mai ma tuu se 20 tala i lo’u lima. E le’i umi, ae aapa mai foi se isi uso ia te au, ma na ou te’i ona sa ia tuu mai foi i lo’u lima se tupe pepa. Sa vave ona ou sueina lo’u toalua, o le sa i le isi itu o le potu, ma ou valaau atu i ai, “Blanquy, faatalofa i tagata uma!”

E le’i umi ae lava le seleni na ma aoina e toe foi atu ai i Kuatemala.

“I le mamalu selesitila o loo i ai ni lagi po o ni tikeri e tolu;

“Ma ina ia maua le tikeri aupito maualuga e ao i se tagata ona ulu atu i le faatulagaga lenei o le perisitua.”¹

2. Ina Ia Finau, E Manaomia Ai Ni Tagata se Toalua

O se tasi o mautauave a lo’u toalua o le “Ina ia fai se finauga, e manaomia ai ni tagata se toalua, ma o le a le avea lava a’u ma se tasi o i la’ua na.”

Ua manino le fofogaina mai e le Alii o uiga faaalua e tatau ona taitai ai a tatou fegalegaleaiga ma isi tagata. O nei uiga o le faatauanau, tali-tiga, agamaualalo, agamalu, ma le alofa faamaoni.²

O sauaga faaletino i totonu o le aiga o se faiga ua tau le tupu i nisi o aganu, ma o se mea lena tatou te olioli ai. Ae peitai, e le’i taitai lava ona tatou tuua sauaga faalelagona. O le afaina e tupu mai i lenei ituaiga o sauaga e i ai lava i o tatou mafaufau, e faamanualia ai o tatou tagata, e totō ai le ita i totonu o o tatou loto, e faifiio ai o tatou lagona lelei e uiga ia i tatou lava, ma e faatumulia ai i tatou i le fefe.

E le lava le na o le auai i le sauniga o le faaiipoipoga faaselesitila. E tatau foi ona tatou ola i se olaga faaselesitila.

3. ○ Se Tamaititi e Pese o se Tamaititi Fiafia Lea

O le isi lea mautauave e masani ona ta’ua soo e lo’u toalua.

Sa malamalama le Faola i le taua o musika paia. Ua ta’u mai e tusitusiga paia, ina ua maea ona faataunuuina le Paseka ma Ona soo, ma ina “Ua uma ona faia o a latou pese, ona latou o atu lea i le mauga o Olive.”³

Ma i Lana fetalaiga na auala mai i le Perofeta o Iosefa, na Ia fetalai ai, “Aua e fiafia lo’u agaga i le pese a le loto; ioe, o le pese a e amiotonu o se tatalo



mai ia te a'u, ma o le a talia ma se faamanuiaga i luga o o latou ulu.”⁴

E ese le faagaetia o le faalogoina o le pese a se tamaitiiti laitiiti na aoaoina e ona matua e usuina le, “O a'u o se atalii o le Atua.”⁵

4. Ou te Manao E Te Fusiina A'u

O upu “Ou te alofa ia te oe,” “Faa-fetai tele lava,” ma le “Faamagalo mai a'u” e pei o se suauu faamalolo mo le loto. Latou te liliuina loimata i le fiafia. Latou te tuuina atu le mafanafana i le loto ua mafatia, ma latou te faamautuina lagona alofa o o tatou loto. E pei lava ona magumagu laau i le leai o se vai taua, e faapena foi ona faavaivaia lo tatou alofa ma mate ai pe a tatou le faia atua na upu ma faatinoga o le alofa.

Ou te manatua aso na masani ona matou auina atu ai ni tusi aualofa e ala i le meli masani po o le faiga na matou faaputuina ai ni nai sene e telefoni atu ai mai se pusa telefoni ia i latou e pele ia i matou po o le faiga foi na matou tusia ai ni ata ma ni solo aualofa i luga o pepa lanutasi.

O aso nei, o nei mea uma ua pei o ni mea ua leva!

O le tekinolosi i aso nei ma le vaitaimi lenei ua mafai ai ona tatou faia mea ofoofogia. Ua ese le faigofie o le auina atu o se feau tesi o le alofa ma le loto faafetai! E fai e le autalavou i taimi uma. Mata e faaauau pea

lenei faiga ma isi faiga mananaia pe a faavaeina o tatou aiga. O se tasi o feau tesi sa ou maua mai i lo'u toalua e faitauina faapenei: “O se fusi e pei o le lagi, o se kisi e pei o le la, ma se afiafi e pei o le masina. Manuia le aso, ou te alofa ia te oe.”

E le mafai ona ou teena le lagona e pei ua ou oo i le lagi pe a ou maua se feau e pei o lenei.

O lo tatou Tama oi le Lagi o se faataitaiga atoatoa o le faaalua o le alofa. A o Ia tuuina mai Lona Alo, sa Ia faaaogaina upu “O lo'u Atalii pele lena, ua ou fiafia lava ia te Ia.”⁶

5. Ou Te Alofa i le Tusi a Mamona ma Lo'u Faaola, o Iesu Keriso

E tumu a'u i le faagaetia pe a ou vaai o faitau e lo'u toalua le Tusi a Mamona i aso uma. Ma a o ia faia lena mea, e mafai ona ou lagonaina lana molimau i le na o lo'u vaaia o le fiafia o ona foliga a o ia faitauina fuaitau e molimau mai i le misiona a le Faaola.

Ese le atamai o fetalaiga a lo tatou Faaola: “E suesue outou i tusi; aua ua outou manatu tou te maua ai le ola e faavavau: o tusi foi ia o loo molimau ia te a'u.”⁷

O le musuia e lenei mau, sa ou fai atu ai ia Raquel le tama teine a lo'u afafine, o le le'i leva atu ona iloa faitautusi, “O le a sau tala e uiga i le faatu o sau sini e faitau le Tusi a Mamona?”

O lana tali o le, “Ae, Tamamatua, e faigata tele. O se tusi telē.”

Ona ou fai atu lea i ai e faitau mai se itulau ia te a'u. Sa ou aumaia se uati e mafai ona taofi ma taimi ai lana faitauga. Sa ou fai atu, “E na o le tolu minute na e faitau ai, ae o le lomiga faaSipaniolo o le Tusi a Mamona e 642 itulau, o lea la e te manaomia ai ni minute se 1,926.”

O lenei mea atonu na atili fefe ai o ia, o lea sa ou vaevaeina ai le numera lena i le 60 minute ma fai atu i ai, o le a na o le 32 itula na te manaomia e faitau ai—e itiiti ifo i le tasi ma le afa aso!

Ona ia fai mai lea ia te a'u, “E matuai faigofie tele lena, Tamamatua.”

I le faaiuga, sa umi atu se taimi na faaaluina e Raquel, o lona tuagane o Esteban, ma isi fanau a le ma fanau nai lo lenei taimi, ona o se tusi lenei e manaomia ona faitauina ma le agaga o le tatalo ma le mafaufau loloto.

E faasolosolo malie lava, a o tatou aoao e fiafia i tusitusiga paia, o le a tatou alalaga e pei o le Fai Salamo: “Ua matua suamalie au afioga i lo'u gutu! ua sili i lo le meli i lo'u gutu!”⁸

6. E Le Lava le Iloa o Tusitusiga Paia; E Tatau ona Tatou Ola Ai

Ou te manatua le avea o a'u ma se faifeautalai ua mae'a mai le misiona, ma le suesueina ma le filiga o tusitusiga paia, sa ou manatu na ou iloa ina uma. A o ma tafafao faamasani, ma te suesue faatasi ai ma Blanquy i tusitusiga paia. Sa ou faaaogaina le tele o a'u faamatalaga na tusitusi ma mau e faatatau i ai e faasoa atu ai lo'u malamalama o le talalelei ia te ia. Ina ua uma ona ma faaiipoipo, sa oo ina ou maua se iloa loloto a o ou aoaoina se lesona maoae mai ia te ia: Atonu sa ou taumafai e aoao o ia i le talalelei, ae sa ia aoaoina au i le auala e ola ai.

Ina ua faaii e le Faaola le Lauga i luga o le Mauga, sa Ia tuuina mai

le fautuaga poto lenei: “O lenei ai se faalogo i a’u upu nei, ma faia e ia, ou te faatusaina o ia i le tagata poto, ua na fai lona fale i luga o le papa.”⁹

O i latou o e ola i mataupu faavae faaselesitila o loo maua i tusitusiga paia e tuuina atu le faamafanafanaga ia i latou o e mafatia. Latou te aumaia le olioli ia i latou o e atuatuvaie, taitaiga ia i latou o e o leiloloa, toafilemu ia i latou o e le fiafia, ma se taitaiga mautinoa ia i latou o e sailia le upumoni.

O le aotelega:

1. O le malumalu o le nofoaga lea.
2. Ina ia finau, e te manaomia ni tagata se toalua, ma o le a le avea lava au ma se tasi o i laua na.
3. O se tamaitiiti e pese o se tamaitiiti fiafia lea.
4. Ou te manao e te fusiina a’u.
5. Ou te alofa i le Tusi a Mamona ma lo’u Faaola o Iesu Keriso.
6. E le lava le iloa o tusitusiga paia; e tatau ona tatou ola ai.

O nei lesona ma le tele o isi lesona e aoaoina i totonu o se aiga—le nofoaga e mafai ona avea ma se vaega o le lagi iinei i le lalolagi.¹⁰ Ou te molimau atu o le talalelei a Iesu Keriso ma le fuafuaga a lo tatou Tama Faalelagi ua tuuina mai ai se taitaiga mautinoa i lenei olaga ma le folafolaga o le ola e faavavau, i le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 131:1–2.
2. Tagai Mataupu ma Feagaiga 121:41.
3. Mareko 14:26.
4. Mataupu Faavae ma Feagaiga 25:12.
5. “O A’u o se Atalii o le Atua,” *Viiga*, nu. 184.
6. Mataio 3:17; tagai foi Mareko 1:11; 3 Nifae 11:7.
7. Ioane 5:39.
8. Salamo 119:103.
9. Mataio 7:24.
10. Tagai Aoaoga a Peresitene o le Ekalesia: *Tavita O. MaKei* (2003), 43, 150.



Saunia e Elder Erich W. Kopischke

○ Le Fitugafulu

○ Le Taliaina e le Alii

O le sailia ma le mauaina o le taliaina e le Alii, o le a taitai atu ai i le malamalama e faapea ua filifilia ma faamanuia i tatou e Ia.

Ao o’u laitiiti, ou te manatua nisi o taimi e alu ai lo’u tamā ma ave a’u ma te galulue i galuega faatino. Sa i ai se matou togalaau laitiiti i ni nai kilomita mai le mea sa matou nonofo ai, ma sa tele lava mea e fai i taimi uma e sauni ai le togalaau i vaitau taitasi. Ma te galulue i le fale e faasavilivili ai po o le fauina po o le lipeaina o pa. Ou te manatua taimi uma e fai ai nei galuega i le maatiati o le malulu, tetele o le kiona, po o le maligi o timuga. Ae sa ou fiafia i ai. E aoao a’u e lo’u tamā i le ala e fai ai ia mea ma le onosai ma le taliaina.

I se tasi aso sa ia valaaulia ai au e faamau se faovilivili ma lapatai mai, “Manatua, afai e te soona vilimauiina, o le a gau.” O le mimita, sa ou manao ai e faaali atu ia te ia le mea e mafai ona ou faia. Sa ou viliina ma lo’u malosi atoa, ma, sa faapena lava, na gau ia te a’u le faovilivili. Sa fai mai lana tala malie, ona ma toe amata ai lea. E ui lava ina sa ou “faaleaga mea” ae sa ou lagonaina i taimi uma lona alofa ma lona talitonuina o a’u. Ua silia ma le 10 tausaga talu ona maliu o ia, ae o loo o’u manatuaina pea lona leo, lagona lona alofa, olioli i ana faamalosiauga, ma lagona lona taliaina.

O le lagona o le taliaina e se tasi tatou te alolofa i ai o se manaoga taua

lea o le tagata. O le taliaina e tagata lelei e musuia ai i tatou. E faateleina ai lo latou lagona o le taua o le tagata lava ia ma le talitonuga ia te oe lava. O i latou o e le maua le taliaina mai punavai manaomia e masani ona saili atu i se isi mea. Latou te ono su’e atu i tagata e le manatu popole i lo latou tulaga faamanuiaina. Latou te ono pipii atu i uo sese ma fai mea ua latou iloa e le sa’o e taumafai ai e maua le aloaiaina o loo latou sailia. Latou te ono sailia le taliaina e ala i le faia o se ituaiga sitaile faapitoa o lavalava e faaosofia ai lagona o le auai po o tulaga e faatulaga ai. Mo nisi, o le tauivi mo se matafaioi iloga po o se tulaga taualoa e mafai foi ona avea ma se auala e sailia ai le taliaina. Latou te ono faamatalaina lo latou taua e ala i se tofiga latou te umia po o tulaga latou te maua.

E oo foi i totonu o le Ekalesia e le o taimi uma tatou te saoloto ai mai nei ituaiga o mafauaoga. O le sailia o le taliaina mai punavai sese po o le mo mafuaaga le sa’o, e tuu ai i tatou i se auala lamatia—le auala lea e ono taitaieseina ai i tatou ma oo atu ai i le faatafunaga. Nai lo o le lagonaina o le faatauaina ma le talitonu o le tagata ia te ia lava, o le a iu ina tatou lagona le tuulafoaina ma le le amanaiaina.

Sa fautuaina e Alema lona atalii o Helamana, “Vaai ia e tepa atu i le Atua ma e ola ai.”¹ O le punavai autu lava o le faatagaina ma le taliaina tumau, o lo tatou Tama Faalelagi ma Lona Alo o Iesu Keriso. La te silafia i tatou. La te alolofa ia i tatou. La te le taliaina i tatou ona o o tatou suafa faalagilagi po o tulaga tofi. La te le silasila i o tatou tulaga. La te silasila i totonu o o tatou loto. La te taliaina i tatou o le ituaiga tagata e i ai i tatou ma le tagata o loo tatou taumafai ia avea ai. O le sailia ma le mauaina o le taliaina mai ia i La’ua o le a le aunoa ona siitia ma faamalosiau ai i tatou.

O le a ou faasoa atu se mamanu faigofie afai e faaaogaina, e mafai ona fesoasoani ia i tatou uma e maua ai le taliaina sili. O lenei mamanu sa tuuina mai e le Alii e ala mai i le Perofeta o Iosefa Samita: “E moni ou te fai atu ia te outou, o i latou uma o i totonu o i latou o e ua latou iloa ua faamaoni o latou loto, ma ua momomo, ma ua salamo o latou agaga, ma ua loto e tausi a latou feagaiga e ala i le taulaga—ioe, o taulaga uma e poloaiina e A’u, o le Alii, e taliaina i latou e a’u.”²

O lenei mamanu e aofia ai ni laasaga faigofie se tolu:

1. Iloa ua faamaoni ma momomo o tatou loto,
2. Iloa ua salamo o tatou agaga, ma
3. Ia loto e tausi a tatou feagaiga e ala i le taulaga, e pei ona poloaiina ai e le Alii.

Muamua, e tatau ona tatou iloa ua faamaoni ma momomo o tatou loto. E faapefea ona tatou iloa lena mea? Tatou te amata i le faia o se iloiloga faamaoni faaletagata lava ia. O le loto o le ogatotonu lea o o tatou lagona. A o tatou vaavaai i totonu o o tatou loto, tatou te faia se iloiloga mo i tatou lava. O mea e le iloa e se tagata o latalata



mai ia i tatou, tatou te iloina lelei lava. Tatou te iloa o tatou faamoemoega ma manaoga. A tatou faia se manatunatuga faamaoni, ma amiotonu, tatou te le ‘alo pe taufaasese ia i tatou lava.

E i ai foi se ala e faamasino ai pe o momomo o tatou loto. O se loto momomo o se loto lea e agavaivai, e matala, ma e mataalia. Pe a ou faalogo a o fetalai mai le Faaola, “Faaute, ou te tu atu i le puipui ma tu’itu’i atu,”³ Ou te faalogo atu i Lana tu’itu’i mai i le faitotoa o lo’u loto. Afai ou te tatalaina le faitotoa lenei ia te Ia, o le a sili atu lo’u mataala i valaaulia a le Agaga, ma e sili atu lo’u taliaina o le finagalo o le Alii.

Pe a tatou mafaufau loloto ma le faamaoni ma le agaga tatalo i le telē e oo i ai le faamaoni ma le momomo o o tatou loto, o le a aoaoina i tatou e le Agaga Paia. O le a tatou maua se faamautinoaga matagofie po o se aoaiga mālū, e valaaulia ai i tatou e galulue.

Lona lua, e tatau ona tatou iloa ua salamo o tatou agaga. O le upu *salamo* i le Oxford dictionary ua faamatalaina o le “lagonaina po o le faaalua o le faanoanoa i le iloa ua faia

e se tagata se mea sese.”⁴ Afai e i ai so tatou agaga salamo, tatou te faailoa atu a tatou agasala ma faaletonu. E aoao gofie i tatou i “mea [uma] tau i le amiotonu.”⁵ Tatou te lagona le faanoanoa faaleatua ma manao e salamo. O se agaga salamo e naunau e faalogo “i uunaiga a le Agaga Paia.”⁶

O se agaga salamo e faaalua e ala i lo tatou malilie ma naunautai e galulue. Tatou te naunau e faamaualalo i tatou lava i luma o le Atua, naunau e salamo, naunau e aoao, ma naunau e sui. Tatou te naunau e tatalo, “Ae aua le faia lo’u loto, a o lou finagalo.”⁷

O le laasaga lona tolu i le taliaina e le Alii o se filifiliga malamalama e tausi a tatou feagaiga e ala i le taulaga, “ioe, o taulaga uma e poloaiina e A’u o le Alii.”⁸ E tele ina tatou mafaufau e faapea o le upu *taulaga* e faatatau i se mea telē pe faigata ona tatou faia. I ni tulaga faapitoa e ono moni ai lenei mea, ae o le tele lava, e faatatau i le ola ai i aso taitasi o ni soo moni o Keriso.

O se tasi o auala tatou te tausi ai a tatou feagaiga e ala i le taulaga, o le fetagofi atu ma le agavaa i le



faamanatuga i vaiaso taitasi. Tatou te saunia ma le iloa lelei i tatou lava mo le sauniga paia. Tatou te faafou ma faamautu ai a tatou tautinoga paia i le Alii. O le ala lenei tatou te lagona ai Lona taliaina ma maua ai Lana faamautinoaga e faapea, o a tatou taumafaiga ua silafiaina ma ua faamagaloina a tatou agasala e ala i le Togiola a Iesu Keriso. I lenei sauniga, e folafola mai ai e le Alii ia i tatou, a o tatou naunau e tauave i o tatou luga le suafa o Lona Alo ma manatua pea o Ia ma tausi Ana poloaiga, o le a tatou maua pea Lona Agaga e faatasi ma i tatou. O le avea o le Agaga Paia ma o tatou soa tumau o le faailoaga sili lea o le taliaina e le Atua.

O isi aualea e tausi ai a tatou feagaiga e ala i le taulaga, e pei lava le faigofie o le taliaina o se valaauga i le ekalesia ma auauna atu ai ma le faamaoni i lena valaauga pe o le mulimuli ai i le valaaulia a lo tatou perofeta, o Thomas S. Monson, ia aapa atu ia i latou o e o loo tutu i tafāala ma e manaomia le laveaiga faaleagaga. Tatou te tausi a tatou feagaiga e ala i le taulaga i le tuuina atu lea o auunaga le leoa i lo tatou vaifale

po o le lotoifale po o le sueina o suafa o o tatou tuua ma fai galuega faalemalumalu mo i latou. Tatou te tausi a tatou feagaiga e ala i le taulaga i le taumafai pea mo le amiotonu, ia faamaoni, ma faalogo i uunaiga a le Agaga a o tatou ola i o tatou olaga i aso taitasi. O nisi taimi o le tausia o a tatou feagaiga e leai lava se isi mea e sili atu nai lo o le tumau mausali ma le faamaoni pe a pesi solo mai faafitauli o le olaga.

Ina ua uma ona faamalamalama atu le mamanu o le aualea e taliaina ai e Ia, sa faaoga loa e le Alii se aoaoga matagofie e faailoa mai ai le ala tatou te manuia ai o ni tagata taitoatasi ma o ni aiga a o tatou sailia Lana taliaina. Na fetalai o Ia, “Aua o A’u o le Alii, o le a faia i latou ia fua mai e pei o se laau fua tele ua toto i se fanua lelei, i tafatafa o se vaitafe mamā, e fua mai ai se fua e taua tele.”⁹

Pe a tatou ola patino e tusa ai ma le Agaga o le Alii ma lagona Lona taliaina, o le a faamanuiaina i tatou e sili atu i mea tatou te malamalama i ai ma fua mai ai ni fua se tele o le amiotonu. O le a tatou i ai faatasi ma i latou ia sa Ia fetalai atu i ai, “Ua lelei ia, le auauna

lelei e, ma le faamaoni: ua e faamaoni i nai mea iti, ou te tofia oe e pule i mea e tele: ina ulufale mai ia i le fiafia o lou Alii.”¹⁰

O le sailia ma le mauaina o le taliaina e le Alii, o le a taitai atu ai i le malamalama e faapea ua filifilia ma faamanuia i tatou e Ia. O le a tatou maua le talitonuga faateleina o le a Ia taitai i tatou ma taiala i tatou mo le lelei. O Lona alofa tunoa o le a iu ina manino i o tatou loto, i o tatou olaga, ma i totonu o o tatou aiga.

Ma lo’u loto atoa, ou te valaaulia ai outou e saili le taliaina e le Alii ma olioli i Ana faamanuiaga folafolaina. Pe a tatou mulimuli i le mamanu faigofie ua fofola mai e le Alii, o le a iu ina tatou iloa ai ua taliaina i tatou e Ia, e tusa lava po o a o tatou tulaga tofi, tulaga, po o le atoatoa faaleolaga nei. O Lona taliaina agalelei o le a musuia ai i tatou, faateleina lo tatou faatuatua, ma fesoasoani tatou te taulima ai mea uma tatou te fetai ai i le olaga. E ui lava i o tatou luitau, o le a faamanuia, ma faatamaoigaina i tatou,¹¹ ma lagona le toafilemu.¹² O le a tatou i ai faatasi ma i latou o e na fetalai mai ai le Alii:

“Aua le matatau, le fanau laiti e, ona o outou o a a’u, ma ua ou manumalo i le lalolagi, ma o outou o ni o i latou o e ua tuuina mai e lo’u Tama ia te a’u;

“Ma e leai so i latou o e ua tuuina mai e lo’u Tama ia te a’u e leiloa.”¹³

I le suafa o Iesu Keriso, amene. ■

FAAMATALAGA

1. Alema 37:47.
2. Mataupu Faavae ma Feagaiga 97:8.
3. Faaaliga 3:20.
4. *Oxford Dictionaries Online*, “contrite,” oxforddictionaries.com.
5. Alema 21:23.
6. Mosaea 3:19.
7. Luka 22:42.
8. Mataupu Faavae ma Feagaiga 97:8.
9. Mataupu Faavae ma Feagaiga 97:9.
10. Mataio 25:21.
11. Tagai Mosaea 2:22.
12. Tagai Mosaea 2:41.
13. Mataupu Faavae ma Feagaiga 50:41–42.



Saunia e Elder Bruce D. Porter

○ Le Fitugafulu

○ Taeaio Matagofie

E le tatau ona tatou fefefe i le humanai, pe faavaivai i le faamoemoe ma ia lototetele, aua o loo faatasi le Atua ma i tatou.

○ le afaifi o se Aso Tofi i Ierusalem, na feiloai ai Iesu ma Ona soo i le afeafe aupito i luga e faamamalu ai le Paseka. E lei iloina e alii na faatasi atu ma Ia o lenei taumafataga o le a ta'ua i se aso o le Paseka Mulimuli. Pe ana latou iloina lenei mea ma lona uiga, semanu latou te fetagisi.

Ae peitai, sa malamalama lelei lo latou Matai, o le a amata i se taimi lata mai ia puapuaga i Ketesemane faapea ma Kolokota. O le a oo mai ia taimi sili ona faigata i le talafaasolopito o le lalolagi; ae ui i lea, na fetalai atu Iesu ia te i latou, “E maua foi outou e le puapuaga i le lalolagi: a ia outou loto tetele; ua ou manumalo i le lalolagi” (Ioane 16:33).

Ua tatou ola nei i se vaitaimi o le fesouaiga ma le le mautinoa, o se taimi na valoia e le Alii ia Enoka o le a faailogaina o “aso o le amioleaga ma le tauimasui” (Mose 7:60). O loo faamalumalu mai i o tatou luma ia luitau ma aso faigata, peitai o loo i ai se mafuaaga e tatau ai ona tatou loto tetele ai ma fiafia aua ua tatou ola i le tisipenisione mulimuli, lea ua toefuatai ai e le Atua Lana Ekalesia ma le malo i le fogaeleele ina ia sauniuni ai mo le afio mai o Lona Alo.

Na saunoa mai Peresitene Boyd K. Packer i se tasi taimi e uiga i fanau a

lana fanau ma le lalolagi ua faateleina le faigata o loo latou ola ae ai. Na ia saunoa ai: “O le a latou vaai i le tele o mea e tutupu e oo mai i vaitaimi o o latou olaga. O nisi o nei mea o le a luitauina ai lo latou lototetele ma faalateleina ai lo latou faatuatua. Ae afai latou te saili ma le agaga tatalo mo le fesoasoani ma le taiala, o le a tuuina atu ia i latou le mana e faatoilalo ai mea faigata.”

Na ia faaopoopo mulimuli ane: “O uiga taua o amioga lea e tatau ona faalagolago i ai ia tagata ua matuai faatupulaia le leaga i se saosaoa faateleina. Ae ui i lea, ou te le fefe lava i le humanai” (“Aua le Fefe,” *Liahona*, Me 2004, 77, 78).

Uso e ma tuafafine, e le tatau ona tatou fefefe i le humanai, pe faavaivai

i le faamoemoe ma ia lototetele, aua o loo faatasi le Atua ma i tatou. O upu muamua lava na tusia o le apo-apoiga a Iesu i Ona soo fou faatoa valaauina i Kalilaia, o upu e fa ia o le lapataiga: “Aua e te fefe” (Luka 5:10). Na Ia taua soo lena lapataiga i le tele o taimi i Lana galuega talai. Na fetalai mai le Faaola i Lana Au Paia i lo tatou vaitaimi, “Ia fiafia, ma aua le fefefe, aua o A'u o le Alii ua Ou faatasi ma outou, ma o le a tu i tafatafa o outou” (MF&F 68:6).

O le a tu le Alii i tafatafa o Lana Ekalesia ma tagata ma tausia ma le saogalemu i latou seia oo i Lona toe afio mai. O le a i ai le filemu i Siona ma ona siteki, aua ua Ia folafola mai “ia avea le faapotopotoina faatasi i luga o le laueleele o Siona, ma i luga o ona siteki, mo se puipuiga, ma mo se sulufaiga mai le afa, ma mai le toasa pe a sasaa mai e aunoa ma le suia i luga o le lalolagi atoa” (MF&F 115:6).

O le Ekalesia e tu o se pa puipui mo le saogalemu o ona tagata. E ui o le a matuai faigata ia tulaga o le lalolagi i nisi o taimi, ae o le a mauaina e le Au Paia o Aso e Gata Ai le malutaga i siteki o Siona. Ua folafola mai e le Alii e faapea o le a taavale atu le maa na tofi mai le mauga e aunoa ma lima, seia tumu ai le lalolagi atoa (tagai Tanielu 2:31–45; MF&F 65:2.)



Ma e leai se mana faaletagata e mafai ona tumau ai i lona ala, aua o le Atua o le mataisau o lenei galuega a o Iesu Keriso o le maa tulimanu.

Na maua e le perofeta o Nifae se faaaliga e faapea i aso e gata ai o le a alu ifo ai le mana o le Tamai Mamoe a le Atua i “luga o tagata o le feagaiga a le Alii” ma o le a “faaauppegaina i latou i le amiotonu ma le mana o le Atua i le mamalu tele” (1 Nifae 14:14).

Ua mafai ona faaauppegaina i tatou taitoatasi, ma o tatou aiga, i le mana o le Atua e avea ma puipuiga pe afai tatou te tumau faamaoni i Le Ekalesia a Iesu Keriso o le Au Paia o Aso e Gata Ai ma tuu atu i le Agaga e avea ma o tatou taijala. E ono oo mai tofo-tofoga, ma e atonu tatou te le malamalama i mea uma e tutupu ia i tatou po o mea o siomia ai i tatou. Ae a tatou faalagolago atu ma le agamaualalo ma le filemu i le Alii, o le a Ia tuuina mai ia i tatou le malosi ma le taitaiga i luitau uma tatou te fetaiiai. Afai e na o le pau lava lo tatou manao o le faafiafaina o le Alii, o le a faamanuiaina i tatou i se filemu loloto i o tatou loto.

I le vaitaimi o le popofou o le Toefuataiga, na fetaiiai ai tagata o le Ekalesia ma luitau ogaoga. Na saunua mai Peresitene Polika Iaga e uiga i na vaitaimi: “Ina ua siosiomia e tagata leaga, faatasi ai ma le oti ma le faatafunaina ua taufaamata’u mai i itu uma, ou te lei iloa se isi lagona sei vagana ai lo’u lagonaina o le olioli, e pei lava o lo’u agaga, e pei ona i ai nei. Atonu e foliga mai le lumanai e le mautonu, ae ou te lei vaaia lava se taimi i lenei Talalelei ou te lei iloaina ai o le tau-nuuga o le a faamanuiaina ai galuega o le upumoni” (*Aoaoga a Peresitene o le Ekalesia: Polika Iaga* [1997], 363).

O lau soa o le misiona o, Paulo, o se tagata e faaaliga lava pea i taimi uma lona lototele. I le avea ai ma se tamā talavou, sa faaletonu lona faiai. E ui i

faigata na mulimuli mai, ae na faaaauu lava lona auauna atu ma le fiafia i isi. Na ia ulu mai i se tasi taimi i lo’u ofisa ao nofo i lona uluai nofoa faataavalevale ma sa ia faapea mai, “Ua faaleleia le olaga i se nofoa faataavalevale e alu i le afi!” Ou te manatuaina pea o ia, i nai tausaga ao lei maliu o ia, ao uuina maualuga le sulu o le Olimipeka ao tietie i lona nofoa faataavalevale ao patipati mai le faitau fia selau [o tagata]. E le mate lava le faatuatua o Paulo, e pei lava foi o lona sulu e mumu pea lava i afā o le olaga.

Ao ou aoga i le Iunivesite o Polika Iaga, sa matou nonofo faatasi i se fale ma nisi alii talavou. O le tagata na ma potu faatasi, o Pulusi, o se tagata lea ua sili ona lelei ua ou iloaina. Matou te lei faalogo lava ua ia fai maia se tala le lelei e uiga i soo se tagata po o soo se tulaga, ma e te lagonaina lava se faamalosiuga pe a lua faatasi. O lona lototele na tafe mai i se talitonuga tumau i le Faaola ma Lana talalelei.

I se tasi aso malulu aisa, sa savali mai ai se isi au uo, o Toma mai le lotoa o le iunivesite. Ua ta lona o le 7 i le taeao, ma sa gaogao ma pogisa le lotoa. Na toulu malosi le kiona, ma sa malosi foi le agi o le matagi. “Oka se leaga o le tau,” o le manatu lea o Toma. Sa ia savali atili atu, ma i fafo atu o le pogisa ma le kiona, sa ia faalogoaina se tagata o loo pese.

Ma le mautinoa lava, sa savali mai i le mafiafia o le kiona, la ma’ua uo e fiafia i taimi uma, o Pulusi. Sa faalolua atu i le lagi ona lima, ma ia peseina se pese mai le tala faatino faamusika o le *Oklahoma*: “Oka, se taeao ina a matagofie! Oka, se aso ina a matagofie! Ua ou mauaina se lagona manaia, o le a lelei mea uma mo a’u” (Richard Rodgers and Oscar Hammerstein II, “Oh, What a Beautiful Morning” [1943]).

Talu mai na tausaga, sa avea lona siufofoga fiafia i se afā pogisa,

ma se faatusa o le faatuatua ma le faamoemoe mo au. E tusa lava pe ua faateleina le amioleaga i le lalolagi, e mafai lava e i tatou o avea ma Au Paia o Aso e Gata Ai ona pepese ma le fiafia, ma le iloaina o loo faatasi mai ia mana o le lagi i le Ekalesia a le Atua ma ona tagata. E mafai ona tatou fiafia i le iloaina lea o loo i ai i o tatou luma se taeao matagofie—o le taeao o le aso o le meleniuma, pe a toetu mai le Alo o le Atua mai le itu i Sasae ma toe nofotupu i luga o le fogaeleele.

Ou te mafaufau foi e uiga i nisi taeao matagofie e lua o loo i le talafaa-solopito o le lalolagi. I le tautotogo o le 1820, i le taeao o se aso matagofie ma le maninoa i Palamaira, Niu Ioka, na ulu atu ai se alii talavou e igoa ia Iosefa Samita i le togalaau ma tootuli i le tatalo. O le tali o lona tatalo, na faaali mai ai le Tama ma le Alo, ma na amatalia ai le tisipenisione o le atoaga o taimi ma le Toefuataiga o le Ekalesia a Iesu Keriso i le fogaeleele.

Ae i se isi foi taeao matagofie e toeitiiti lava atoa le 2,000 tausaga ua mavae i fafo atu o pa o le aai o Ierusalem. E lei masalomia le susulu matagofie o le la i lona taeao o le Eseta. Sa o mai se vaega toalaite o tamaitai e asi le tuugamau maa, ma le faamoemoe e uuina le tino o lo latou Alii na faasa-tauroina. Na faafeiloai i latou e agelu e toalua ma faapea atu: “Se a le mea tou te saili ai le ua soifua i e ua oti? E le o iinei o ia, a ua tu” (Luka 24:5–6).

O le manumalo o Iesu Keriso mai le agasala ma le oti, ou te molimau atu ai. O le fuafuaga o le alofa mutimutivale a lo tatou Tama e Faavavau ma Lona alofa tumau, ou te molimau atu ai foi. A o tatou ala mai i taeao taitasi, sei o tatou tepa atu i le lagi ma faapea atu, “Oka, o se taeao ina a matagofie,” Ou te tatalo atu ai i le suafa o Iesu Keriso, amene. ■



Saunia e Elder D. Todd Christofferson

○ Le Korama a Aposetolo e Toasefululua

Togiola

I le tulaga o lo tatou mulimuli ai ia Keriso, tatou te saili ai e auai ma faalautele Lana galuega togiola.

I taimi o pulega faakolone, sa tele se manaoga mo tagata faigaluega i Amerika. I le vaitau o le seneturi lona 18 ma le amataga o le seneturi lona 19, sa faaopoopo ai i Peretania Tele, Siamani, ma isi atunuu Europa ia tagata mai isi atunuu e fia galulue, ae toatele i latou na naunau e malaga sa le gafatiaina le tau o femalagaaiga. Sa taatele lava mo nei tagata le malaga i lalo o se maliega po o se feagaiga na folafola atu ai e galulue pe a taunuu mo se vaitaimi patino e aunoa ma ni totogi e fai ma totogi mo a latou malaga. O isi na o mai ma le folafolaga o le a totogiina e tagata o o latou aiga o loo i ai i Amerika o latou pasese pe a taunuu, ae afai e le tupu lena mea, e noatia tagata fou nei e totogi a latou lava pasese e ala i galuega le totogia mo se vaitami. O le upu sa faaaoga e faamatala ai nei tagata galulue fua o le “tagata faaola.” E ao ona latou toe faaola pe totogi maia le tau o a latou pasese, i se lagona e faatau lo latou saolotoga—e ala i a latou galuega.¹

O se tasi o suafa aupito sili ona taua e faamatalaina ai Iesu Keriso o le Togiola. E pei ona faailoa atu i lau tala puupuu o tagata malaga “faaola,” o le upu *faaola* o lona uiga o le totogi lea o se tautinoga po o se aitalafu. O le *faaola* e mafai foi ona faauigaina o le laveai pe faasaoloto e ala i le totogiina

o le tau. Afai e solia e se tagata se mea sese ma toe faasa’o pe faia ni fetuunai-ga, tatou te faapea ua ia faaolaina o ia lava. Ua fautua mai e nei uiga taitasi ni vaega eseese o le togiola sili na faataunuaina e Iesu Keriso e ala i Lana Togiola, lea e aofia ai, i le faauigaga a le lomifefiloi, “ia laveai mai le agasala ma ona faasalaga, e ala i se taulaga na faia mo le tagata agasala.”²

E lua vaega o le Togiola a le Faaola. Muamua, ua togiola ai le solitulafono a Atamu atoa ai ma le Pa’ū o le tagata

lea na sosoo ai e ala i le faatoilaloina o le mea e mafai ona ta’ua o aafiaga fitoitonu o le Pa’ū—o le oti faaletino ma le oti faaleagaga. O le oti faaletino ua malamalama lelei i ai; o le oti faaleagaga o le vavaeeseina o le tagata mai le Atua. I upu a Paulo, “Aua faapei ona oti uma ia Atamu, e faapea foi ona faaolaina uma ia Keriso” (1 Korinito 15:22). O lenei togiolaina mai le oti faaletino ma le oti faaleagaga e mo tagata uma lava e aunoa ma ni tuutuuga.³

O le vaaiga lona lua o le Togiola a le Faaola o le togiola mai le mea e mafai ona faaupuina o taunuuga fitoitonu o le Pa’ū—o a tatou lava agasala e ese mai le solitulafono a Atamu. Ona o le Pa’ū ua tatou fananau mai ai i se lalolagi faaletino i le mea o loo i ai le agasala, o lona uiga o le le usiusitai i tulafono na faavaeina faalelagi—lea e aafia ai tagata uma. I Lana fetalaiga ia i tatou uma, na faapea mai ai le Alii:

“E faapea lava pe a amata ona latou tutupu a’e, ona tuputupu o le agasala i o latou loto, ma latou te tofo i le oona, ina ia latou iloa ai ona faataua le lelei.



“Ma ua tuu atu ia te i latou ia iloa le lelei mai le leaga; o le mea lea o i latou o ni pule ia i latou lava” (Mose 6:55–56).

Ona tatou te tali atu mo i tatou lava ma tatou faia ni filifiliga, o le togiolaina o a tatou lava agasala e i ai la tuutuuga—o tuutuuga i le ta’uta’u atu ma le lafoaia o agasala ma liliu atu i se olaga faaleatua, po o se isi faaupuga, o tuutuuga o le salamo (tagai MF&F 58:43). “O le mea lea,” ua poloai mai ai le Alii, “ia aoao atu i lau fanau, e ao i tagata uma, i soo se mea lava, ona salamo, po o le a leai se ala e mafai ai ona latou mautofi i le malo o le Atua, ona e leai se mea le mama e mafai ona mau iina, pe mau i ona luma” (Mose 6:57).

O puapuaga o le Faola i Kete-semane ma Ona tiga i le satauro ua togiola ai i tatou mai le agasala e ala i le faamalieleina o manaoga o le faamasinotonu i o tatou luga. Na te tuuina mai le alofa mutimutivale ma faamagaloina i latou o e salamo. Ua faamalieleina foi e le Togiola le aitalafu o nofoaitalafu ai le faamasinotonu ia i tatou e ala i le faamaloloina ma le tausia o i tatou mo soo se mafatiaga tatou te onosaia ma le taumamaina. “Aua faauta, e mafatia o ia i tiga o tagata uma, ioe, tiga o tagata ola uma, o tane, o fafine, ma tamaiti, o e ua i ai i le aiga o Atamu” (2 Nifae 9:21; tagai foi i le Alema 7:11–12).⁴

I le tulaga o lo tatou mulimuli ai ia Keriso, tatou te saili ai e auai ma faalautele Lana galuega togiola. O le au-aunaga silisili lava tatou te tuuina atu i isi i lenei olaga, lea e amata ia i latou o o tatou lava aiga, o le aumaia lea o i latou ia Keriso e ala i le faatuatua ma le salamo ina ia mafai ona latou tofo i Lana Togiola—o le filemu ma le olioli i le taimi nei, ma le tino ola pea ma le ola e faavavau i le olaga a sau. O le galuega a a tatou faifeautalai o se faailoaga tele lea o le alofa togiola



o le Alii. I le avea ai ma Ana avefeau faatagaina, latou te ofo atu faamanu-iaga le mafaatusalia o le faatuatua ia Iesu Keriso, salamo, papatisoga, ma le meaalofa o le Agaga Paia, lea e tatala ai le ala i le toe fanauina faaleagaga ma le togiolaina.

E mafai foi ona tatou fesoasoani i le Alii i le togiolaina o i latou ua maliliu. “O toeaina faamaoni o lenei tisipenisione, pe a tuua e i latou lenei olaga faaletino, e faaaaua a latou galuega i le talaiga o le talalelei o le salamo ma le togiolaina, e ala i le taulaga a le Alo e Toatasi na Fanaua o le Atua, i totonu o e o loo i le pouliuli ma o loo i lalo o le pologa o le agasala i le lalolagi tele o agaga o e ua oti” (MF&F 138:57). Ona o faamanu-iaga o sauniga sui tatou te faatinoina mo i latou i totonu o malumalu o le Atua, lea e oo lava ia i latou na maliliu i noataga o le agasala e mafai lava ona faasaolotoina.⁵

E ui o vaaiga aupito sili ona taua o le togiola lea e faatatau i le salamo ma le faamagaloga, ae o loo i ai foi se vaaiga faaletino taua tele. O loo tusia na femaliuai Iesu ma fai le lelei (tagai Galuega 10:38), lea sa aofia ai ma le faamaloloina o e mamai ma vaivai, tuuina atu o meaai i motu o tagata fiaai, ma aoao atu i se ala sili atu ona lelei. “O le Atalii o le tagata e lei sau ia ina ia auauna mai tagata ia te ia, a ia auauna atu ia, ma foaiina atu lona

ola e fai ma togiola e sui ai tagata e toatele” (Mataio 20:28). E mafai foi la ona tatou o atu, e ala i le uunaiga a le Agaga Paia, ma faia le lelei i le mamanu togiola a le Matai.

O le uiga o lenei ituaiga o galuega togiola o le fesoasoani lea i tagata i o latou faafitauli. O lona uiga o le faauo atu i tagata matitiva ma vaivai, faamāmā i mafatiaga, faasa’oina o mea sese, puipuia o le upumoni, faamalololia o le tupulaga faiae, ma le ausiaina o le puipuiga ma le fiafia i le aiga. O le tele o la tatou galuega togiola i le lalolagi o le fesoasoani lea i isi ia tuputupu ae ma ausia o latou faamoe-moega ma manaoga amiotonu.

O se faaitaiga, mai le tusi faitau a Victor Hugo le *Les Misérables*, e ui o se tala fatu, ae ou te ootia ai lava ma uunaia ai au i taimi uma. E latalata i le amataga o le tala, sa tuu atu ai e Bishop Bienvenu ni meaai ma se malutaga mo le po ia Jean Valjean, e leai sona aiga, lea e lei leva ona tatala mai i tua sa falepuipui mo le 19 tausaga mo le gaoia o se papa falaoa e fafaga ai le fanau fiaai a lona tuafafine. I lona loto maaa ma le loto tiga, na tauia ai e Valjean le agalelei o Bishop Bienvenu i le gaoia o ana oloa siliva. Mulimuli ane sa taofia e leoleo masalosalo, ma sa tau atu ma le pepelo e Valjean o siliva ia o se meaalofa mo ia. Ina ua toso atu e leoleo o ia i le fale o le epikopo, sa faateia tele Valjean, ina ua faamaonia e Bishop Bienvenu lana tala ma faamautinoa atili atu e faapea, “‘Ae! Sa ou avatua foi ma moligao, lea e siliva e pei o isi mea, lea e mafai ona faatauina i le lua selau tala. Aisea na e le avea ai faatasi ma au ipu?’ . . .

“Sa faalatalata atu le epikopo ia te ia, ma fai atu, i se leo lemu:

“‘Aua nei galo, aua lava nei galo ua e folafola mai ia te au e faaoga lenei siliva e avea ai oe ma se tagata faamaoni.’

“Sa tu Jean Valjean, e matua le manatua lava lenei folafolaga, ma lona le mautonu. Sa faaauau le tala a le . . . epikopo, ma le malu:

“Jean Valjean, lo’u uso: e le toe pulea lava oe e le leaga, ae o le lelei. O lou agaga lea ua ou faatauina mo oe. Ua ou aveesea mai mafauauga pogisa ma mai le agaga o le malaia, ma ou te avatu [lou agaga] i le Atua!”

Sa avea moni lava Jean Valjean ma se tagata fou, se alii faamaoni ma se tagata na fesoasoani i le tele o tagata. I lona olaga atoa sa ia tausua ai lava moligao siliva e lua, e faamanatu atu ai ia te ia le togiolaina o lona olaga mo le Atua.⁶

O nisi ituaiga o togiola faaletino e oo mai e ala i se taumafaiga fai faatasi. O se tasi lea o mafuaaga na faatu ai e le Faaola se ekalesia. I le faatulagaina ai i korama ma ausilali ma i siteki, uarota, ma paranesi, e le mafai ona tau ina tatou aoao atu ma fefaamalosia’aua’i le tasi i le isi i le talalelei, ae e mafai foi ona tatou talosagaina le fesoasoani a tagata ma punaoa e taulima ai manaoga o le olaga. O tagata e galulue lava na o i latou po o ni vaega na fatu mo ni faamoemoega patino e le mafai ona latou sauniaina i taimi uma ni auala e lava mo le taulimaina o ni luitau tetele. I le avea ai ma soo o Iesu Keriso ua avea ai i tatou ma se nuu o Au Paia ua faatulagaina e fesoasoani e togiola ia manaoga o o tatou uso a Au Paia ma le toatele o isi i le toatele tatou te mafai ona aapa atu i ai i le salafa o le lalolagi.

Ona o a tatou taumafaiga agaalofa, ia na ta’ua e Elder Dallin H. Oaks, e patino lava i le tausaga na sei mavae atu nei, ua maua ai nei e tagata e 890,000 i atunuu e 36 le suavai mama, 70,000 tagata i atunuu e 57 ua maua nofoa faataavalevale, 75,000 tagata i atunuu e 25 ua faaleleia la latou vaai, ma tagata i atunuu e 52 ua mauaina fesoasoani ina ua mavae ai faalavelave



faalenatura. I le galulue faatasi ai ma isi, ua fesoasoani atu ai le Ekalesia e tuu atu ni tui puipui taua i fanau e 8 miliona ma fesoasoani atu i tagata Suria i tolouapiga a tagata sulufai i Take, Lepanona, ma Ioritana i mea manaomia o le olaga. I le taimi lava lea e tasi, na maua ai e tagata le tagolima o le Ekalesia le faitau miliona o talā mai taulaga anapogi ma isi fesoasoaniga faaleulefele i le 2012. Faafetai atu mo lo outou lotofoai.

O mea uma nei e le amata faitauina ai galuega a tagata taitoatasi o le agalelei ma le lagolago—o meaalofa o meaai, lavalava, tupe, tausiga, ma le faitau afe o isi ituaiga o faamafanafanaga ma le agaalofa lea e mafai ai ona tatou auai i le galuega FaaKeriso o le togiola. A o ou tamaitiiti sa ou molimauina ai faatinoga a lou lava ia tina e togiola ai se tamaitai le tagolima. I le tele o tausaga talu ai a o laiti lana fanau, sa faia ai se taotoga ogaoga o lo’u tina lea sa toeitiiti lava a maliu ai ma faataotolia ai i lona moega mo le tele o le taimi lea sa toetoe atoa ai le tausaga. I lea taimi, sa fesoasoani ai tagata o le aiga ma le uarota ia Tina ma lo matou aiga. Mo se fesoasoaniga faaopopo, sa fautuaina ai

e le peresitene o le Aualofa, o Sister Abraham, e faafaigaluega e ou matua se tamaitai i le uarota sa matuai manaomia lava se galuega. A o faamatalaina ai leni tala, o le a ou faaogaina le igoa fatu o Sara ma Ana mo leni tamaitai ma lana tama teine. O le tala leni a lo’u tina:

“E mafai ona ou vaai manino i ai e pei lava na tupu ananafi. O iina sa ou taoto ai i le moega, ma aumai ai e Sister Abraham ia Sara i le faitotoa o le potumoe. Sa ou le fiafia. Sa tu iina se tagata na matua le tosina i le vaai faatoa ou feiloai i ai—e pae lava, eleelea, veuveua lona ulu; faataua’au pepē; ma na punou i lalo ma pulatoa i le fola. Sa ia laeiina se ofu fale tuai sa matuai telē mo ia. Sa le mafai ona ea mai i luga ma tautala lemu mai, lea sa ou tau le lagona. Sa lafi i ona tua se teineitiiti laitiiti pe a ma le tolu tausaga le matua. O le a le mea o le a ou faia i leni tagata? Ina ua latou tuua le potu, sa ou tagi tu’i. Sa ou manaomia se fesoasoani ae le o nisi faafitauli. Sa nofo ai Sister Abraham mo sina taimi faatasi ma Sara ma e lei pine ae mama uma le fale ma saunia sina meaai lelei. Sa talosaga mai Sister Abraham ia te au ia faataitai o ia mo



ni nai aso, ona sa oo si teine lea i ni taimi faigata lava ma o loo manaomia se fesoasoani.

“I le taeao na sosoo ai ina ua usu mai Sara, sa iu na ou fai atu ia te ia e sau i talaane o lou moega lea e mafai ai ona ou lagonaina o ia. Sa ia fesili mai pe o le a se mea ou te mana'o na te faia. Sa ou ta'u i ai ona fai atu lea, 'Ae o le mea aupito sili ona taua o la'u fanau tama; faaalu sou taimi ma i latou, faitau atu ia i latou—e sili atu lo latou taua nai lo le fale.' O ia o se kuka lelei ma sa ia tausii mama le fale, fai tagamea ma sa lelei o ia i tama.

“I le aluga o vaiaso, sa ou iloa ai le tala ia Sara. [Ona e faaletonu lana faalogo, sa le lelei ai lana aoga ma iu ai ina le toe alu i le aoga. Sa faaipoi po laitiiti atu o ia i se alii e onā i taimi uma. Sa fanau Ana ma avea ai ma fiafiaga sili o Sara. I se tasi po taumalulu sa foi mai ai lona toalu onā i le fale, ave faamalosii Sara ma Ana i totonu o le taavale i o la ofu moe, ma ave tiai i talaane o le alatanu. La te lei toe vaai lava ia te ia. I le leai o ni seevae ma le maalilili, sa savavali ai Sara ma Ana i le tele o maila i le fale o lona tina.] Sa malie lona tina latou te nonofo ae ia totonu i le faia o galuega uma i totonu o le fale ma kuka ia meaai, ma tausii lona uso ma lona tuagane sa o i le aoga.

“Sa matou avea Sara i le fomai taliga, ma maua ai sana mea faalogo. . . . Sa matou ave o ia e fai lana aoga mo tagata matutua, ma sa maua ai lana tipiloma o le aoga maualuga. Sa alu o ia i aoga afiafi ma mulimuli ane faauu mai le kolisi ma faiaoga mo aoga o

manaoga faapitoa. Sa faatau sana tamai fale. Sa faaipoi Ana i le malumalu ma maua sana fanau e toalu. Sa mulimuli ane faia nisi taotoga o Sara i ona taliga ma iu ai ina lelei lana faalogo. I ni tausaga mulimuli ane na litaea ai o ia ma auauna atu faamisiona. . . . Sa faafetai mai Sara ia i matou ma faapea mai na ia aoaoina le tele o mea mai ia te au, aemaise lava ina ua ou tau atu ia te ia e sili atu le taua o o'u atalii i lo le fale. Sa ia fai mai na aoao ai o ia ina ia taulima Ana i lona ala. . . . O Sara o se tamaitai faapitoa tele.”

I le avea ai ma ni soo o Iesu Keriso, e ao ona tatou faia mea uma e mafai ona tatou faia e togiola ai isi mai mafatiaga ma avega. E oo lava i a tatou auaunaga aupito silisili o le togiola lea o le a taitai atu ai i latou ia Keriso. A aunoa ma Lana Togiola mai le oti ma mai le agasala, ua na o le talalelei lava la o le faamasinotonu faaagafesootai tatou te mauaina. O lona mea e mafai ona maua ai na o sina fesoasoani ma le faaleleiga i le taimi nei, ae e le maua ai la se mana e to ai mai le lagi le faamasinoga atoatoa ma le alofa mutimutivale le mafatiaga. O le togiola sili lava ua ia Iesu Keriso ma ua na o Ia lava e maua ai. Ou te faailoa atu ai ma le lotomaulalo ma le lotofaafetai o Ia o le Togiola, i le suafa o Iesu Keriso, amene. ■

FAAMATALAGA

1. See *Merriam-Webster's Collegiate Dictionary*, 10th ed. (1993), “redemptioner.”
2. *Webster's New World College Dictionary*, 3rd ed. (1988), “redeem.”
3. “Ua togiola le Alo o le Atua mo le uluai sala, lea e le mafai ai ona tali o agasala a matua i luga o ulu o fanau, ona ua mama i latou mai le faavaega o le lalolagi” (Mose 6:54). E ala i le Togiola a Keriso, ua faaitoilalo ai e tagata uma le tuugamau ma e toetutu i le tino ola pea. Ma le isi, ua faaitoilaloina ai e tagata uma le oti faaleagaga e ala i le toe aumai o i latou i le afioaga o le Atua ina ia faamasinoina. Na fetalai Iesu, “[E] pei ona sii ae o au i luga [o le satauro] e tagata ia faapea foi ona sii ae i luga tagata

e le Tama, e tutu i ou luma, e faamasinoina i a latou galuega, pe ua lelei pe ua leaga” (3 Nifae 27:14). O i latou ua faamamaina mai le agasala o le a tumau pea ma le Atua i le malo faalelagi, ae o i latou e le i salamo ma eleelea e le mafai ona mau faatasi ma se Atua paia, ma a uma le Faamasinoga e tatau ona latou o ese ma faapena ai ona toe mafatia i le oti faaleagaga. O nisi taimi e faasino ai i lenei mea o se oti faalua po o le mafatia i le oti faaleagaga mo se taimi lona lua. (Tagai Helamana 14:15–18.)

4. E tusa ai ma a tatou lava agasala, o loo ta'ua i tusitusiga paia nisi e le i mauaina le faamanuiaga o le togiola: “E tumau ai e amioleaga e peiseai e leai se togiola na faia mo i latou, vagana ai le tatalaina o fusi o le oti” (Alema 11:41). “O ia o le na te le faaoga se faatuatua e salamo ai, ua tualiali i le tulafono atoa o manaoga o le faamasinotonu; o lea ua nao ia o le ua i ai le faatuatua e salamo ai, ua aumai ai le fuafuaga tele ma faavavau o le togiolaina” (Alema 34:16). Afai e teena e se tagata le Togiola a le Faaola, e tatau ona ia totogi lana aitalafu e faamasinotonu ai o ia lava. Na fetalai mai Iesu, “Aua faauta, o A'u, o le Atua, na mafatia i nei mea mo tagata uma, ina ia latou le mafatia pe afai latou te salamo; Ae afai latou te le salamo, o le a latou mafatia e pei lava o A'u” (Mataupu Faavae ma Feagaiga 19:16–17). O se mafatiaga a se tagata e le togiolaina mo agasala ua ta'ua o seoli. O lona uiga o le gauai atu lea i le tiapolo, ma ua faamatalaina i faataoto faatusitusiga paia o le noatia lea i filifili po o le lepa afi ma le teio. Sa augani atu Liae i ona atalii e filifili le Togiola a Keriso “ma aua le filifilia le oti e faavavau, e tusa ma manaoga o le tino ma le leaga o i ai i totonu, lea ua tuu atu ai i le agaga o le tiapolo le mana e faatagataotaua ma aumai ai outou i lalo i seoli, ina ia mafai ona nofotupu o ia i luga o outou i lona lava malo” (2 Nifae 2:29). E faapena foi, ona o le Togiola a Iesu Keriso, ua i ai foi le mutaaga o seoli [i le] toetu mulimuli” (Mataupu Faavae ma Feagaiga 76:85). Ua na o “atalii o le malaia” ua “nao i latou o e o le a oo i ai i luga le mana [tumau] o le oti faalua; ioe, e moni, nao i latou lava ia o e o le a le togiolaina i le taimi tatau ai a le Alii, pe a mavae mafatiaga o lona toasa” (Mataupu Faavae ma Feagaiga 76:32, 37–38).
5. Sa vivii le Perofeta o Iosefa Samita, “Tuu atu i e ua oti e tautala mai i viiga e faavavau i le Tupu o Emanuel, o le na faauuina, ae lei i ai le lalolagi, le mea e mafai ai e i tatou ona togiolaina i latou i fafo mai lo latou falepuipui; ona o le a faasaolotoina pagota” (Mataupu Faavae ma Feagaiga 128:22).
6. Tagai Victor Hugo, *Les Misérables* (1992), 91–92.



Saunia e Peresitene Thomas S. Monson

Seia Tatou Toe Feiloai

Ou te tatalo ia faamanuia ma tausia outou e le Alii, o'u uso e ma tuafafine. Ia i ai Lona filemu na folafola mai ia te outou i le taimi nei ma aso uma.

Ou uso e ma tuafafine, se konafesi ina a mamalu. Ua ou iloa o le a outou ioe faatasi ma au, o savali e musuia. Ua ootia o tatou loto, ma ua faamalolosa a tatou molimau i lenei galuega paia a o tatou lagonaina le Agaga o le Alii. Tau ina ia tatou manatua pea mea na tatou faalogo ai i nei aso e lua. Ou te uunaia

outou ia saga suesue atili i savali pe a lolomiina i mekasina o le *Ensign* ma le *Liahona* a sau.

E momoli atu lo matou agaga faafetai ia i latou uma taitoatasi sa saunoa, faapea foi i latou sa tuuina atu tatalo. E le gata i lea, sa faagaetia ma musuia foi musika. Tatou te alolofa i le Aufaipese matagofie a le Tapeneko

ma faafetai atu foi i isi uma sa saunia foi musika.

Tatou te auai faatasi i le tuuina atu o lo tatou agaga faafetai ia i latou o le au peresitene aoao ma le fono faatonu a Tamaitai Talavou, o ē na faamalolo ananafi. Na maoae la latou auunaga faapea lo latou tuuto.

Ua tatou lagolagoina, e ala i le sii o lima, ia uso ma tuafafine ua valaauina i tofiga fou i lenei konafesi. Matou te mananao ia i latou uma ia silafia ua matou sagisagi fiafia atu e galulue faatasi ma i latou i le galuega a le Matai.

O la tatou Ekalesia ua i ai i le lalolagi atoa uso e ma tuafafine. Ua i ai o tatou tagata i le salafa o le kelope. Ou te apoapoai atu ia te outou ia avea outou ma tagatanuu lelei o malo o loo outou nonofo ai ma avea o ni tuaoi lelei i o outou nuu, aapa atu ia i latou o isi tapuaiga faapea foi i o tatou lava tagata. Ia tatou onosai, ma ia agalelei foi ma alolofa atu ia i latou e le tutusa





o tatou talitonuga ma tulaga faatonuina. Ua aumaia e le Faola i lenei lalolagi se savali o le alofa ma le agalelei i alii uma ma tamaitai. Ia tatou mulimuli i Lana faataitaiga.

Ou te tatalo ia mafai ona tatou iloa manaoga o i latou o loo siomia ai i tatou. O loo i ai nisi, aemaise i le autalavou, ua ogaoga le aafia ai i fualaau faasaina, ola lē mama, ponokalafi, ma isi mea. O loo i ai i latou ua tuulafoaiina, e aofia ai fafine ma tane ua maliliu o latou taitoalua, o ē o loo moomoo mo mafutaga ma amanaia e isi. Ia tatou sauniuni e tuuina atu ia i latou se lima fesoasoani ma se loto e alofa.

Ua tatou ola i se taimi i le talafaasolopito o le lalolagi, ua matua tele naua luitau faigata ae o loo tele ai foi avanoa ma mafuaaga e olioli ai. E moni, e i ai taimi tatou te oo ai i le le fiafia, lototiga, ma mafatiaga i o tatou lava olaga. Peitai, afai tatou te tuu lo tatou faatua-tuaga i le Alii, o le a Ia fesoasoani mai

i o tatou faigata, tusa lava po o le a. Na aumaia e le Fai Salamo le faamautinoga leni: “E afe ane le tagi i le afiafi, a o le alaga fiafia i le taeao.”¹

Ou uso e ma tuafafine, ou te manao ia outou iloa lo’u matua faafetai i le talalelei a Iesu Keriso, na toefuatai mai i nei aso e gata ai e ala mai i le Perofeta o Iosefa Samita. O le ki lea i lo tatou fiafia. Tau ina ia tatou lotomaulalo ma lototatalo, ma le faatuatua e mafai e lo tatou Tama Faalagelagi ona taiala ma faamanuia i tatou i o tatou olaga.

Ou te tuuina atu la’u molimau patino ma tautino atu ia te outou o loo soifua le Atua, e faafofoga mai o Ia i tatalo a loto e faamaulalo. O Lona Alo, lo tatou Faola ma le Togiola, ua fetalai mai ia i tatou taitoatasi: “Faauta, ou te tu atu i le puipui ma tu’itu’i atu: Ai se tasi e faalogo mai i lo’u leo ma tatala mai le puipui, ou te ulufale atu ia te ia.”² Tau ina ia tatou talitonu i


nei upu ma faaaoga leni folafolaga.

A o faamaeaina leni konafesi, ou te talosagaina faamanuiaga o le lagi i luga o outou taitoatasi. Ia faatutumu o outou maota ma laoa i le filemu, toafimalie, faaaloalo, ma le alofa. Ia faatumuina i le Agaga o le Alii. Ia fafaga ma faafailele a outou molimau o le talalelei, ia avea o se puipuiga ia te outou mai mea faafefete a Satani.

Seia tatou toe feiloai i le isi ono masina, ou te tatalo ia faamanuia ma tausia outou e le Alii, o’u uso e ma tuafafine. Ia i ai Lona filemu na folafola mai ia te outou i le taimi nei ma aso uma. Faafetai atu mo a outou tatalo mo au faapea foi le Au Pulega Aoaou uma. Matou te matua faafetai atu ia te outou. I le suafa o lo tatou Faola ma le Togiola, o lē o loo tatou auauna i ai, o Iesu Keriso, le Alii, amene. ■

FAAMATALAGA

1. Salamo 30:5.
2. Faalagila 3:20.



Saunia e Ann M. Dibb
Fesoasoani Lua i le Au Peresitene Aoao o Tamaitai Talavou

O o Outou Nofoga Paia

E tusa po o [o outou nofoaga paia] e faaletino po o ni taimi faapitoa e le faagaloina, e tutusa lava le paia ma i ai le mana malosi maoae.

O le autu o le Mutuale i le 2013 o loo maua i le vaega e 87 o le Mataupu Faavae ma Feagaiga. O loo maua leni faatonuga i vaega eseese e tolu; e manino lava le taua o le apoapoaga. O loo faamatala mai ai le auala e mafai ai ona tatou maua le puiuga, malosi, ma le filemu i

taimi o le le mautonu. O le faatonuga musuia o le, ia “tutu i nofoaga paia, ma aua le masii ese.”¹

A o o’u mafaufau loloto i leni autu, sa leai se mea na mafai ona ou faia ae mafaufau pe “o a ‘nofoga paia’ o loo faatatau i ai le Tama Faalelagi?” Na fautua mai Peresitene Ezra Taft Benson,

“O nofoaga paia e aofia ai o tatou malumu, o tatou faletatalo, o tatou fale, ma siteki o Siona . . . ‘mo se puiuga, ma mo se sulufaiga.’”² E faaopoopo atu i ai, ou te talitonu e mafai taitoatasi e i tatou ona maua nisi nofoaga e tele atu. E mafai ona tatou mafaufau muamua i le upu *nofoga* o se siosiomaga faaletino po o se nofoaga faafaafanua. Peitai, o se *nofoga* e mafai foi ona avea “o se tulaga uiga ese, tofiga, po o se tulaga o le mafaufau e iloa lelei le ese mai i se mea talitutusa faapena.”³ O le uiga o leni mea o nofoaga paia e mafai foi ona aofia ai *taimi e tutupu ai ni mea e le mafaagaloina*—taimi e molimau mai ai le Agaga Paia ia i tatou, taimi tatou te lagona ai le alofa o le Tama Faalelagi, po o taimi pe a tatou maua se tali i a tatou tatalo. Ae maise, ou te talitonu o soo se taimi e te maua ai le lototele e tu atu ai mo le mea sa’o, ae maise lava i tulaga ia pe a leai se isi e manao e faia lena mea, e te fatuina ai se nofoaga paia.

I le soifuaga puupuu ae matagofie o Iosefa Samita, sa “[tu] moni o ia i nofoaga paia” ma sa le masii ese o ia. A o talavou lava, sa popole o ia i le vevesi o mea taulotu i lona nuu ma sa manao ai e iloa po o le fea o lotu uma e sa’o. O le itu togavao e lata i lona fale na avea ma se nofoaga paia a o ia tootuli ai i lalo o laau ma tuuina atu lana uluai tatalo leotele. Sa tali mai lana tatalo, ma o le taimi nei e ta’ua e le Au Paia o Aso e Gata Ai leni togavao o le Vao Paia.

E tutu tamaitai talavou i le lalolagi atoa i nofoaga paia o le natura, i toluapiga a Tamaitai Talavou. Na faasoa mai ia te a’u e se tasi o taitai o Tamaitai Talavou le tala i se aafiaga o se tasi o tamaitai talavou. O le tamaitai sa le toaga i le lotu, sa tau le talitonu o ia i le maua o se aafiaga faaleagaga i le togavao. O le aso muamua, sa ia lipoti atu ai i le taitai, “Ua ou maua se taimi



sili ona manaia, ae pe mafai ona aua nei o tatou talanoa e uiga i le Agaga? Ua ou sau iinei e tolauapi, fiafia i mea o le natura, mafuta ma au uo, ma fai ni mea malie!” Ae peitai, i le faaiuga o se lotu molimau sa tagi lenei lava tamaitai ma tautino mai, “Ua ou le fia alu i le fale. E faapefea ona ou maua le lagona e pei ona ou lagonaina nei, lenei Agaga, i totonu ia te a’u i taimi uma?” Ua ia maua se nofoaga paia.

O le isi nofoaga paia i le soifuuga o Iosefa Samita o lona lava potumoe. Atonu e faigata ona talitonuina lenei mea, aua e pei o le toatele o outou, sa potumoe faatasi ma nai ona tei. Ua avea ma se nofoaga paia ina ua ia tatalo ma le faatuatua tele ma le lotomauualalo, ma le manaomia. Na ia faamatala mai, “Ina ua mavae ona ou malolo atu i lo’u moega i le po, na ou tatalo ma aioi atu ai i le Atua Malosi Aoa mo se faamagaloga o a’u agasala uma ma sese.”⁴ Na le faigofie le tolu tausaga na te’a atu talu ona maua e Iosefa le faaaliga i le Vao Paia. Na onosaia e Iosefa e sefulufitu tausaga le matua ia tauemuga, taufaifaiga, ma taufaamata’u e le uma. Ae o le po lena i le potumoe o Iosefa, sa faaali ane ai le agelu o Moronae o le tali i ana aioiga. Na maua e Iosefa le malamalama, ma le faamafanafanaga. I lena po, sa avea lona potumoe ma se nofoaga paia.

A o o’u matamata i se vitio o Savali faaMamona mo le Autalavou na ou molimauina ai se isi potumoe na avea ma se nofoaga paia. O loo faaaliga i le vitio ia Ingrid Delgado, o se tamaitai talavou mai El Salvador, o loo faasoa mai ona lagona e uiga i le malumalu. Fai mai o ia, “Ua manaia le iloaina ua i ai se nofoaga e mafai ona matou o ese atu i ai mai mea o le lalolagi ma maua sauniga paia ma fesoasoani ia i latou o e e le mafai ona mauaina i lenei olaga.” A o tautala o ia, e faaali mai i le vitio ia Ingrid o loo faitau ana



tusitusiga paia, e siomia i Ata faa-Mamona, upusii, mau, o se tusi o le Alualu i Luma o le Tagata Lava Ia, ata o lona aiga ma le malumalu, ma ioe, ma ana manu utuvavae e sili ona fiafia i ai.⁵ Atonu na te le o iloaina, ae ua ia fatuina sona nofoaga paia e aluese atu i ai mai mea o le lalolagi. Faamata ua fia ni taimi ua faitauina ai e Ingrid ana tusitusiga paia, lagonaina le Agaga, ma maua tali i ana tatalo i totonu o lona nofoaga paia.

Peitai o le isi nofoaga paia e le’i mafauina i le soifuuga o Iosefa Samita o le Falepuipui i Liperate. Na saunoa Elder Jeffrey R. Holland, “Na leai se isi taimi na sili atu ona faigata i le soifuuga o Iosefa nai lo o lenei faafalepuipui faalealofa, lē faatulafonoina, ma le le tauamionuina.” Na faaaauu ona faamalalama mai e Elder Holland e faapea, o le Falepuipui i Liperate ua faatatau atu i ai o se “falepuipui-malumalu” ona o aafiaga paia na maua e le Perofeta o Iosefa Samita iina.⁶

O nisi o outou tamaitai talavou atonu o feagai ma o outou lava Falepuipui i Liperate, se nofoaga o loo e feagai ai ma le faalumaina, se nofoaga o loo e lagona ai le leai o se alofa agalelei, se nofoaga o loo ulagia, faamata’uina, ia pe faamanualia faaletino ai oe. Ia te outou tamaitai talavou, ou te tuuina atu upu a Elder Holland: “E mafai ona e maua aafiaga paia, faa-talifaaliga, maoae faatasi ma le Alii *i aafiaga e sili ona le lelei o lou olaga* . . . , a o onosaia faiga le amiotonu e sili ona tiga, pe a

feagai ma mea faigata ma le tetee lea e foliga mai e le mafai ona faatoilaloina nai lo o soo se mea ua e oo i ai.”⁷ I se isi faaupuga, e pei foi o le Perofeta o Iosefa Samita, e mafai ona e fatuina ma tu ai i nofoaga paia, e oo lava i taimi e sili ona faigata e te oo i ai.

Sa faasoa mai e se tamaitai talavou matua, o Kirsten, sana aafiaga tiga. O le aoga Mauualuga sa avea ma ona Falepuipui o Liperate. Ae ui i lea, o le potu faaili na maua ai se malutaga. Fai mai a ia: “A ou laa atu i totonu o lenei potu, na pei lava na ou laa atu i totonu o se nofoaga saogalemu. Na leai ni faamatalaga faalumaluma pe faalealofa, leai ni upu masoa. Ae, matou te faalogoina ai upu faamalosiua ma le alofa. Sa matou faataitaia le agalelei. Sa o se nofoaga fiafia. Sa tumu le potu faaili i le Agaga a o matou faataitaia ma faatinoina musika. Na faapena le potu ona o faatosinaga a le taitai faaili. O ia o se tamalii Kerisiano lelei. O le toe tepa ai i tua, o le aoga mauualuga sa o se nofoaga faamama. Na faigata, ae sa ou aoaoina ai auala lelei e tali atu ai i faigata. O le a faavavau pea ona ou faafetai mo lo’u sulufaiga, lo’u nofoaga paia, le potu faaili.”⁸

I le afiafi nei, pe na e manatunatu i ou nofoaga paia? Na ou talosaga atu i le faitau selau o tamaitai talavou e faasoa mai ia te a’u e uiga i o latou nofoaga paia. E tusa pe faaletino po o ni taimi faapitoa e le faagaloina, e tutusa lava le paia ma i ai le mana malosi maoae. O a latou tali faagaetia nei e iva:

- Muamua: “Sa ou i ai i le falemai, ma siiiina lo’u tuagane o se pepe fou.”
- Lua: “O taimi taitasi ou te faitauina ai lo’u faamanuiaga faapeteriaka, ou te lagona e pei e iloa ma alofaina a’u e lo’u Tama Faalelagi.”
- Tolu: “O le aso na atoa ai lou 12, na teuteu ai e tamaitai talavou o le uarota le faitotoa o lou potu i ni

pepa fatu.⁹ Sa ou lagonaina le alofa, taliaina, ma le fiafia!”

- Fa: “A o faitau a’u tusitusiga paia i se tasi aso, sa ‘matilatila le taua’ o se fuaitau. Sa ou mauaina se tali i a’u tatalo.”
- Lima: “Sa ou savali atu i totonu o se pafi sa inupia ai tagata ma auai i isi gaoioiga le talafeagai. Na ta’u mai e le Agaga ia ou toe liliu ma toe foi atu i le fale. Sa ou faia, ma ioe sa i ai ni ‘taunuuga faaleagafesootai.’ Ae peitai, o le taimi lena na ou maua ai le to’a sa ou manaomia e iloa ai e mafai ona ou ola i le talalelei.”
- Ono: “I le taimi o le faamanatuga, sa ou mafaufau i le Togiola. Sa ou iloa ai e tatau ona ou faamagalo atu i se tasi sa ou ita i ai. O lo’u filifili e faamagalo atu sa o se faatinoga lelei o le a aumai ai le Togiola i lo’u olaga i aso uma.”
- Fitu: “Ina ua maea le Amataga Fou sa ma auai atu i ai ma lo’u tina, sa sogi mai o ia i lo’u alafau, ma fai mai e alofa ia te a’u. O le taimi muamua lea ou te manatuaina ua ia faia ai se mea faapea.”
- Valu: “Faatasi ai ma se faamautinoga mai lou epikopo, sa ou iloa ai o folafolaga sa ou maua i tusitusiga paia e moni: ‘E ui lava ina pei o ofu mumu a outou agasala, e sisina ia e pei o le kiona.’¹⁰ Sa ou lagona le i ai o se faamoemoe ma iloa ai e mafai ona ou amatalia le faagasologa umi o le salamo.”
- Ma le mulimuli: “I se tasi afiafi, sa ou maua ai le lototele e faasoia atu o’u lagona e uiga i le talalelei ma le Tusi a Mamona i la’u uo lelei lava. Mulimuli ane, sa o se faamanuiaga le auai atu i lona papatisoga. O lenei la ua ma auai faatasi atu i le lotu.”

Se’i ou faasoaina atu ia te outou se tasi o a’u nofoaga paia. Sa ou lagonaina i se tasi taimi le lofituina, fefe, ma

le matuai tuuatoatasi. Na ou faia se tatalo le leoa, “Le Tama Faalelagi, ou te le iloa pe faapefea ona fai lenei mea. Faamolemole, faamolemole, fesoasoani mai ia te a’u!” E le’i leva, ae faafuasei ona tulai ae se tagata ma tuu mai lona lima i lou tauau, ma tuuina mai ni upu faamaoni, ma faamalosianga. I lena taimi, sa ou lagonaina le toafilemu. Na ou lagonaina le taliaina. Na suia mea uma. Na oo mai i lo’u mafaufau upu a Peresitene Spencer W. Kimball: “E silafia i tatou e le Atua, ma na te puipuia i tatou. Ae e masani lava ona ala mai i se isi tagata lona taulimaina o o tatou manaoga.”¹¹ Mo a’u, o lena taimi, o lena nofoaga na faapaiaina.

Tamaitai talavou pele e, e anoa-noai isi nofoaga paia maimau pe ana mafai ona tatou faasoaina atu i le tasi ma le isi. A outou foi atu i aiga i lenei afiafi, ou te uunaia outou e tusi i lalo ia outou api o talaaga na nofoaga tou te iloa ma manatua ai. E manino mai ia te a’u o le faitau afe o *outou* o loo tutu i nofoaga paia. O nei nofoaga ua outou maua ai se malupuipuiga, malosiaga, ma le filemu i taimi le mautonu. O a outou molimau o le a faasolo malolosi ona o loo outou tutu atu mo le upumoni ma le amiotonu i auala *faamamaluina*.



San Salvador, El Salvador

O outou, le autalavou tautupu o le Ekalesia, o a’u toa manumanu. Ou te alofa ia te outou. Ou te lagona le alofa ofoofogia o le Tama Faalelagi mo outou, ou te tuuina atu la’u molimau e moni le talalelei a Iesu Keriso. O loo faatalitali ma sauni o Ia e lagolago outou a o outou “tutu ai i nofoaga paia ma aua le masii ese.” Ou te alofa ma lagolagoina Peresitene Thomas S. Monson, o lo tatou perofeta moni ma le musuia. Ou te faia ai nei mea i le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 87:8; tagai foi Mataupu Faavae ma Feagaiga 45:32; 101:22.
2. Ezra Taft Benson, “Prepare Yourself for the Great Day of the Lord,” *New Era*, Me 1982, 50, tagai foi Mataupu Faavae ma Feagaiga 115:6.
3. Merriam-Webster Online, “place,” merriam-webster.com/dictionary/place.
4. Iosefa Samita—Talafaasolopito 1:29.
5. Tagai “Practice, Celebration, Dedication: Temple Blessings in El Salvador,” lds.org/youth/video.
6. Jeffrey R. Holland, “Lessons from Liberty Jail,” *Ensign*, Sete, 2009, 26.
7. Jeffrey R. Holland, “Lessons from Liberty Jail,” 28.
8. Talanoaga patino ma le tusitala.
9. O nisi taimi e faataata i ai i le lunaite Setete o se “faate’i fatu.”
10. Isaia 1:18.
11. Spencer W. Kimball, “The Abundant Life,” *Liahona*, Iuni 1979, 4.



Saunia e Mary N. Cook

Fesoasoani Muamua i le Au Peresitene Aoao o Tamaitai Talavou

A E Laveaiina se Teine, Ua E Laveaiina Augatupulaga

O o outou olaga amiomama o le a faamanuiaina ai o outou augatama, o outou aiga i le taimi nei, ma tagata o aiga o le a oo mai.

O se faamamaluga mo au le lauga atu i tamaitai talavou faamaoni o le Ekalesia. Ua matou vaaia lo outou agaigai i luma i le ala o i latou o e faamamalaina a latou feagaiga, ma ua matou iloa o outou olaga amiomama o le a faamanuiaina ai o outou augatama, o outou aiga i le taimi nei, ma tagata o aiga o le a oo mai, e pei ona saunoa Peresitene Gordon B. Hinckley, “A e laveaiina se teine, ua e laveaiina ia augatupulaga.”¹

Na amata lou ala i feagaiga i le taimi na papatisoina ai oe ma e maua le meaalofo o le Agaga Paia. E faaauau i vaiaso taitasi i sauniga faamanatuga, o se nofoaga paia e te faafouina ai lau feagaiga o le papatisoga. O le taimi leni mo oe e te sauniuni ai e osia feagaiga i le malumalu. O “sauniga paia ma feagaiga e maua i malumalu paia, e mafai ai e [i tatou] ona toe foi atu i le afioaga o le Atua ma mo [o tatou] aiga e tuufaatasia ai e faavavau.”²

Tutu i nofoaga paia mo o outou augatama. “O tagata uma e o mai

i leni lalolagi o le taunuuga lea o augatupulaga o matua. E i ai lo tatou faanaunaga masani e fesootai i o tatou augatama.”³ A o e faatinoina le talafaasolopito o aiga ma galuega i le malumalu, ua e lalagaina se sootaga i lou olaga ma olaga o ou augatama e ala i le faia o sauniga faaola mo i latou.

Ia e tu i nofoaga paia mo oe lava ma lou aiga patino. O au faataitaiga amiotonu o le a avea ma punavai o le olioli tele, tusa lava po o a ou tulaga faaleaiga. O au filifiliga amiotonu o le e agavaa ai e osia ma tausia feagaiga paia, o le a fusia faatasi ai lou aiga e faavavau.

Ia tu i nofoaga paia mo lou aiga i le lumanai. Tautino atu e faamauiina i lau tane e ala i le perisitua paia i le malumalu pe a amataina le iunite o lou aiga. O le a faamanuiaina lau fanau i le upumoni pe a e atiina ae au faataitaiga mama ma le molimau e le maluelue i o latou olaga, ma faaali atu ia i latou le auala i luga o le ala o le feagaiga.

Na ou vaaia nei mataupu faavae faavavau o faaalii i le Tauvaga Faavaomalo o Faatufugaga mo le Autalavou. Sa fatuina faafuainumera e Megan Warner se galuega o le pueina o ata, e faaoga ai se faiga faaona po nei i le faataoto a Keriso i taupou e toasefulu.⁴ Sa ma feiloai ma Megan, ma sa ia faamatala mai le faatusa o taupou e toasefulu, lea na faamatalaina o se tamaitai talavou o le amiomama ma le faatuatua ua saunia e osia ma tausia feagaiga o le malumalu. E faapei o taupou popoto uma, e faia lana lava tapenaga a o ia faaopoopoina le suauu i lana lamepa, e tasi le mataua i le taimi, e ala i le ola amiotonu e le aunoa. Sa ou matauina le fili manaia i lona lauulu. Sa faamatala mai e Megan o le fili o le faatusa o le lalagaina o le ola mama o leni tamaitai talavou i tupulaga e le mafaitaulia. O le fuailauulu e tasi e faatusa i le lalagaina o lona alofa ma le faaaloalo mo ona augatama, o le lona lua o le lalagaina lea o lana uunaiga amiotonu i lona aiga o i ai nei, ma le laulu lona fa, o le lalagaina o lona olaga ua saunia i olaga o tupulaga a sau.

Sa ou feiloai i se isi tamaitai talavou o lana tapenaga vave faaleagaga ua lalagaina ai se olaga o le amiotonu i le tele o tupulaga.

I se aoauli matagofie ia Setema, sa ma i ai ma lo’u toalua i le malumalu e faatalitali le avanoa e fai ai sauniga o le malumalu. Sa ulufale atu i le potu ia Chris, o se ma uo. Sa manaia le vaai atu i leni alii talavou, o le sa faatoa talii mai lana misiona mai Rusia.

Toetiiti amata le sauniga, ae saofai mai i ou autafa se tamaitai talavou lalalei. Sa susulu, matafiafia, ma sa tumu i le malamalama. Sa ou fia masani ia te ia, o lea sa vave ai ona ou faailoa atu lo’u igoa. Sa ia musumusu maia lona igoa, o Kate, ma sa ou manatuina ai lona faaii o se aiga sa nonofo i Michigan i le mea sa nonofo ai lo



Queen Creek, Arizona, ISA

matou aiga i se taimi. O Kate o lo la afafine ua matua, ua faatoa lima vaiaso talu ona foi mai lana misiona mai Siamani.

I le taimi o le sauniga sa oo mai pea lava pea le mafaufau, “Faafeiloai Kate ia Chris.” Sa ou tuuese lea uunaiga ma ou faapea. “Afea, i fea, faapefea?” A o ma sauni e foi, sa sau Chris e faatofa mai ma sa ou pueina loa le avanoa. Sa ou toso maia Kate ma musumusutu atu i ai, “O oulua o ni talavou amiomama e tataua ona iloa e le tasi le isi.” Sa ou tuua le malumalu ua faamalalaina aua sa ou faatinoina la’u uunaiga.

Ina ua ma foi, sa ma talanoa ma lo’u toalua i mea na ma manatuaina i luitau na feagai ma le aiga o Kate. Ua sili atu lo’u iloa o Kate, ma sa ia fesoasoani ia ou malamalama i mafuaaga o lona matafafia sa ou vaai i ai i le malumalu i lena aso.

Sa taumafai pea lava pea Kate e tumau i le ala o ana feagaiga e ala i le sailia o nofoaga paia. Sa ola ae o ia i se aiga e fai afiafi faaleaiga, tatalo

faatasi, ma suesue tusitusiga paia ma avea ai lona aiga ma nofoaga paia. A o laitiiti o ia, sa ia aoao e uiga i le malumalu, ma o le pese, “Ou Te Fia Vaai i se Malumalu” o se pese sili lea mo afiafi faaleaiga.⁵ A o teineitiiti, sa ia matauina ona matua o faia se faataiga o le sailia o se nofoaga paia a o la malaga i le malumalu i se afiafi o le faaiuga o le vaiaso, nai lo le o i se tifaga pe o e aai i se faleaiga.

Sa matua alofa tele o ia i lona tama, ma sa faaaoga e [lona tama] lana pule o le perisitua e fesoasoani ai ia [Kate] e faia ana uluai feagaiga o le papatisoga. Ona faaee atu lea o lima i luga o lona ulu ma mauaina le Agaga Paia. Fai mai Kate, “Sa ou fiafia lava e maua le Agaga Paia, ma sa ou iloaina o le a fesoasoani ou te tumau ai i luga o le ala i le ola e faavavau.”

Sa faaauau pea le olaga o Kate i se ala manuia ma le fiafia. Ina ua 14 ona tausaga, sa amata lana aoga maua luga ma sa fiafia i le seminare, o se isi nofoaga paia e aoao ai e uiga i le talalelei. I se tasi aso, sa amata ona talanoa lona

faiaoga e uiga i tofotofoga ma sa ia faamautinoa atu tatou te oo uma lava i ai. Sa ia faapea ifo ia te ia lava, “Ou te le manao i ni tofotofoga; ou te le fia faalogo i ai.”

Sa na o ni nai vaiaso mulimuli ane ae ala a’e lona tama i le Aso Sa o le Eseta ua matua ma’i tigaina lava. Fai mai Kate: “O lo’u tama o se tagata ola maloloina; o se tagata tamo’e marafoni. Sa popole tele lo’u tina i le tigaina ma o lea na ave ai o ia i le falemai. E lei atoa se 36 itula ae pe atoa le tele o lona tino. Sa mafai ona emoemo ona mata, ae sa le aoga lona tino atoa. Ou te manatua le vaai atu ia te ia ma mafaufau, ‘Auoi, ua tupu. Ua sa’o lava lo’u faiaoga seminare. Ua oo mai so’u tofotofoga.’” E lei umi ni aso, ae maliu le tama o Kate.

Na faaauau le tala a Kate: “Sa ese le faigata. E te le manao e leiloa atu le toa o lou olaga. Sa ou iloaina e mafai ona avea o se mea e fesoasoani ai ia ou tuputupu ae pe avea foi o se maagao. Ou te lei manao e avea o ia ma mea e faaleagaina ai lo’u olaga aua



faatoa 14 o'u tausaga. Sa ou taumafai ou te latalata i le Alii i le mea sili e mafai ai. Sa faatele ona ou faitauina au tusitusiga paia. Sa faamautinoa mai e le Alema mataupu e 40 ia te au, e moni le toetutu ma o le Togiola a Keriso e mafai ai ona ma toe mafuta ma lo'u tama. Sa faatele ona ou tatalo. Sa ou tusitusi i la'u api talaaga i le tele sa ou mafaia. Sa ou faaolaolaina la'u molimau i lo'u tusia lea i lalo. Sa ou alu i le lotu ma i Tamaitai Talavou i vaiaso uma. Sa vagaia a'u lava e ni uo lelei. Sa ou mafuta vavalalata ma o'u aiga alolofa aemaise i lo'u tina, o le taula lea i lo'u aiga. Sa ou sailia faamanuiaga faaleperisitua mai lo'u tamamata ma isi e umia le perisitua."

O nei filifiliga faifai pea, e faapei o na taupou popoto, na faaopoopo ai le suauu i le lamepa a Kate. Sa faaosofia o ia e lona manao e toe mafuta ma lona tama. Sa iloa e Kate na iloa lelei e lona tama ana filifiliga, ma sa le manao o ia e faaita lona tama. Sa manao o ia i se sootaga e faavavau ma ia, ma sa malamalama o ia o lona tumau ai i luga o le ala o feagaiga o le a lalagaina ai faatasi lona olaga ma lona tama.

Peitai, e lei uma ai tofotofoga. Ina ua 21 tausaga o Kate ma ua auina atu

ona pepa o le misiona, sa maua lona tina i le kanesa. Sa tataui ia Kate ona faia se faaiuga taua i lona olaga. Pe o le a nofo i le fale e tausi lona tina pe alu i lana misiona? Sa tuuina atu i lona tina se faamanuiaga faaleperisitua ma folafola atu ai o le a ola o ia mai le ma'i. I le faamautinoa ai e lenei faamanuiaga, na alu ai Kate ma le faatuatua ma faaauau ai ana fuafuaga e faamisiona.

Fai mai Kate: "Sa ou laa tautoai i le pogisa, ae a o ou i ai i la'u misiona, sa oo mai le malamalama ma sa ou mauaina ai se tala fiafia ua moni lava le faamanuiaga a lo'u tina. Sa ou matua fiafia lava ona ou te lei toloina le au-auna atu i le Alii. A oo mai mea faigata, ou te manatu e faigofie ona taofia le agai i luma, ma faalē i ai se manao e agai i luma, ae a e faamuamua le Alii, e mafai e mafatiaga ona taitai atu i faamanuiaga matagofie. E mafai ona e vaai i Lona aao ma molimauina vavega." Ua iloa e Kate le moni o upu a Peresitene Thomas S. Monson: "O o tatou avanoa aupito taua o le a maua i taimi o faigata aupito ogaoga."⁶

Ua ia Kate lenei ituaiga o faatuatua aua sa malamalama o ia i le ata o le faaolataga. Sa ia iloa sa tatou ola

muamua, o le lalolagi o se taimi lea o tofotofoga, ma o le a tatou toe ola foi. Sa i ai lona faatuatua o le a faamanuiaina lona tina, ae mai le mea na tupu i lona tama, sa ia iloa a na fai e maliu lona tina, o le a le afaina. Fai mai a ia: "Sa lē na ona ou lavātia le maliu o lo'u tama, ae na avea o se vaega o lo'u faasinomaga mo le lelei, ma a na faapea foi e ave lo'u tina, semanu o le mea lava e tasi. E lalagaina ai se molimau sili atu i lo'u olaga."⁷

Sa sailia e Kate se nofoaga paia i le po na ou feiloai ai ia te ia i le malumalu. O le manao e lalagaina ia maopo lelei ia sootaga o le faavavau lea e maua mai i sauniga o le malumalu, ae sa ia mulimuli i le mamanu na faatuina e ona matua o le ō pea lava e le aunoa i le malumalu.

E leai se mea tele na tupu i le po sa ou faafeiloai atu ai Kate ia Chris, ae i le sailia o se isi nofoaga paia i le Aso Sa na sosoo ai, sa vaai ai Kate ia Chris i le fiaselau o talavou nofofua matutua i se faigalotu a le inisitituti. O iina na iloa atili ai e le tasi le isi. I nai vaiaso mulimuli ane, sa valaaulia ai e Chris ia [Kate] la te matamata i le konafesi aoao. Sa faaauau pea le sailiga o nofoaga e valaaulia ai le Agaga i le gasologa o la la'ua faamasaniga ma sa iu ai ina faamauiaina i la'ua i le malumalu, o le nofoaga paia lea sa la faatoa feiloai ai. Ua taufai faataunuuna nei e i la'ua le tiutetauave paia faamātua, ma lalagaina ai a la'ua molimau o le ata o le faaolataga i olaga o se fanau tama laiti e toatolu, e faaali atu ai ia te i latou le auala e agai atu i le ala o feagaiga.

"A e laveaiina se teine, ua e laveaiina augatupulaga." O le faaiuga a Kate o se 14 tausaga le matua e tumau i luga o le ala, ua faaopoopo ai pea e le aunoa le suauu i lana lamepa, ma o le tu ai i nofoaga paia *ua ma o le a* laveaiina ai augatupulaga. O le sailia

o ona augatama ma le auuuna atu i le malumalu ua lalagaina ai faatasi lona loto ma i latou. O le faatinoina o talafaasolopito o aiga ma galuega o le malumalu, o le a faapena foi ona lalagaina ai faatasi o outou loto ma avatu ai i o outou augatama le avanoa mo le ola e faavavau.

O le ola ai i le talalelei i lou aiga o le a faaopopo ai foi le suauu i lau lamepa ma lalagaina ai le malosi faaleagaga i lou aiga i le taimi nei ma faamanuiaina ai lou aiga i le lumanai i ni auala e le mafaitaulia. E le gata i lena, e pei ona saunoa Elder Robert D. Hales, “Afai e le lelei le faataitaiga na tatou maua mai i o tatou matua, o lo tatou tiutetauave le faia o se suiga . . . ma aoao atu agaifanua sa’o mo augatupulaga e mulimuli mai.”⁸

Fai nei a outou faaiuga e faia mea uma tou te mafaia e faatutumu ai a outou lamepa, ia mafai ona lalagaina lau molimau malosi ma faataitaiga i olaga o le tele o augatupulaga ua mavae, i le taimi nei, ma le lumanai. Ou te molimau atu o lou olaga amiomama o le a le gata ina laveiaina ai augatupulaga, ae o le a faasaoina ai foi *lou* ola e faavavau, aua ona pau lea o le ala e toe foi atu ai i lo tatou Tama i le Lagi ma maua ai le olioli moni i le taimi nei ma le faavavau atoa. I le suafa o Iesu Keriso, amene. ■

FAAMATALAGA

1. Gordon B. Hinckley, “Standing Strong and Immovable,” *Worldwide Leadership Training Meeting*, Jan. 10, 2004, 20; tagai foi Gordon B. Hinckley, “Our Responsibility to Our Young Women,” *Ensign*, Sept. 1988, 10.
2. “O Le Aiga: O Se Folafolaga i le Lalolagi,” *Liahona*, Nov. 2010, 129.
3. Russell M. Nelson, “Generations Linked in Love,” *Liahona*, Me 2010, 92.
4. Tagai Mataio 25:1–13.
5. Tagai “Ou Te Fia Vaai i le Malumalu,” *Tusipese a Tamaiti*, 99.
6. Thomas S. Monson, “Meeting Your Goliath,” *New Era*, June 2008, 7.
7. Faatalanoaga patino ma le tusitala, 2013.
8. Robert D. Hales, “How Will Our Children Remember Us?” *Ensign*, Nov. 1993, 10.



Saunia e Elaine S. Dalton
Peresitene Aoao o Tamaitai Talavou

Aua Le Masii Ese

Ia tutumau. Ia mausali. Tutu atu mo le upumoni ma le amiotonu. Tutu atu e fai ma molimau. Ia avea o se tagavai i le lalolagi. Ia tutu i nofoaga paia.

O le po nei a o ou tu i se nofoaga paia i lenei pulelaa ma i luma o perofeta, tagatavaai, ma talifaaaliga ma afafine tautupu o le Atua. O se taimi ofoofogia lenei le i ai i le lalolagi ma le avea ai o se tamaitai talavou. O outou o afafine filifilia o lo tatou Tama i le Lagi. Ou te faamoe-moe o loo outou lagonaina lo outou faasinomaga, ma le pele o outou i lo tatou Tama i le Lagi. E alofa o Ia ia te outou uma taitoatasi, ma ou te alofa foi ia te outou.

I luga o le kesi i lo’u ofisa, o loo i ai se kopi o le atavane apamemea o se tamaitai talavou e igoa ia Kristina. O le atavane tele na muai taina, o loo tu i luga o se paega i Copenhagen, Tenimaka, e faasaga agai i le sami

agai atu i Siona. O lana faaiuga e auai i le Ekalesia ma tuua lona aiga e le i faigofie, ma e mafai ona e vaaia le agi malosi mai o matagi e faafesagai ma ia. O loo tu mausali o ia, ma faia se mea faigata tele ae ua ia iloa e sa’o. Na tuu e e na tupuga mai ia te ia lena atavane i luga o lena paega e avea o se saafiafiga ia Kristina, mo lana faaiuga i lena aso, e matua taua e faavavau mo augatupulaga.

Ia te au, o le atavane lenei o Kristina e faatusa ia te outou taitoatasi. E faapei o Kristina, o loo outou tutu i le faatausiusiuga o le anoano o faaiuga taua ma le faiga o filifiliga i aso taitasi, o nisi o na faaiuga e faigata, o le a le gata ina faatulaga ai lou lumanai ae faapea foi le taunuuga o augatupulaga. O loo outou feagai foi ma matagi malolosi o tete, mafatiaga, uunaiga a taaga, ma le faaleagaina o le ola mama. Ae o lena lava tou te tutu mausali ma ola i le talalelei a’o feagai ai ma nei afa matautia i lo tatou lalolagi. E faapei o Kristina, o loo taitaia outou e le Agaga Paia. O loo outou faia faaiuga sa’o. Tou te lotonuu ma o outou o ni tamaalii.

E leai se fautuaga e sili atu ua ou mafaufau i ai mai lo tatou Tama Faalelagi alofa nai lo Lana apoapoiga mo outou taitoatasi ia “outou tutu . . . i nofoaga paia, ma aua le masii ese.”¹



O loo faapea mai o Ia: “Ia tutumau. Ia mausali.² Tutu atu mo le upumoni ma le amiotonu.³ Tutu atu e fai ma molimau.⁴ Ia avea o se tagavai i le lalolagi. Ia tutu i nofoaga paia. Ma o lea la o la’u savali ia te outou taitoatasi e faigofie lava—“Ia mausali.”

Muamua, ia mausali i le filifilia o le mea tonu. I nei aso e gata ai, e leai se faaiuga e faatauvaa. O filifiliga o loo outou faia i le taimi nei, e matua taua

lava. O le faitalia, po o le tomai e filifili ai, o se tasi lea o meaalofo silisili a le Atua i Ana fanau. O se vaega lea o le fuafuaga o le fiafia lea na tatou filifili e puipuia i lo tatou muai olaga. Ia outou ola i o outou olaga i se tulaga e mafai ai ona outou faalogologo i le Agaga Paia ma o le a Ia fesoasoani ai ia te outou e faia faaiuga sa’o. O le a Ia “ta’u mai ia te outou mea uma e tatau ona outou faia.”⁵



I ni nai vaiaso talu ai sa ou toe foi ai i la’u aoga maualuga tuai mo le taimi muamua talu mai le tele o tausaga. Sa ou asiasi i se konafesi faalesiteki sa faia ai i le faletele o le aoga. A o ou savali atu i le faapaologa, sa amata ona saputu mai i lo’u mafaufau mea e manatua. Sa pei lava o le taimi a’o ou i ai i le a’oga maualuga o se teine talavou—e le mautonu, lē mautu o a’u lava, o o’u lava mafaufauga, ma o lea, sa ou manao ai ia faafetaui lelei a’u i ai. Sa ou alu i le faletele. Sa toe saputu mai ni manatua i lo’u mafaufau. Sa ou iloa lelei vaega uma o lena faletele. Na o le tasi lava le mea na suia—o a’u.

O le aso lena, sa ou maua ai le avanoa e tu atu ai i luga o le tulaga e pei ona sa ou faia i le tele o taimi a’o i ai i le aoga maualuga o se tasi o taitai o tamaiti aoga. Sa ou vaai foi i nisi o la’u vasega i le aofia—o nisi sa matou tafafao faamasani! Ae o le taimi la lenei, nai lo le taitaia o se potopotoga a le a’oga, sa ou mauaina le avanoa—iina i le faletele o la’u aoga maualuga—e “tu atu ai o se molimau”⁶ ma tuuina atu la’u molimau i lo tatou Faola o Iesu Keriso.

Tamaitai talavou, ia mautinoa o a outou sootaga ma isi ia oo atu i le 40 tausaga mai le asō, o le a e le maasi-asi lava. E leai lava se āuga o uunaiga a taaga a tupulaga, taliaina, po le lauiloa. O lau uunaiga i alii talavou o le a fesoasoani ai ia i latou e tumau le agavaa mo le mana o le perisitua, feagaiga o le malumalu ma faia se misiona. A o ai foi na te iloa? Fasefulu tausaga mai le asō, atonu o le a i ai se tasi o i latou e savali atu ia te oe, iina i le faletele o lau a’oga maualuga ma faafetai atu ia te oe i lou fesoasoani ia i latou ia tumau le agavaa e faataunuu ai o latou tiute faale-perisitua e faia ai se misiona mamalu. A o ai foi na te iloa? Atonu e te mauaina se tusi mai se tasi

o faletua o na alii talavou, e faafetai atu ai ia te *oe* mo lau uunaiga i lona toalua ma lo latou aiga i le lumanai, i taimi a o e a'oga i le aoga maualuga. E taua au filifiliga. O au filifiliga i le taimi nei e le gata ina aafia ai oe, ae e aafia ai foi isi. E faavavau lo latou taua. Ia mausali!

Lua, ia mausali i lou naunau ma lau tautinoga e tumau i le amiomama ma ia mama a'i'ai mai faiga feusuai.

Talisapaia le mama. O lou lava mama a'ia'i o se tasi o sosia aupito sili o le mana. Ina ua e sau i le lalolagi sa tuuina atu ia te oe le meaalofo taua o se tino. O lou tino o se meaalofo luega o lou mafaufau ma o se meaalofo paia e te faaaogaina ai lou faitalia. O se meaalofo lenei e le'i mauaina e Satani, ma o lea ua ia faatonutonuina ai ana osofaiga uma lava i lou tino. E manao ia te oe e te inoino i ai, faaoga sese, ma faatautala lou tino. O le le tauagafau, ponokalafi, ola le mama, taina o pe'a ma tatui, faaoga sese o fualaau faasaina, ma vaisu o ituaiga uma, o taumafaiga uma ia e faoa ai lenei meaalofo taua, ma faia ia faigata mo oe ona e faaaogaina lou faitalia. Na fesili Paulo: "Tou te le iloa ea o outou o le malumalu o le Atua, ma e nofo le Agaga o le Atua i totonu ia te outou?"⁷

O lou tino o se malumalu. Aisea? Aua ua i ai le malosi e nofo ai e le gata i lou agaga e faavavau, ae faapena foi i agaga e faavavau o isi o le a o mai i le lalolagi, o se vaega o lou aiga e faavavau. Na aoa mai e Elder Dallin H. Oaks, "O le mana e foafoa ai le olaga faitino o [se] mana faaeaina."⁸ O lau matafaioi o se matafaioi faaeaina. Ua tuuina atu e le Atua ia te oe se faatuatuga paia! O loo outou sauniuni e ave ma tina i le lumanai o tupulaga o le a oo mai. Ia tausisia lo outou mama ma le agavaa ma ia pui-puia le mea ua "sili ona pele ma taua i lo mea uma"—o lou mama ma le ola mama.⁹ I le ave ai ma afafine filifilia



o le Tama Faalelagi, o Lana fautuaga poto ia te oe lava ia o le "savali i o'u luma i ala o le amiomama." Na fesili Paulo, "Tou te le iloa ea o outou o le malumalu o le Atua, ma o loo mau le Agaga i totonu ia te outou?"¹⁰

O le mama o le ki auro lea i le malumalu. *O lea la, o le lona tolu, ia mausali i le agavaa e osia ma tausia feagaiga paia.* O le feagaiga e te osia i le papatisoga o le a noatia ai oe i le ala o le mama ma le fiafia a o e faafouina i vaiaso taitasi e ala i le taumafa i le faamanatuga. A e tausia lau feagaiga o le papatisoga, o le a ese ou foliga, ese le faiga o ou laei, ma ese foi au aga mai le lalolagi. O le tausia o lenei feagaiga o le a mafai ai ona taialaina oe e le Agaga Paia. Tutu i nofoaga paia, ma aua lava tou te faalatalata atu i na siosiomaga o musika, ala o faasalalauga, po o asosi e ono afua ai ona e le maua le mafutaga ma le Agaga Paia.¹¹ Ma a outou tausia a outou feagiaga, o le a tumau lo outou agavaa ma saunia e ulu atu i malumalu paia o le Alii.

O le mea mulimuli, ia mausali i lou taliaina o le Togiola a le Faaola. O le Togiola e mo oe ma au. O se mana e mafai ai ma togiolaina ai. Afai e te le o lagonaina le agavaa e tu i nofoaga paia, aua e te tauaveina lenei avega

o le agasala mo se isi aso. O le olaga lenei, tatou te faia uma lava ni mea sese. Ia e iloa e alofa tele le Faaola ia te oe na Ia faia ai ia e mafai ona suia ma salamo pe afai ua e faia se mea sese. E le manao Satani e te mafaufau faapea e mafai ona e sui.¹² O le a taumafai o ia e faatalitonu oe ua e le toe aoga. O se pepelo lava lena mea. E mafai ona e toe foi mai. E mafai ona e salamo. E mafai ona e mama a'ia'i ma paia ona o le Togiola e le i'u a le Faaola.

Se'i ou faaii atu i se tasi o tala valevalealofo aupito sili ona ou fiafia i ai. Atonu e te fesili, "O le a se faia a se tala valevalealofo ma le tutu i nofoaga paia?" O se tala lea i se tamaitai talavou e igoa ia Repeka.¹³

I le faamatalaga o lenei tala, na poloaiina e Aperaamo lana auuina e sue mai se tamaitai talavou agavaa e fai ma ava a lona atalii o Isaako. E tatau o sē e agavaa mo se faaipoipoga i le feagaiga—amiomama ma mama a'ia'i, ma agavaa. O lea na ia auina atu ai lana auuina i se malaga umi ma le matautia i se nuu e igoa o Arana. O loo manino lava le mafuaaga na alu ai o ia iina—e manaomia e tane paia ni fafine paia e lagolagoina ma fesoasoani ia i latou. Ina ua latalata atu le auuina i le aai o Arana, sa tu o ia i se vaieli e faainu ana kamela ma sa ia tatalo ia taitaiina o ia i



Brasília, Pasila

le tamaitai talavou sa’o, ma ia ona iloina o ia e ala i le ofoina mai o se vai mo ia ma ana kamela e 10. Ia, sa ou tietie i se kamela, ma ua ou iloa ai—e inu vai *tele* ia kamela!

I le Kenese ua tatou faitau ai sa le gata ina alu Repeka i lalo o le vaieli e utu a’e ai vai, ae sa “faataalise”¹⁴ o ia—pe faatopetope ina ia faataunuuina lenei galuega. Ona tuu atu lea e le auuana o asoa ma taulima auro ia Repeka ma fesili pe maua se avanoa i le fale o lona tama sei nofo ai o ia. Ou te talitonu na fesoasoani ia asoa ma taulima auro! Fai mai le mau, “Ona momo’e lea o le teine ma ta’u atu mea uma i le aiga o lona tina.”¹⁵ Masalo o Repeka o se tagata tamoe!

Na faamatala e le auuana i le aiga o Repeka le mafuaaga o lenei malaga umi ma sa ioe Repeka e avea ma ava a Isaako. Sa mana’o le auuana e la te o ma Repeka i le aso na sosoo ai, ae peitai na talosagaina e lona aiga latou te toe nonofo ma ia i se isi 10 aso. Ona latou fesili atu lea ia Repeka po o le a le mea e manao e fai, ma o lana tali o le “O le a ma o.”¹⁶ Pe tali foliga lena tali i le tali a le toafia afe e tali mautinoa atu “O le a ou alu,

ma faia”¹⁷ ina ua fofogaina mai e le perofeta, o Peresitene Thomas S. Monson, le avanoa mo nei alii talavou ma tamaitai talavou e faamisiona ai i le matutua ua tuutuu i lalo?

I le aoaoga la ma le faaiuga o lenei tala valevalealofa. Sa saunia ma agavaa Repeka e osia ma tausia feagaiga paia ma ia avea o se ava a Isaako i le feagaiga. Sa lei tafaatalitali o ia sei saunia. A o lei malaga ese o ia mai lona aiga, sa tuuina atu ia te ia se faamanu-iaga ma ua ou ootia lava i upu, aua sa folafola atu ia te ia o le a avea o ia “ma tina o afe e mano.”¹⁸ Ae o le vaega aupito sili o lenei tala valevalealofa o le taimi ina ua faatoa vaai lava Repeka ia Isaako ma faapena foi ia [Isaako] ia. E le o ta’ua maia lenei mea i le Tusi Paia, ae ou te manatu o le alofa i le tepa muamua! Aua “o le amiomama e fiafia i le mama; [ma] o le malamalama e pipii i le malamalama.”¹⁹ Ina ua alu atu Isaako e faafetaiai i le kariota, sa “alu ifo [Repeka] i le kamela.”²⁰ Ona fai mai lea, “Ma sa alofa o ia ia te ia.”²¹ O i lea ou te ofo ai!

O le tutu ai o Repeka ma Kristina i nofoaga paia e lei faigofie. O le mausali e le faigofie. Sa agi malosi

le matagi, sa mamafa le vai mai le vaieli, ma o le tuua foi o aiga ma olaga ua masani ai, e mautinoa lava sa lei faigofie. Ae sa la faia ni filifiliga sa’o. Sa taialaina i la’ua e le Agaga Paia. Sa amiomama i la’ua; ma sa saunia i la’ua lava e osia ma tausia feagaiga paia. Na tupuga mai le Faaola i le gafa o Repeka. Pe na ia iloina i lena taimi o le a tupu lenei mea? E leai! Pe taua a outou filifiliga i le taimi nei? Ioe!

Tamaitai talavou, o loo faalagolago mai augatupulaga i filifiliga tou te faia, o lo outou mama a’ia’i, ma o outou olaga agavaa. Ia outou mausali. E tele so outou taunuuga o loo lupe. O lo outou taimi lenei! Ou te talitonu faamaoni o se tamaitai talavou amiomama e toatasi, e taitaia e le Agaga, e mafai ona suia le lalolagi!

Ou te molimau atu o loo soifua le Faaola! O le a faatasi o Ia ma outou. O Ia o le a outou mafaia ai. Ma i taimi faigata, “[o le a] si’o faataamilo outou e [Ana] agelu, e sapisapai outou i luga.”²² I le suafa o Iesu Keriso, amene. ■

FAAMATALAGA

1. Mataupu Faavae ma Feagaiga 87:8.
2. Tagai Mosaea 5:15.
3. Mautauave a Tamaitai Talavou, i le *Young Women Personal Progress* (booklet, 2009), 2.
4. Tagai Mosaea 18:9.
5. 2 Nifae 32:5.
6. Tagai Mosaea 18:9.
7. 1 Korinito 3:16.
8. Dallin H. Oaks, “The Great Plan of Happiness,” *Ensign*, Nov. 1993, 74.
9. Moronae 9:9.
10. Mataupu Faavae ma Feagaiga 25:2.
11. Tagai 1 Korinito 6:9; 1 Tesalonia 5:22; 2 Timoteo 2; Mataupu Faavae ma Feagaiga 9:13.
12. Tagai *Mo Le Malosi o le Autalavou* (tamaitusi, 2011), 28–29.
13. Tagai Kenese 24.
14. Kenese 24:20.
15. Kenese 24:28.
16. Kenese 24:58.
17. Tagai 1 Nifae 3:7.
18. Kenese 24:60.
19. Mataupu Faavae ma Feagaiga 88:40.
20. Kenese 24:64.
21. Kenese 24:67.
22. Mataupu Faavae ma Feagaiga 84:88.



Saunia e Peresitene Dieter F. Uchtdorf
Fesoasoani Lua i le Au Peresitene Sili

O Lau Malaga Matagofie i le Aiga

A e faaaogaina ma le fiafia le faafanua na saunia e lou Tama alofa mo lau malaga, o le a taitai atu ai oe i nofoaga paia ma o le a e tulai mai ai i lou gafatia faalelagi.

Ua faamamaluina i tatou i lenei afiafi i le susū mai o Peresitene Thomas S. Monson, lo tatou perofeta pele. Peresitene, o loo matou tatalo pea mo oe.

Ou tuafafine pele, faafetai atu mo le musika ma le afioga tulei. Sa musuia lava ma talafeagai mo le Eseta, le vaitau paia o loo tatou faamanatua i lenei vaiaso.

O se fiafiaga lo tatou mafuta ai ma outou tuafafine talavou pele, faatasi ai ma o outou tina ma taitai lelei. E susulu o outou agaga ma laufofoga fiafia. E moni e silafia outou e le Alii ma o loo silasila mai ma le alofa mai le lagi ia te outou.

Na ou ola a'e i Zwickau, lea na aveva muamua ma Siamani Sasae. Pe a ma le 11 o'u tausaga, sa faateleina suesuega o lo'u tama e tetee i upufai, ma sa lagona e o'u matua e na o le pau le faaiuga e sili ona saogalemu mo lo matou aiga, o le sosola lea i Siamani Sisifo. Sa tonu ai o le fuafuaga e aupito saogalemu o le eseese lea o taimi matou te tuua ai, ma ui atu i ni auala eseese agai i Sisifo, ae tuua a matou meatotino uma.

Talu ai le matua lamatia tele o lo'u

tama, o lea sa ia alu ai i le malaga aupito vave, e ui atu i Perelini. O o'u uso matutua na agai i matu, ma sa sue lava le auala o le tagata ia i sisifo. O lo'u tuafafine—o lē atonu e tai pei o le matutua o le toatele o outou o iinei i le aso—faatasi ai ma Helga Fassmann, lona faiaoga i Tamaitai Talavou, ma nisi sa ō i le nofoaafi na ui atu i Siamani Sisifo. Sa latou totogiina se leoleo faitotoa e tatala se tasi o faitotoa mo i latou, ma ina ua sopoia e le nofoaafi le tuaoi o Siamani Sisifo, sa

latou tulioso i lalo mai le nofoaafi i le saolotoga. Oka so'u faamemelo i lo'u tuafafine i lona lototoa.

O au o le uii, ma sa tonu ai i lo'u tina e ma te savavali e sopoia atumauga o loo va a'i atunuu e lua. Ou te manatua sa ia teuina se ma meaai e faapei o la ma te o i se savaliga sopo po o se tafaoga i atumauga.

Sa ma o i se nofoaafi i le mamao sa ma mafaia, ona ma savavali ai lea mo le tele o itula, seia latalata atu i le tuaoi o Siamani Sisifo. Sa matua maopoopo le vaavaaiga o tuaoi, ae sa i ai se ma faafanua ma sa ma iloaina se taimi ma se nofoaga o le a saogalemu e kolosi ai. Sa mafai ona ou lagonaina le popole o lo'u tina. Sa ia matua matauina ma le toto'a le eria ina ia vaai po o tuliloa mai i ma'ua. O laa taitasi, sa foliga mai ua faasolo ina vaivai ona vae ma ona tulivae. Sa ou fesoasoani ia te ia i le amoina o lana taga mamafa sa tumu i meaai, o pepa taua, ma ata o le aiga a o ma fe'a'ei i luga o le mauga mulimuli. E moni lava, sa manatu o ia, ua ma pasia le tuaoi i le taimi lenei. Ina ua ia lagonaina ua saogalemu, sa ma nonofo ifo loa i lalo ma amata ona 'ai le ma meaai. Mo le taimi muamua i lona aso, ou te talitonu, sa sa'o lelei lana manava.



Sobral, Pasila

Ae o le taimi lena na ma faatoa iloa atu ai le faailoga o le tuaoi. O la lava ma te mamao ese mai ai! E sese le itu o le tuaoi lea ma te tafafao ai. O lea lava ma te i ai i Siamani Sasae!

Sa mafai lava ona tutu mai ni leoleo tuaoi i lena taimi!

Sa toe teu faanatinati ma le popole e lo'u tina le ma meaai, ma sa ma faatopetope agai atu i le mauga i le vave sa ma mafaia. O le taimi la lenei, ma te le'i tutu lava seia oo ina ua ma mautinoa ua ma taunuu i le isi itu o le tuaoi.

E ui lava na eseese auala na ui ai tagata taitoatasi o lo matou aiga ma sa feagai foi ma faigata eseese uma i le ala, ae na iu lava ina matou saogalemu uma. Sa iu ina toefaatasia o se aiga. Se aso ina a matagofie o lena aso!

Tala o Malaga

O le tala sa faatoa ou faamatalaina atu, o se aafiaga ou te manatu ai o se malaga e taua tele. Ua mafai nei ona ou toe tilotilo i tua ma iloa ai le tele



o “malaga” faapena o le olaga sa ou ui ai. E le o malaga uma sa aofia ai se sopoia o atumauga po o ni tuaoi faaupufai; o nisi e matele i le faatoi-laloina o tofotofoga po o le tuputupu ae faaleagaga. Ae, o ni malaga uma lava. Ou te talitonu o olaga uma, o se faaputuga o “tala o malaga” taitasi.

Ou te talitonu ua outou iloa o tu ma aga faaleaganuu taitasi ua tamao-aiga i tala o malaga. Mo se faaitaiga, atonu ua outou masani i le malaga a Dorothy ma lana taifau, o Toto, i le *The Wizard of Oz*. Na tafia ia Dorothy ma Toto i se asiosio ma tuua ai i le Nuu o Oz. O iina, na maua ai e Dorothy se auala sima-lanusamasama iloga o loo makaina ai le ala mo se malaga na iu ina taitai atu ai o ia i lona aiga.

E i ai foi Ebenezer Scrooge o le tala a Charles Dickens, o lana malaga na aveina atu ai e lē mai se nofoaga i sea nofoaga, ae mai lea taimi i lea taimi. O se malaga i totonu o lona lava loto, ma na fesoasoani e malamalama ai o ia ma iloa pe aisea na avea ai o ia ma tagata na oo i ai, ma le mea semanu e oo ia te ia pe a na faaaauai ai pea i lona ala faaloloto po o le manatu faapito ma le lē lotofaafetai.¹

O se tasi o talafatu lautogia maoae e fa o talatusi faa-Saina o le *Malaga i Sisifo*. Na tusia i le seneturi e 16, o loo faamatala matagofie ai le tala i se mea na tupu ma le malaga a se faifeau, o lē na malaga agai atu i le malamalama, faatasi ai ma le fesoasoani a ni tagata agalelei se toafa.

Ma le Bilbo Baggins, si alii laititi faalēamanaia ma e sili lava ia te ia le nofo i le fale e ‘ai lana supo. Ae ina ua tuitui atu lona faitotoa, sa ia manao e mulimuli atu i nofoaga na te lei iloina muamua ma sa ia agai atu ai i le lalolagi, faatasi ma se taulaitu ma se vaega o sa’a e faatino se misiona matautia ae e matua taua lava.²

O Se Tala Faaleatulaulau

Pe tatou te le fiafia ea i nei tala o malaga aua e mafai ai ona tatou vaai ia i tatou lava i tagata o loo malaga? E mafai ona fesoasoani a latou mea e manuia ma mea foi latou te toilalo ai, e sue ai o tatou lava ala i le olaga. O le vitio lea sa tatou matamata ai i ni nai minute ua tea o loo tau mai ai foi se tala matagofie o se malaga. Atonu e faamanatu mai ai foi ia i tatou se malaga e tatau ona tatou masani uma ai—se malaga e tofu i tatou uma ma se vaega taua e faia ai.

O lenei tala na amata i se taimi ua leva lava a o lei taitai ona amata taamilo le lalolagi i lona alāli’o, a o lei taitai ona amata o’o atu le aasa o le la i le vanimonimo malulu, a o lei taitai ona nofoia e ao ma le timu ma meaola tetele ma ninii lo tatou paneta. I le amataga o lenei tala, sa outou nonofo ai i se nofoaga mamao lava.

Tatou te le iloa ni auiliiliga se tele e uiga i le olaga i lena siosiomaga i le muai olaga, ae e i ai ni nai mea ua tatou iloa. Sa faaalua mai e lo tatou Tama Faalelagi pe o ai o Ia, pe o ai i tatou, ma pe o ai foi e mafai ona avea ai i tatou.

I lena muai esetete, sa outou iloa ai ma le matua mautinoa o loo i ai se Atua aua na outou vaai ma faalogo ia te Ia. Sa outou iloina Iesu Keriso, o lē o le a avea ma Tamai Mamoe a le Atua. Sa outou faatuatua ia te Ia. Ma sa outou iloina o lo outou taunuuga e lē o le nonofo ai i le saogalemu o lo outou aiga i le muai olaga. E ui ina sa outou fiafia i lena siosiomaga faava-vau, ae sa outou iloina e manaomia ona outou tuuvaa i se faigamalaga. O le a outou tuua le afioaga o lo outou Tama, ma ui mai i se ufimata o le lotogalo, maua se tino faitino, ma aoao ma o’o i mea e faamoemoe o le a fesoasoani tou te tuputupu ae ai ina ia avea atili e faapei o le Tama i le Lagi



Copenhagen, Tenimaka

ma toe foi atu ai i Lona afoaga.

I lena nofoaga paia, e siosiomia e i latou sa outou iloina ma alolofa i ai, atonu o le fesili sa outou mafaufau i ai o le “Mata o le a ou toe foi saogalemu mai i lo’u aiga faalelagi?”

Sa matuai tele naua mea semanu e le mafai ona faafoeina. O le a faigata le olaga faitino i nisi taimi, tumu i pioga o le auala e le iloa: o ma’i, loto nutimomoia, faalavelave, ma feeseeseaiga.

A aunoa ma se manatua o lou olaga sa i ai—a aunoa ma le manatua ina sa e nofo faatasi ma lou Tama i le Lagi—mata e te matauina Lona siufofoga i le pisapisao ma mea faalavelave o le olaga faitino?

O le malaga o i luma e foliga mai e matua umi tele ma lē mautinoa—e matua tumu i mea matautia.

O le a le faigofie. Ae na outou iloa lava o le a aoga taumafaiga uma.

O lea, sa e tu i le amataga o lau malaga i le faavavau, ma sagisagi atu ma le fiafia e le magagana ma le faamoemoe—ae ou te manatu, e faatasi ai foi ma sina popole ma le mata’u.

I le faaiuga, sa e iloina e faamaoni le Atua—o Lona agalelei o le a manumalo. Sa e i ai i fonotaga maoae

faalelagi ma sa e iloa ai o le a saunia e lou Faaola ma le Togiola, o Iesu Keriso, se ala mo oe e faamama ai mai agasala ma laveai mai le oti faaletino. Sa e faatuatua, a oo i le iuga, o le a e olioli ma sii ae lou leo faatasi ma ‘au o le lagi ma vivii faamanu atu i Lona suafa paia.

Ma o lea la, sa e manava ai i totonu . . .

Ma se laa telē i luma . . .

Ma o lea la ua e i ai iinei!

Ua outou, taitasi, ma tuuvaa atu i lau lava malaga matagofie e toe foi ai i lou aiga faalelagi!

O Lau Faafanua

O lea la ua e i ai nei i le lalolagi, e ono atamai lou fesili ifo ia te oe lava pe o faapefea lau malaga. Pe o e i ai i le ala sa’o? Pe o avea ea oe ma le tagata lea na mamanuina oe ia e i ai ma manao ia avea ai? Pe o e faia ea filifiliga o le a fesoasoani ia te oe e toe foi atu ai i lou Tama i le Lagi?

Na te lei auina mai oe i lenei malaga e tau ina e fealualui solo e lē tapasaina. E finagalo o Ia ia e toe foi atu ia te Ia. Ua la tuuina atu ia te oe ni matua alolofa ma taitai faamaoni o le Ekalesia, ma se faafanua o loo

faamatala atu ai le siosiomaga ma faailoa atu ai tulaga matautia; e ta’u atu ia te oe e le faafanua le mea e mafai ona maua ai le filemu ma le fiafia ma o le a fesoasoani ia te oe e faataatia le alafua e te toe foi atu ai i le aiga.

Ia o fea la e te maua ai lenei faafanua?

- I tusitusiga paia.
- I upu a perofeta ma aposetolo.
- Ma e ala mai i faaaliga patino mai le Agaga Paia.

O le faafanua lenei o le talalelei, o le tala e lelei, ma o le auala fiafia lea o se soo o Keriso. O poloaiga ma le faataitaiga ua tuuina mai e lo tatou Faufautua ma le Faiaoga, o lē e silafia le ala aua o Ia lava o le ala.³

Ioe, o le na ona i ai o se faafanua e matua leai lava se aoga sei vagana ua e suesue i ai—vagana ua e faaaogaina e faafoe ai lau malaga i le olaga. Ou te valaaulia oe ia e faia o se faamuamua maualuga le suesueina ma faaaoga le afoaga a le Atua. Tatala lou loto i le Agaga Paia ina ia mafai ona Ia taitaia oe i lau malaga i le olaga.

E tumu lau faafanua i feau faamalosiua ma faatonuga mai le Tama

Faalelagi ma Lona Alo o Iesu Keriso. O le aso, ou te fia faasoa atu ia te outou ni savali se tolu o le a fesoasoani ia manuia ai lau malaga e toe foi atu i lou aiga faalelagi.

O le savali muamua: “Aua tou te fefefe, aua o A’u le Alii ua Ou faatasi ma outou.”⁴

Ua le na o oe i lenei malaga. Ua silafia oe e lou Tama Faalelagi. Tusa lava pe leai se tasi e lagonaina oe, Na te faafogaina oe. A e fiafia i le amiotonu, e fiafia o Ia faatasi ma oe. A e feagai ma tofotofoga, e mafatia o Ia faatasi ma oe.

O le naunau mai o le Tama Faalelagi ia te oe, e le faalagolago i lou mauoa po o le aulelei po o le maloloina po o lou atamai. E le silasila mai o Ia ia te oe faapei o le vaai a le lalolagi; e silasila mai o Ia i lou tagata moni. E silasila o Ia i lou loto.⁵ Ma e alofa o Ia ia te oe⁶ aua o oe o Lona afafine.

Tuafafine pele, saili atu ia te Ia ma le faamaoni a’ia’i, ona e maua lea o Ia.⁷

Ou te folafola atu ia te outou, e le o tuulafoaiina outou.

Taimi nei, tilotilo nei loa lava i tagata o loo siomia ai oe. O nisi atonu o ou taitai, uo, po o tagata o le aiga. O isi atonu e te lei feiloai lava i ai muamua. Ae ui o lea, o tagata uma lava o siomia ai oe—i lenei sauniga po o se isi lava nofoaga i soo se taimi—sa totoa i le muai olaga. O lena tagata foliga lē amanaia ma faatauvaa—o loo nofo i ou tafatafa atonu o se tasi lena o tagata maoae sa e alofa ma faananau i ai i le lalolagi o agaga. Atonu foi sa avea oe lava ia ma se tagata faataitai?

O se tasi e mafai ona e mautinoaina: o tagata uma e te vaai i ai—tusa lava po o le a le lanu, tapuaiga, talitonuga faaupufai, ituaiga tino, po o foliga—e aiga. O le tamaitai talavou lena e te tilotilo i ai, o le Tama Faalelagi lava e tasi e pei o oe, ma sa ia tuua Lona afioaga agaalofoa e faapei foi ona sa e faia, sa naunau e sau i lenei lalolagi ma ola ai ina ia mafai foi ona toe foi atu ia te Ia i se aso.

Peitai, e ono lagonaina e ia le tuuatoatasi, e faapei foi o oe i nisi taimi.

Atonu e i ai foi nisi taimi e galo ai ia te ia le faamoemoega o lana malaga. Faamolemole faamanatu atu ia te ia, e ala i au upu ma au amioga, e le o tuulafoaiina o ia. Ua tatou i ai iinei e fesoasoani ia te ia.

E mafai ona faigata le olaga, ma e mafai foi ona faamaaaina ai loto e oo ai lava ina foliga mai ua le mafai ona aapa atu i nisi tagata. O nisi atonu e tumu i le ita. O isi atonu e aamu ma faatauemu ia i latou o ē talitonu i se Atua alofa. Peitai, mafaufau i le mea lenei: e ui latou te le manatuaina, ae sa i ai foi le taimi na latou mananao ai e toe foi atu i lo latou Tama i le Lagi.

E le o sou tiutetauave le faaliliu mai o se tagata. O le galuega lena a le Agaga Paia. O lau galuega o le faasoa atu o ou talitonuga ma ia aua le fefe. Ia avea oe o se uo i tagata uma, ae aua lava nei fetuutuunaia ou tulaga faatonuina. Ia e faamaoni i ou talitonuga maumaututu ma le faatuatua. Ia e tu ma le lototoa, aua o oe o se afafine o le Atua, ma o loo oulua tutu faatasi ma Ia!

O le savali lona lua: “Ia outou fealofani, e faapei ona ou alofa atu ia te outou.”⁸

Pe i ai ea se taimi na e mafaufau ai po o le a le gagana na tatou tautatala uma ai a o tatou nonofo ai i le afioaga o le Atua? E malosi lava lo’u masalosalo o le faa-Siamani, e ui lava ou te lagona e leai se isi o mautinoaina. Ae ou te iloa i lo tatou muai olaga, sa tatou muai aoaoina ai, mai le Tamā o o tatou agaga, se gagana sa laugatasia uma ai—o se gagana e i ai le mana e faatoilalo ai papupuni faalelagona, faaletino, ma le faaleagaga.

O lena gagana o le alofa mama o Iesu Keriso.

O le gagana e aupito sili ona mamana i le lalolagi.

O le alofa o Keriso e le o se alofa e faatagāfai. E le o se alofa e molimoli mai i se kata faamanuia. E le o le



Sini, Ausetalia

ituaiga alofa lea e faaviivii mai i musika ma ata tifaga e fiafia i ai tagata.

O lenei alofa e aumaia ai suiga moni o le amio. E mafai ona faatoilalo ai le inoino ma foia ai le lotomatau'a. E mafai ona faamaloloina ai le faatuaupua ma tineia ai le afi mumu o le lototiga.

Sa tatou mauaina a tatou "uluai lesona"⁹ i lenei gagana o le alofa a o avea i tatou o ni agaga i le afioaga o le Atua, ma iinei i le lalolagi ua tatou maua ai avanoa e faatino ai ma atili mauupu ai. E mafai ona e iloaina pe o e aoaina lenei gagana o le alofa e ala i le iloiloaina o mea o loo faaosofia ai ou mafaufauga ma au mea e fai.

A oo ina taulai atu ou mafaufauga faavae pe faapefea ona aoga mea ia te oe, e ono manatu faapito ma papa'u mea o loo faaosofia ai oe. E le o le gagana lena e te manao e aoao.

Ae a oo ina taulai atu ou manatu faavae ma amioga i le auauna atu i le Atua ma isi—pe a e manao moni lava e faamanuia ma sii a'e i latou o loo vagaia oe—ona mafai lea ona aoga le mana o le alofa mama o Keriso i lou loto ma le olaga. O le gagana lena e te manao e aoao.

A oo ina e mauupu i lenei gagana ma faaaoga i au fegalegaleaiga ma isi, o le a latou matauina se mea o ia te oe e ono fāgua ai i latou i se lagona ua leva ona natia e saili atu mo le ala sa'o i le malaga toe foi i lo latou aiga faalelagi. O le mea moni, o le gagana o le alofa o la latou gagana faalenuu moni lena.

O lenei uunaiga loloto ma le mau-sali, o se gagana e oo ifo i le taele o le loto. O se gagana o le malamalama, o se gagana o le auaunaga, o se gagana e siitia ma olioli ai ma faamafanafana ai.

Aoao e faaaoga le gagana laugata-sia o le alofa o Keriso.

Ma o le savali lona tolu: "Ia olioli."¹⁰



O nisi taimi e le lava ai lo tatou onosai i le mea ua tatou i ai i la tatou malaga, e sa'o? Afai ua 12 ou tausaga, atonu e te moomoo ia e 14. A 14, atonu e te moomoo ia e 18. A 18 foi, o nisi taimi atonu e te moomoo maimau e pe ana e toe 12 ina ia mafai ona toe amata atoa.

O le a i ai lava i taimi uma mea e faitio ai—o mea e foliga mai e le o sa'o lava. E mafai ona e faaaluina ou aso e faanoanoa ai, tuulafoaiina, lē malamalama ai, pe lē manaomia foi. Peitai e le o le malaga lena sa e faamoemoe i ai, ma e le o le malaga foi lena sa auina mai oe e le Tama Faalelagi e te faia. Manatua, o oe moni lava o se afafine o le Atua!

O le iloa ai o lenei mea, ou te valaulia ai outou ia savavali ma le maunitino ma le fiafia. Ioe, e i ai patupatu ma ala'alo e oo lava i ni mea e lamatia ai. Ae aua nei taulai atu i na mea.

Vaavaai mo le fiafia ua saunia e lou Tama i le Lagi mo oe i laasaga uma o lau malaga. O le fiafia o le taunuuga lea, ae o le ala foi lena. "O le filemu i le lalolagi, ma le ola e faavavau i le lalolagi a sau" o mea ia ua Ia folafola mai.¹¹ O le mea lena na Ia poloaiina ai i tatou "ia olioli."

A e faaaogaina ma le fiafia le faafanua na saunia e lou Tama alofa mo lau

malaga, o le a e tulai mai i lou gafatia faalelagi. O le a tuputupu ae ma avea ma afafine o le Atua lea sa e moemiti ia avea ai oe.

Tuafafine pele, tamaitai talavou pele o le Ekalesia, uo talavou pele, i le avea ai o se Aposetolo a le Alii, ou te tuuina atu ai ia te outou se faamanuiaga ia e maua lou ala i lenei malaga toe foi i le aiga, ma o le a avea oe o se musumusuga i ē o loo outou faimalaga. O la'u folafolaga foi ma la'u tatalo a e faamamaluina ma ola faamaoni i feagaiga, o mataupu faavae, ma tulaga faatauaaina o le talalelei a Iesu Keriso, i le faaiuga o lau malaga, o le a i ai iina lou Tama Faalelagi. O le a Ia opoina oe, ma o le a iloaina ai loa lava ua e taunuu saogalemu i le aiga. I le suafa o Iesu Keriso, amene. ■

FAAMATALAGA

1. Tagai Charles Dickens, *A Christmas Carol*.
2. Tagai J. R. R. Tolkien, *The Hobbit*.
3. Tagai Ioane 14:6.
4. Mataupu Faavae ma Feagaiga 68:6; tagai foi Isaia 41:10; Ioane 14:18.
5. Tagai 1 Samuēlu 16:7.
6. Tagai 1 Peteru 5:6–7.
7. Tagai Ieremia 29:13.
8. Ioane 15:12; tagai foi Ioane 13:34; Moronaē 7:45–48.
9. Mataupu Faavae ma Feagaiga 138:56.
10. Mataupu Faavae ma Feagaiga 78:18; tagai foi Ioane 16:33; 3 Nifae 1:13.
11. Mataupu Faavae ma Feagaiga 59:23.

O Le Avea o le Konafesi ma Vaega o o Tatou Olaga

Mafaufau e faaaoga nisi o nei gaoioiga ma fesili e fai ma vaega amata mo talanoaga faaleaiga po o mafaufauga loloto faaletagata lava ia.

Onumera o le itulau o loo lisiina atu i lalo e faailoa atu ai le itulau muamua o le lauga.

Mo Tamaiti

- Sa saunoa mai Peresitene Thomas S. Monson e uiga i le taua o le usiusitai ma le auala e aumai



ai i taimi uma e le le usiusitai ia taunuuga (itulau 89). Mafaufau i se taimi na e usitaia ai tulafono faaleaiga. Ae faapefea se taimi na e usitaia ai tulafono a le Atua? O a ni ou lagona i taimi e te usiusitai ai?

- Sa faamatala e Elder M. Russell Ballard o le Korama a Aposetolo e Toasefululua le tala i se teineitiiti na totoina se tamato mai se fatu laitiiti (itulau 18). Faitau pe toe faamatala lenei tala o se aiga ma talanoa e uiga i le mea o aoao mai e uiga i le ala e mafai ai ona avea oe e faapei o le Tama Faalelagi. E mafai ona e setiina se sini e fai se mea se tasi e tuputupu ae ai e latalata atili i le Tama Faalelagi.
- Sa saunoa Elder Enrique R. Falabella o le Fitugafulu e uiga i mea o le a malolosi ai ia aiga (itulau 102). Sa ia aoao mai e faapea o nisi o upu e sili ona taua e faaaoga i lou aiga o le “Ou te alofa ia te oe,” “Faafetai tele lava,” ma le “Faamagalo mai au.” Sa fautua mai Sister Rosemary M. Wixom, o le peresitene aoao o le Peraimeri, ia fai atu e faapea, “Ou te fiafia i mea uma e uiga ia te oe” (itulau 81). Tagai i le mea e tupu pe a e faaaogaina nei upu i lou aiga. Pe faafiafaina ai i latou? O a ni ou lagona?

Mo Le Autalavou

- Sa aoao mai e Peresitene Thomas S. Monson ni mataupu faavae se fa mo le sauniaina e fai galuega faafai-feautalai—e le na o se faifeautalai faamisiona ae faapena foi i le avea ai o se tagata o le Ekalesia (itulau 66). E mafai ona e suesue i lana lauga i le mafaufau i le fesili lenei: O le a se mea e mafai ona ou faia ina ia avea ai o se faifeautalai sili atu i le taimi nei?
- Sa aoao mai Elder Jeffrey R. Holland o le Korama a Aposetolo e Toasefululua e faapea e le afaina le i ai o ni masalosologa ma ni fesili, ae sa ia aoao mai foi: “Ia taofi mau i mea ua uma ona outou iloa ma tutu malolosi seia oo mai se isi malamalama. . . . Ia faamaoni i le faatuatua lena ua ia te oe” (itulau 93). Mafaufau e tusi i lau api talaaga ou talitonuga, moli-mau, ma nisi o aafiaga faaleagaga ua e mauaina. Ia tusi foi i lalo ni fesili o ia te oe ma taofi ina ia mafai ai ona e saili mo ni tali ao e faitauina ia tusitusiga paia ma lenei lomiga.



- E toatele failauga na talanoa e uiga i le usiusitai ma ona faamanuiaga. Mo se faataitaiga, sa aoao mai Peresitene Monson, “O le iloa o le upumoni ma tali i a tatou fesili silisili e oo mai ia i tatou pe a tatou usiusitai i poloaiga a le Atua” (itulau 89). Mafaufau e sailiili lenei lomiga e faamamafa pe tusi i lalo ia faamanuiaga e tele o le usiusitai. O le faailoaina o nei faamanuiaga e mafai ai ona musuia oe e faaauau pea ona ola amiotonu.
- O nisi failauga sa aoao mai e faapea e mafai ona e auauna atu i soo se taimi, ae le na o taimi e fai ai ni galuega auauna atu. “Auauna atu i aso uma,” sa aoao mai ai Brother David L. Beck, o le peresitene aoao o Alii Talavou. “O loo siomia outou e avanoa.” E mafai ona e faitau i le lauga a Brother Beck i nisi o faataitaiga a autalavou o loo auauna atu i isi (itulau 55).

Mo Tagata Matutua

- E toatele failauga na molimau mai ia Iesu Keriso. O le a se mea e mafai ona e aoaoina e uiga i Lona



uiga paia, misiona, ma le galuega mai lauga i itulau 22, 70, 96, 99, ma le 109?

- O le autu o le mataupu aoaoina a le autalavou ia Me o loo faatatau i perofeta ma faaaliga. Afai o loo e faiaoga i le autalavou i le lotu pe i ai foi sau fanau talavou, e mafai ona e talanoaina ma i latou le mataupu aoaoina ma lenei fesili: Aisea e taua ai le faalogo ma mulimuli i perofeta soifua? Mafaufau e suesue lenei lomiga e faailoa ni valoaga ma lapataiga ia, pe afai e usitaia,

o le a fesoasoani e faamanuiaina ai i tatou i taimi faigata.

- O nisi failauga na taulai atu i le faamalolosia o aiga. Mo se faataitaiga, sa aoao mai Elder Richard G. Scott o le Korama a Aposetolo e Toasefululua, “A avea [le Faaola] ma taulaiga tutotonu o lou aiga, o le a i ai le filemu ma le toafimalie” (itulau 29). Saili mo ni auala e avea ai le Faaola ma taulaiga tutotonu o lou aiga ao e suesue i le lauga a Elder Scott faapea ai foi ma lauga o loo i itulau 6, 81, 83, ma le 102. ■



AOAIONA O FANAU MAI TUSITUSIGA PAIA

Mafaufau e suesue i mau nei, ia sa ta’ua pe faasino i ai i le tele o taimi i le konafesi aoao:

1 Samuelu 16:7*
 Mataio 7:24; 28:19
 Ioane 13:34–35; 14:6; 16:33
 Mosaea 3:19*; 18:8–9
 Helamana 5:12*
 3 Nifae 11:7

Moronaē 9:9
 Mataupu Faavae ma Feagaiga
 42:22; 59:23; 64:34; 84:88; 87:8;
 115:6
 Iosefa Samita—Talafaasolopito
 1:17*

* Mau tauloto a le seminare

Faasino Upu o Tala o le Konafesi

O le lisi lea o aafiaga na filifilia mai saunoaga o le konafesi aoao, e mafai ona faaaoga i suesuega a le tagata lava ia, afaifi faaleaiga, ma isi aoaoga. O le numera o loo faasino i le itulau muamua o le lauga.

FAILAUGA

TALA

Elder Neil L. Andersen	(77) O ulugalii i Mozambique ua mulimuli i le Faaola nai lo o a latou uputuu.
Elder M. Russell Ballard	(18) Ua toe faaola e se afafine o se tasi o lana fanau e fitu tausaga se laau o le tamato na mamae.
David L. Beck	(55) Sa faauo e e umia le Perisitua Arona se tamaitai talavou na feagai ma le sauaina. Ua fesoasoani se tiakono i Bangalore, Initia e toe faatoaaga mai alii talavou uma i lana paranesi.
Elder Tad R. Callister	(52) Ua aoao ia George F. Richards e sefulufitu tausaga le matua e uiga i le mana o le perisitua e ala i le tuuina atu o se faamanuiga i lona tina.
Elder D. Todd Christofferson	(109) O le tina o D. Todd Christofferson ua fesoasoani i se tamaitai talavou mafatia ia ausia ona gafatia.
Mary N. Cook	(118) Ua feagai se tamaitai talavou ma le maliu o lona tama ma le taua a lona tina ma le kanesa e ala i le faaogaina o lona faatuatua.
Elder Quentin L. Cook	(32) Ua lagona e se tamaitai Hindu le filemu i le taimi o le fale tatala o le Malumalu o Suva Fiti.
Epikopo Dean M. Davies	(9) O le mafuie i Loma Prieta, Kalefonia, ISA, i le 1989 ua faamautu ai i le mafaufau ma le loto o Dean M. Davies le taua o le fausiaina o o tatou olaga i se faavae mautinoa.
Ann M. Dibb	(115) Ua lagona e se tamaitai talavou lē toaga le Agaga i le taimi o le toluapiga a Tamaitai Talavou.
Peresitene Henry B. Eyring	(62) Ua avea se tamaitiiti matuaoti ma uluai tagata o le Ekalesia i se aai e 130,000 tagata. Ao auauna atu ai i New Mexico, ISA, ma i New England, ISA, na vacaia ai e Henry B. Eyring le aao o le Atua i le fausiaina o Lona malo.
Elder Enrique R. Falabella	(102) Ua foai atu e tagata o le Ekalesia i Arizona, ISA, ia Enrique R. Falabella ma lona faletua ni tupe ina ia mafai ai ona la toe foi atu i Kuatemala ina ua maea le la faaipoipoga i le malumalu.
Elder Jeffrey R. Holland	(93) Ua faamatala e Jeffrey R. Holland se taulealea e 14 tausaga le matua e le manaomia ona ia tau faatoese mo le “na o le talitonu.”
Peresitene Thomas S. Monson	(66) O se alii i Kanata ua suesue ma auai i le Ekalesia ina ua uma ona tuu atu e ni faifeautalalai faamisiona se molimau mamana o le Perofeta o Iosefa Samita. E ala i le faailoa atu o le alofa i ana tusi i vaiaso taitasi, ua aumaia ai e se faifeautalalai faamisiona lona tama i le Ekalesia. (89) Ua aoao e Thomas S. Monson e valu tausaga le matua le usiusitai ina ua ia susunuina se fanua i le afi. Ua teuina e se tagata faamaoni o le Ekalesia i Hanikeri lana sefuluai mo le tele o tausaga seia oo ina mafai ona ia tuu atu i ona faiaoga o aiga.
Elder Richard G. Scott:	(29) Ua manao se faifeautalalai faamisiona e mamanu lona aiga i le lumanai e pei o le aiga o lana peresitene o le misiona.
Peresitene Dieter F. Uchtdorf	(70) Na amata lagiina le Au Paia i Aferika i Sisifo ia viiga ina ua pe le eletise i le latou falelotu. Ua fesoasoani le talalelei i se tamaitai talavou e faatoilalo le pogisa o le sauaina o ia ao tuputupu ae. (125) Ua sosola ese Dieter F. Uchtdorf ma tagata o lona aiga mai Siamani i Sasae.

○ Aoaoga Mo ○ Tatou Taimi

○ lesona a le Perisitua Mekisateko ma le Aualofa i Aso sa lona fa, o le a tuuto atu i “Aoaoga mo o Tatou Taimi.” E mafai ona saunia lesona taitasi mai se lauga se tasi pe sili atu foi na tuuina mai i le konafesi aoao aupito lata mai (tagai i le siata o loo i lalo). E mafai e peresitene o siteki ma itu ona filifili pe o a lauga e tatau ona faaaoaga, a le o lena, e mafai ona latou atofa atu lenei tiutetauave i epikopo ma peresitene o paranesi. E ao i taitai ona faamamafa atu le taua o le suesueina e uso o le Perisitua Mekisateko ma tuafafine o le Aualofa o nei lauga e tasi i Aso Sa foi lava na e tasi.

O i latou e auai atu i lesona o le Aso Sa lona fa ua fautuaina ina ia suesue ma aumai i le vasega le mekasini o le konafesi aupito lata mai.

Fautuaga mo le Sauniaina o se Lesona mai Lauga

Tatalo ina ia faatasi atu le Agaga Paia ma oe a o e suesue ma aoao atu ia lauga. Atonu e i ai taimi e

faaosoosoina ai oe e faa-aoga nisi mea e sauni ai lau lesona, peitai o lauga o le konafesi o mataupu na ua faamaonia mo le aoaoina. O lou tofiga o le fesoasoani lea i isi e aoao ma ola ai i le talalelei, e pei ona aoaoina mai i le konafesi aoao aupito lata mai a le Ekalesia.

Toe iloilo lauga, ma vaavaai mo mataupu ma aoaoga faavae e fetau ma manaoga o tagata o le vasega. Ia vaavaai foi mo tala, o mau e faatatau i ai, ma faamatalaga mai lauga o le a fesoasoani ia te oe, e aoao atu ai nei upumoni.

Fai se oototoga o le auala e te manao e aoao atu ai ia mataupu faavae ma aoaoga faavae. E tatau ona aofia i lau oototoga ni fesili e fesoasoani ai i tagata o le vasega e:

- Vaavaai mo mataupu ma aoaoga faavae o loo i ai i lauga.
- Mafaufau i o latou uiga.
- Fefaasoai le malamalama, manatu, aafiaga, ma molimau.
- Faaaoga nei mataupu faavae ma aoaoga faavae i o latou olaga. ■

○ MASINA E AOA○ ATU AI LESONA

Aperila 2013–
Oketopa 2013

Oketopa 2013–
Aperila 2014

○ ANOMEA MO LESONA O LE ASO SA LONA FA

O lauga na tuuina mai i le konafesi aoao o Aperila 2013*

O lauga na tuuina mai i le konafesi aoao o Oketopa 2013*


* Mo lesona o Aso Sa lona fa o Aperila ma Oketopa, e mafai ona filifili ni lauga mai konafesi talu ai pe mai foi se konafesi sili ona lata mai. O loo maua lauga i le tele o gagana i le conference.lds.org.

Au Peresitene Aoao o Ausilali

AUALOFA



Carole M. Stephens
Fesoasoani Muamua



Linda K. Burton
Peresitene



Linda S. Reeves
Fesoasoani Lua


TAMAITAI TALAVOU



Carol F. McConkie
Fesoasoani Muamua



Bonnie L. Oscarson
Peresitene




Neill F. Marriott
Fesoasoani Lua


PERAIMERI



Jean A. Stevens
Fesoasoani Muamua



Rosemary M. Wixom
Peresitene



Cheryl A. Esplin
Fesoasoani Lua

ALII TALAVOU



Larry M. Gibson
Fesoasoani Muamua



David L. Beck
Peresitene

AOGA SA



David M. McConkie
Fesoasoani Muamua



Russell T. Osguthorpe
Peresitene



Matthew O. Richardson
Fesoasoani Lua

O le Konafesi Aoao Lona 183 ua Aofia ai le Lagolagoina o le Au Peresitene Aoao Fou o Tamaitai Talavou

“Ua ootia o tatou loto,” sa saunoa ai Peresitene Thomas S. Monson i le sauniga faaii o le Konafesi Aoao Faaletausaga Lona 183 i le aso 7 Aperila, 2013, “ma ua faamalolosia a tatou molimau i lenei galuega paia a o tatou lagonaina le Agaga o le Alii. Tau ina ia tatou manatua pea mea na tatou faalogo ai i nei aso e lua ua mavae.”

E silia ma le 100,000 tagata na auai i sauniga e lima o le konafesi aoao i le Maota Autu mo Konafesi i le Aai o Sate Leki, Iuta, ISA, i le aso 6 ma le aso 7 Aperila. E faitau miliona isi i le lalolagi atoa sa maimoaina pe faalogo- logo foi e ala i TV, leitio, ma faasalalauga i le Initoneti. I va o faasalalauga tuusao ma vitio i luga o le initoneti, otio, ma tusiga o le konafesi i le LDS.org, sa mafai ai e tagata o le ekalesia ona maua le konafesi i gagana e 95.

Sa tatalaina e Peresitene Monson le konafesi faaletausaga i le faasilasilaina mai lea o fuafuaga e fausia ni malumalu i Cedar City, Iuta, ISA, ma Rio de Janeiro, Pasila—ua maua ai le aofaiga o malumalu ua faasilasila mai pe o loo fausiaina i le 29. O le taimi nei, e 141 malumalu o loo faaogaina.

Sa faia ni suiga i le taitaiga o le Ekalesia i le taimi o le sauniga o le aoauli o le Aso Toonai. Sa faamalolo uma sui o le au peresitene aoao o Tamaitai Talavou, ma Elder Walter F. González sa faamalolo mai o se uso o le Au Peresitene o Fitugafulu. Sa faamaloloina ai foi Fitugafulu Eria e lima sefulutasi.

Sa lagolagoina ia Elder Ulisses

Soares o le Korama Muamua a Fitugafulu e avea ma uso o le Au Peresitene o Fitugafulu.

Sa lagolagoina e avea ma au peresitene aoao fou o Tamaitai Talavou ia Bonnie Lee Green Oscarson, peresitene; Carol Foley McConkie, fesoasoani muamua; ma Neill Foote Marriott, fesoasoani lua.

Sa lagolagoina ai foi uso fou o le Korama Muamua a Fitugafulu: Elder Edward Dube o Zimbabwe; Elder S. Gifford Nielsen o Sugar Land, Texas, ISA; ma Elder Arnulfo Valenzuela o Queretaro, Mekisiko. Sa lagolagoina ai foi uso fou e toalima o le Korama Lua a Fitugafulu:

O Elaine S. Dalton, o le sa avea ma peresitene aoao o Tamaitai Talavou, na auauna atu i le au peresitene aoao



o Tamaitai Talavou, o se fesoasoani pe ma se peresitene mo tausaga e 11 a o lei faamaloloina ia Aperila.

Tagai i le lisi atoa o le lagolagoina ma le faamaloloina mai valaauga i le itulau e 26.

Sue i talaaga o soifuaga o taitai fou ua valaauina e amata atu i le itulau e 139. ■

E MAFAI ONA E FESOASOANI

Sa uunaia uma e Peresitene Thomas S. Monson ma Elder Russell M. Nelson o le Korama a Aposetolo e Toasefululua ia tagata o le ekalesia ia saofaga atu i le Tupe mo Faifeautalai Lautele. E mai le aso 4 Aperila, 2013, ua oo atu i le 65,634 faifeautalai faamisiona o loo auauna atu, ma le silia i le 20,000 isi ua maua valaauga.

I le sauniga amata o le konafesi aoao, sa saunoa ai Peresitene Monson e faapea, “Ina ia fesoasoani e faatumauina lenei ‘au o

faifeautalai, ma ona o le toatele o o tatou faifeautalai e o mai i tulaga lē mautu lelei, o lea matou te valaaulia ai outou, pe a mafai ai, ia saofagā ma le limafoai i le Tupe Lautele mo Faifeautalai a le Ekalesia.”

E mafai ona foai atu tagata o le ekalesia e faaoga ai le pepa foai o le sefuluai ma tusi le aofaiga latou te finagalo e foai atu i lalo o le Tupe mo Faifeautalai Lautele. E mafai foi ona foai atu tagata o le ekalesia e ala initoneti i le ldsphilanthropies.org.

O Loo Manaomia e le Ekalesia le Tomai ma le Poto Masani o Ulugalii Matutua

Faatasi ai ma le faateleina o le aofaiga o faifeautalai talavou ona o le tuuina i lalo o tausaga o faifeautalai, ua matuai manaomia ai foi ulugalii matutua i misiona i le lalolagi atoa. Faatasi ai ma le faatutuina o misiona fou e 58 talu ai nei, ua manaomia ai nisi ulugalii matutua se toatele e tuuina atu le poto masani faaletaitaiga ma isi lagolago ia e taua i se misiona faamanuuiaina.

I le konafesi o Aperila 2013, sa saunoa ai Peresitene Thomas S. Monson e uiga i le saosasoa o le faateleina o le aofaiga o faifeautalai ma faailoa mai lona alofa mo i latou e naunau e auauna atu i le Alii i le galuega faamisiona (tagai itulau 4, 66). Sa uunaia patino lava e Elder Russell M. Nelson o le Korama a Aposetolo e Toasefululua ia ulugalii matutua ina ia auauna atu. “Outou ulugalii matutua, ia outou

fuafula mo le aso e mafai ai ona outou o i a outou misiona. O le a matou talisapaia sili la outou auaunaga,” sa ia saunoa ai (tagai itulau 45).

I le taimi amata o le konafesi aoao o Oketopa 2012, sa saunoa ai Peresitene Monson: “O le a tatou manaomia ina pea lava pea nisi ulugalii matutua se toatele. A mafai i o outou tulaga o i ai, afai ua tataua ona e litaea, ma mafai i lou soifua maloloina, ou te fautuaina outou ia faaavanoaina outou lava mo le galuega faafaifeautalai faamisiona. O le a tautai maua e le tane ma le ava le olioli tele ao la auauna atu faatasi i fanau a lo tatou Tama” (“Susū Mai Ia ma Maliu Mai i le Konafesi,” *Ensign* po o le *Liahona*, Nov. 2012, 5).

Mo le tele o tausaga, o loo uunaia ai pea e taitai o le Ekalesia ia ulugalii matutua ia auauna atu. Sa saunoa mai

Elder M. Russell Ballard o le Korama a Aposetolo e Toasefululua: “Ua manaomia e misiona i soo se mea nisi ulugalii se toatele. O lo latou tomai ma le poto masani e avea ai i latou ma nisi o faifeautalai aupito silisili ua tatou maua. O o latou tomai faapitoa . . . ua latou mafai ai ona aoaoina ma le mataalia taitai i le lotoifale, faamalositia ma toefaatoaaga mai ia tagata o le ekalesia, ma aumai tagata le lolotu ia Keriso” (“Missionary Couples—Trading Something Good for Something Better,” *Ensign*, June 1988, 9, 11).

O ulugalii agavaa e mananao e auauna atu o ni faifeautalai ua uunaia ia faailoa atu i o latou epikopo po o peresitene o paranesi o latou manaoga e auauna atu. O le umi o auaunaga e mafai ona fetuunai i le va o le 6 ma le 23 masina.

O i latou e i ai ni fesili e uiga i misiona mo tagata matutua e mafai ona valaau atu i le 1-800-453-3860, laina faaopoopo 2-6741 (po o le 1-801-240-6741), po o le imeli SeniorMissionaryServices@ldschurch.org e maua ai se tali i ni fesili patino. ■

O le tomai ma le poto masani o ulugalii matutua e mafai ai ona latou aoaoina taitai i le lotoifale ma faamalositia tagata o le ekalesia faapea ai foi ma le aumaia o tagata le lolotu ia Keriso.



O Se Mea Faigaluega Fou i le Initoneti ua Fesoasoani e Faasao ma Faasoa Atu Atapue ma Manatuaga o Aiga



○ Tagata asiasi i le FamilySearch.org o le a matauina nisi suiga taua na amata ia Aperila 2013. O lanu fou ma susulu, ata mataina, ma le tele o vaaiga fou ua ofo maia se tele o aafiaga i tala atu o sailiiliga. E ui o le a avea pea le saite ma se taunuuga sili mo tagata saili gafa ma le au suesue, ae o vaaiga fou o le a tosina i ai se vaega lautele atu o tagata asiasi.

O vaaiga fou ua fesoasoani e tuleia talafaasolopito o aiga i tala atu o sailiga ma augani atu i se aofia toatele o tusi talafaasolopito amata o aiga o e talavou ma matutua. Ua mafai nei e tagata asiasi ona fausia faatasi o latou gafa o aiga i le initoneti ma faasao ai ma faasoa atu atapue ma tala o aiga—e leai ma se totogi.

Ua toe faaola mai e atapue ma tala o aiga ia augatuaa. O tagata moni o loo i tua o aso e mafai ona aoaoina i tatou i mataupu faavae e pei o le taua o le galue malosi, le auala e taulimaina ai luitau o le olaga, ma le auala e aafia ai o tatou olaga i filifiliga.

O le faafaigofieina ona faamaumau ma faasao ia talafaasolopito o aiga ua fesoasoani ai ia i tatou e fesoootai ma lo tatou tuanai ma fatu ai se talatuu mo le lumanai.

Vaaiiga Fou i le FamilySearch.org

FamilySearch Family Tree. Mo le taimi muamua i le FamilySearch.org, ua mafai nei e tagata taitoatasi ona amata fausia faatasi o latou gafa faaleaiga i luga o le initoneti e mafai ona faasoa atu i isi, e amata i le faaopoopo i ai o faamatalaga e uiga ia i latou lava ona faalatele atu lea i augatupulaga ua mavae.

Vaega autu o le Gafa Faaleaiga:

- E maua i le FamilySearch.org i lalo o le faailoga “Family Tree”.

- Ua muai faaaināina le gafa i le silia ma le 900 miliona igoa taitoatasi na saofaga i ai tagata auai.
- E leai se totogi.
- Ua mafai ai e tagata taitoatasi ona fausia faatasi, puleaina, ma fefaasoaai o latou talafaasolopito o aiga i le initoneti atoa.
- Ua mafai e tagata faaaoga ona mauaina mea atonu ua uma ona mauaina e isi e uiga i o latou talafaasolopito o aiga.
- Ua mafai e tagata faaaoga ona faapipii gofie i ai atapue ma tala ma puna o sootaga faainitoneti.
- Ua mafai e tagata faaaoga ona faasaoina tumau o latou gafa faaleaiga mo augatupulaga o lumanai.
- O le vaega faigofie o le “grab and pull (uu ma toso)” ua mafai ai e tagata faaaoga ona sii i luga ma lalo la latou gafa faaleaiga ma le faigofie.
- O le a faaaoga e tagata auai le faitau piliona o faamaumau maua fua i le FamilySearch.org e fesoasoani ai e faatumu ia lala o loo misi i a latou Gafa Faaleaiga.

Atapue. Ua mafai e tagata faaaoga ona faasaoina atapue e fiafia i ai o augatuaa, faapipii i a latou talaaga ootoo i le FamilySearch Family Tree, ma faasoa atu i ala o faasalalaga faaleagafesootai. Ua silia ma le 200,000 ia atapue ua uma ona saofaga i ai, faasaoina, ma fefaasoaaiina.

Tala. Ua mafai e tagata faaaoga ona tusi ni tala e fiafia i ai e uiga i se tuua patino i le FamilySearch Family Tree. O lenei vaega ua mafai ai e aiga ona ao mai, fefaasoaai, ma faasaoina tumau a latou tala faaleaiga.

Siata Faafesootai o Uo. I le 2012 sa faaitai ai e le FamilySearch se vaega



sa mafai ai e tagata taitoatasi ona vaai ia i latou lava ma o latou tuua i le anotusi o se siata felanulanuai o uo. O lenei vaega ua faaleleia nei ma ua maua i le FamilySearch.org.

Family Tree Wizard. O le a iloa e i latou e fou i le fatuina o gafa faaleaiga le aoga o lenei meafaigaluega. I se sitaile o faatalanoaga faatosina, e fesiligia ai e le meafaigaluega ni fesili e uiga i ou augatuaa o loo soifua ma maliliu, ona fausia lea o na fesoootaiga i le gafa faaleaiga e te amata ai.

Fesoasoaniga Tuusao. O le fiafia i talafaasolopito o aiga ua faatupulaia i le lalolagi atoa. Ua faalauiloa e le FamilySearch se faalapotopotoga i le lalolagi atoa i luga o le initoneti lea e maua ai oloa o fesoasoaniga maua fua ma le lagolagosua patino mo sailiga e ala i telefoni ma talanoaga i le uepi 24 itula i le aso—lea ua maua nei i gagana e 10.

Gagana. O vaega fou uma ia ma auaunaga o le a maua i gagana e 10. O se faaputuga o vitio maua fua o le faapefea-ona-fai ma isi punaoa i le initoneti o loo maua mo vaega uma. Tau na ona kiliki i le faamau Help mo nisi faamatalaga. ■

E Suia e Talafaasolopito o Aiga ia Loto

Saunia e R. Scott Lloyd

Talafou o le Ekalesia

O le tele o nofoaga autu o talafaasolopito o aiga i le lumanai o le a i ai lea i totonu o aiga, sa valoia ai e Elder Bradley D. Foster o le Fitugafulu i se lauga na tuuina atu i le aso 23 o Mati i le soosootauau ai ma le RootsTech 2013 Family History and Technology Conference i le Aai o Sate Leki, Iuta, ISA.

Sa saunoa Elder Foster, o se Faatonusili Pule Lagolago o le Matagaluega o Talafaasolopito o Aiga, e faapea o le a le pine ae iva piliona tagata i le lalolagi ma ua saunia e le Alii ia tekinolosi o le a faafaigofieina ai ona “fusi ma fesooteai faatasi na aiga uma.”

Sa ia faamamafaina le taua o le faia o talafasolopito o aiga, aoaoina o tala o o tatou augatuaa—e le na o

gafa, sueina o igoa ma aso. O maa-faamanatu o soo se tuugamau i le lalolagi o loo i ai se igoa, aso fanau, se tamai laina, ona sosoo lea ma se aso na maliu ai, sa ia fai mai ai. “O lena tamai laina i le va o le aso fanau ma le aso na maliu ai e foliga mai e matuai laitiiti lava ma faaletaua, ae o lo tatou talafaasolopito atoa lava o loo taoto ai i totonu,” sa ia saunoa ai. “O lea ao tele ina tatou taulai atu i le mauaina o na aso, o lo tatou alolofa mo o tatou augatuaa—o le liliuina o o tatou loto i o tatou tama—e sau mai le mauaina o le laina laitiiti lena.”

E aumai faatasi i tatou e le talafaasolopito o aiga ao tatou fefaasoaiina tala ma galulue faatasi, sa ia faamalamalama ai. “O le mea lea, e suia e gafa a tatou siata; e suia e talafaasolopito o aiga o tatou loto.” ■

Maliu Elder Eldred G. Smith i le 106 Tausaga

Saunia e Sarah Jane Weaver

Talafou o le Ekalesia

O Elder Eldred G. Smith, o le sa auauna atu o se Peteriaka o le Ekalesia mai le 1947 i le 1979, na maliu i le aso 4 o Aperila, 2013, i lona aiga. Ua 106 ona tausaga.

E talitonuina o le tamalii aupito matua lea i Iuta, ua umi atu ai le soifua o Elder Smith nai lo se isi lava tagata na avea muamua ma se Pulega Aoao.

Sa asiasi atu Peresitene Thomas S. Monson ia Elder Smith i lona aso fanau, 9 o Ianuari, 2013. “O Elder Smith o sa’u uo lelei lava,” sa saunoa ai Peresitene Monson. “Sa tele ni maila na ma faimalaga faatasi ai. Ou te alofa ma faaaloalo i lenei tamalii.”

Sa valaauina Eldred G. Smith o se Peteriaka i le Ekalesia i le aso 10 Aperila, 1947, e Peresitene Siaosi Alapati Samita le sa avea ma Peresitene o le Ekalesia i lona taimi ma o ia le tagata mulimuli na umia lea tofiga. Sa faamaloloina o ia ma le mamalu i le 1979. O le tofiga lea sa amatalia mai le 1833 lea na valaauina ai Iosefa Samita le Matua, le tuua o le Perofeta o Iosefa Samita. O Elder Smith o le tupulaga lona fa (great-great-grandson) o Ailama, le uso o le Perofeta.

I le taimi o lana auunaga o se Peteriaka o le Ekalesia, sa malaga ai Elder Smith i le tele o eria o le lalolagi ma tuuina atu le tele o faamanuiaga faapeteriaka i nofoaga sa leai ai se peteriaka. I le 1966 sa ia faimalaga ai faatasi ma Elder Monson i Ausetalia ma Samoa e tuuina atu faamanuiaga faapeteriaka i tagata o le ekalesia iina. O se taimi muamua lea sa asia ai e se peteriaka pulefaamalumalu ia



O Peresitene Thomas S. Monson, taumatau, o loo asiasi atu ia Elder Eldred G. Smith, le sa auauna atu o se Peteriaka i le Ekalesia mai le 1947 i le 1979, i lona aso fanau lona 106, i le aso 9 Ianuari, 2013. Sa maliu Elder Smith i le aso 4 Aperila i lona aiga.

Samoa. O aso nei ua i ai lava i le tele o siteki se peteriaka e alala i totonu o le siteki.

Sa saunoa uma ia Peresitene Monson ma Elder M. Russell Ballard o le Korama a Aposetolo e Toasefululua i le falelauasiga o Elder Smith. Sa faitauina e Peresitene Monson se tusi o faamaisega i le aiga mai le Au Peresitene Sili, ona ia faaopoopo atu lea, “Mo se taimi le tumau, ua ma valavala ai ma se uo lelei.”

O Elder Ballard, o ia foi o se tasi o le tupulaga lona fa (great-great-grandson) a Ailama Samita, na saunoa i saofaga a Elder Smith i le faatumauina o le ola o le talafaasolopito o lo latou aiga. “Matou te patipatia o ia o se Peteriaka i le Ekalesia ma se peteriaka o lo matou aiga lautele,” sa

ia saunoa ai. Sa ia faaopoopo mai e faapea na ia iloaina sa lagonaina e Elder Smith o le mea aupito sili na ia ausiaina o lona aiga.

Sa faaiipoipo atu Eldred Smith ia Jeanne Audrey Ness i le 1932; e toalima le la fanau. Ina ua mavae le maliu o Jeanne ia Iuni 1977, sa ia faaiipoipo atu ia Hortense Child; o le taimi lona sa avea ai Hortense ma se fesoasoani i le au peresitene aoao o Tamaitai Talavou. Sa maliu o ia i le 2012.

O loo soifua nei ia atalii e toalua ma afafine e toalua o Elder Smith (o le isi afafine ua maliu), e 22 fanau a fanau (e toalua isi ua maliliu), 63 fanau a fanau a fanau, ma le 22 o fanau a fanau a fanau a fanau. ■

Sa i ai se sao o Gerry Avant i lenei tusiga.



Elder Ulisses Soares

O le Au Peresitene o Fitugafulu

O Elder Ulisses Soares o le na amata auauna atu i le Au Peresitene o Fitugafulu ia Ianuari 2013, ua molimauina mo ia lava le saosaoa o le tuputupu ae o le Ekalesia i le tele o vaega o le lalolagi.

Sa soifua mai Elder Soares i São Paulo, Pasila, ia Oketopa 1958. Sa auai ona matua o Aparecido ma Mercedes Soares i le Ekalesia ina ua lima ona tausaga. Sa latou auai i sauniga i totonu o se potu i luga ae o se fale tao falaoa. E manatua e Elder Soares le fiafia na ia lagonaina o se tamaitiiti e valu tausaga le matua ina ua faatulaga le uluai siteki i Amerika i Saute i São Paulo i le 1966. Sa televave le tuputupu ae o le Ekalesia i Pasila ma e oo atu i le 1990 ua 50 siteki, ae i le 2000 ua silia ma le 200 siteki.

O Elder Soares lea na maua lona faailoga o le tagata malaga i mataupu faatausi tusi ma faaletamaoaga mai le Pontificia Catholic University atoa ai ma se MBA mai le National Institute of Postgraduate Study, sa faigaluega mo se kamupani pa'u taavale faavaomalo ina ua ofo atu se tofiga i le Ekalesia. Sa faafaigaluegaina e le Matagaluega o Tupe, ma na vave lava ona avea o ia ma faatonu sili mo mataupu faaletino i le ofisa o le eria a le Ekalesia i São Paulo, lea sa tuuina atua le lagolagosua i le Au Peresitene o le Eria mo le 10 tausaga. Sa ia auauna atu foi o le uluai peresitene o le Siteki o São Paulo Brazil Cotia.

Sa ia auauna atu o le peresitene o le Misiona a Portugal Porto mai le 2000 i le 2003 ma sa valaauina ai i le Korama Muamua a Fitugafulu ia Aperila 2005. Sa ia auauna atu i Au Peresitene o Eria o Pasila ma Aferika Sautesasae.

“O nei aafiaga ua ou maua ai le vaaiga e iloa ai e mafai lava ona faatuina le Ekalesia i soo se mea o i ai o tatou tagata faatuatua,” sa ia fai mai ai, “atoa ai ma le vaaiga e iloa ai mea e tatau ona ou faia e aoao ai e faaleleia atili la'u auaunaga.”

Sa faaipopo Elder Soares ma lona faletua o Rosana Fernandes Morgado ia Oketopa 1982 i le Malumalu o São Paulo Pasila. O i laua o matua o fanau e toatolu.

Sa auauna atu faamisiona ia Elder Soares i le Misiona a Brazil Rio de Janeiro. Sa avea foi o ia ma se peresitene o le korama a toeaina, fesoasoani i se au epikopo, fautua maualuga, failautusi faapitoa a le siteki, ma se sui lisone mo uelefea. ■



Elder Edward Dube

O Le Fitugafulu

Sa faalauiloa atu le talalelei ia Elder Edward Dube i le 1981 e se pule o le galuega, o le ana le maota sa ia faigaluega ai. Sa tuu atu i ai e le tagata lea se kopi o le Tusi a Mamona. Na te lei faitauina seia oo i le 1983 ae sa matua faagaetia i le molimau a Iosefa Samita e uiga i le asiasiga a Moronae lea na ia tali atu ai i se valaaulia e auai i se sauniga anapogi ma molimau i le falelotu i Kwekwe, Zimbabwe.

Sa lei maua sona toafimalie muamua, i lona lagonaina o loo i ai o ia i se mafutaga faaleauauna i le toatele o i latou sa auai.

“Ae ao latou tuu mai a latou molimau e uiga i le Tusi a Mamona, sa ou lagonaina nisi fesootaiga ma nei tagata,” sa ia ta'ua ai, “ma sa mafai ai ona faasoa atu ou lagona e uiga i le Tusi a Mamona.”

Sa mulimuli ane maua ana lesone ma faifeautalai, sa papatisoina, ma iu ai ina auauna atu i le Misiona a Zimbabwe Harare.

I lona taimi, sa ia aoaoina ai le aiga o Naume Keresiya Salazani, ao 16 ona tausaga i lona taimi. Sa faaauau pea le la faamasaniga ina ua maea lana misiona ma faaipopo ai i Kwekwe i le aso 9 o Tesema, 1989. Ia Me 1992 sa faamauiina ai i laua i le Malumalu o Johannesburg i Aferika i Saute. O i laua o matua o ni afafine se toatolu ma se atalii.

Sa soifua mai ia Me 1962 i le nuu o Chirumanzu, Zimbabwe, ia Clement ma Rosemary Dube, sa maua e Elder Dube se tipiloma i aoaoga mai le Kolisi o Zimbabwe E. D. i le 1992 ona faigaluega ai lea i le Ofisa o Aoga a le Ekalesia, i le faavaeina o seminare ma inisitituti o mataupu faalelotu i Zimbabwe, Zambia, ma Malawi. Ua faamanuiaina lava o ia i le vaaia o le toatele o tamaiti aoga ia sa ia tauaoina i ai a latou tusi faamaonia o faauuga ua auauna atu i tofiga faaleautaitai o le Ekalesia i na atunuu ao tuputupu ae ai le Ekalesia.

Sa auauna atu o ia o se peresitene o le korama a toeaina, peresitene o le paranesi, peresitene o le itu, peresitene o le siteki, fesoasoani i se au peresitene o se misiona, ma, mai le 2009 i le 2012, sa avea ai o ia ma peresitene o le Misiona a Zimbabwe Harare. Ao lei valaauina i lenei valaauga i le Korama Muamua a Fitugafulu sa auauna atu o ia o se Fitugafulu Eria. ■



Elder S. Gifford Nielsen

O Le Fitugafulu

O Elder Stanley Gifford Nielsen e matua faamemelo lava i afeleti, ae o taaloga e le o le mea aupito sili lea ona taua i lona olaga. E talitonu o ia o le paleni o mea e taua tele ma o le talalelei o le faavae lea mo le fiafia i le taimi nei ma i le faavavau.

Sa soifua mai ia Oketopa 1954 ia Harry ma Lois Nielsen, sa ola ae ai o ia i Provo, Iuta, ISA, seia oo ina faauu mai le kolisi. Sa aoaoina o ia e ona matua i se faatulagaga o tulaga faatauaina e faatotonugalemu i le talalelei lea sa taialina ai lona olaga.

Ina ua mavae se mafatiaga mai se manua toatuga lea sa faamutaina ai lana matata o le lakapi i le kolisi, sa saunoa ai Elder Nielsen sa ia aoaoina e faapea o mea aupito sili ona taua i le olaga e le mafai ona aveesea e se manuaga.

Ina ua toe malosi, sa ia taalo i le laina i tua i le National Football League, ae na toe faamutaina lana matata lea ina ua mavae le tolu tausaga. Sa faitioina o ia e tagata lautele. O se taimi o le faasusulu atu o lou tagata ma saili po o le a tonu le mea o ia talitonu i ai. “Sa ou aoaoina e le tuua lava oe e le Faaola, e tusa lava po o le a,” sa fai mai ai Elder Nielsen, lea ua alala nei i Sugar Land, Texas.

Afai e i ai se mau na ia taumafai e mamamu i ai lona olaga, o le Mataio 5:14–16: “O outou o le malamalama o le lalolagi. . . Ia faapea ona pupula atu lo outou malamalama i luma o tagata, ina ia latou iloa la outou amio lelei, latou te vivii atu ai i lo outou Tama o i le lagi.”

“E faaloaloa mai e le Alii Ona aao ia te oe,” sa saunoa ai Elder Nielsen. “E te alofa ia te Ia e ala i le ola ai i le talalelei.”

O le taimi ao aoga i le kolisi sa feiloai ai ia Wendy Olson. Sa la faaiipoipo i le Malumalu o Provo Iuta i le aso 23 Aperila, 1975. Sa maua lona faailoga i mea tau fesootaiga mai le Iunivesite o Polika Iaga. Sa taalo o ia i le laina i tua a le Houston Oilers ma sa avea ma se faatonusili o taaloga mo le televise o le KHOU ao lei valaauina e auauna tumau mo le Ekalesia.

O le tama o se fanau e toano, le susuga ia Elder Nielsen sa auauna atu o se faiaoga o le seminare, peresitene o Alii Talavou, peresitene o le korama a toeaina, epikopo, ma se peresitene o le siteki. Sa auauna atu o ia o se Fitugafulu Eria ae valaauina ai i lona valaauga i le Korama Muamua a Fitugafulu. ■



Elder Arnulfo Valenzuela

O Le Fitugafulu

Sa soifua ae Elder Arnulfo Valenzuela i aai Mamona i Chihuahua, Mekisiko, ma sa faauu mai le aoga a le Ekalesia, le Academia Juárez. Sa ia mauaina i lona tamaitiiti ni avanoa taua sa gafataulimaina ina ia aoaoina e alii ma tamaitai faamaoni o e sa tuuto atu i le talalelei ma le auauna atu i le Alii.

O lesona sa aoaoina i lona nofoaga lauiloa o le Ekalesia i Amerika Latina o le a aoga tele ia te ia ao ia amatalia ona tiute o se uso o le Korama Muamua a Fitugafulu.

“Ua matuai ou lagonaina lava le faamanuiaina i lenei valaauga e auauna atu i le Alii i se tulaga tumau,” sa ia saunoa ai.

Sa soifua mai ia Me 1959 ia Gilberto ma Rosa Valenzuela, ma sa tosina ai lava Arnulfo ao talavou i auaunaga faale-Ekalesia. I le 19 o tausaga na ia taliaina ai se valaauga i le Misiona a Mexico Veracruz. I lona itulagi mataina o Mekisiko sa ia iloaina ai le faamalieina o le galuega o le talalelei i aso taitasi ma le olioli o le valaauliaina o isi ia Keriso.

E lei leva ona maea lana misiona, ae ia asiasi atu i se aiga na ia papatisoina lea na mulimuli ane masii atu i le Aai o Mekisiko. O le tuaoi o le aiga lea, o Pillar Porras, o se tamaitai faamaoni na liliu mai i le Ekalesia. Sa oo ina faauo ia Arnulfo ma Pilar ma e lei pine ae amata ona tafafao faamasani. Sa la faaiipoipo i le Malumalu o Mesa Arizona i le aso 6 Aperila, 1982, i le taimi lea sa leai ai ni malumalu i lo la atunuu moni.

O loo la tausia se fanau e toatolu, ma faaaauu pea ona auauna atu i le Ekalesia ao la vaavaai atu i le avea o Mekisiko ma se malo o malumalu. “Sa lei mafai ona matou mafaufauina o le a i ai ni malumalu se 12 i Mekisiko, faatasi ai ma le isi tasi o loo fausiaina,” sa ia saunoa ai.

I lona taimi sa auauna ai o se epikopo, se fesoasoani i se au peresitene o se siteki ma se misiona, ma se Fitugafulu Eria, sa molimauina ai lava e Elder Valenzuela le tuuto ofoofogia o tagata le mafaitaulia o Mekisiko o loo naunau e tuu atu mea uma latou te maua i le galuega a le Alii.

I le avea ai ma se tasi na faauu mai i le Mexico City’s University of Accounting and Administration Studies, sa faigaluega ai Elder Valenzuela i tofiga faalepulega mo kamupani faavaomalo. ■



Elder Timothy J. Dyches

O Le Fitugafulu

O se tasi o matafaioi e fiafia lava i ai ia Elder Timothy John Dyches i le olaga o le “avea ma se molimau” ma le molimau atu i isi, ma fesoasoani ia i latou ia o mai ia Keriso. Pe o ia auuana atu o se faifeautalai, fegale-galeai i totonu o lona lava aiga, po o le galue i lana matata faalegaluega, na te taliaina lava ma le fiafia lona matafaioi ma le tiutetauave ma taumafai e fesoasoani i isi ia faia lona lava mea e tasi.

Sa soifua mai ia Ianuari 1951 i Murray, Iuta, ISA, ia Milo Fredrick ma Mary Katherine Dyches, ma o le lona lua o le fanau e toafitu. Ao avea o ia ma se tiakono talavou, sa masii atu lona aiga i Elko, Nevada, lea sa ia faaluina ai lona taimi pe a tuua le aoga e faigaluega ai i le faletalavai a lona tama. Ao la galulue soosootauau, sa aoao ai o ia e lona tama i le taua o le galue malosi—o se mea na aoga tele ia te ia o se faifeautalai talavou i le Misiona a Siamani i Saute mai le 1970 i le 1972.

“Sa avea o se misiona faigata, ae o se misiona maoae foi mo au,” sa ia saunoa ai. “Sa ou aoaoina le taua o le galue malosi ma le usiusitai ma le le fiugofie.”

O lona manatu faalegaluega sa faaaauu pea ina ua maea lana misiona, i lana aoga, galuega, ma tofiga faale-Ekalesia. Sa feiloai atu Elder Dyches i lona faletua mo le lumanai, o Jill Dudley, ao aoga ai i le Iunivesite o Polika Iaga. Sa la faaiipoipo i le aso 26 Aperila, 1974, i le Malumalu o Manti Iuta. E toatolu le la fanau.

Sa maua le faailoga o le tagata malaga a Elder Dyches mai le Iunivesite o Polika Iaga i suesuga faaleiunivesite ma faaaauu ai i le mauaina o se faailoga faafomai mai le Washington University Medical School. Sa faaalu lana matata faalegaluega o se fomai tipitipi o taliga, isu, ma le fa’a’i i sana lava ia pisinisi tumaoti i Reno, Nevada.

I le taimi o lona valaauga i le Korama Lua a Fitugafulu, sa auuana atu Elder Dyches i le faalapotopotoga o Alii Talavou o se faufautua i le korama a tiakono. Sa auuana atu o ia i le tele o isi valaauga, e aofia ai le Fitugafulu Eria, peresitene o le Misiona a Oregon Portland, peresitene o le siteki, fesoasoani i se au peresitene o le siteki, fautua maua-luga, tagata fai sauniga o le malumalu, peresitene o le Aoga Sa, ma se failautusi a le uarota. ■



Elder Randy D. Funk

O Le Fitugafulu

O loo soifua pea Elder Randy Dennis Funk o le Korama Lua a Fitugafulu i lona olaga i lenei mataupu faavae autu: “Faalagolago i le Alii ma Lona lelei.”

I le tausaga lona tolu o lana aoga faaloia, sa maitaga ai lona faletua i le la tama lona lua ma sa avea o ia i le taimi lona ma se faatonu lagolago o le iloiloga o tulafono ina ua oo atu le valaau e auuana o se peresitene o le korama a toeaina. “O lea taimi faigata na ou taliaina ai le valaauga ma tatalo i le Tama Faalelagi ia faaatoatoa mai,” sa ia saunoa ai. “Sa ou manaomia se fesoasoani e faataunuu ai lou vala-auga, faamaea ai ma le manuia lau aoga, sue ai se galuega, ma tausi ai lou aiga talavou. O faamanuiaga na ma mauaina sa matuai sili atu nai lo mea sa tatau ona ma mauaina. O le aafiaga sa ou maua ai se faatuatua maoae i le lelei o le Alii ma Ana faamanuiaga i luga o i latou e tauivi ma le naunau-tai e auuana atu ia te Ia.”

Sa soifua mai ia Aokuso 1952 ia C. Dennis ma Rebecca Funk, sa ia ola ae i Manti, Iuta; Madison, Wisconsin; ma Smithfield, Iuta, ISA. Sa ia matauina lona tama ao auuana atu ma le faamaoni i le Ekalesia ma sa aoaoina i le taua o le faataunuina o tiute faaleperisitua.

Ina ua maea ona auuana atu i se misiona i Initonisia, sa ia faaiipoipo atu ai ia Andrea Clyde i le aso 29 Me, 1976, i le Malumalu o Logan Iuta. O i laua o matua o fanau e toaono. Sa maua e Elder Funk se faailoga i mea tau talafaasolopito mai le Iunivesite o le Setete o Iuta ma se faailoga faaloia mai le Iunivesite o Iuta. Sa avea o ia ma se paaga i se ofisa loia tele i Denver, Colorado, ao lumanai ai lana auuunaga tumau i le Ekalesia, lea na amatalia i lona valaauga o se peresitene o le Misiona a India Bangalore i le 2010.

“Ina ua matou o atu i Initia, sa i ai lo matou faatuatua i le fetalaiga a le Faola: ‘O lenei foi, Ou te fai atu ia te outou, soo se tasi tou te auina atu ai lou igoa, e ala i le leo o outou uso, o le Toasefululua, ua fautuaina mai i le ala tatau ma tuuina atu i ai e outou le pule, o le a i ai le mana e tatala ai le faitotoa o lo’u malo i soo se atunuu i soo se mea tou te auina atu i ai i latou’ (MF&F 112:21).” Sa auuana atu Elder Funk o se peresitene o le korama a toeaina, peresitene o Alii Talavou, epikopo, peresitene o le siteki, ma Fitugafulu Eria. ■



Elder Kevin S. Hamilton

O Le Fitugafulu

E faamatalaina e Elder Kevin Scott Hamilton o ia lava o se “fua o se liua ma se laveai.”

O lona soifua mai ia Mati 1955 i Wenatchee, Washington, ISA, na uunaia ai lona tina, o Kay, i ni fesili e faatatau i le uiga o le olaga. Sa ia talanoa atu i se uo AAG, o Richard Pratt, lea sa faafesootaia o ia i faifeautalati.

Sa faamatala mai e lona toalua o Norman Russell Hamilton, o ia sa avea lava ma tagata o le Ekalesia, ae ui i lea sa le toaga talu mai lona talavou. Sa oo ina toe toaga o ia i le Lotu ina ua auai lona toalua.

“O ou matua o ni tagata maoae o le ekalesia o e na fausiaina le faatuatua ua matou mauaina i le asō,” sa saunoa ai Elder Hamilton.

Ae ua ia faamautu mai o lana misiona i Farani ma Suitiselani na suia moni ai lava lona olaga. “Na fatuina ai i totonu ia te au se manaoga musaesae e lei toe alu ese lava,” sa ia saunoa ai.

Sa ia faaipoipo atu i se agaga lalelei, o Claudia Keysor, i le aso 27 Iulai, 1978, i le Malumalu o Los Angeles. Ao tausia ai le la fanau e toaono i Kalefonia, sa la faia ai lo la fale o sina nofoaga autu mo tagata asiati.

“Latou te fai mai e mafai ona outou maua se sauniga filemu i lo outou fale, ma e i ai lava a matou tamai upusii nei i soo se mea i le fale,” sa saunoa ai Sister Hamilton. O se faitotoa i le fale e faatumuina lava i kopi o le Tusi a Mamona, o tamaitusi o le *Mo Le Malosi o le Autalavou*, ma isi tusitusiga a le Ekalesia lea e toe faatumuina e le aunoa pe a ave e tagata asiati.

O le naunautaiga o Elder Hamilton e auuna atu na maua ai ni avanoa e auuna atu ai o se epikopo, peresitene o le siteki, ma le peresitene o le Misiona a Belgium Brussels Netherlands mai le 2003 i le 2006. Ao lumanai ai lona valaauga i le Korama Lua a Fitugafulu, sa avea o ia ma faatonusili o le Aufono o le Va i Fafu a le Ekalesia i Kalefonia i Saute, e aofia ai siteki e 64 i le Eria a Greater Los Angeles Metropolitan.

Faatasi ai ma se faailoga o le tagata malaga mai le Iunivesite o Polika Iaga ma se matuaofaiva mai le Iunivesite o Uosigitone, i mea uma tau pisinisi, na ia faaaluina ai le tele o lana matata faalegaluega i pisinisi tau fesootaiga, lea sa tautua ai mo le tele o taimi o se pule sili. ■



Elder Adrián Ochoa

O Le Fitugafulu

A o auuna ai o se Fitugafulu Eria i Mekisiko, sa faaalu ai e Elder Adrián Ochoa ni nai aso i le aai o Chihuahua e fefautuaai ai ma le peresitene o le siteki ma isi, ona alu loa lea i se vaalele e fuafua mo lona aiga. Ae ina ua saofai i lona nofoa, na ia mauaina se uunaiga faaleagaga malosi tele e faapea e lei uma lana galuega i Chihuahua.

Sa faia e le afaigaluega o le vaalele sauniuniga mulimuli mo le malaga ese atu. “Ae,” sa saunoa ai Elder Ochoa, “Sa ou iloina e tataua ona ou toe alu ese ma lena vaalele.” O lea sa ia tuua ai. O se faasologa o faatalanoaga sosoo na maua ai ni faamatalaga taua ia na foia ai se faafitauli faigata ma faatagaina ai le alualu i luma faaleagaga o se aiga.

Ae sa lei maea ai iina le galuega a Elder Ochoa i Chihuahua. Sa taitai atu foi o ia e le Agaga i se aiga faatauvaa o sona tausoga na te lei toe vaai ai lava mo le tele o tausaga. Sa ia maua ai lona tausoga ua tuulafoaiina—o se tagata le toaga o le ekalesia—ma lona aiga toalaiti o tauivi ma ni luitau faigata o mea tautupe. “Sa ou iloina o le Ekalesia ma Keriso o lo latou vaifofo lena. Sa ou augani atu i lou tausoga e toe foi mai i le lotu,” sa ia saunoa ai.

Sa toe foi mai le tausoga ma toe toaga, ma sa toefuatai se mafutaga faaleaiga taua. Sa mafai ona laveaiina e le Alii ni soifua se tele i Chihuahua ona sa faalogo se tagata se toatasi i uunaiga a le Agaga.

Ua agavaa uma tagata i ia uunaiga faaleagaga e suia ai olaga, sa molimau ai Elder Ochoa, lea sa auuna atu i le tele o valaauga o le Ekalesia ao galue ai i matata tau faasalalauga. Sa pulefaamalumalu o ia i le Misiona a Honduras San Pedro Sula mai le 2004 i le 2007 ma, mai le 2009 seia oo ina ua valaauina i le Korama Lua a Fitugafulu, sa auuna atu ai o se fesoasoani lua i le au peresitene aoao o Alii Talavou.

Sa soifua mai ia Mati 1954 i San Francisco, Kalefonia, ISA, ia Eduardo ma Consuelo Ochoa, ma sa ola ae o ia i Kalefonia ma Mekisiko. Ao avea ma se alii talavou, na valaauina o ia i se misiona faapitoo o le va i fafo i Mekisiko. Sa faamauina o ia ma lona faletua o Nancy Villareal i le Malumalu o Mexico City. O i laua o matua o fanau e toalima. ■



Elder Terence M. Vinson

O Le Fitugafulu

O Elder Terence M. Vinson, lea faatoa valaau i le Korama Lua a Fitugafulu, sa lei faalogo lava i le upu *Mamona* ae lei feiloai ia Kay Anne Carden i le amataga o le vaiata o le 1970 i Sini, Ausetalia. Sa talanoa le paga lea e uiga i mea tau lotu ma mulimuli ane ai oo i se maliliega. O Aso Sa taitasi, sa la auai ai uma i le lotu a Terence ao talavou faapea ai ma se paranesi laitiiti o Le Ekalesia a Iesu Keriso o le Au Paia o Aso e Gata Ai. O le tasi vaega e feiloai i se fale tele ma matagofie, ao le isi i se tamai avanoa laitiiti ma utotogi lea sa mafai ona gafatia e ni nai tagata o le Au Paia o Aso e Gata Ai.

Ae ina ua mavae sina taimi “sa maasiasi le faatusatusaga,” ma na amata ai e Terence ona fai ana lesona a faifeautalai. Sa tele ni ana fesili. Ona oo lea, ao auai i le konafesi a le siteki, sa ia lagonaina se savali i le manino e pei ona tautalagia ai. “Sa manaomia ona ou auai i le Ekalesia ina ia mafai ai ona ou alualu i luma. Sa maua ni tali i fesili uma sa ia te au,” sa ia saunoa ai.

Sa papatisoina o ia i le vaiaso na sosoo ai.

Sa soifua mai Terence Michael Vinson i Sini, Ausetalia, ia Mati 1951 ia John Laurence ma May Therese A. Vinson. O lona tama, le sa galue o se tineimu, na ositaulaga ina ia mafai e lana fanau e toafitu ona a’otauina.

Sa maua se faailoga o le tagata malaga a Elder Vinson i mea tau matematika ma faafuainumera mai le Iunivesite o Sini ma se tipiloma faafaiaoga mai le Kolisi Faafaiaoga o Sini. Sa ia maua foi se tipiloma o le fuafuaina o mea tautupe mai le Iunivesite o Deakin ma se faailoga o le matuaofaiva i mea tautupe faaoga mai le Iunivesite o Macquarie. I le taimi o lana matata faalegaluega, sa lauiloa ai o ia o se faiaoga o le numera, failauga, ma se faufautua mo mea tautupe ma sa puleaina se pisinisi mo le fuafuaina o mea tautupe ma teugatupe.

Sa faaipoipo atu o ia ia Kay Anne, le tamaitai lea na faalauiloina ia te ia le talalelei, i le aso 2 Me, 1974, i Sini, ma sa faamauina le ulugalii i le aso 23 Aokuso, 1975, i le Malumalu o Hamilton Niu Sila; e toaono le la fanau. E lei atoa se tolu tausaga talu lona papatisoga, ae valaauina Elder Vinson e avea ma epikopo. Sa auuuna atu o ia i le tele o au peresitene o siteki ma sa avea o se sui lisone ma se Fitugafulu Eria. ■



Bonnie L. Oscarson

Peresitene Aoa o Tamaitai Talavou

A o auuuna atu ai o se faatina i le Malumalu o Stockholm Sweden mai le 2009 i le 2012, sa vaaia ai e Bonnie Lee Green Oscarson le ositaulaga o le Au Paia o Aso e Gata Ai mai Suetena, Nouei, ma Lativia ina ia tapuai i le maota o le Alii.

Peitai, na te lei iloaina i lena taimi, o lesona sa ia aoaoina mai nei tagata “lotomaulalalo tele, ma matuai tuuto ma faamaoni” o le a fesoasoani e faatonutonu lana taulaiga o le peresitene aoa o Tamaitai Talavou o le Ekalesia.

“Talu ai ua toatele tamaitai talavou ua filifili nei e auuuna atu faamisiona ma auai i le malumalu i se tausaga talavou, ou te faamoemoe ai o lo’u aafiaga i le galue ai i le malumalu o le a fesoasoani ia te au ia malamalama i le aualea e fesoasoani ai ia i latou ia saunia,” sa ia saunoa ai.

Sa soifua mai Bonnie Lee Green ia Oketopa 1950 i le Aai o Sate Leki ia Theo James ma Jean S. Green. Ina ua filifili ona matua la te mananao i le la fanau ina ia lagonaina aafiaga o le Ekalesia i fafo mai o Iuta, o lea na masii atu ai Bonnie e iva tausaga ma lona aiga i Oklahoma, ISA. Sa faaalu foi se taimi o le aiga i Colorado ma Tennessee ao lei masii atu i Misuri, lea sa feiloai ai Bonnie ma Paul Kent Oscarson i Fa Uesi, Misuri, i le lotoa o le malumalu—o se nofoaga taua ona sa i ai uma o la aiga na nonofo i le eria o Fa Uesi.

Ina ua maea le aoga i le Iunivesite o Polika Iaga, sa faaipoipo loa le ulugalii i le aso 9 Tesema, 1969, i le Malumalu o Sate Leki; e toafitu tamaiti na mulimuli ane maua i le aiga.

Sa na o le 25 tausaga le matua o Sister Oscarson ae valaauina lona toalua—o le sa faamisiona i le Misiona a Suetena mai le 1965 i le 1968—e pulefaamalumalu i le Misiona a Sweden Göteborg.

Ina ua toe foi atu le Au Oscarson i le Iunaite Setete, sa latou nonofo i Misuri, New Jersey, Massachusetts, ma Texas, lea sa faigaluega ai Uso Oscarson o se sui peresitene o le faleoloa tele faaleitulagi. E pei foi o ona matua, sa maua e Sister Oscarson le olioli tele i le ola ai i nofoaga e toalaiti tagata o le Ekalesia e i ai.

E faatolu ona avea Sister Oscarson ma peresitene o Tamaitai Talavou, o se faiaoga seminare i le vaveao mo le iva tausaga, ma se faiaoga o Aoaoga Faavae o le Talalelei. ■



Carole F. McConkie

Fesoasoani Muamua i le Au Peresitene Aoao o Tamaitai Talavou

Talu mai lona talavou, sa i ai pea ia Carol Foley McConkie se “faananau mo le malumalu.” O lena taulaiga sa faatonutonuina ai ana amioga i lona olaga atoa.

Sa soifua mai ia Aperila 1952 i Spokane, Uosigitone, ISA, ia Williams ma Joanne W.Foley, sa laitiiti lava Sister McConkie i le taimi na tuitui ai faifeautalai i le faitotoa o le fale o ona matua i Wilmington, Delaware, ma faailoa atu le talalelei i lona aiga. Sa vave ona taliaina e ona matua ia aoaoga e ui i feteenaiga ma le toe faia o ni suiga i o latou olaga.

Ao teineitiiti sa ia malaga ai ma lona aiga i le nofoaafi e sopoia le atunuu ina ia faamau ai i le Malumalu o Manti Iuta.

“O se aafiaga matagofie tele lena,” sa ia saunoa ai. “Ou te manatua le ofu ai i laei papae ma le uiga o lena mea i lou aiga. O se aafiaga ofoofogia, ma e ui sa ou laitiiti, ae ou te manatua lava lagona sa ou mauaina, o vaaiga o laei papae, ma le matagofie o lena aso. O lena aafiaga na ou maua ai le uluai manao e faatumauina le malumalu i lou olaga i taimi uma.”

Sa avea le malumalu ma sulu o le faamoemoe i taimi o tofotofoga ma i le taimi na faia ai lona lava ia aiga.

Sa ia feiloai i lana tane, o Oscar Walter McConkie III, ao la aooga ai i le Iunivesite o le Setete o Arizona. Sa maua e Sister McConkie lona faailoga o le tagata malaga i aoaoga faaPeretania. Sa la faaipoipo i le aso 22 Tesema, 1973, i le Malumalu o Mesa Arizona ma o matua o le fanau e toafitu.

I le taimi o lona valaauga e avea ma fesoasoani muamua i le au peresitene aoao o Tamaitai Talavou, o loo auauna atu Sister McConkie i le fono faatonu aoao o Tamaitai Talavou. Sa ia faaalua le tele o lana auaunaga i le Ekalesia i valaauga e aofia ai le faiaoga ma se peresitene o Tamaitai Talavou i le uarota ma se fesoasoani i le Aualofa i le uarota ma le au peresitene o le Peraimer. Sa ia auauna faatasi ma lona toalua ao pulefaamalumu lona toalua i le Misiona a California San Jose mai le 2005 i le 2008. ■



Neill F. Marriott

Fesoasoani Lua i le Au Peresitene Aoao o Tamaitai Talavou

Eui sa lei auai o ia i le Ekalesia, ae sa aoao lava Neill Foote Marriott ao teine talavou e faapea o loo i ai se Atua ma e alofa o Ia ia te ia.

“O lou tama o se mamanu o lo tatou Tama Faalelagi,” sa saunoa ai le fesoasoani lua fou o le au peresitene aoao o Tamaitai Talavou. “O lona alofa ma le taliaina o isi sa le faatuaaia. Sa o se fesiitaiga faigofie o le alofa ma le faatuaaia sa ou maua mo lou tama faalelalolagi e faatuaaia ma alofa ai i lou Tama Faalelagi.”

Sa soifua mai ia George ma Antonia Foote ia Oketopa 1947 i Alexandria, Louisiana, ISA, ma sa na o ia lava le tuafafine i tuagane laiti e toaono. Ina ua faauu mai le Iunivesite o Southern Methodist i Dallas, Texas, ma se faailoga i aoaoga faaPeretania ma aoga maualuga, sa ia masii atu ai i Cambridge, Massachusetts, lea sa faigaluega ai o se failautusi i le Iunivesite o Harvard. O iina sa ia feiloai ai ia David Cannon Marriott, lea sa fai atu ia te ia, “E i ai ni au uo ou te manao e te feiloai i ai.” Sa vave ona ia aumaia faifeautalai e aoao o ia ma ana uo sa latou potu faatasi.

Ao ia faalogo atu i faifeautalai, sa ia fai atu, “ua faatumuina e lesona ia fasi mea sa misii mai lou malamalama o le talalelei.” Ina ua mavae lona papatisoga ia Me 1970, sa la faauo pea ma David; ina ua mavae se tausaga na amata loa ona la faamasani ma faaipoipo ai ia Iuni 1971 i le Malumalu o Sate Leki.

I le galulue faatasi ai ma lona toalua, sa nofo ai Sister Marriott i le fale faatasi ma le la fanau e toasefulutasi ao tuliloaina e lona toalua se matata faalegaluega i mea tau pisinisi. Sa la galulue i le tele o valaauga a le Ekalesia. Sa ia auauna atu faatasi ma ia ao pulefaamalumu lona toalua i le Misiona a São Paulo Interlagos mai le 2002 i le 2005, ma sa ia auauna atu o se fai sauniga i le Malumalu o Sate Leki, o se peresitene o le Aualofa i le uarota ma le siteki, o se peresitene o Tamaitai Talavou i le uarota, o se faiaoga o Aoaoga Faavae o le Talalelei, ma se tagata tomai faapitoa mo le teuina o meaai.

I lona tofiga fou, ua faamoemoe ai Sister Marriott e faasoa atu le molimau lava lea e tasi na ia mauaina ao tamaitai talavou. E manao o ia ia iloa e tamaitai talavou “e alofa lo latou Tama Faalelagi ia i latou i se alofa aupitua sili ona loloto ma faamamaluina.” ■



“O Au le Tauaso, Ua Ou Vaai Nei,” saunia e Brady Fairbanks

“Ua malii ane [Iesu], ua silafia le tagata ua tauaso talu ina fanau mai. . . .

*“Ua fetalai atu [e Iesu] nei upu, ona feanu ifo lea o ia i le eleele; ona faia lea o le palapala
i le feanuga, ua nini mata o le tauaso i le palapala,*

“Ona faapea atu lea o ia ia te ia, Alu ia, ina mulumulu i le taelega i Selo. . . .

Ona alu lea o ia ua mulumulu, ua toe foi mai, ua vaai. . . .

“Ona tali lea o ia ua faapea mai, . . . O le mea e tasi ua ou iloa, o au le tauaso, ua ou vaai nei” (Ioane 9:1, 6–7, 25).



“Ua tatou ola i se taimi i le talafaasolopito o le lalolagi, ua matua tele naua luitau faigata ae o loo tele ai foi avanoa ma mafuaaga e olioli ai,” na saunoa ai Peresitene Thomas S. Monson i le sauniga faaiu o le Konafesi Aoa Lona 183 Faaletausaga a le Ekalesia. “E moni, e i ai taimi tatou te oo ai i le le fiafia, lototiga, ma mafatiaga i o tatou lava olaga. Peitai, afai tatou te tuu lo tatou faatuatuaga i le Alii, o le a Ia fesoasoani mai i o tatou faigata, tusa lava po o le a.”